







5.8.58







V/V.

A (1)

2  
3x6





*F. Aurelius Brandolinus cognomento Lippus Mathematicæ Corvini Hungaricæ Regis Consiliarius Theologus, Philosophus Historicus Poeta, Orator Præclarissimus Obiit. A.*

*1422.*

*Mus. Bibl. del. et sculp.*

5.8.58



F. AURELII BRANDOLINI

AUGUSTINIANI

COGNOMENTO LIPPI

De Ratione scribendi Libri tres,

*In quibus Vir ille doctissimus plura etiam, quæ  
a Veteribus de arte dicendi tradita  
sunt, vel omissa, breviter, ac di-  
lucide complexus est.*

Prodeunt longe quam antehac emendatiores,  
cum novo Indice

YUSSU REVERENDISSIMI PATRIS

F. NICOLAI ANTONII SCHIAFFINATI

NEAPOLITANI

*E Congregatione S. Joannis ad Carbonariam,*

Totius Augustiniani Ordinis Prioris Generalis.

ACCESSIT

*Ejusdem LIPPI ORATIO laudatissimo  
de Passione Domini habita coram  
Alexandro VI. an. 1496.*



ROMÆ, Typis Rochi Bernabò, MDCCXXXV.

SUPERIORUM LICENTIA.

5.8.58





111

FR. NICOLAUS ANTONIUS  
SCHIAFFINATI  
NEAPOLITANUS

Totius Augustiniani Ordinis Magister

*Bonarum Literarum studiosis ejusdem Ordinis  
salutem dicit.*



QUALIS, quantusque vir  
fuerit acutissimus sane  
Lippus, Aurelius noster  
Brandolinus, ut satis  
abunde testantur, quæ  
hic adscribuntur erudi-  
torum Virorum de illo  
judicia; ita neminem ignorare arbitra-  
mur, qui de inclytis xv. Ævi Scriptori-  
bus aliquando nonnihil audivit. Porro,  
quod ejusdem libros de Ratione scri-  
bendi, ante annos ferme ducentos, cura,  
& industria V. C. Sebastiani Corradi, ex  
inemendatis Sanvitorum Fratrum schedis  
recognitos, & Basileæ primum editos,  
postremo Coloniae recusos, nunc iterum  
vulgandos curavimus; duplici ratione

fecimus . Primo quidem , quia in hac Præfectura , quam plane immeriti gerimus , nostrarum esse partium duximus fatagere , ne præstantissimi Viri opus diutius neglectum jaceret , & à quavis oblivionis injuria , siqua forte ex inopia exemplarium obvenire potuit illud vindicare : quam quidem inopiam & nos ipsi tantam fuisse sensimus , ut vix exemplum unum Colonienſe naſti in hac noſtra Angelica Bibliotheca , coacti fuerimus eodem uti ex benigniſſimo nutu CLEMENTIS XII. Pontificis in nullo non ſummi ad hanc ipſam editionem procurandam . Accessit deinde , quod noſtri Sodalitii homines , præſertim vero juniores aſſidua eorundem librorum lectione ad purioris eloquentiæ , ac dictionis leges conſectandas plurimum juvari poſſe pervidimus ; nam etſi vir ſummus ſat probabiliſſimis cauſſis adductus Rhetoricæ præcepta a ratione dicendi ad ſtylum exercendum egregie traduxerit ; nemo tamen non intelligit , quam brevi intervallo hæc ab invicem diſtent : ac demum ; quod ipſe diſerte profitetur in præſatione ad Fran-

ci-

ciscum \* Picolomineum Cardinalem Senensem ; in hisce libris nihil omissum fuit eorum , quæ ad artem dicendi pro suscepta institutione pertinere existimavit . Verum hæc, ut & nostrum illud studium, quo juxta S. P. AUGUSTINI monitum *non tam præesse vobis cupimus , quam Ep. 134. prodesse* , quum legetis ( quod ut dies , noctesque faciatis magnopere hortamur ) melius , quam ex nostra prædicatione cognoscetis .



\* Qui & postea Pius III. P. M. filius Nanni Tudeschini operis lentissimi , ut Ciacconius inquit , hominis Senensis ; Picolominus tamen dictus, quod cum Pius II. ut purpura, ita & familia donaverit . Erat enim illius ex Laodomia sorore nepos .

**REIMPRIMATUR,**

Si videbitur Reverendissimo Patri sacri  
Palatii Apostolici Magistro .

*N. Baccarius Episcopus Bojanensis  
Vicesgerens.*

---

**REIMPRIMATUR.**

Er. Jo: Benedictus Zuanelli Ordinis Præ-  
dicatorum sacri Palatii Apostolici Ma-  
gister .

ERU-

V

# ERUDITORUM VIRORUM

DE

FR. LIPPO BRANDOLINO

Judicia, ac Testimonia.

*Aldus Manucius Epistola ad Angelum  
Rocca Sacrarum Apostolici Praefectum praefixa  
Lippi Orationi de Passione Domini,  
quam idem Manucius edidit anno 1596.*

**M**agnus sane vir fuit Lippus, magnisque viris acceptus: summis, mediis, infimis apprime carus; praecipueque Pontificibus, Imperatoribus, Regibus, at quibus Regibus? iis nempe, quorum memoria inter Reges omnes Regia erit semper; Literatis omnibus iisque inter summos summis, Hermolao Barbaro, Poggio, & universis sui aevi. Sed, o utinam ea mihi facultas esset, quae animo responderet; non desiderarem certe multa, quae jacent, fortasseque diutius, quam par est, jacebunt....

Orationem de Virtutibus D. N. Jesu Christi, nobis in ejus Passione ostensis, a Lippo Aurelio Brandolino Augustiniano Eremita, ante centum annos, & coram Alexandro VI. Pont. Max., & sacro Senatu, in Sacello Pontificio habitam, atque tantum probatam, ut iterum ac iterum eam repetere Auctor cogeretur, biennium ipsum in sinu a me gestatam, legendam omnibus trado: ne solus tanto bono, saepius a me devorato fruar. Ciceronem Romanae eloquentiae parentem aequat: mater proculdubio superat.....

Lippum lege. Cujus alia quoque penes me sunt: Paradoxa nempe Christiana: & Dialogus de humanae vitae conditione, ac toleranda corporis aegritudine, ad Matthiam Corvinum, Hungariae, & Bohemiae Regem, & ad

# VIII

Beatricem Aragoniam Reginam ejus uxorem : & de  
*Ratione scribendi Libri tres*, de quibus quid senserit  
 Sebastianus Corradus, vit is, cui bonæ literæ pluri-  
 mum, atque plurimum debent, quum in eos, primum a  
 se e tenebris erutos, ad Senatum, Populumque Rēgien-  
 sem ante 1. annos præfaretur, hic adscribere volui  
 ( *Corradi verba habes in sequenti Elogio.* )

*Sebastianus Corradus primus Editor horum  
 librorum Præfatione ad S. P. R. Rhegen-  
 sem anno 1545.*

**Q**Uoniam qui profitetur, præceptaque vel carminis  
 scribendi, vel solutæ orationis formandæ tradit,  
 non multum solet proficere, nisi juvenes, qui au-  
 diunt stylum, præstantissimum dicendi, & scribendi  
 effectorem, & magistrum exerceant: tres Lippi Bran-  
 dolini de *Ratione scribendi* libros nunc primum descri-  
 bendos ( sive ut nunc loquimur imprimendos ) curavi,  
 cum ut in vestro nomine appareant, tum ut juventuti ve-  
 stræ ad stylum exercendum prodesse. Nam vir ille,  
 quanvis pene cæcus, certe Lippus, quum Rethori-  
 cam in Pannonia invitatus a Mathia Rege docuisset,  
 ex ea præcepta collegit, & a ratione dicendi ad ratio-  
 nem scribendi tam doctè transtulit, & tam diligenter  
 accommodavit, ut nihil neque majotum nostrorum, ne-  
 que nostra memoria doctius, aut elegantius in eo genere  
 scriptum esse videatur. Quamobrem, quum Bartholo-  
 mæus, & Ludovicus Sanviti Fratres, juvenes mei, litera-  
 rumque studiosissimi, hosce libros manu Patris, utcu-  
 que scriptos mihi dedissent: dignos ego in quibus corri-  
 gendis aliquid temporis consumerem judicavi. Quod  
 ego vero feci quam diligentissime potui, neque vero  
 sine magno labore; quum multa fuerint mutanda, omnia  
 interpungenda, & dividenda: verba græca, quæ latine,  
 & perperam fuerant scripta, græcè reponenda, & multa  
 multis locis rursus scribenda.

*Mat-*

*Matthæus Bossus Canonicus Regularis Epistola inter familiares 75. ad Hieronymum Campagnolam civem Patavinum. (Hujus Bossi meminit non sine laude Bergomensis in Supplemento ad ann. 1490.)*

**R**em inauditam ecce tibi narrabo, allaturam facile tibi miraculum, & quam soles in omnibus exquirere devotionem egregiam.

Audivimus modo Veronæ prophetantem ex pulpito Lippum Florentinum, Religiosum Eremitani Ordinis hominem, & cum a primis ferme vitæ cunabulis oculorum luminibus captum, tanta cum admiratione omnium Præfectorum Urbis, & Civium eruditorum præsertim, ut id complecti satis neque sermo, neque calamus queat. Hic in primis sanctas Literas amat, easque commodissime tractat, atque dispensat. Hic quicquid Philosophiæ illius veteris, quæ ad nos effluxit a græcis gravis, plena, expolita, & emuncta, nostris nunc in gymnasis nescio quo vitio exolera, sic bene caller; ut de ea, quum aliquid suscipit; non Burleos; non Paulos Venetos; non Strodos, sed Platonem quidem; Aristotelem, Theophrastum audire videamur. Taceo historiarum quarumcumque monumenta; & quicquid in Oratorum singulo, & Poetarum amplum extat, & nobile; quæ ita sibi supeditavit, ut ea omnia non tam visus sit didicisse, quam a puerpilo illa secum credas adolevisse. Lyra, ut licentius loquar, ei cedit Apollo, & Amphion. Claros vero Poetas hoc uno & superat, quod quæ illi cudebant longa pervigilia, atque lucerna, iste extemporaliter format, & canit. In quo æque abundat tam capax, tenax, fecundaque memoria, tanta & ingenii, orisque facilitas, ut quod hac in parte de eo dicendum est, tu vix possis aut admittere animo, aut cogitatione, mi Campagnola, complecti; quam tantam rem & ipse antea neque vidisse me unquam, neque quod legerim memini. Cyrus omnes sui exercitus milites recensuisse scribitur nominatim.

## X

tim: Cyneās Romam missus legatus a Pyrrhō, singulæ Senatus, & Equestris ordinis viris postero quam advenerat die nomina dedisse. Mitridates duarum, & viginti gentium Rex, totidem linguis jura dedisse, singulas pro negociis, & causis affatus; sic, admirabilis extitisse memoriæ Annæus proditur Seneca. Lippus vero noster in cætu multorum Civium nobilissimorum, literarumque cultorum, ipsoque astante Prætorē, quicquid ei ab iis proponi placuit, porrecta illi lyra in quoscunque statim arctavit, & modulatus est numeros. Denique de illustribus quoque, & prisce gloriæ viris, quibus Patria Verona esset, quæsitus ut diceret: Catullum, Cornelium nepotem; Plinium secundum Civitatis dignitatem, Urbisque splendorem luculentissimo prosecutus est carmine, ac splendidissimis pro merito laudibus, nulla intercedente cogitatione, vel hæsitatione cum mora. Sed illud cetera superat, quod omnem Plinianam naturalem historiam, septem & triginta in volumina discretam, per singula cujusque voluminis capita, quamplurimis, & præclarissimis versibus extemporaliter enarravit prætermissa re nulla memorabili, ac cognitu digna. Qui ludus fuit illi domesticus, & frequentissimus olim apud Sixtum Pontificem Max. ejus nominis IV., vel quum festi Sanctorum dies incidissent decorandi, vel quum argumentum aliud impræmeditato illi proponeretur. Tum namque materias omnes ita prosequeretur extempore, ut nihil posthaberet intactum, quod sive ad gratiam, sive ad veritatem pertineret. At vero dum in concione descendit ad mores, & populariter docet ex pulpitis, ea singula, quæ vel extollit, vel in quæ fulgurat, non videntem vidisse utique diceres. Hanc primam tibi Hieronymus isto de homine degustationem pinxi, atque porrexī, quam putavi tibi fore jucundam; & hoc animo etiam, atque consilio, ut illum istuc venientem, quum se ostenderit, possis audire, teque ille.



.XI

*Hermolaus Barbarus Epistola ad eundem Lippum. Edidit hanc Epistolam Aldus Manucius, una cum Lippi Oratione de Passione Domini ad Calcem.*

**C**ognitus mihi pridem fama Lippus, extemporale in homine facundia. Oratione, tam prosa, quam versu clarus. Urbanitas in eo tanta, ut nec lepor in differendo, nec candor in iudicando, desiderari posse videatur &c.

*Martinus Breuerus Nuncupatoria ad Nicolaum de Gerend Episcopum Transylvanensem præmissa Lippi Dialogo de humana vita conditione ab ipso edito anno 1543.*

**E**t si parum compertum habeam, quisnam ille Lippus fuit, nisi quis eum fuisse putet, cujus alicubi Pontanus meminit: Qui rerum antiquarum, ac Latini sermonis impendio studiosus erat, quique quum paupertate simul & cæcitate laboraret, utrumque tamen malum ea æquitate ferebat, ut neutrum sentire videretur. Fuit profecto vir ille quisquis is fuit, mira ingenii, ac iudicii laude præditus, & disciplina exquisitarum literarum eruditissimus, ut qui tanto iudicio, ac prudentia res alioqui graves, & ab opinione hominum, nedum delicatissimis Regum auribus abhorrentes, lumine interpretationis, atque adeo Socratica quadam lenitate, ac lepore ita illustraverit, ut communem veterum in hoc scribendi genere laudem, citra controversiam assecutus esse videatur.

*Gerardus Joannes Vossius de Historicis latinis lib. 3.*

**A**urelius Brandolinus, cognomine Lippus, Florentinus, Ordinis Augustiniani Monachus, floruit ex-

176

## XII

cremis Frederici III. , ac primis Maximiliani I. temporibus. Cum alia multa consignavit, tum historiam eorum, quæ narrantur in veteri Testamento, item multas Sanctorum historias. Mortuus est Romæ anno 1498.

*F. Jacobus Philippus Bergomensis in Supplem. Chronic. ad ann. 1490.*

**L**ippus Aurelius Florentinus, Ordinis Eremitarum Divi Augustini, & ipse a nativitate quasi semper cæcus, vir certe eruditissimus; sed eloquentissimus, ac disertissimus imprimis, poetæque consummatissimus, atque multarum aliarum disciplinarum, maximeque Muliæ sufficienter edoctus hisce temporibus in Hungaria, atque Italia omni clarus extitit. Cujus tanta fuit memoriæ tenacitas, ut Garfia Pirrhi Regis orator haberetur, & ejus fama ubique explendesceret: A Matthia gloriosissimo Pannoniorum Rege ascitus, & Budæ, & Strigoniz multis annis publico munere magna cum laude oratoriam docuit. Inde Florentiam dulcem Patriam reversus, Ordinis habitum induens, haud multo tempore propter ingenii, & eruditionis magnitudinem Sacerdos ordinatus, etiam concionator evasit egregius, atque disertissimus Orator. Nam quum aliquam ingrederetur civitatem prædicaturus, & Ecclesiarum Prælati, atque alii doctissimi viri quadam incredibili voluptate illum audire satagebant. Eratque adeo facilis in eudendis verbis ejusque generis, ut quidquid dicere volebat versus esset &c.

*Fr. Thomas Herrera in Alphabeto Augustiniano.*

**L**ippus Aurelius, sive Aurelius Brandolinus Florentinus, cognomento Lippus, urpote a nativitate quasi semper cæcus, illustri genere natus, circa annos 1494, mirum in modum claruit. Extant ad eum Baptiste Pog-  
gii

## XIII

gii Epistolæ , quibus ejus nomen summa cum gloria celebratur . Edidit pro ingenii sui magnitudine plura commentaria soluta oratione , plurima carmine . . . Romæ ex Peste , ut Bergomensis est Auctor , diem clausit extremum . At non anno 1498 . , ut idem Bergomensis , & Pamphilus tradidere ; Marianus enim de Genazano die 19. Octobris anno 1497. in suo Registro sic habet : Dedimus literas ad M. Gratianum Procuratorem Ordinis , dolentes mortem F. Lippi Aurelii Florentini , qui per adversam valetudinem præfati Procuratoris , ejus loco petorare debebat in Capella D. N. Papæ .

*Louys Morery dans le grand Dictionnaire historique .*

**B**randolini ( Aurelius ou Aurelio ) surnommé , Lippus , de Florence , Religieux de l'Ordre de Saint Augustin , a fleuri dans le x v. siècle . Il Etoit Historien , Orateur , & Poete ; & ses Ouvrages luy acquirent une très-grande reputation .

*Fr. Dominicus Antonius Gandolfus in Dissertatione histor. de ducentis celeberrimis Augustinianis Scriptoribus pag:85.*

**A**urelius Brandolinus Florentinus ; Matthæi q. Georgii filius , cognomento Lippus , utpote a nativitate pene cæcus , Philosophus , & Theologus disertus , Poeta celeberrimus , nec non Musicus , ac Rethoricæ artis peritissimus . . . . Exiit quoque Præceptor Joannis Mariz de Monte , postea Julii III. Summi Pontificis . Justis præconiis decoratur ab omnibus Ordinis Scriptoribus post Bergomensensem , atque Pocciantio in Florentinis pag.21. , Postevino pag.174. , Frisio 146. , Verderio 47. , atque ab Henrico Warthon 118. , aliisque .

## DE LIPPI BRANDOLINI

## SCRIPTIS

**F**Acile quidem plura alia de Lippo nostro probatissimorum Auctorum judicia, ac testimonia afferri potuissent. Verum quum hæc non contineant nisi pura pura ejusdem encomia, de quibus sat magnifice in præcedentibus: ideo consultum est iis omisissis Scriptorum ejus seriem statim apponere, quod certe præstandum fuit temporis ordine minime servato; nec dum enim comperitus nobis esse potuit annorum illius vitæ numerus, quemadmodum multa etiam ignoramus, quæ facere possent, ad ejusdem Lippi historiam contexendam.

Primo ergo inter opera Brandolini, quæ pessimo Scripturarum optimi generis fato vel interciderunt, vel adhuc obscura jacent in Bibliothecis, numerandi sunt libri de Lingua latina, quorum nemo hætenus quidem meminit; sed ab eo fuisse conscriptos, immo & vulgatos clarissime ostendunt ejusdem verba lib. 3. de Ratione scribendi cap. 24. ait enim: *Sed hac quoniam & plura sunt, quam breviter comprehendere possint, & a nobis magna ex parte in libris de lingua latina pertractata, non sunt hic latius repetenda.*

Secundo, Historias omnes veteris Testamenti elegantiori stylo congeffit, ut inquit Bergom. in Supplem., quod sane opus, meo judicio, non differt ab eo, quod memorat Gandolfus hisce verbis: *In sacram Historiam Hebræorum, Roma in Altempsiana.*

Tertio, in omnes Epistolas S. Pauli Commentarii.

Quarto, Historiæ multæ Sanctorum.

Quinto, de Legibus opus pulchrum.

Sexto, Liber, in quo carminibus heroicis vetus, & novum Testamentum complexus est.

Septimo, Orationes permultæ elegantissimæ, præsertim de Passione Domini, coram Alexandro VI. *Omnia ex citato Supplemto, & aliis.*

Octa.

Octavo, de Comparatione Reipublicæ, & Regni  
ad Laurentium Medicem.

Nono, de Laudibus ejusdem Laurentii Medices.  
Utrumque in Laurentiana Medicea ex Gandolfo, qui  
omnium primus videtur hæc prodidisse.

*Opera Brandolini Typis edita, hæc sunt.*

**P**aradoxa Christiana. Basileæ 1545. Romæ 1581.  
De humanæ vitæ conditione, & toleranda corporis  
ægritudine Dialogus. Basileæ 1543.

Carmina in morte Platinæ. Extant in calce operum  
ejusdem Platinæ. Et ex Gandolfo duo Rithmi, vulgo  
*Sonetti*, in laudem Laurentii Medices.

De Ratione scribendi Libri tres. Basileæ primum  
(si fides est Gandolfo) apud Oporinum 1549. Ibidem  
1585. Coloniz 1573.

Ceterum quod spectat ad nostram hanc editionem  
animus sane fuit Poetarum, Oratorum, tum præsertim  
Auctoris ad Herennium, & aliorum sententias, ac ver-  
ba, quæ in hisce libris allegantur per distinctos caracte-  
res efferre, & loca ex quibus desumuntur ad oram descri-  
bere. Sed quoniam præconcepta spe comparandi alterius  
exemplaris, quod esset ad manum, dejecti non fuimus  
nisi post opus a Typographo inchoatum; & aliunde satis  
festinum se hic præbebat ad opus ipsum explendum, con-  
siliū illud nostrum perfici nequaquam potuit; & conti-  
git, ut inviti hac in parte sequeremur Typos Colonien-  
ses: quorum denique tollendis mendis pene innumeris  
(ut nihil dicamus de Ortographiæ inconstantia) etsi tan-  
tum curæ sit impensum, ut conjectura, immo & divina-  
tione usi simus: tamen factum non est, quin hæc pauca,  
& levia superessent stultio Lectori emendanda.

*Pag. 45. lin. 12. & 13. Cæcus, lege cæcus.*

*Pag. 73. lin. 19. similibus, lege similibus.*

*Pag. 125. lin. 17. coporeæ, lege corporeæ.*

*Pag. 141. lin. 13. tabellarius, lege sane melius ta-  
bellariis.*

# XVI

Sequentibus præterea locis desumptis a Lipso ex libris  
ad Herennium sic restituenda erit genuina lectio ex his-  
dem libris.

Pag. 59. lin. 11. cæso cecidissent abiegnæ ad ter-  
ram trabes, *lege* cæsa cecidisset  
abiegnæ ad terram trabes.

Pag. 271. lin. 19. Tatæ, *lege* Tati.

Pag. 279. lin. 11. venit a te, *lege* veniit a te.

Pag. 285. lin. 26. ostondas, *lege* ostentas.



1  
X  
1

# INDEX

## CAPITULUM.

*Præfatio ad Cardinalem Senensem.* pag. 1.

### LIBER PRIMUS.

- I. *Quid sit epistola, & unde dicta sit.* pag. 9.
  - II. *De inventione, & generibus epistolarum.* 10.
  - III. *In quo genere caussarum versetur epistola.* 13.
  - IV. *De rebus ad scribendum necessariis.* 15.
  - V. *De arte, imitatione, exercitatione.* 16.
  - VI. *De partibus inventionis.* 18.
  - VII. *De exordio, & caussarum generibus.* 19.
  - VIII. *De vitiis exordiorum.* 24.
  - IX. *De salutatione, & principio epistolarum.* 27.
  - X. *De narrationum generibus.* 29.
  - XI. *De virtutibus narrationis.* 31.
  - XII. *De divisione.* 34.
  - XIII. *De confirmatione, & confutatione.* 36.
  - XIV. *De argumentis.* 37.
  - XV. *De formis argumentorum.* 38.
  - XVI. *De inductione, & exemplo.* 39.
  - XVII. *De syllogismo, sive ratiocinatione, & enthymemate.* 42.
  - XVIII. *De locis personarum.* 46.
  - XIX. *De locis rerum.* 48.
  - XX. *De argumentis a causis rerum.* 49.
  - XXI.
- b

# I N D E X

XXI.	<i>De argumentis a loco, &amp; tempore.</i>	<u>52.</u>
XXII.	<i>De argumentis ex modo, &amp; facultatibus.</i>	<u>53.</u>
XXIII.	<i>De adjunctis negotio.</i>	<u>55.</u>
XXIV.	<i>De his, quæ negotium consequuntur.</i>	<u>61.</u>
XXV.	<i>De usu argumentorum.</i>	<u>62.</u>
XXVI.	<i>De confutatione.</i>	<u>66.</u>
XXVII.	<i>De dissolutione argumentorum.</i>	<u>71.</u>
XXVIII.	<i>De conclusione.</i>	<u>79.</u>
XXIX.	<i>De enumeratione.</i>	<u>81.</u>
XXX.	<i>De amplificatione.</i>	<u>82.</u>
XXXI.	<i>De miseratione.</i>	<u>85.</u>

## L I B E R S E C U N D U S .

I.	<i>Præfatiuncula.</i>	<u>88.</u>
II.	<i>De constitutionum generibus.</i>	<u>90.</u>
III.	<i>De conjecturali constitutione.</i>	<u>92.</u>
IV.	<i>De legitima constitutione.</i>	<u>97.</u>
V.	<i>De juridicali constitutione absoluta.</i>	<u>100.</u>
VI.	<i>De judiciali assumptiva.</i>	<u>102.</u>
VII.	<i>De causis deliberativis.</i>	<u>107.</u>
VIII.	<i>De causis demonstrativis, Diisque laudandis.</i>	<u>114.</u>
IX.	<i>De laudandis hominibus.</i>	<u>118.</u>
X.	<i>De rebus laudandis.</i>	<u>122.</u>
XI.	<i>De personis.</i>	<u>127.</u>
XII.	<i>De generibus epistolarum.</i>	<u>134.</u>
XIII.	<i>De divino, &amp; morali genere epistolarum.</i>	<u>135.</u>
XIV.		



C A P I T U M

XIV.	<i>De negotioso, sive activo epistolarum genere.</i>	138.
XV.	<i>De epistola narrativa.</i>	139.
XVI.	<i>De laudandi, &amp; vituperandi genere.</i>	142.
XVII.	<i>De gratiarum actione.</i>	148.
XVIII.	<i>De gratulatione.</i>	151.
XIX.	<i>De accusandi genere.</i>	153.
XX.	<i>De injuriarum, vitiorumque accusatione.</i>	157.
XXI.	<i>De excusandi, sive defendendi genere.</i>	162.
XXII.	<i>De certis, &amp; incertis rebus.</i>	167.
XXIII.	<i>De imperandi, &amp; prohibendi genere.</i>	168.
XXIV.	<i>De suadendi, &amp; dissuadendi genere.</i>	170.
XXV.	<i>De commendandi genere.</i>	172.
XXVI.	<i>De petendi, concedendi, &amp; negandi genere.</i>	178.
XXVII.	<i>De consultandi genere.</i>	182.
XXVIII.	<i>De optandi ratione.</i>	187.
XXIX.	<i>De predicendi, interpretandi, opinandique ratione.</i>	191.
XXX.	<i>De consilii dandi ratione.</i>	196.

L I B E R T E R T I U S.

I.	<i>De affectibus.</i>	201.
II.	<i>De amore concitando, &amp; sedando.</i>	204.
III.	<i>De cupiditate incitanda.</i>	210.
	b 2	IV.

# C A P I T U M

IV.	<i>De contemptione pecunie , honorum , gloria , &amp; voluptatis .</i>	214.
V.	<i>De spe , ac desperatione .</i>	218.
VI.	<i>De audacia , &amp; metu .</i>	221.
VII.	<i>De ira .</i>	224.
VIII.	<i>De latitia , &amp; jocis excitandis .</i>	227.
IX.	<i>De latitia reprimenda .</i>	231.
X.	<i>De mœrore , sive agritudine sedanda .</i>	232.
XI.	<i>De consolatione paupertatis .</i>	234.
XII.	<i>De consolatione amissorum bonorum , &amp; patria .</i>	236.
XIII.	<i>De consolatione mortis .</i>	239.
XIV.	<i>De consolatione cecitatis , &amp; totius corporis imbecillitate .</i>	245.
XV.	<i>De inventione in universum .</i>	248.
XVI.	<i>De dispositione .</i>	250.
XVII.	<i>De elocutione in universum , &amp; de scribendi materia .</i>	253.
XVIII.	<i>De figuris orationis .</i>	260.
XIX.	<i>De virtutibus elocutionis .</i>	264.
XX.	<i>De vitiis compositionis .</i>	268.
XXI.	<i>De ornatu .</i>	272.
XXII.	<i>De figuris verborum .</i>	275.
XXIII.	<i>De figuris sententiarum .</i>	287.
XXIV.	<i>De compositione .</i>	293.
XXV.	<i>De numerosa oratione .</i>	297.
	<i>Nuncupatoria auctoris ad Alex. VI. qua illi offert Orationem de Passione Domini .</i>	311.
	<i>Oratio de Passione Domini .</i>	315.
	IN-	

# INDEX

## RERUM, ET VERBORUM.

### A

<b>A</b> Equum, & bonum quid sit.	pag. 101.
Affectuum duplex genus.	201.
Affectuum plures species.	203.
Affectus circa virtutes, & vitia versantur.	204.
Affectus, vehemens quædam commotio.	202.
Affectus a Latinis passionibus etiam appellantur.	<i>ibid.</i>
Affectus nominat Cicero morbos, ægrotudines, & affectiones.	<i>ibid.</i> Ex opinione in animum proficiscuntur. <i>ibid.</i>
Affectus alii bonum, alii malum respiciunt.	<i>ibid.</i>
Amor tum ad studium virtutis, tum ad libidinem applicari potest.	204.
Amor in hominem, vel in rem aliquam quomodo excitandus.	206. & seq.
Quid agendum in principio, ut alliciamus aliquem ad amorem.	204.
Amplificatio ex locis communibus desumitur.	82.
Argumentatio quot modis tractanda.	63. Hi modi accurate explicantur,
Argumentatio non probabilis quæ.	72. Quæ minus probabilis, & quot modis.
Argumentatio vitiosa.	73. Ejus exemplum apud A. Gellium.
Argumentum ratio rei dubiæ faciens fidem.	37. Quid argumentum probabile, quid necessarium.
Argumentorum formæ præcipuæ.	38.
Argumentorum modi varii.	65.
Argumenta eadem non eodem modo semper conficienda.	<i>ibid.</i> Inter modos argumentandi, eligendi qui optimi, & necessarii ad causam.
Argumenta a rebus pluribus modis ducuntur.	48. Horum divisio ex Cicerone, & Quintiliano.
Argumentum a causis rerum quid.	<i>ibid.</i> & seq. Quomodo tractari debet.
Argumentum a loco, & tempore.	<i>ibid.</i> Habet etiam locum in epistolis.
Argumentum ex modo & facultatibus qua ratione ducatur.	52. & seq.
	53. & seq.

# I N D E X

- Argumentum sumptum ab adjunctis negotio . 55. Quot modis . *ibid.*  
 Argumentum quomodo ab his , quæ negotium consequuntur ducatur . 61. & seq.  
 Ars præceptio ad dicendum , vel agendum . 16. Naturæ observatrix , & adiutrix . *ibid.*  
 Ars dissimulanda in epistolis . 17.  
 Artis præceptis utuntur illiterati homines sine arte , & multo pluribus . 273. Homines cum arte nasci multissimum est . *ibid.* Nulla ars docet quo loco disponendæ sint figuræ . 273.  
 Assensio omnis unde sumatur . 64.  
 Assumptiva judicialis quid , & quot partes habeat . 102. Dividitur in purgationem , & deprecationem . *ibid.* Plura de utraque . 102. 103. 104. & seq.  
 Auctoritas quomodo comparanda . 205. & seq.  
 Aulus Gellius notatur . 259. & seq. In admonitione quomodo procedendum . 159. Quid præstandum in objur-  
 gatione . 161.

## B

- B**eneficentiæ partibus uti , quid sit . 110.  
 Beneficii multiplex laudandi ratio . 115. & seq.  
 Bona naturæ , fortunæ , & animi non laudantur , sed eorum optimus usus . 119.  
 Bona aut corporis , aut fortunæ , aut animi . 108. Quæ bona corporis , quæ fortunæ , quæ animi . *ibid.* Mala his omnibus contraria . *ibid.*  
 Bonorum falsæ opiniones . 51.  
 Bonorum ratio quomodo tractanda . 68. Quot in bonis consideranda . 109.  
 Brandolini ætate vitium multorum in defunctis laudandis . 119.  
 Brandolini tempore multi de rebus divinis pro concione ita loquebantur quasi in schola . 103.  
 Brandolini ætate Sanctorum laudationes magno Romæ in usu erant . 118. Vix reverti eadem ætate qui numeros in dicendo , & scribendo sectarentur . 299.  
 Brandolinus ab ineunte ætate in angustis & laboribus versatus . 5. In cæcitate & aliis calamitatibus ejus solatium ex litterarum studio . *ibid.* Præcepta a ratione dicendi ad rationem scribendi transfert . 6.

## RERUM, ET VERBORUM.

## C

- C**alumnie & criminationes in nos, & amicos quot modis in epistola refellantur. 70. & seq.
- Causarum genera Oratori propria tria. 12. Quid unumq. odque eorum. 24. An epistolis conveniat. *ibid.*
- Causarum genera. 88.
- Causarum genera ex Cicerone. 19.
- Causæ aliæ levissima argumenta in principio, aliæ firmissima requirunt. 65. Optimis in fine semper utendum, levioribus in medio. *ibid.*
- Cicero nulli comparandus in eloquentia. 17.
- Ciceronis & Sallustii simplicitatem imitari difficile est. 293.
- Ciceronianus candor, & facilitas imitanda. *ibid.*
- Commendatio petitionem conjunctionem habet. 176. Exordium semper habet, & quare. *ibid.*
- Commendatio varie adhibenda pro diversarum personarum conditione, & qualitate. 172. & seq.
- Commendatio debet esse diversa pro varietate eorum apud quos fit. 173.
- Commendatio iusta esse debet, & honesta, aut necessaria. *ibid.* Accommodata etiam ei, cui fit. *ibid.*
- Commendationis dux partes, laus & suasio, quæ servanda in omni commendatione. 274.
- Comparatione quæ probantur, quid exigant. 64.
- Compositio optima, quæ. 297. In Compositione quæ vitanda. 269.
- Concedere. In difficilibus concedendis quid faciendum, quid in facilibus. 180. Quæ proponenda siquid Amico negabimus. 181.
- Conclusio quid. 79. Eius non eadem ratio in Oratione, & in epistola. *ibid.* Ut pro diversitate epistolarum diversus esse debeat illius usus. 80.
- Confirmatio rerum nostrarum artificiosa comprobatio. 36.
- Confutatio quid, & quotuplex. 36. 56.
- Confutatio aliter in epistola aliter in oratione. 67. Harum Confutationum varia discrimina. *ibid.*
- Confutandi ratio duplex. *ibid.* & seq.
- Conjectura. In Conjectura excusanda rerum ignorantia, & incertitudo. 193. Quomodo procedendum in conjectura exponenda. *ibid.* Ubi nec interpretatio, nec conjectura locum habet, quid agendum. 196.
- Consilium non eodem modo dandum omnibus. *ibid.* & seq.

## I N D E X

- In Consilio dando videndum an sponte, vel requisiti id agamus, & qua in re. *ibid.* Ratio Consilii dandi in re certa. 198. Et in aliis circumstantiis. *ibid.* & *seq.*
- Consilium quomodo communicandum amico non petenti. 182. In Consultatione videndum cur ad amicum scribamus Consilium nostrum certum in re incerta. *ibid.* Quomodo si amicus petat. *ibid.* Qua ratione exponendum Consilium, ut amici iudicium audiamus. 183. Quomodo procedendum, si nostro Consilio exposito, amicum ad suum præbendum incitemus. 184. Quid si amicus alio Consilio utatur, & in nostram sententiam sit adducendus. *ibid.* Cum omnino dubitamus quid facturi simus, quo pacto Consilium ab amico requirendum. 185. & *seq.*
- Consolatio quæ afferri potest in ammissione bonorum, & patriæ. 236. & *seq.* Qua ratione consolandus quis causa mortis. 249. & *seq.* Qua ratione consolari possumus hominem cæcum, vel alio infirmitatis genere laborantem. 245. & *seq.* Quomodo possumus consolari in paupertate. 234. & *seq.*
- Consolatione mæror aut tollendus, aut sedandus. 232. De Consolatione plura scripserunt tum Latini, tum Græci. 233. Brandolini ætate aliqui de Consolatione scripserunt. 235. Quæ cavenda in Consolatione. 239.
- Constitutio judicialis quid; ejus partes. 100. Quando tractatur. *ibid.* Consuetudo quid. *ibid.*
- Constitutio legitima quid. 97. Ad juris-peritos spectat. *ibid.* Quot partes habet. *ibid.* Non cadit in epistolam, neque in orationem tempore Auctoris. *ibid.* Aliqua de illa attinguntur. 97. 98. 99.
- Constitutio conjecturalis, quid. 92. In ea quid agendum accusatori, quid defensori, quid reo. 93. Sex illius partes late. *ibid.* & *seq.*
- Constitutio primo invenienda in aliqua causa. 90. Idem est ac status causæ questio, & caput. *ibid.* Qua ratione invenitur in omni causa. 91. Propria est judicialis generis. 90. Potest etiam cadere in alia genera causarum. *ibid.*
- Cupiditas optinarum rerum est, & etiam honorum, & pecuniæ. 204. Ut excitandus quis ad scientiæ studium, & virtutis cupiditatem. 210. & *seq.*
- Cupido, sive spes futurum bonum respicit. 202.

## D

- D**efendendi & excusandi multiplex ratio. 162. Quo pacto procedendum in defensione. 163. & *seq.*  
De:

## RERUM, ET VERBORUM.

- Defuncti laudantur consolando eos apud quos dicimus. 119.  
 Consolatio petenda ab eorum virtutibus, rebus gestis &c.  
*ibid.*  
 Deliberatio utilis, quæ. 108. Bonorum adeptioem &c. maiorum fugam respicit. 109. In omni deliberatione quæ notanda sunt. 107.  
 Deliberatio de re præfenti, aut futura in conjectura posita est. 108. Ex conjectura tractanda. *ibid.* Quæ præterea consideranda. *ibid.*  
 Deliberatio quid; illius officium duplex. 114  
 Deliberationis causæ unde petendæ. 112. Res quot modis deliberationem faciant. *ibid.* & seq.  
 Demonstrativum genus laude, & vituperatione constat. 114.  
 Deum laudare non potest vox humana. 115. Sed ejus actus laudamus. *ibid.*  
 Dispositio rerum inventarum ordo. 15. & seq.  
 Dissolvere argumenta quid sit. 71. Unde, & quomodo fieri possit. a 71. usque ad 79.  
 Divisio quid. 34. In judicialibus causis quomodo ea utendum. *ibid.* In deliberativis exponendæ partes, de quibus dicturi sumus. *ibid.*  
 Divisione non utendum in epistola. 34. Quomodo utendum si pluribus simul epistolis respondendum sit. 35. Quomodo si quaestionibus satisfaciendum. *ibid.*  
 Dolor sive tristitia præfentis est mali. 203.

## E

- E** Locutio quid. 253. Omnium partium difficillima nobis, & cur. 16.  
 Elocutio diversa apud veteres pro diversitate seculorum. 259. De elocutione multi scripserunt; de inventione extra judicium nemo. 249.  
 Enthymema duabus partibus tantum constat. 45.  
 Enumeratio quid. 81. Quomodo ea utendum in epistola. *ibid.*  
 Varietas adhibenda in ejus usu. *ibid.* Ut varii esse possumus. *ibid.* & seq.  
 Epistolas scribendi causa. 11.  
 Epistolarum duplex genus in Auctoris sententia. *ibid.* & seq.  
 Epistolarum scribendarum finis duplex docere, & movere. 134. Inde epistolarum duo genera. *ibid.* & seq.  
 Epistolarum genus activum quomodo lex. 138. & seq.  
 Epistola divina, & moralis quomodo tractanda. 126. & seq.  
 Ad Epistolas commendatitias, quæ plurimum valeant. 147.  
 1a

# INDEX

- In Epistola narrativa considerandum cur negotium aliquod narretur. 129.
- Epistola narrativa non finienda cum narratione. 140. Ut claudendum hoc epistolarum genus. *ibid.*
- Epistola narrativa familiari nulli liberior, & solutior. *ibid.*
- Exordium in ea adhiberi potest, vel omitti. *ibid.* Summum artificium in ea, nullo artificio uti. 141. Qui debeat esse illius sermo, & contextus. *ibid.*
- Epistolam qui scribit de rebus divinis, & liberalibus disciplinis summam harum cognitionem debet habere. 136.
- Epistolam cum scribimus consideranda persona, & causa. 127. In persona quinque spectanda sunt, & quæ. 128. & seq. Ut scribendum ad pares. 129. Ut ad superiores, & majores natu. *ibid.* & seq. Qua ratione ad præcellentes honore, & dignitate. 130. A persona nostra maxime contrahenda benevolentia si ad incognitos scribimus. 132. Quid præterea cum illis agendum. *ibid.* Quid si nos-ipsi in aliqua dignitate constituti simus. *ibid.* Quid si alieno nomine scribendum. *ibid.*
- Epithetis quæ usus tribuit Pontificibus, & Principibus uti licet. 131.
- Exemplum. *Vide* Inductio.
- Exempla magis movent quam præcepta. 137.
- Exempla recentia facillora nobis existimamus, quam a nostra ætate remota. *ibid.*
- Exercitatio non valet sine præceptis; neque præcepta sine exe citatione. 308. Ea perscitur omnis dicendi, & scribendi facultas. 8.
- Exordium quid. 19. Et non semper utendum in epistola, *ibid.* Ut eo utamur quæ spectanda. *ibid.* & seq.
- Exordio quibus modis aliena benevolentia captari possit. 21. & seq. Quomodo legentes dociles fiant. 22. & seq.
- Exordium vitiosum quod accomodari potest ad plures causas. 24.
- Exordiorum plura vitia. *ibid.* & seq. Simplex & dilucidum esse debet præsertim in epistola. 36.

## F

- F**idei partibus uti quid sit. 110.
- Fides quomodo comparanda apud amicum. 205.
- Figuræ sententiarum tractantur. 287. & seq.
- Figuræ verborum. 275. & seq.
- Figuræ Orationis tres. 260. De iis plura. 261. & seq.
- Fi.



## RERUM, ET VERBORUM.

Figuris Auctor græca, & latina nomina tribuit. 174. Præcepta ad figuras spectantia primum a natura profecta, a quibus primum observata. 273.  
Fortitudo quid; quæ illius partes; utque illis utendum. 111.

## G

**G**enerum dicendi permixtio, & confusio vitanda. 259.  
Gratularum actio laudem requirit. 148. Beneficii re-  
stitutionem semper continet. *ibid.* Beneficium in ea quo-  
modo laudandum. *ibid. & seq.*  
Gratulatio a laudandi ratione non disjuncta. 151. In gratula-  
tione, quæ spectanda, & servanda. *ibid. & seq.* Aliter  
amico, aliter principi, aliter in re magna, aliter in parva  
gratulandum. *ibid.*  
Græca lingua aliquo tempore Romæ magis viguit, quam  
nunc latina. 255.  
Græcis vocabulis uti vitiosum est in oratione populari. 257.

## H

**H**ieronimi dictum in translatione Geneseos. 301.  
Historia ex Quintiliano quid requirat. 305. Ad historias  
scribendas legendi in primis Cæsar, & Sallustius, Livius  
quoque, & Curtius. 306.  
Historias scribentes poetas imitari possunt. 257.  
Historias ex poemate in epithomen redigere vitiosum est.  
307.  
Hortensius Orator quotidie se exercebat in dicendo. 18.

## I

**I**mitatio quid. 17. Optima ad imitationem proponen-  
da. *ibid.*  
Imperantis discrimen a mandante. 170. Ab imperantibus  
tria consideranda. 168. & seq. Exordium vel nullo, vel bre-  
vi utendum ab imperante. *ibid.*  
Incisa in Oratione quæ sint. 305.  
Inductio quid. 37. Eam Cicero plerumque facit per inter-  
rogationes. *ibid.* Varii ea utendi modi. *ibid. & seq.*  
Inscriptio Epistolarum quæ requirit. 27. & seq.  
Insinuatio quando fiat. 23.  
*in*

# I N D E X

Insinuationum pulcherrimarum modi.	197. & seq.
Intelligentia quid. 110. Quæ intelligentia non assequimur admiratione, & veneratione prosequenda.	115.
Interpretatio quid sit, & qua ratione ea utendum.	194.
Ubi locum non habet quid agendum.	196.
Inventio excogitatio eorum, quæ scribere volumus. 15. Non semper refert utrum vera sint quæ inveniuntur, <i>ibid.</i>	
Inventionis partes sex. 18. Epistola non omnes recipit, pauciores quam duas non habet.	<i>ibid.</i>
Jocari per epistolam cum principibus quando liceat. 231. & seq.	
Joci non tam arte quam natura discuntur & perficiuntur. 230. Qui natura repugnante joci vult, comparatur asello apud Æsopum. <i>ibid.</i> Duo genera jocandi narratio, & imitatio.	228.
Jocum multis modis verba excitant.	229.
Jocus vel in rebus, vel in verbis. 228. Quot modis jocus excietur.	<i>ibid.</i>
Judicatum quid.	101.
Judiciale genus causæ non frequenter in usum scribendi venit.	89.
Justitiæ partes quædam nostra ætate laudantur, quas veteres non commemorabant.	122.

# L

<b>L</b> Audabile quid, & unde sumendum.	112.
Laudandi cum modestia qui coram laudantur.	118.
Laudantur res vel a natura, vel ab usu earum. 123. Quando laudantur a natura, quando ab usu. <i>ibid.</i> Unde laudandæ Urbes. 124. Unde artetacta. <i>ibid.</i> Quomodo laudandæ artes, scientiæ, & virtutes.	<i>ibid.</i> & seq.
Laudes tribuendæ unicuique pro conditione, & dignitate.	122.
Laus sumitur aut a personis, aut a rebus.	114.
Laus omnis continet vel admirationem, vel testificationem. 144. Sed non aperte proponenda. <i>ibid.</i> Cum laudamus considerandum quid, & qua de causa laudemus. 142. In laudatione cavenda in primis ostentatio. 147. Quomodo per insinuationem ingrediendum laudes ejus ad quem scribimus. <i>ibid.</i> Dicere ex officio nos aliquem laudare, vel vituperare non probat Lippus. <i>ibid.</i> tam in laude, quam in vituperatione, crebris digressionibus, & amplificationibus utendum.	<i>ibid.</i>
	Lex

## RERUM, ET VERBORUM.

Lex quid.	100.
Latitia immodica, qua ratione reprimenda. 231. Qua arte est excitanda.	227.
Libri de lingua latina ab Auctore scripti.	296.
Licitum quot modis dicitur.	100.
Loci communes qui ad omnes causas accomodari possunt. 82. Plures enu merantur, & exponuntur. <i>ibid.</i> & <i>seq.</i> Quid in his omniſſum a Cicerone.	83.
Locus communis a conjecturis quis.	95.
Locus communis a rumoribus.	96.
Locus ſedes, ex qua argumentum ducitur. <i>ibid.</i> Reperitur in rebus, & personis.	<i>ibid.</i>

## M

M Embra in oratione quæ.	305.
Memoria quid.	110.
Mentiri. Nihil nos cogere debet cuiquam de ipſo mentiri. 130.	
Metus ſive timor ad malum futurum refertur. 203. In metu repellendo, & in audacia provocanda quibus artibus utendum.	221. & <i>seq.</i>
Miſericordia deſinitur. 85. Qua ratione in aliis commoven da.	<i>ibid.</i> & <i>seq.</i>
Modestia quid; ejus partes, & earum uſus.	111.

## N

N Arratio ex Cicerone quid. 29. Duo eſſe illius genera arbitratuſ Lippus; & de utroque illo genere plura. <i>ibid.</i> & <i>seq.</i>	
Narratio in deliberativis cauſis non ſemper neceſſaria. 34.	
Naturam vel propriam, vel communem deſignare difficile eſt. 46. Quæ in ea conſiderantur.	<i>ibid.</i>
Naturæ ordo quæ comprehendit.	64.
Naturæ juſ quid.	100.
Neceſſitudinis cauſæ quæ.	146.
Nomen ejus ad quem ſcribimus an quandoque exprimendum initio epiſtolæ.	28.
Nominare quemquam in numero multitudinis quiſque ille ſit non debemus. 131. De nobis ut de pluribus loqui quando liceat.	<i>ibid.</i>
	Nu-

# I N D E X

Numeris qui omnium primi orationem astrinxere. 299.  
Numeros qui in oratione sectantur Lippi ætate vix re-  
perti. *ibid.* Ad assequendum numerum in oratione habenda organi cantu utebatur C. Gracchus. *ibid.*

## O

**O** Pinione hominum quæ constant. 64.  
Optandi sola causa raro scribitur epistola. 189. Quæ servanda si hoc fieri contingat. *ibid.* & seq. Quid agendum quum aliquid alicui optamus. 187. & seq.  
Oratio accomodanda Auditorum intelligentiæ. 257.  
Oratio non modo debet intelligi, sed debet non posse non intelligi. 270.  
Oratio in animos lectorum, & auditorum ut sol in oculis incurrere debet. 271.  
Oratio crescere debet in verbis, & sententiis. 296.  
Oratio figuris quasi luminibus illustranda. 293.  
Oratio præferat naturalem candorem, & romanam simplicitatem. 254.  
Oratio sponte fluere debet. *ibid.* Vitandus frequens concursus earundem vocalium & consonantium. 271. Similiter cadentia crebra eam vitant. 272. Vitium ejus contextus desinere in numerum poeticum. *ibid.*  
Orationis maximum vitium a vulgari consuetudine recedere. 270.  
Ordo in argumentis collocandis servandus. 65.

## P

**P** Actum quid sit. 101.  
Petitio in narratione exponenda, & quo pacto. 179.  
Curandum ut uno verbo plura magis quam unum pluribus petamus. *ibid.* Exponendæ rationes cur fieri possit, & debeat id quod petimus. *ibid.* Unde hujusmodi rationes ducendæ, & quid ulterius præstandum. *ibid.*  
Personarum attributa quæ. 46.  
Pietatis partibus uti quid sit. 100.  
Plinii nepotis eloquentia non imitanda. 17.  
Poemata a principio Oratores futuri non imbibant. 255.  
Poetarum, & Oratorum linguæ diversæ. 154.  
Poetæ in oratione esse voluerunt Apulejus, Petronius Arbitr, & Mariannus Capella. 256.  
Poetis non danda opera statim post grammaticæ studium. *ibid.*  
Pro-

## RERUM, ET VERBORUM.

Providentia quid.	110.
Prudentia quid, & ejus partes. 109. Quid sit uti prudentiæ partibus.	110.
Pueris litterarum initia non sumenda a poetis, & græca lingua.	256.

## Q

Quæstiones difficiliore Philosophiæ, & Theologiæ non tractandæ apud populum.	258.
Quæstionibus, & interrogationibus in epistola quomodo satisfaciendum.	35.

## R

Ratiocinatio quando altera, vel utraque probatione carente potest. 44. potest esse sine ulla probatione. 45.	
Ratio vana quæ. 82. Quid infirma, & quotuplex. <i>ib. d. &amp; seq.</i>	
Rationes, & rationum confirmationes, ut disponendæ. 296.	
Rectum unde sumendum. 109. Aliquando sine laude est, laus sine recto nunquam.	<i>ibid.</i>
Res quæ in consultationem venit qualis esse debet. 107.	

## S

Salutatio. Nomen scribentis in principio epistolæ non apponere non congruit antiquis. 27. Id tamen relinquendum cuiusque arbitrio, & cur.	<i>ibid.</i>
Sancti laudandi a divinis, & humanis partibus. 116. Quæ humanæ partes, & quæ divinæ. <i>ibid. &amp; seq.</i> Qua ratione ducenda laudatio ab hisce partibus.	<i>ibid.</i>
Scribere. In scribendo cogitandum cui similes esse velimus. 259.	
Scribenti tria necessaria.	15.
Scribendi ratio quæ debeat esse ostendit Auctor in epistola tamquam in speculo.	9.
Sententiæ, & materia, corporis formæ comparantur, verba versibus.	248.
Spes futurum bonum respicit.	202.
Suadere. In suadendo vel dissuadendo quo exordio utendum. 170. & seq. Quæ ulterius servanda.	<i>ibid.</i>

Tran.

# I N D E X

## T

**T** Ranquillus (Svetonius) obscurus, & affectatus. 305.

## V

**V** Erba quædam græca, & hebræa retinenda sunt si in usu sint recepta. 266.

Verba sequioris ævi aut fugienda, aut revocanda ad Scriptores magnæ auctoritatis. 267.

Verba ante Ciceronis ævum, ipso Ciceronis tempore antiquata. *ibid.* Nec laudandus Gellius, qui ea verba affectat. *ibid.*

Verba latina facit veterum auctoritas, & consuetudo Romanæ linguæ. 266.

Veteres cur præcepta epistolarum scribendarum separatim non tradiderint. 16.

Virtutes elocutionis quæ & quot. 264.

Vocabula humilia, obscæna, & sordida quæ. *ibid.*

Vocabula propria, quæ declarant auditori id quod volumus. 265. & seq.

Vocabula data rebus nuper inventis non fugienda. *ibid.*

Voces novæ adhibendæ ad exprimendos novos conceptus in elocutione. 267.





LIPPI BRANDOLINI  
IN LIBROS

De Ratione scribendi,  
*Ad Franciscum Piccolomineum Cardi-  
nalem Senensem*

PRÆFATIO.



ULTA quidem, atque ingen-  
tia munera nobis ab illo optimo  
Parente, ac Redemptore nostro  
collata sunt, sapientissime Pa-  
ter: nullum tamen, neque ma-  
jus, neque præstabilius, neque  
humano ingenio dignius est divinarum hu-  
manarumque rerum cognitione, atque scien-  
tia; quam quidem sapientiam majores nostri  
appellavere. Nam quum participes rationis, ac  
divinitatis simus, nihil habemus, quo avidus  
intelligendi animus tæpè opere delectetur, quo  
tan-

*tantopere alatur, in quo denique tantopere  
 acquiescat. Opes enim, honores, imperia,  
 voluptates, ceteraque res omnes, quæ ab ho-  
 minibus expetuntur, atque in precio summo  
 habentur, partim tam fluxæ, atque instabiles,  
 partim tam plenæ curarum, ac sollicitudinis  
 sunt, ut omnem animo non modo delectationem,  
 sed tranquillitatem quoque, ac sui ipsius pote-  
 statem eripiant. Hæc una rerum divinarum,  
 humanarumque scientia, ita propria animi, &  
 perpetua possessio est, ut cui semel est parta, ei  
 vi aliqua eripi, auferrique non possit; delecta-  
 tionem vero, & suavitatem animo tantam af-  
 fert, ut eum ab omni alia cura, & cogitatione  
 ad sui studium, & contemplationem traducat.  
 Huc accedit immensa quædam, & incredibilis  
 animi quies, atque tranquillitas, quæ hac una  
 contemplatione comparatur. Animus enim  
 pulcherrimarum, atque altissimarum rerum stu-  
 dio, & investigationi deditus omnem sollici-  
 tudinem, cupiditatemque deponit, humana  
 omnia contemnit, ac pro nihilo ducit, omni  
 denique affectu, ac perturbatione vacuus, so-  
 lutusque quiescit. Ratio autem, & peritia  
 bene, beateque vivendi hinc potissimum sumi-  
 tur. Animus enim optimis præceptis, exem-  
 plisque saluberrimis institutus, sive sibi victu-  
 rus, sive aliis præfuturus sit, facile totius vi-  
 tæ cursum videt, ad eamque traducendam  
 omnes rationes, & consilia comparat, seque  
 ipsum*



*ipsum ad ea , quæ legit , quæ audivit , quæ observavit , accommodat ita , ut qui ex literarum cognitione degendæ vitæ rationes , fructumque non capiunt , hi mihi nescire omnino literas videantur . Porro hæc quantum in secundis rebus ornamentum , quantum in adversis præsidium afferant , incredibile dictu est . Præstant enim in alteris moderationem , mansuetudinem , [auctoritatem : in alteris animi magnitudinem , patientiam , humanarum rerum contemptionem ; contra , ex illis superbiam , atque elationem omnem : ex his omnem dolorem , atque ægritudinem adimunt adeo , ut hæc una ad expellendos omnes animi morbos , affectusque sedandos medicina optima , atque accommodatissima sit ab omnibus semper iudicata . Postremo hæc una contemplatio nos in cælum rapit , & quantum homini scire fas est , usque ad ipsius Dei cognitionem ducit . Hæc immortalem nostrum animum ad suam originem redire cupientem mira quadam ejus , quam optat , beatitudinis spe , & quasi prægu-  
statione incendit , & quoad fieri potest , Deo proximum , atque simillimum reddit . Quam quidem rem sapientissimus nobis ille Paulus verissime , atque apertissime declaravit , quum per patientiam , & consolationem Scripturarum spem habere nos iussit . Tuum itaque tam præclarum institutum , sapientissime Pater , ego quidem satis commendare , admirarique non pos-*

*Sam: qui in maximis opibus, in amplissimo fortuna, ac dignitatis gradu, in summa apud omnes homines existimatione, atque auctoritate constitutus, ceteris rebus omissis, te totum sapientiæ studiis, contemplationique tradideris, eaque, de quibus inter se homines contendere, atque digladiari solent, despicias, ac pro nihilo ducas. Neque tu solum id facias, sed a tuis quoque faciendum cures. Egregium sane, & dignum sapientissimo viro, & Cardinale religiosissimo institutum. Quod quidem tamen si tu a sanctissimo viro, Patruo tuo Pio II. Pontifice Maximo tanquam hereditarium munus accepisti: qui quidem in maximis regenda Christiana Reipublica, & totius pene terrarum orbis administrandi laboribus, ac occupationibus positus ea, per quæ ad locum illum pervenerat, literarum studia nunquam deseruit: habes tamen a benignitate quadam naturæ tuæ, ingenii magnitudine, ut a studiis illis, quæ optima, atque religiosissima esse sentis, distrahi, avocarique non possis. Perge igitur, Pater optime, ut facis: perge, inquam, tibi que persuade id, quod divinitus a Salomone primum, deinde etiam a Platone est dictum, sapientiæ possessionem esse omni auro, divitiisque meliorem, speraque fore, ut ejus rei fructus quanquam nunc magnos percipis, majores tamen in dies singulos, uberioresque percipias. Ego quidem, quanquam neque doctrina,*

*na,*

# PRÆFATIO.

5

*na, neque ocii ad contemplandum satis habeo, ejus rei tamen incredibilem quotidie fructum capio. Nam quum ab ineunte ætate sim in maximis semper angustiis, ac laboribus corporis, animique versatus cum ob naufragium rei familiaris nostræ, tum ob hanc, quæ totum corpus aggravat, cæcitatem: unum hoc literarum præsidium, unum hoc solatium semper habui, quo calamitates omnes, & præsentēs constantissime toleravi, & adventantes fortissime repuli. Hodie quoque quum nihilo minus, atque haud scio, an etiam magnæ fortunæ procellis exagiter, amissa ob temporum perverstatem quiescendi spe, ab hoc uno literarum studio & vitæ præsidia, & animi relaxationem peto. Dies enim aliis instituendis, noctes mihi, quantum licet, impendo. Ne vero nocturna etiam studia nostra a communi utilitate disjuncta sint, quum solis nobis natî non simus, conor aliqua assidue lucubrare, quo non mei solum animi delectationibus, sed ceterorum etiam tum viventium, tum posterorum utilitati prospiciam. Itaque quum cogitarem, si quod esset, in quo ego mea opera, & industria nostris hominibus prodesse possem, videremque permulta de ratione dicendi tum a veteribus, tum a nostris conscripta volumina, de scribendi ratione ab illis nihil traditum esse: digna mihi visa res est, & nostris hominibus necessaria, de qua aliquid conscriberetur,*

*præsertim quum hoc tempore quicquid est elo-*  
*quentiæ, id in scribendo tantum exerceatur,*  
*dicendi exercitatio pene tota defecerit. Nam*  
*accusandi, & defendendi ratio, ad quam omnes*  
*eloquentiæ vires, omnis dicendi facultas a ve-*  
*teribus comparabatur, mutata fori judicio-*  
*rumque consuetudine, sublata penitus atque*  
*extincta est. Sententiæ in Senatu apud cete-*  
*ras civitates patria, & communi lingua, hic*  
*in nostro colloquio & breviter, & minus latine*  
*dicuntur ita, ut in illis dicendi facultas locum*  
*non habeat. Conciones quoque patria fere*  
*oratione pronunciantur, pauca admodum aut*  
*Sanctorum, aut Defunctorum laudationes*  
*latina lingua habentur, atque hæc quoque ab*  
*illa veteri oratoria in novam quandam, & bar-*  
*baram consuetudinem ab his, quos Fratres ap-*  
*pellamus, commutata sunt.] Sola jam nobis*  
*scribendi ratio relicta est, in qua versari possit*  
*eloquentia. Atque hanc quidem præceptionem*  
*veteribus eam existimo fuisse causam primam*  
*literis non tradendi, quod partim cum dicendi*  
*ratione conjunctam esse arbitrantur, partim*  
*sciri hæc ab omnibus tamquam vilia, & vulga-*  
*ta conspicerent. Nobis, qui neque in dicendo*  
*exercemur, neque hæc scire alibi possumus,*  
*necessario tradenda esse censui. His igitur de*  
*caussis scripsi superiori anno de scribendi ra-*  
*tione libros tres, in quibus & ea, quæ erant*  
*de arte dicendi a veteribus tradita, quæ qui-*  
*dem*

dem usus nobis esse possent, breviter, atque dilucide sum complexus, & quæ ab illis prætermissa fuerant, quantum potui, longa observatione collegi. Nam & quæ ab illis de sex partibus orationis, de causarum generibus, de dispositione, de elocutione præcepta fuerant, quantum ad hanc institutionem conferre visa sunt, non omisi, & quo pacto ad omnem singulatim materiam accommodari possit inventio, (quæ res adhuc intacta fuerat) diligenter, copioseque tractavi: atque ut ejus rei certa præceptio tradi posset, epistolam, quoniam eo maxime scribendi genere utimur, quasi formulam quandam, in qua Scriptor versetur, accepi, ad eamque scribendam omnem præceptionem nostram accommodavi. Quos quidem libros, quia neque adhuc satis emendatos putabam, neque publicandi gloriam affectabam, libenter apud me continebam. Quum autem tu eos a me his diebus & coram, & per Augustinum fratris tui filium, præstanti ingenio, moribusque optimis adolescentem, pro tua consuetudine petiisses, quod fore illius institutione eos non inutiles judicares, non sum passus, pro tua summa erga me benevolentia, meaque in te incredibili observantia, eos abs te diutius desiderari, Augustinumque ipsum hac utilitate, si qua ex nostris libris ei proventura est, ulterius carere: imo in magna mea felicitate duxi, res nostras tibi aliqua ex parte vel ju-

*cundas, vel utiles esse posse. Eos itaque tibi, sapientissimo Pater, quam possum emendatissimos quam primum exhibeo, ne, si eos apud me diutius emendando detineam, vel Augustini commodum, vel tuam cupiditatem videar remorari. Peto tamen abs te, ut non tibi pro amplitudine, & sapientia tua dedicatos fuisse, sed ad Augustinum instituendum tanquam in servitutem missos esse existimes. Nam quæ tibi dedicanda sunt, & majora, & meliora sint necesse est. Ea si quando a nobis scribentur, ad te potissimum scribentur. Hos interea libros accipies, ut tibi aut non legendos, aut si legeris, emendandos putes. Dabis autem operam, ut hæc, quæ præcepta sunt, ab Augustino non discantur solum, sed diu, multumque exerceantur. Omnis enim dicendi, scribendique facultas, una exercitatione perficitur. Quam quidem ad rem, ne quid ei deesse possit, me, quum volet, socium, adiutoremque habebit. Sed suavitate consuetudinis tuæ, & studio tecum colloquendi erectus sum longius fortasse, quam debebam, brevius certe, quam volebam. Quamobrem ad ipsam nunc præceptionem veniamus.*

\* \* \*

17  
LIPPI BRANDOLINI<sup>9</sup>

De Ratione scribendi ,

LIBER I.

*Quid sit Epistola , & unde dicta sit .*

CAPUT I.



UONIAM igitur omnis sermo  
noster de scribendi ratione fu-  
turus est , eaque in epistola  
tanquam in subiecto quodam ,  
& quasi speculo demonstnan-  
da est , placet primum Philosophorum mo-  
re definire quid sit Epistola , ut intelligatur,  
quid sit id , de quo disputetur : atque eam  
in sua genera dividere , deinde de rebus ad  
scribendi rationem necessariis pertractare ,  
tum singulorum præcepta tradere , atque  
ad ea nostram orationem accommodare .  
Est igitur Epistola sermo ad absentes de  
re ad eorum alterum pertinente conscrip-  
tus . Græci ἐπιστολήν eam vocant , ἀπὸ τοῦ ἐπι-  
στέλλειν , quod est mittere . Nos quanquam  
epistolæ nomen in tam frequentem usum  
recepimus , ut nostrum quodammodo fe-  
cisse videamur : tamen literas appellamus ;  
illud autem in soluta oratione servamus , ut  
ad

ad elementorum differentiam eas in plurali dumtaxat numero, quas ad absentes scribimus, literas appellemus. Poëtæ singularem etiam numerum usurpant.

*De Inventione, & generibus epistolarum.*

## CAPUT II.

**A** Quibus vero primum inventa sit epistola, neque ego satis exploratum habeo, neque existimo quæri curiosius oportere; non enim ad eam, quam suscepimus, Institutionem magnopere pertinet: neque a rerum gestarum scriptoribus, quod ego sciam, memoriæ proditum est. Illud inter omnes constat, hoc scripti genus omnium antiquissimum esse. Nam quum primum literæ inventæ sunt, statim ad absentes scribi coeptæ sunt: & fortasse hac potissimum de causâ etiam sunt inventæ, ut cum absentibus loqueremur; necessitatis enim gratia, quum antea non essent, inventas certum est, ut absentes ea, quæ audire, aut videre non poterant, quoquo modo cognoscerent. Quod quidem hinc vel maxime deprehendi potest, quod Ægyptii, antequam literarum usum haberent, figuris quibusdam, atque imaginibus rerum depictis, quæ ἱερογλυφικά dicebantur, ea, quæ volebant,



tant, designabant. Ex quo fit, ut scribendarum epistolarum consuetudo antiquissima sit, neque habeat auctorem ullum satis certum, cui ejus rei assignari possit inventio: sed sit ante ullas literas ab ipsa necessitate inventa, imo cum ipsis pene hominibus nata. Scribendi autem illa potissimum causâ fuit, ut cum absentibus de nostris, vel aliorum rebus communicaremus: quæ ratio assignari utilitati potest. Accessit deinde etiam animi delectatio, ut cum amicis jocaremur, eorumque consuetudine etiam absentes frueremur: qui quidem amicitiae fructus est maximus. Finis autem epistolarum Scriptori est ille idem propositus, qui oratori: ut doceat, ut moveat: nam delectare, quod tertio loco posuit Cicero, in movendi parte collocandum puto. Quid enim est aliud delectare, quam animum ad lætitiâ, ad voluptatem, ad cupiditatem, ad spem, & ceteros affectus concitare? Sed Cicero aliam fortasse rationem est secutus, nos duplici tantum fine contenti, docendi, & movendi, epistolarum duo genera omnino existimamus esse: alterum, quod ad docendum: alterum, quod ad movendum sit. Ac superius illud quidem, ac maximum docendi genus, quum latissime pateat, duo genera ex sese facit: unum, quod in præceptis, & studiis  
li-

12 DE RATIONE SCRIB.

liberalium disciplinarum : alterum , quod in actionibus vitæ civilis , ac negociis positum est . Illud studiosum , sive contemplativum : hoc activum , sive negotiosum possumus appellare . Ac studiosum quidem illud in duo rursus genera dividitur : unum , quod ad res divinas pertinet , quod Apostoli secuti sunt , item Dionysius Areopagita , Cyprianus , Augustinus , Hieronymus , alique complures : alterum , quod ad virtutes , moresque , & instituta Philosophiæ tradenda maxime accommodatum est . Quo ex Græcis Democritus , Plato , alique permulti frequenter usi sunt , ex nostris potissimum Seneca . Illud vero , quod activum appellavimus , quoniam in summâ vitæ communis varietate versatur , certis generibus comprehendi non potest , species habet pene infinitas . In eo , quoniam latissime patet , atque ad omnes pertinet , omnes pene versati sunt , hodieque versantur : sed ex omnibus , quos habeamus , ut in ceteris , quæ ad doctissimum hominem spectant , partibus , ita in hac maxime floruit Cicero . Posterius illud scribendi maximum genus , quod ad movendum accommodatum esse diximus , in duo item distinguitur genera : unum , quod ad concitandos , alterum , quod ad sedandos animi affectus pertinet . Hoc instituendi gratia remissivum ,

vum ,

vum, illud concitativum, opinor, appellemus. In horum utroque ita versatus est, atque excelluit Cicero, ut cum illo conferri possit nemo. Nec desunt, qui hoc movendi genus, non in hæc duo concitandi, & sedandi, sed in alia duo distinguant genera: quorum alterum sit severum, & grave, quod ad tristitiam, metum, iram, dolorem, affectusque graviores, vel concitandos, vel sedandos pertineat: alterum familiare, & jocosum, quod affectus habeat jucundiores, materiamque leviolem. Ego superiorem divisionem, quæ & melior, & clarior est, magis probo. Atque hæc fere sunt epistolarum genera. Species vero, quoniam innumerabiles sunt, persequi infinitum & supervacuum esset. Nos eas, quæ & insignes, & necessariae maxime videbuntur, quum ad earum præcepta pervenerimus, colligemus. Nunc in quo genere causarum versari possit epistola, ostendemus.

*In quo genere causarum versetur Epistola.*

## CAPUT III.

**T**Ria sunt causarum genera, quæ recipere debet orator, ut & Cicero tradit, & omnes ferme scriptores consentiunt: Demonstrativum, quod in alicujus laude,  
aut

aut vituperatione est positum: Deliberativum, quod habet suasionem, & dissuasionem: Judiciale, quod habet accusationem, vel defensionem cum petitione. Horum generum, quod potissimum epistolæ proprium dici possit, non video. Nam tametsi in epistola multos sæpe laudamus, multos vituperamus: suademus item, & dissuademus, accusamus, & defendimus, ac petimus: non tamen ea propria dicenda sunt epistolarum. Id enim proprium cujusque rei dicitur, quod ei vel soli, vel maxime convenit, quo quidem res illa carere sine suo magno detrimento, & imminutione non potest, ut risus hominis, numerus carminis proprius esse dicitur. His autem generibus causarum magna pars epistolarum caret, ut non modo ea non desideret, sed ne recipere quidem ullo modo possit. Quo enim ex generibus utuntur, qui per epistolam narrant res gestas, qui negocia exponunt, hi qui docent, hi qui jocantur, qui denique varios affectus describunt? Sed laudatur etiam in his epistolis, aut vituperatur aliquis; incidunt sæpe consultationes, petitiones, & alia his similia. Fateor: non tamen est illa principalis epistolæ subjecta materia, quam tractet, & in qua versetur, sed extrinsecus accersita. Habere autem multas etiam epistolas  
lau-

laudem, vituperationem, deliberationem, petitionem, & quæ sunt ejusdem generis, ut propriam, principalemque materiam: & tunc ea causarum genera recipere posse, non negaverim. Sed esse omnibus epistolis tanquam propria recipienda, non censeo. Recipere hæc igitur omnia causarum genera ut aliena interdum potest, ut propria semper non potest. Sed de generibus causarum satis.

*De rebus ad scribendum necessariis.*

## CAPUT IV.

**T**Ria igitur habere debet is, qui ad scribendum accedit: inventionem, dispositionem, elocutionem. Nam memoria, & pronuntiatio, quæ oratori maxime necessariae sunt, huic non sunt ita expetendæ. Ea enim, quæ literis mandamus, memoria, & actione non egent. Inventio est exco- gitatio earum rerum, quas scribere volumus. Veræ, an falsæ sint, non semper refert. Non enim idem finis semper nobis propositus est, qui oratori, ut persuadeamus: sed delectare interdum eum, ad quem scribimus, apologis, & jocis satis ducimus, quos veros esse, non semper est necesse. Dispositio est conveniens rerum in-  
ven-

ventarum ordo in singulis rebus, partibusque servandis. Elocutio est elegans, & ornata verborum, sententiarumque compositio. Harum partium ut inventio est maxime necessaria, (scribere enim quidquam, nisi prius invenerimus, non possumus) ita elocutio meo iudicio difficillima, nobis præsertim, qui hanc linguam non quasi patriam habemus, ut veteres, sed quasi peregrinam discimus: neque habemus ex illorum scriptis sane multa, ex quibus possumus absolute linguam perdiscere; multa enim sunt, quæ, quo modo latine exprimamus, non habemus. Quamobrem multo magis est in elocutione nobis, quam veteribus elaborandum. Hanc tamen, & reliquas partes tribus illis rebus, quas tradit Cicero, assequi poterimus, arte, imitatione, exercitatione.

*De Arte, Imitatione, Exercitatione.*

## CAPUT V.

**A**RS est præceptio vel ad dicendum, vel ad aliud quippiam agendum accommodata, quæ naturæ tum observatrix, tum adiutrix esse dici potest. Ea veteres magna in scribendis epistolis utebantur; sed ejus rei præcepta separatim non relique-

quere : propterea quod cum eo , quem instituebant oratorem , conjuncta viderentur. Nos , qui illud jam assequi non possumus , huic incumbimus , hoc magnum existimamus , hinc præcepta exquirimus . Illud tamen in primis observandum est , ut artem , quantum possumus , dissimulemus . Illa enim erit optima demum , & artificiosa epistola , quæ minime affectata , artificiosaque videbitur . Imitatio est diligens conatus ejus exprimendi , cujus in re aliqua similes esse volumus : hæc ab optimis est petenda semper . Stultum est enim , ut ait Plinius , sibi ad æmulandum non optima quæque proponere . Atque hac quidem in re quem cum Cicerone comparemus , habemus neminem : qui non solum est optimus , sed in hoc genere pene solus . Nam Plinium nepotem ei , qui aliquid eloquentiæ assequi velit , ego quidem imitandum non puto . Danda est igitur opera , ut Ciceronis quam simillimi esse possimus . *Nam , ut ait Quintilianus , ille se profecisse sciat , cui Cicero valde placebit .* Exercitatio est assidua consuetudo ejus rei , in qua proficere volumus , faciendæ . Hæc multa scriptione comparatur : cujus rei unusquisque sibi magister esse potest . Tantum autem hæc una res cum ad cetera omnia , tum vel maxime ad dicendum valet , ut sola sine ceteris multum

B

pos-

possit, cetera sine hac nihil omnino. Hac veteres tam frequenter usi sunt, ut Hortensius summus Orator nullum præterire diem pateretur, quo se non aut domi, aut in foro dicendo exerceret: sæpe utrumque eodem die faceret. Sed quoniam quæ res ad scribendum essent necessariae, & quibus modis eas assequi possemus, satis diximus: nunc ad inventionem redeunt, ejus partes considerabimus, & quo pacto ad epistolam singulae accommodari possint, ostendemus.

*De partibus Inventionis.*

C A P U T VI.

**I**Nventio sex omnino partes habet, Exordium, Narrationem, Divisionem, Confirmationem, Confutationem, Conclusionem: harum partium alia aliis epistolis necessariae sunt, omnes omnibus non sunt: imo vix existimo posse accidere, ut una eademque epistola has omnes partes recipiat. Orationis enim tunc, non epistolæ nomen assumeret: pauciores tamen quam duas, Conclusionem, & aliam quamvis five Narrationem, five Confirmationem habere potest nulla. Quando autem sit earum unaquæque necessaria, suis.



fuis locis aperiemus; ab exordio enim incipientes de singulis nunc partibus tractabimus.

*De Exordio, & cauffarum generibus.*

## CAPUT VII.

**E**Xordium est artificiosum principium, quo animus vel lectoris, vel auditoris ad legendum, audiendumve paratur. Eo non semper in epistola utendum est, quando autem sit utendum, tum caussa, tum persona nos admonebit. Caussarum genera, ut scribit Cicero, quem potissimum auctorem sequimur, sunt quatuor: honestum, turpe, dubium, & humile. Honestum est, quum recte defendimus, oppugnamusque contraria, ut quum homines ad virtutes cohortamur, deterremus a vitiis. Turpe contra genus est, quum ea, quæ videntur ab omnibus vituperanda, defendimus, & laudamus; aut quæ laudanda, vituperamus, ut si quis virum bonum, & quem omnes laudandum putent, vituperare, & in odium ejus, ad quem scribit, adducere velit; aut contra, si quis obscurum, & ignavum hominem, & qui malus ab omnibus judicetur, commendet, & bonis, ac studiosis anteponendum ducat. Dubium genus

B 2

est,

est, quod habet in se turpitudinis, & honestatis partem, ut si quis clarum, atque honestum hominem, ceterum flagitiosum, & improbum commendet, ac præferat. Humile genus est, quum rem vel nostram, vel eorum, ad quos scribimus, dignitate multo minorem, inferioremque tractamus, ut si quis à Summo Pontifice vel parvam vestem, vel exiguam pecuniam per literas petat. Personarum vero tria genera sunt: nostra, qui scribimus, eorum, ad quos scribimus, & eorum, de quibus scribimus. Causa igitur posita, personæ considerandæ sunt. Si honesta sit, nec valde gravis, aut difficilis, & inter pares personas sæpius agitata, aut nullo, aut peregrino exordio utendum est. Si nova, gravis, aut difficilis: item si is, ad quem scribimus, nos vel ætate, vel dignitate, vel honore, vel potentia, vel virtutibus, vel aliis partibus antecedit, longiori exordio uti necesse est. Si de negociis notis inter nos, usitatisque ad quemvis scribamur: item si literis aliorum respondeamus, propositio rei, de qua scripturi sumus, pro exordio erit. Cetera causarum genera aliud atque aliud, omnia tamen exordium exigunt. Nos quum de singulis epistolarum generibus præcepta trademus, quo pacto in singulis exordiri conveniat, aperiemus. Illud in præsentia satis erit ad-

admonere, in omni exordio lectorum animos, quam maxime possumus, esse conciliandos. Conciliantur autem tribus illis rebus, benevolentia, docilitate, attentione; sed benevolentia in primis ea captatur vel a rebus, vel a personis: a rebus quidem, si eas utiles, vel honestas, vel laudabiles, vel cognitione dignas, vel certe jucundas, voluptatisque plenas ostendemus; a personis tripliciter pro ea, quam modo fecimus, personarum distinctione. A nostra quidem, si nostram erga illos benevolentiam, amicitiam, consuetudinem, observantiam, servitutem etiam, si poterimus, si nostram perpetuam voluntatem, nostra in eos studia, officia commemorabimus: item, si a nobis omnem arrogantiam, superbiam, ambitionis, cupiditatis suspicionem removebimus: si quid de nostra vita, aut doctrina sine arrogantia proferemus: item, si aut splendorem nostrae familiae, aut nostras calamitates indicabimus: item, si spem, dignitatem, salutem nostram in illis positam esse dicemus: item, si nostram curam, sollicitudinem, diligentiam in eorum rebus, in eorum salute, aut dignitate esse ostendemus. A lectorum persona benevolentiam contrahemus, si eorum in nos, vel in patriam, vel in bonos omnes officia, studia, merita, benevolentiam, observantiam,

tiam, voluntatemque referemus: si eorum sapientiam, mansuetudinem, pietatem, fidem, beneficentiam, animi magnitudinem, constantiam, modestiam, ceterasque virtutes collaudabimus: item, si genus, opes, copias, honores, dignitates, potentiamque commemorabimus: atque hæc omnia ad eam, quam scribimus, materiam accommodabimus. Ab eorum, de quibus scribimus, persona benevolentiam comparabimus, si eorum nobilitatem, virtutem, probitatem, vitam, ceteraque animi, cum fortunæ, tum etiam naturæ bona, ut opus esse videbimus, pro subjecta materia extollemus: item, si quales in patriam, in ceteros amicos fuerint, quales in eos ipsos, ad quos scribimus, futuri sint, ostendemus: item si eorum miserias, calamitates, solitudinem, inopiam, necessitatemque aperiemus: si ostendemus, quantum fiducia, quantum spei, quantum præsidii in illo, ad quem scribimus, positum esse ducant: si omnem illos salutem, dignitatem, fortunas omnes in ipsius potestate collocasse dicemus: atque his fere modis benevolentia parari solet. Dociles lectores faciemus, si breviter, quibus de rebus scripturi sumus, dilucideque ostendemus: si causas, quæ nos ad scribendum adduxerint, profereamus: si rei, de qua scripturi sumus, fundamentum.

menta quædam, & quasi semina jaciemus. Denique nostris legendis attentos reddemus, si pollicebimur, nos de rebus magnis, novis, inusitatis, & ad communem eorum, qui legent, utilitatem, dignitatem, laudem, salutemve pertinentibus esse scripturos. Attentos faciemus item, si spem, voluptatem, delectationemque afferemus: si metum, dolorem, ceterasque animi perturbationes nostris literis sublaturus, aut magna ex parte sedaturos esse pollicebimur: item si de Deo, de rebus cœlestibus, de summa Religionis, de summa Reipublicæ tractaturos nos esse dicemus: denique si alio, quo ceteri solent, modo scripturos nos esse ostendemus. His fere modis animi Lectorum in principiis conciliantur; fiunt autem hæc tum apertius, tum occultius pro causæ honestate, ac dignitate personæ: quum apertius fiunt, principium: quum occultius, insinuatio dici solet, quæ fit quum causæ, & personæ diffidimus, ut is, ad quem scribimus, causæ, aut personæ genere offendantur, & tamen in nostram sententiam veniat. Fit autem ita, ut cum id maxime agimus, minime agere videamur. Quod in commendatitiis Ciceronis epistolis apprehendi facillime potest; atque hæc duo sunt exordiorum genera. Neque ignoro me multa præterisse; omnia enim comple-

## 24 DE RATIONE SCRIB.

ſti ſupervacaneum eſſet : & prudentem eſſe eum , qui ſcribit , neceſſe eſt . Præceptis præterea noſtris aditum ingeniis patefacimus , non res terminamus . Si quid tamen addendum videbitur , quum de ſingulis episto-  
larum generibus agemus , latius explicabimus . Ac de virtutibus quidem exordii ſatis , nunc pauca de vitiis attingemus .

*De Vitiis Exordiorum .*

## C A P U T VIII.

**V**itiorum autem alia tam epistolis , quam orationibus , & omnibus pene ſcriptorum generibus communia ſunt : alia propria epistolarum . Communia ſunt , quæ Cicero , & Quintilianus tradunt . Vitioſum enim exordium , ut ambo ſcribunt , eſt , quod ad plures cauſas accommodari po-  
teſt : quod ab illis vulgare appellatur . Quale eſt eorum , qui tenuitatem ingenii ſui ſemper excuſant : quod Quintilianus ſcribit aliquando non oratoribus evitatum fuiſſe ; id meo iudicio adoleſcentium eſt proprium , vel eorum , qui non ſatis cogniti ſunt , & tum primum ad dicendum , ſcribendumve accedunt . Vitioſum item exordium eſt , quod non eſt cum iſſa re , de qua agimus , conjunctum , ſed affectatum , &  
aliun-

aliunde accersitum de industria videtur : quod Quintilianus translatum appellat , qualia sunt meo judicio Sallustii procœmia in Catilinarium , & Jugurthinum bellum . Nonnulli enim non quæ ad rem maxime faciunt , sed quæ ipsi optime sciunt , ea potissimum scribunt . Vitiosum item exordium est , quod nimis longum est pro subiecta materia . Quamquam autem terminus exordio præscribi non potest ( alia enim aliis longiora debent esse ) videndum tamen est in epistola præsertim , ne longius exordium sit , ne epistola quasi monstrosum corpus , caput ceteris membris majus habeat , & tota pene exordium sit . Est item vitiosum exordium , quod nimis apparatus , verbisque exquisitioribus , atque obscurioribus compositum est , quod Lectori , atque auditori tum suspicionem , tum tædium affert : suspicionem quidem , quia se dolo peti , & circumveniri putat , quum nimis compositam , & quasi phaleratam orationem videt : tædium vero , quum non sine difficultate intelligit , quæ legit . In quod vitium plerique nostris temporibus incidunt , qui tum se optime , atque elegantissime loqui putant , quum obscurissimis , atque ab usu remotissimis , aut longissime translatis verbis utuntur . Atque hoc vitium si quibus vitandum fuit unquam , nobis præcipue

## 26 DE RATIONE SCRIB.

pue vitandum est, cum quia non semper cum doctissimis agimus, tum quia in levissimo scriptorum genere, hoc est, epistola, plerumque versamur. Nam quum scripta omnia dilucida, ac facilia esse debeant, quippe quæ propterea eduntur, ut legantur, atque intelligantur, neque semper a doctissimis legi possunt, & hoc epistolæ maxime proprium esse debet, ut facilis, ut dilucida, ut perspicua sit: quæ, ut supra diximus, necessitatis gratia inventa est, ut cum absentibus de rebus communibus colloquamur, neque semper ad doctos scribitur, & responsum semper expectat, sæpe etiam spacium excogitandi non habet. Ideo dixerunt nonnulli extemporalem eam, & quodammodo negligentius scriptam videri debere. Sed ut ad exordia revertamur, dabimus operam, ut cum universa epistola, tum vel maxime exordium simplex, dilucidum, & perspicuum sit, & animos Lectorum tribus illis modis, benevolentia, docilitate, & attentione conciliet; nam qui hæc non assequetur, vitiosum sine dubitatione se fecisse intelliget. Atque hæc omnibus scriptis communia vitia sunt.

\* \*

*De*



*De salutatione, & principio Epistolarum.*

## CAPUT IX.

**P**roprium vero vitium epistolarum est; quum vel salutationem in principio non apponimus, vel alio, quam deceat, modo apponimus. Quo loco illorum error mihi corrigendus est, qui quum ad magnos viros scribunt, illorum nomen suo præponunt sic: *Innocentio Pontifici Maximo Lepus Brandolinus S. D.*, existimantes dignitatem aliquam inesse in illa nominis præpositione; quæ profecto nulla est. Sed emanavit hic error a nonnullis religiosiis viris, qui quum ad Episcopos, vel ad Pontifices scriberent, reverentiæ gratia illorum nomen suo præponebant. Quos quidem auctores in vita imitari debemus, in lingua non debemus, si veterum illorum in scribendo similes esse volumus. Est tamen hodie ita corrupta dicendi, scribendique consuetudo, atque ita ab ea, quæ olim erat, immutata, ut qui suum nomen Pontificis nomini præposuerit, superbus, atque impudens videatur. Itaque hoc uniuscuiusque prudentiæ, arbitrioque relinquo. Illud admonere satis est, eum, qui veterum illorum similis esse velit, nomen, & cognomen suum præ-

## 28 DE RATIONE SCRIB.

præponere in salutationem debere. Nam prænominibus nos quidem non utimur. Deinde illius, ad quem scribit, similiter nomen, cognomenque apponere sic: *Lippus Brandolinus Francisco Picolomineo S. P. D.* Multi etiam *Suo* addunt, quibus est Plinius: Cicero non addit. Id quidem quoniam non magni momenti est, addamus nec ne, non magnopere laboro. Dignitatem autem ejus, ad quem scribimus, omittendam in salutationem non puto: sed nostra neque omittenda est, quum insignis est, vel quum ad pares, aut minores scribimus sic: *Franciscus Picolomineus Cardinalis Senensis Oliverio Carraphæ Cardinali Neapolitano, vel Lippo Brandolino S. P. D.*: quanquam Sacerdotes nomen familiæ novo quodam instituto non apponunt. Principium autem epistolæ nomen ejus, ad quem scribimus, nisi certis de causis, habere non debet. Causæ autem sunt, ut vel aliquem affectum animi exprimamus, ut: *Ego vero, Servi, vellem, ut scribis, in meo gravissimo casu affuisses.* Vel ut in re admodum gravi attentio- rem habeamus auditorem, ut: *Ego, Lentule, initio rerum, atque actionum mearum.* Vel quum aliquid vehementius exprimere volumus, quod non in principio modo, sed in tota quoque epistola fit, ut: *Urbem, mi*  
*Ruf-*

*Ruffe, cole, & in ista luce vive.* Seneca fere semper nomen ejus, ad quem scribit, apponit: Plinius, quod ego meminerim, nunquam: Cicero his fere, quas exposui, caussis; atque hæc de exordio in præsentia satis, nunc ad narrationem accedemus.

*De Narrationum generibus.*

C A P U T X.

**N** Arratio ( ut scribit Cicero ) est rerum gestarum, aut perinde ut gestarum expositio: ejus alii tria, alii plura genera fecere: ego duo tantum esse puto. Unum, quod ad negocia, & ad civiles causas accommodatum est, quod activum; sive negotiosum appellari potest: alterum, quod ab usu fori, negociorumque remotum, domi tantum, & in ocio exercetur: quod domesticum, sive ociosum, opinor, vocemus. Ac superius illud quidem dicendi genus, quoniam certum finem sibi propositum habet, ut efficiat, quod vult, sive laudet, sive deliberet, sive defendat, sive aliquid horum contrarium faciat, ita tractandum est, ut non quæcunque gesta sint, sed quæ ad nostram maxime causam faciunt, exponamus. Ejus genera sunt duo: unum, quod ad totam rem, & causam ex-  
po-

ponendam pertinet : qualis est narratio Clodianaë cædis apud Ciceronem pro Milone : quod genus epistola frequenter recipit in negociis, in laudationibus, petitionibus, commendationibus : alterum est, quod rem, vel causam nonnunquam intercurrit, aut exempli, aut affectus movendi, aut comparisonis, aut asseverationis, aut alia simili de causa, quod fortuitum, sive accidentale possumus appellare : qualis est narratio Servii Sulpitii ad Ciceronem, in ea epistola, *Posteaquam mihi renunciatum est, quum inquit : quæ res mihi non mediocrem consolationem attulit, volo tibi commemorare.* Ejus plures species facit Quintilianus : quum persona exactius describitur, ut : *M. Attilius Palicanus humili loco picens, loquax magis quam facundus.* Quum locus describitur, ut : est in Hetruria Sena urbs & natura, & arte munitissima. Quum tempus, ut : Veris initio, quum omnia florere incipiunt. Præterea quum alicujus belli, seditionis, pestilentiaë, aut alterius rei causa describitur. Quo toto genere frequenter in omnibus epistolis utimur. Alterum illud genus narrationis, quod ociosum, aut domesticum appellavimus, in duo genera distribuitur, historicum & poëticum. Historica narratio, quia veram, atque integram rerum gestarum co-

gni-

gnitionem sibi propositam habet, ita tractanda est, ut nihil falsi dicamus, nihil veri omittamus. Hac etiam in epistolis nonnunquam utimur, quum nostras, vel aliorum res gestas conscribimus: quales sunt multæ e Cilicia missæ Ciceronis epistolæ. Poëtica narratio, quia non similis est, & delectationem plerumque finem habet, non eodem semper modo tractanda est. Aliter enim Comici, aliter Tragici, item aliter Heroici, aliter Elegi narrant. Omnes tamen varietati, atque delectationi inserviunt; ea paratur festivitate sermonis, variorum, ac dissimilium affectuum concitatione, diversorum tum animorum, tum eventuum expositione, jucundo exitu rerum, ut scribit Cicero; hæc tota narratio, nisi joci gratia veniat in epistolam, alia de causa, quod ego quidem sciam, nunquam venit.

*De virtutibus Narrationis.*

C A P U T XI.

**O**Mnis autem narratio tres habeat virtutes necesse est, ut sit brevis, dilucida, verisimilis. Brevis erit, si inde narrare cœperimus, unde cognosci rem necesse est, neque ab ultimo initio repetemus,  
ut

ut si quis Romanæ civitatis nobilitatem explicare volens, incipiat ab adventu Æneæ in Italiam: quod in historia tolerabilius esset, quæ causas rerum, initiaque explicet necesse est: in epistola non convenit. Breviter etiam narrabimus, si summatim res, non particulatim exponemus, quale esset illud: Cicero vesperi domum applicuit, ex equo descendit, domum ingressus est, pallium deposuit, suos salutavit, quæ omnia satis intelligentur, si domum tantum venisse Ciceronem dixerimus, nisi quid ex particularibus illis ad rem nostram, causamque conveniat: ut si velimus inferre insidias Ciceroni a domesticis in illa salutatione paratas fuisse. Breves item crimus, si nullis transitionibus, & digressionibus utemur, ut sunt aliquando in Metamorphosi Ovidii, qui fabulam fabulæ interponit. Sed quod in eo Poëmate virtus est, in epistola, aut historia vitium esset. Rem etiam bis, aut sæpius non repetemus sic: venit Romam Augustinus: postquam venit, domum applicuit: ubi vero domum applicuit, benigne a suis exceptus est. Ita etiam consequentia narrabimus, ut ex illis antecedentia intelligamus, ut: si te Romam rediisse dixeris, discessisse quoque te facile intelligat. Denique rerum exitus longius, quam opus sit, non persequamur:

ut

ut si propositum sit tuum ad urbem reditum narrare, prosequaris etiam quicquid in urbe postea feceris. Præteritæ autem quicquam ex re gesta, ubi rei notitia sola petitur, non oportet. Ubi narratio ad finem aliquem laudis, deliberationis, iudicii que dirigitur, non ea modo, quæ obsunt, sed ea etiam, quæ non profunt, omittenda sunt. Dilucida erit narratio, si ordinem rerum gestarum, temporum, locorum, personarumve servabimus: si nihil quod extra rem sit, interponemus: si nihil obscure, nihil contorte, nihil concise, aut contracte proferemus: si propriis, atque usitatis tum verbis, tum sententiis rem exponemus: si ambitu, sive (ut Cicero appellat) comprehensione verborum longiore, quam necesse est, non utemur: si circuitiones, & quasi ambages omittemus: si non deerrabimus ab eo, quod cœperimus: denique si ea, quæ paulo ante tradita sunt, brevitatis præcepta observabimus. Verisimilis, sive probabilis erit narratio, si omnia locis, temporibus, rebus, personis convenientia proferemus: si res gesta est, aut geri potuit, ita narrabimus: si nihil difficile, nihil incredibile, nihil fabulosum, aut a facultate hominum, memoriæve remotum, & monstro fere simile proferemus: si rei, quam narrabimus, argumenta, signa,

testimonia , quatenus egere videbitur , ostendemus : si eam probabilem nostra, aut illustrium virorum fide, asseveratione, aut auctoritate faciemus. Ac de narratione, quidem hætenus .

*De Divisione .*

C A P U T XII.

**D**ivisio est distributio totius vel orationis, vel alterius rei in suas partes ; ea narrationem statim sequi debet. Atque in judicialibus quidem causis primum dicendum est, quid nobis conveniat cum adversariis, quid in controversia sit : deinde enumerandæ, atque exponendæ breviter partes, de quibus dicturi sumus, quæ plures, aut pauciores tribus ( ut Cicero præcipit ) esse non debent. In domesticis vero, & deliberativis causis neque divisio semper adhibenda est, neque quid nobis conveniat cum adversariis exponendum, sed explicandæ tantum partes, de quibus dicturi sumus : hoc plerumque post exordium fit ; narratio enim in his causis non ita semper necessaria est. Epistola meo iudicio vel nunquam, vel quam rarissime divisionem recipit ; nam quum illud quasi proprium habere debeat, ut minime exco-  
gi-



gitata, atque artificiosa videatur, illa partium enumeratione non indiget. Præterea unica, ut plurimum in ea tractatur materia, eaque simpliciter. Quod si pluribus de rebus eodem tempore scribendum sit, quoniam auditoris, aut lectoris memoriam non magnopere expetunt, satis est, si, re priore absoluta, aliam, & deinde aliam subtexamus. Si autem duabus, pluribusve epistolis eodem tempore respondere velimus, poterimus uti divisione, sive propositione hoc modo: Binas abs te accepi literas, alteras Kalendis, alteras Nonis datas: quibus, ut velle videris, ego suo ordine respondebo. Illi quoque, qui aliquid per epistolas docent, præsertim quum quæstionibus, interrogationibusque respondent, divisione utuntur hoc modo: Petis a me, ut tibi quæstiones tres per epistolam declarem; quibus breviter explicatis, subjungemus in hanc sententiam pauca: faciam, ut potero, breviter, & eo ordine, quo requiris; quo quidem modo Hieronymus sæpissime utitur. Ac de divisione satis; nunc ad reliquas partes transcamus.

\* \*

*De Confirmatione , & Confutatione .*

C A P U T XIII.

**D**ivisioni proxima est confirmatio , & confutatio , quæ partes , quoniam & difficillimas tractationes habent , & frequenter in epistolas veniunt , accuratius explicandæ sunt . Nam siue docere , siue monere velimus , probemus , quæ dicimus , necesse est , refutemusque contraria . Sed quum aliud sit epistolas domi scribere , aliud in foro causas agere : aliaque sit epistolæ , alia sit orationis ratio ; non est utraque eodem modo tractanda . Nos itaque,omissis his, quæ fori, & iudiciorum propria sunt, ea , quæ venire in usum scribentium solent , tantum persequemur . Quoniam autem ex quibus locis confirmatio sumitur , ex iisdem sumitur confutatio , neque nostra satis confirmare possumus, nisi aliena refellamus , de utraque mihi primo conjuncte , deinde etiam separatim dicendum esse existimavi . Est igitur confirmatio nostrarum rerum artificiosa comprobatio , siue ( ut Cicero definit ) nostrorum argumentorum expositio cum asseveratione . Confutatio est contrariorum locorum dissolutio . Utraque rationibus , atque argu-

gumentis tota conficitur . Argumenta autem a ceteris locis , & sedibus eruuntur . Nos prius de argumentis pauca dicemus : deinde locos , e quibus argumenta eliciuntur , quantum res postulabit , breviter attingemus .

♣ *De Argumentis .*

## CAPUT XIV.

**A**Rgumentum est igitur ( ut omnes definiunt ) ratio rei dubiæ faciens fidem , vel ( ut apertius dicam ) est ratio , quæ incerta , & incognita per ea , quæ certiora , & notiora nobis sunt , probat . Id in duo genera omnino distribuitur , probabile , & necessarium . Probabile ( ut Boëthius definit ) est id , quod omnes , aut quamplurimi , & sapientes , & in ea re , de qua agitur , periti sic esse consentiunt , quale est illud : Si mater est , liberos diligit . Item , si literis operam dedit , aliquid scit . Est enim apud omnes probabile eam , quæ mater est , filios diligere , & eum , qui literis operam dederit , aliquid scire ; non tamen ita necessarium est , ut aliter esse non possit . Atque hoc genus oratorum , & dialecticorum est proprium . Necessarium est id , quod etiam si apud omnes non probetur , aliter se habere

non potest, quale est illud: Quum terra inter lunam, & solem posita fuerit, luna deficiet: item, quum luna soli, ac terræ se interposuerit, sol deficiet; lunam enim terræ interpositione, solem vero interpositione lunæ deficere, tametsi non omnibus probabile videatur, ita tamen necesse est, & ut aliter se habere non possit. Atque hoc genus Philosophorum, Mathematicorumque proprium est. Utrumque autem hoc genus, si inter se jungatur, parit ex sese genus tertium, quod probabile, & necessarium nuncupatur, quale est: Si dies est, lux est: item, si currit, movetur. Utrumque enim & apud omnes probatur, & sic esse necessarium est; quod quidem genus, ut est ex genere utroque compositum, ita etiam omnibus, quas memoravi, disciplinis convenit, & commune est. Ac de argumentorum quidem generibus satis; nunc de eorum formis pauca dicamus.

*De Formis argumentorum.*

C A P U T XV.

**A**Rgumentorum formæ duæ præcipue sunt, inductio, quæ a Græcis *ἰπαγωγὴ*, & ratiocinatio, quæ *συλλογισμὸς* ab illis appellatur, a quibus aliæ duæ ducunt originem

nem: exemplum, quod Græce παραδειγμα dicitur: & ἐνθύμωμα, quod Quintilianus commentum, sive commentationem interpretatur, quibus omnibus non oratio modo, verum etiam epistola, & omne scripti genus frequentissime utitur. Non inconueniens mihi videtur, ut de his singillatim, quam brevissime possimus, præcipiamus, ab inductione potissimum incipientes.

*De Inductione, & Exemplo.*

## CAPUT XVI.

**I**nductio igitur est oratio, quæ per similitudines particulares, non dubias, rei dubiæ, sive illa particularis, sive universalis sit, assensionem elicit. Eam plerumque Cicero per interrogationes facit, ut plurimis, de quibus nulla dubitatio esse possit, similibus collectis rebus, hisque omnibus nobis per interrogationem concessis, de re, quam volumus, demum interrogemus, ut quum ille similitudine victus negare non possit; vel tacite, quod assensionis genus est; vel aperte, quod volumus, fateri compellatur. Ea utemur hoc modo: sit aliquis, quem ad literarum studia compellere cupiamus, eum nos per inductionem ita compellemus. Si civis tuus plus opum habeat,

quam tu, tuas ne, an illius opes malis? Illius profecto, respondebit: quid, si civis tuus plus potentiae, aut auctoritatis, quam tu in civitate habeat, tuamne, an illius, cedo, potentiam, atque auctoritatem malis? illius vero dicet; tunc nos inferemus: at si quis civis tuus plus doctrinae, atque eloquentiae habeat, quam tu habes, tuamne, an illius malis? illius profecto malle se cogetur respondere, aut certe convictus tacebit, tunc nos, siue taceat, siue fateatur, quod volumus concludemus. Atque hæc inductio per interrogationes fit, & particularia concludit. Potest & universa affirmando concludere hoc modo: Si superare alios cives opibus volumus, si honoribus, si dignitatibus, si potentia, si auctoritate, si gratia cupimus eos antecire, propterea quod hæc honestissima, & præclaro cive dignissima existimamus, profecto omnibus quoque rebus, quæ honesto, & præclaro cive dignæ habentur, præstare aliis, & antecellere velle debemus. Atque hoc in genere tria esse præcepit Cicero: primum, ut res illæ, quas per similitudinem inducimus, ita certæ, atque indubitatae sint, ut eas omnino concedi nobis necesse sit: deinde, ut id, cujus causa fiet inductio, ita simile sit his rebus, quæ ante allatae, concessæque sunt, ut refugi, aut negari simili-

tu-

tudo non possit : postremo , ut similitudines tales inductæ sint , ne intelligi possit , quo spectent , aut quem ad exitum perventuræ sint ; nam qui videt ex primis interrogationibus , si assenterit , sibi postea confirmandum esse quod nolit , aut non respondendo , aut male respondendo longius procedere interrogationes non sinet , atque hoc postremum in ea inductione , quæ per asseverationem fit , non ita servari necesse est . Potest autem inductio falsum etiam aliquando concludere hoc modo : Qui scit canere , cantor est : luctari , luctator est : Qui scit literas , literatus est : ita etiam , qui scit mala , malus est : quæ quidem falsa conclusio est ; virtutes enim scire sine contrariorum , hoc est vitiorum scientia non possumus ; quo quidem modo si quis contra nos argumentetur , facile confutari , ac refelli poterit . Ex inductione autem exemplum nascitur , quod ex inductione particulari particularem conclusionem facit hoc modo : Ut Græci Homerum summopere venerantur , ita nos Virgilium summopere venerari debemus . Ac de inductione quidem , & exemplo , satis diximus ; nunc ad ratiocinationem transeamus .

*De Syllogismo, sive Ratiocinatione,  
& Enthymemate.*

## CAPUT XVII.

**S**Yllogismus, qui ratiocinatio interpretari potest ( ut Cicero definit ) est oratio ex ipsa re probabile aliquid eliciens, quod expositum, & per se cognitum sua se vi, ac ratione confirmet. Boëthius Syllogismum definit: Syllogismus est oratio, in qua quibusdam positis, & concessis, per ea, quæ posita, & concessa sunt, necesse est aliud evenire. Quæ definitio tametsi verbis a Ciceronis definitione discrepet, eodem tamen, si recte consideretur, tendit. Quod enim ait Boëthius, quibusdam positis, & concessis, Cicero ait, expositum, & per se cognitum. Tum quod ille ait, necesse est aliud evenire per ea, quæ posita, & concessa sunt, hic ait, ex ipsa re probabile aliquid eliciens; & ut ostenderet fieri per ea, quæ posita, & concessa sunt, neque aliunde trahi quod probatur, subjunxit, se sua vi, ac ratione confirmet. Constat autem Syllogismus tribus ad minimum partibus, propositione, quam Dialectici majorem appellant: assumptione, quam illi minorem vocant, & complexione, quæ ab il-



illis consequentia dicitur : ejus tale exemplum est, ut si probare velis hominem esse substantiam, sic probes : Omnis homo est animal, omne animal est substantia, ergo omnis homo est substantia. Hic species habet plures, sed quoniam his orator nunquam, aut rarissime utitur, explicandi eas in præsentia tempus non videtur. Oratorius autem Syllogismus, quem Cicero ratiocinationem appellat, quinque ad summum partibus efficitur, propositione, probatione (quæ vel una, vel pluribus rationibus effici potest) assumptione, alia item probatione (quæ pluribus etiam rationibus, atque argumentis exornari, atque amplificari potest) & complexione, quam eandem conclusionem licet appellare. Ea tractatur hoc modo : ut si velim ostendere civitati melius ab uno, quam a multis gubernari, sic ostendam : Quæ ad publicum commodum gubernanda sunt, ea melius ab uno, quam a pluribus gubernantur. Hæc est propositio, quæ probatur hoc modo : Multi enim & inter se sæpe dissentiunt, & omnia ad sese rapiunt ; unus belli dux exercitui præponitur ; unus rector navim moderatur : denique apes ipsæ unum, qui ceteris præsit, regem creant. Sequitur assumptio, five minor propositio : Quid autem est, quod multorum commodum ita respiciat, ita

ita sibi propositum habeat, ut civitas, quæ  
da omnium est salutem, & commodum in-  
stituta? Sequitur quoque hujus assumptionis  
probatio: Nam quid aliud agunt, qui  
universos cingunt, ac sepiunt, nisi ut om-  
nes, qui intra sunt, tueantur? Quid aliud  
templa, fora, theatra, ceteraque urbis  
tum publica, tum privata ædificia, nisi ut  
omnibus ferviant, omnibus usui, atque or-  
namento sint? Leges porro, jura, magi-  
stratusque qua de causâ instituti sunt, nisi  
ut quæ sua sunt, tuto possidere unicuique  
liceat? Postremo tot artes, tot studia, tot  
disciplinæ quid sibi volunt aliud, nisi ut  
omnes in terris commode vivere, atque  
habitare possint? Sequitur complexio, quæ  
si breve, si argumentum simplex, potest  
esse hoc modo: Quæ quum ita sint, longe  
melius ab uno, quam a pluribus civitas  
gubernatur. Si vero longior ratiocinatio  
fuerit, complexio brevem epilogum habeat  
necesse est, hoc modo: Quod si omnia, quæ  
publicum commodum spectant, melius ab  
uno, quam a pluribus gubernantur; nihil  
autem est, quod æque salutem omnium,  
commodumque respiciat, atque ipsa respi-  
cit civitas: eam profecto ab uno, quam a  
pluribus satius est gubernari. Potest ratio-  
cinatio carere vel utraque probatione, vel  
altera, quum id, quod dicimus, ita per se

patet, ut probatione non egeat hoc modo: Si quo die virgo Romæ vitiata est, ego eo die in Sicilia fui, profecto transferri in me hoc crimen non potest: hæc propositio ita per se manifesta est, ut probatione non egeat. Sequitur assumptio; Fui autem in Sicilia: hoc quia inter omnes non constat, probetur necesse est. Quod autem dixi de altera probatione, de altera quoque intelligi volo. Potest enim incidere causa, in qua assumptionis probatio non sit necessaria, ut si dicam: Cæcus amore mulierum capi non potest; amor enim formæ non nisi a re visa proficiscitur: ego autem, ut videtis, cæcus sum; atque hæc assumptio probatione non eget. Potest & tribus tantum partibus constare sine ulla probatione hoc modo: Si lux est, dies est: lux autem est; igitur dies est. Potest & duabus, quum propositio tacetur hoc modo: lux est, igitur dies est. Atque hæc a Græcis appellatur enthymema; id (ut diximus) Quintilianus commentum, sive commentationem appellat. Atque hæc præcipue argumenta sunt oratori necessaria. Et prioribus quidem illis Socrates, & Socratici omnes: posterioribus vero his Aristoteles, & Theophrastus, & Peripatetici omnes maxime usi sunt. Sunt & aliæ argumentorum formæ quamplurimæ; sed quoniam ad nostram

fram institutionem non pertinent, hoc loco exponendæ non sunt. Hæc quoque, quæ attigi, multi fortasse reprehendent, & ad scribendi rationem minus necessaria judicabunt: sed si diligenter adverterint apud unum Ciceronem ( ut Senecam, Hieronymum, & alios omittamus ) hæc omnia frequenter invenient. Sed de argumentis hæcenus; si quis plura desiderabit, Ciceronem, & Boëthium legat; nunc de locis, a quibus argumenta ducuntur, differamus.

*De Locis personarum.*

C A P U T XVIII.

**L**ocus est quasi argumenti sedes, ex qua ipsum argumentum ducitur. Distribuantur autem loci duas in partes: in personas, & res. Personis hæc fere attributa esse scribit Cicero, nomen, naturam, victum, fortunam, habitum, affectionem, studia, consilia, facta, casus, orationes. Nomen est uniuscujusque proprium vocabulum. Ducitur autem ab eo argumentum, si quempiam aut laudemus, aut vituperemus, dicamusque nomen esse personæ vel accommodatum, vel contrarium. Naturam vel omnibus communem, vel propriam uniuscujusque definire difficile est.

In

In ea consideratur genus, virile, an muliebne sit; alia enim a viris, alia a mulieribus argumenta ducuntur; nam in viro facilius furtum, in muliere facilius veneficium creditur. Consideratur item natio, Italus, Gallus, an Hispanus sit: patria, Romanus, Florentinus, an Venetus; nam & nationum, & civitatum singularum proprii mores, opiniones, consuetudines, & instituta sunt, a quibus argumenta ducuntur. Consideratur præterea cognatio, claris, an obscuris majoribus ortus sit, a quibus sæpe argumenta ducuntur: ut fecit Sallustius in Ciceronem, atque in eum Cicero. Item ætas; alia enim de puero, alia de adolescente, aut de senè ducuntur. Item comoda, & incommoda animo, vel corpori a natura data, ut acutus, an hebes, memor, an obliviosus sit, longus, formosus, an contra. In victu, sive educatione consideratur quomodo educatus sit, quos præceptores, aut socios vitæ habuerit, quibuscum habeat consuetudinem, quo studio, aut artificio teneatur, quomodo rem familiarem administret. In fortuna consideratur dives, an pauper sit: servus, an liber: privatus, an cum potestate: foelix, clarus, an contra; quales liberos habeat. Quod si de mortuo loquemur, genus etiam mortis in argumentum ducemus. In habi-  
tu

tu corporis considerabimus, si quid commodi studio, & arte consecutus sit, quo vel formosior, vel agilior sit effectus. In habitu animi, qua virtute, qua doctrina præditus sit. In affectione quæritur lætitia, tristitia, metus, molestia, omnis denique animi mutatio subita. In studio, poësi, philosophiæ, picturæ, an musicæ deditus sit. In consilio quæretur, quid cogitet, quid deliberet; quanquam hoc Quintilianus ad res magis putat, quam ad personas pertinere. Facta, casus, & orationes ex tribus temporibus considerantur; nam non modo quid quisque fecerit, quid dixerit, quid ei acciderit: sed quid agat, quidve acturus esse videatur, considerabimus. Eadem de dictis, & casibus ratio erit. Atque hæc fere personis attributa sunt.

*De Locis rerum.*

## C A P U T XIX.

**A** Rebus, sive negociis argumenta multis modis ducuntur. Cicero ea quatuor in partes distribuit; dicit enim, partim esse continentia cum ipso negotio, partim in gestione negotii considerari, partim esse conjuncta negotio, partim gestum negotium sequi. Quintilianus argumenta, quæ  
are-

a rebus ducuntur, quinque ex partibus duci affirmat; aut enim quæ de causâ, aut quo loco, aut quo tempore, aut quo modo, aut per quæ unumquodque fiat, considerandum esse dicit. Quæ divisio tametsi a Ciceronis divisione diversa esse videatur, eodem tamen tendit. Nam quæ Cicero cum ipso negotio continentia vocat, Quintilianus causas rerum appellat: quæ Cicero, vel in gestione negotii, vel adjuncta, vel consequentia tanquam genera considerat, ea Quintilianus non generatim, sed per suas species singillatim exequitur. Nos quoniam non oratorem instituimus, ut illi faciebant, sed scribendi rationem tradimus, locos tantum illos attingemus, quos ad eam rem esse maxime necessarios existimabimus: ne vel adolescentium mentes his, quæ minime in usu sunt, causis judicialibus implicemus, vel Ciceronem, vel Quintilianum ad verbum scribere, non aliquid de integro condere videamur.

*De Argumentis a causis rerum.*

## C A P U T XX.

**D**ucuntur igitur argumenta in primis a causis rerum vel actarum, vel agendarum, quum ea, quæ egimus, aut acturi

D su-

sumus, nos aliqua de causâ vel fecisse, vel facturos dicimus; quam materiam Quintilianus ab aliis *ἑλπίς*, ab aliis *δύναμις* scribit appellari. Causâ autem rerum considerantur vel circa bonorum adeptiones, incrementum, conservationem, usum: vel circa malorum evitationem, imminutionem, conversionem. Quicquid enim facimus aut boni appetendi, aut mali fugiendi gratia facimus. Hinc nascitur uberrima argumentorum materia, sive in deliberando, quum ostendimus quæ bona consequentur, si id fiat, quod volumus; contra, quæ mala, si non fiat; sive in judiciis, quum ostendimus eum, qui accusatur, ex ea re magna vel commodâ acquisivisse, vel fugisse incommoda: ut si probemus Ajacem ab Ulyssæ occisum esse, ostendemus Ulyssæm inimicitias, injurias, interitumque, qui sibi immineret, evitasse. Habent hæc quoque causâ in epistolis magnam argumentorum materiam, sive in commendando, quum ex ea commendatione aliquod commodum eventurum dicimus. vel ei ad quem scribimus, vel nobis ipsis, vel ei quem commendamus: sive in petendo, quum ex ea re vel nobis, vel amicis, vel his, ad quos scribimus, utilitatem, dignitatem, laudem futuram declaramus: sive in consolando, quum ex ea morte & illos, qui



qui decesserint, magnam felicitatem habituros, magnis miseriis liberatos; & eos, ad quos scribimus, vel aliquod commodum esse adeptos, vel incommodo aliquo levatos esse ostendimus. Sunt autem & bonorum, & malorum falsæ quoque opiniones, quæ multorum, & magnorum errorum causas hominibus præbent. Multa enim velut bona appetuntur, vel ut mala fugiuntur: quæ opinione, non re vel bona, vel mala sunt. Atque hinc existunt pessimæ animi perturbationes, odium, ira, invidia, crudelitas, avaritia, libido, ambitio, spes, metus, & quæ sunt generis ejusdem: quæ materiam argumentandi in omnibus causis amplissimam præbent, quum ostendimus hominem adductum odio, amore, aut alia perturbatione, id de quo quæritur, facinus admisisse. Atque hic locus in consolationibus latissime patet, maximamque vim habet. Possumus enim facile ostendere vel bona, vel certe non mala, quæ illis, ad quos scribitur, mala videantur: illos vero dolore, vel amore impeditos, quæ recta sint, minus cernere. Quem locum exequitur late Servius Sulpitius, quum Cicero- nem de morte filiae consolatur; & de causis quidem rerum hætenus.

*De Argumentis a loco, & tempore.*

## C A P U T XXI.

**D**ucuntur argumenta a loco, in quo consideratur ipsius loci natura, maritimus, an mediterraneus, sit, montanus, an planus: quantitas, ut longinquus, an propinquus, magnus, an parvus: qualitas, ut desertus, an frequens, consitus, an incultus; præterea facer, an prophanus, publicus, an privatus, alienus, an ejus, de quo agitur: quæ quidem omnia tametsi fori, & judiciorum propria magis sunt, veniunt tamen etiam in familiares epistolas, & in alia scriptorum genera, quum laudamus, vel vituperamus aliquem a loco, unde oriundus sit, in quo versatus sit; quum suademus, vel dissuademus aliquid propter loci opportunitatem: quum consolamur, & eum, qui discesserit, in patria, in suis ædibus, inter domesticos, & familiares discessisse, aut honestissimo loco sepultum esse dicimus; quem quidem locum pulcherrius exequitur Servius Sulpitius in ea epistola, in qua mortem Marcelli describit. Ducuntur argumenta a tempore, quod vel est generale: ut quum dicimus: olim sub Alexandro: quum Reges Romæ regnarent: quum

quum Roma a Consulibus regeretur; vel speciale quid in annos, menses, dies, horasque distinguitur. Huic Cicero occasionem adjungit, quam temporis speciem facit; omnis enim occasio tempus est, sed non contra. Ejus facit tria tempora, publicum, ut bellum, dies festi: commune, ut messis, vindemia: singulare, ut convivium, nuptiæ. In omni vero tempore consideratur, quid gestum sit, quid geri potuerit, quid geri posse videatur; atque hoc etiam in epistolam venit. Nihil enim in negociis æque, ac temporis opportunitas consideratur, siue narremus gesta, siue gerenda decernamus. Hanc quoque occasionem in Marcelli morte non omisit Servius Sulpitius; ait enim, post cœnæ tempus occisum esse Marcellum, & mane sibi hora decima nunciatum. Valet etiam occasio temporis plurimum tum in deliberando, tum in consolando: quam quidem partem latissime tractat idem Servius Sulpitius, quum Cicero- nem de morte filiæ consolatur.

*De Argumentis ex modo, & facultatibus.*

## CAPUT XXII.

**D**ucuntur etiam argumenta ex modo, quum exponitur quo modo, quo animo aliquid a nobis, vel ab aliis factum sit:

## 54 DE RATIONE SCRIB.

Ejus partes sunt prudentia, & ira. Prudenter aliquid factum existimatur, quum vi, dolo, consilio, persuasione, mente denique tali factum est. Imprudenter contra factum dicitur id, quod per inscitiam, casum, necessitatem: quod præterea per affectionem animi, iram, odium, amorem est factum. Veniet autem hic locus in epistolas, quum nostrum, vel alterius factum accusabimus, vel excusabimus, & veniam petemus. Hoc Cicero sæpe facit, quum accusat Pompejum, quod ita bellum administraverit, & quum se ipsum excusat quod affuerit. Facultates etiam epistolis præstant argumenta in petitionibus, commendationibusque præsertim, quum ostendimus habere eum, ad quem scribimus, magnam ejus rei, quam petimus, præstandæ facultatem. Conferunt etiam plurimum in deliberando, quum exponimus, quæ necessaria sint ad eam rem, quam scribimus, faciendam. Hunc locum tractavit Cicero, quum de ratione traducendæ vitæ cum Servio Sulpitio consultaret. Conferunt etiam facultates ad reprehendendum, vel excusandum: cujus rei exemplum est apud Ciceronem ad eundem Servium, quum Pompejum accusaret, quod neque militum genere, aut robore, neque consilio satis valeret.

*De*

*De adjunctis negotio .*

## CAPUT XXIII.

**S** Equuntur ea , quæ Cicero adjuncta negotio appellat : qui loci sunt plurimi , quos ipse brevissime perstringit ; Quintilianus latissime tractat : nos eos tantum , qui nostræ institutioni convenient , explicabimus , ceteros omittemus . Ducuntur igitur a definitione nonnunquam argumenta , quum vocabulum , aut rem , de qua loquimur , definimus , ut per eandem definitionem quod volumus inferamus ; id fit vel interrogando , vel affirmando . Interrogando sic : Nonne virtus viri propria est , & a viro appellata ? vel sic : Quid est amicitia ? nihil aliud est , quam mutua benevolentia . Affirmando sic : Quod si amicitia nihil aliud est quam mutua benevolentia , nos mutuo amemus necesse est , si amici volumus appellari . Ducuntur argumenta a genere , specie , differentibus , propriis ; sed quoniam hæc in epistolam , vel aliud scripti genus , vel nunquam , vel rarissime , & disputandi tantum gratia veniunt , omitto . Quod si quis ea , de quibus disputaturus est , sciet : hæc quoque , sine quibus sciri illa non possunt , teneat necesse est .

Ducuntur etiam a divisione argumenta , quum totum in suas partes dividimus , vel genus in suas species distribuimus . Quæ a Quintiliano partitio nominatur. Hinc multis modis argumenta ducuntur , quum omnia divisionis membra a nobis ad eandem conclusionem deducuntur hoc modo : Quum virtus viros bonos efficiat, si ametur, ab aliis expetenda est , ut aliis placere possimus ; si non ametur , expetenda est , ut nobis ipsis placeamus . Item divisione utimur , quum duabus , aut pluribus propositis partibus quamcumque nobis concedat adversarius, dicimus hoc modo : Quum ante hac ad me non scripseris , aut superbiæ , aut negligentia te accusem necesse est , tu vide utra te minus deceat . Item quum omnia divisionis membra confutamus , ut ad id , quod volumus , deveniamus hoc modo : Falso te excusas , quod ad me sæpe scripseris , nam si scripsisses , aut tabellariis , aut amicis , aut peregrinis viatoribus literas dedisses : tabellarii se nullas accepisse dicunt ; amici isthinc nulli huc veniunt ; peregrini isthac iter facere non possunt . Quod si his omnibus nullas dedisti , nullas profecto dedisti . Item quum pluribus enumeratis partibus , ceterisque confutatis , extremam relinqui veram necesse est hoc modo : Aut voluisti ad me scribere , aut per mul-

multas occupationes, vel ægritudinem, non potuisti, aut copiam tabellariorum non habuisti, aut certe negligens fuisti: noluisse te, quum me magnopere ames, non puto: occupationes habes aut nullas, aut paucissimas: ægritudine nulla laborasti; nam omnes, qui instanc profecti sunt, te valentem viderunt: Tabellarii quotidie ultro, citroque comitant; quod si harum causarum nullam asserre potes, negligens fueris necesse est. Atque hæc a Quintiliano remotio appellatur. Quum autem rerum omnium ratio ab initiis per incrementa ad summam, sive finem procedat, probantur ultima ab initiis, vel incrementis hoc modo: Quum adolescentiam tuam continentem, & studiosam videam, non possum de reliqua ætate non optime sperare. Probantur contra ab ultimis prima hoc modo: Quum tu omnes gratis doceas, ostendis te non lucri causa literas didicisse. Probantur res a similibus, ut si Homerus legendus est, Virgilium quoque legi par erit. A dissimilibus, ut si Cicero imitandus est, non Plautum, aut Nævium imitari convenit. A contrariis, ut si virtus præmium meretur, vitium certe supplicium merebitur. A repugnantibus, ut si amicus est, amicum odisse non potest. A consequentibus tum natura, tum tempore: na-

tura, ut si fides virtus est, nemo est profecto fallendus; a tempore sic: Si caloris initium æstas attulit, ejus finem hyems afferat necesse est: quæ agi, & converti possunt hoc modo: Si nemo est fallendus, fidem virtutem esse par est. Item: Si finem caloris hyems attulit, ejus initium æstas afferet. Quædam ex rebus mutuam confirmationem præstantibus, siue (ut Cicero appellat) sub eandem rationem venientibus, argumenta nascuntur, ut si licet poëticen discere, docere cur non liceat? Discere, enim quisquam, nisi doceatur, non potest. Eodem modo vendere, & emere, locare, & conducere, & cetera, quæ se mutuo consequuntur. Similia his sunt, quæ a causis appellat Quintilianus, quum ea, quæ facta sunt, ab his, quibus efficiuntur, causis probantur; vel contra, quum efficientes causæ ex rebus effectis ostenduntur. Quæ quidem aliquando ex utraque parte necessaria sunt, aliquando ex altera tantum, aliquando vero ex neutra. Ex utraque sic: Si sol exortus est, dies est: item si dies est, sol utique exortus est. Ex altera sic: Fuit apud ignem, ergo est calidus; hæc pars necessaria est; sed non: Calidus est, fuit igitur apud ignem; potuit enim vel sole, vel alia causâ fieri calidus. Ex neutra parte necessaria sic: Exercuit corpus, ergo



robustus est: vel contra, robustus est, ergo corpus exercuit; horum neutrum necessarium est; non enim quisquis corpus exercuit, robustus est: neque quisquis robustus est, corpus exercuit; potest enim & ille exercitatione robustus non fieri, & hic robustus sine exercitatione esse. Quo loco illud videndum est, ne causæ nimis remotæ, & ex alto repetitæ afferantur, quod Poëtæ nonnunquam faciunt, ut: Utinam ne nemore Pelio securibus cæso cecidissent abiegnæ ad terram trabes; rem deinde sequitur: nam nunquam hera mea errans mea domo efferret pedem Medæa animo ægra, amore sævo saucia. Optime autem (ut mihi videtur) probatur res ex comparatione, quum majora minoribus, minora majoribus, paria paribus comparantur. Quibus quidem argumentis non epistolæ tantum, & scripta omnia, sed sermo etiam communis refertus est. Probantur autem majora a minoribus sic: Qui alienos, atque ignotos juvas, tuos tibi conjunctissimos non juvas? Item, qui movetur meretricis morte ob pravam consuetudinem, quid mihi faciat patri? Minor ex majoribus sic: Si patris mortem moderate tulisti, quo tandem animo ferendam amici mortem putas? Item, si totius Reipublicæ interitum ferre potuisti, in unius mulierculæ animula quid tan-

tantopere commoveris? Qui locus pulcherrimus est apud Servium Sulpitium in consolatione Ciceronis. Paria ex paribus sic: Quæ poena interfectori patris constituta est, eadem matris interfectori constituta esse debet. Item, si magna præmia musicis debentur, poetis cur non eadem debeantur? Atque hæc comparationes amplissimam in omni genere argumentandi materiam præbent: quas, quia natura unicuique facile subministrat, pluribus eas verbis non explicabo. Ducuntur postremo etiam a fictione (ut Quintilianus appellat) argumenta, quum fingimus, id est, proponimus aliquid, quod si re ipsa verum esset, causam nostram vehementer adjuvaret, ut: Si arbores, & saxa vocem haberent, tam indignum facinus detestarentur. Quem quidem ego locum non magni facerem, nisi eo sapissime Cicero uteretur, neque in orationibus modo, verum etiam in epistolis, ut ad Appium Pulchrum: Si tibi Respublica narrare posset, quomodo se haberet, non melius, quam ex ipso Phania intelligeres. Cujus quidem loci quoniam totidem possunt esse species fictæ, quot veræ, ideo feci ejus cum Adjunctis negotio mentionem.

*De his , quæ negotium consequuntur .*

## CAPUT XXIV.

**R**Estant ea , quæ gestum negotium consequuntur : quæ pars ex his , quæ negotio attributa sunt , quarta est , & a Cicerone consecutio appellatur : in hæc primum considerandum est id , quod factum est quo nomine appellari conveniat , ut quum amicum per epistolam excusabimus , qui alium dicatur offendisse , ostendamus non illam esse offensam alterius , sed sui defensionem appellandam . Ut Cicero fecit ad Metellum , quum inquit : Ego non fratrem tuum oppugnavi , sed fratri tuo repugnavi . Deinde ejus facti qui fuerint autores , qui comprobatores , qui imitatores , qui contra , id oderint , fugiant , detestentur , ut quum dicimus facultatem dicendi a sapientissimis , atque antiquissimis rerum publicarum conditoribus fuisse inventam , a summis postea viris comprobata , ab optimo quoque semper expetita : quod non nisi ignari , & flagitiosi detestentur . Videndum postea , quid de ea re sit lege cautum , quid judicatum , quid consuetudine frequentatum , quid arte , aut scientia præceptum : item vulgo ne , & frequenter ea res fiat , an insolenter & ra-

& raro. Postremo quæ rem honestas, utilitas, laus, gloria consequatur: quæ omnia facile possumus in proximo exemplo considerare. Sunt autem pleraque a Servio Sulpitio in Ciceronis consolatione tractata, quum ait: Tot oppida, tot claros viros interuisse, & quotidie interire: item fortunatos esse, qui liberos vel non genuerint eo tempore, vel amiserint: postremo, quum ostendit, quæ ignominia Ciceronem ex eo luctu; quæ hominum opinio; quod denique periculum consequatur. Atque hæc de locis, a quibus argumenta ducuntur, breviter dixisse sufficiat. Si quis plura desideret, a Cicerone, & Quintiliano accipiat. Nos ea tantum prosequimur, quæ ad scribendi rationem necessaria esse arbitramur: nunc quomodo argumentis uti conveniat, paucis absolvemus.

*De usu Argumentorum.*

C A P U T XXV.

**O**Mnis igitur argumentatio, quæ ex his locis nascitur, quæque ab oratore sumitur, aut ita necessaria est, ut probandum sit; aut ita probabilis, ut nulla ei necessitas adjungatur. Nam quæ tantum necessaria est, & assensione non indiget, ea ma-

mathematicarum est disciplinarum propria. Necessaria igitur, quæ assensionem hominum habet adjunctam, tractetur aut per complexionem, aut per enumerationem, aut per simplicem conclusionem. Complexio est, quæ ex duabus partibus propositis, utramque vel interrogando, vel negando concludit. Interrogando sic: Si virtus bona est, cur fugis? Si mala, cur laudas? Negando: Si virtus bona est, non est fugienda: Si mala, non est laudanda. Enumeratio, quæ multis propositis partibus, ceterisque refutatis, extremam necessario probatam relinquit hoc modo: Hunc librum necesse est vel emptione, vel commodato, vel dono, vel hæreditate, vel furto habueris; nam ante hac non habuisse te illum plane fateris; sed neque emisti, quia pecuniam nullam habebas: neque ab amicis aut commodato, aut dono accepisti, quoniam nemo in hac civitate te novit omnino: neque rursus aut testamento, aut hæreditate cujusquam habuisti, quum ex tuis defunctus sit nemo; relinquitur ergo, ut illum ex furto habeas. Simplex conclusio fit hoc modo: Si quo tempore tu ad me Romam scripsisti, ego Romæ non fui, accipere tuas literas profecto non potui. Ea vero argumentatio, quæ solam assensionem requirit, frequentiusque in epistolam venit, per  
sim-

simplicem assumptionem, & conclusionem, quod enthymema appellari diximus: item per inductionem, atque exemplum, frequentissime tractatur. Nam ratiocinatio, nisi necessitatem habeat, facillime refellitur. Omnis autem assensio, vel a naturæ ordine, vel ab hominum opinione, vel a rerum comparatione colligitur. Naturæ ordo & sensus omnes, & jura naturæ comprehendit. Nam quæ sensu aliquo percipimus, his facillime assentimur, ut quæ videmus, audimus, tangimus. Item quæ naturæ consentanea sunt, ut Pater est, liberos igitur amat: & quæ sunt generis ejusdem. Quæ opinione hominum constant, ea partim legibus probantur, ut qui hominem occiderit, morti subjacere. Partim sententiis hominum, ut quæ Princeps, aut Senatus decrevit, ea servanda esse. Partim consuetudine, ut majoribus natu assurgendum. Partim communi quodam hominum consensu; ut bonis præmia, malis poenas post mortem esse præparatas. Quæ autem ex comparatione probantur, ea vel contrariam rationem exigunt, vel similem, vel majorem, vel minorem: quarum partium omnium exempla superius posuimus. Hoc autem universum, quod probabile appellamus, Cicero in plures species subtilius dividit, quas quoniam ad hanc infi-

stitutionem non pertinent, prætermiffi. Quis autem ordo in argumentis collocandis fervandus fit, præcipi fatis certe non poteft; non enim vel in omnibus orationibus, vel epiftolis, vel fcriptis unus, idemque femper eft fervandus. Aliæ enim cauflæ leviffima quæque argumenta in principio maxime defiderant, ut confolationes, quæ fenfim irrepere, non ftatim irrumpere per vim in hominum mentem debent. Aliæ a firriffimis argumentis incipiendæ funt, ut crimina, quæ minime videmur poffe defendere. Illud tamen perpetuo tenendum eft, ut optimis in fine argumentis utamur; nam & quæ firriffima funt ad faciendam fidem plurimum conferunt: & quæ ultimo loco funt dicta, memoriæ audientium magis inhærent. Leviora vero in medio commodiffime collocantur; nam & antecedentibus, & confequentibus vim non mediocrem addunt, & ipfa firmioribus utrinque munita, validiora, gravioraque redduntur. Illud in omni argumentatione fervandum in primis, tenendumque eft, ut varietati inferviamus: ut neque iifdem argumentorum modis femper utamur: quale eft, fi femper inductione, aut ratiocinatione uteremur. Neque eadem argumenta eodem femper modo conficiamus; quale eft, fi mater eft filios

E

di-

diligit: mater autem est; filios igitur diligit. Sed nunc a conclusione incipiamus hoc modo: Diligit sine dubio liberos, quia mater est; nam diligi a matribus liberos naturæ consentaneum est. Nunc ab assumptione hoc pacto: Quia mater est, diligere eam liberos credibile est: quod omnibus matribus est naturale, ac proprium. Ita denique tum argumentorum formas, tum modos, contextusque varietur, ut ipsa varietas homines ad nostra legenda, audiendaque alliciat. Neque in omnibus causis, sive negociis, omnes, quos supra memoravimus, aut quæremus, aut assumemus: sed eos potissimum deligemus, qui & optimi, & maxime necessarij ad nostram causam esse videbuntur. Ac de confirmatione quidem satis diximus, nunc de confutatione differamus.

*De Confutatione.*

C A P U T XXVI.

**C**onfutatio est alienorum argumentorum, dictorumve destructio. Ea duplex est: generalis, in qua tota versetur oratio necesse est: quæ advocatorum, sive patronorum, & eorum, qui causas defendunt, propria est; & specialis, sive parti-



ticularis, quæ ad singulas orationis, vel sermonis partes pertinet: quæ propria est epistolarum. Utraque tamen ab iisdem locis oritur, quibus oritur confirmatio; sed ex contraria ratione; nam quibus locis illa ad confirmandum, iisdem hæc ad infirmandum utitur. Sed quantum differt ab oratione epistola, tantum prioris confutationis ratio a posteriore differt; illa enim adversarium habet; hæc non habet; illa in criminibus tota versatur; hæc in causis plerumque honestissimis: illa ea tantum, quæ dicta sunt, confutat; hæc etiam quæ dici possent, investigat: illa objectis plerumque ex tempore respondet; hæc ad respondendum satis oculi habet: illa denique futurum iudicium pertimescit; de hac nulum futurum iudicium est: proptereaque defendendi, quam accusandi rationem veteres difficiliorem putabant, quod accusandi ratio simplex esset, defendendi multiplex. Nos ita omissa illa patronorum confutatione, de qua satis, abundeque a Cicerone, & Quintiliano tractatum est; de hac, quæ ad nostram institutionem magis pertinet, breviter disseramus. Hæc igitur in deliberativis causis, hoc est in suadendo, & dissuadendo tota fere posita est; neque quid dictum sit, tantum considerat: sed multo magis, quid dici possit, explorat.

Quid autem dici possit, per eosdem, quos supra diximus, locos personarum inquirat. Personarum quidem, ut si te cohorter ad studia literarum, ostendamque te neque, aetatem, neque ingenium, neque aliud quicquam, quod in personis consideretur, quo minus id facias, excusare posse. Rerum vero, si neque tempus, neque locum, neque facultates ad eam rem tibi deesse significem. Confutandi vero duplex omnino ratio est, bonorum, & malorum. Utraque & vera, & falsa esse possunt. Bonorum ratio ita tractanda erit: primum, ut ostendamus, quæ ei, ad quem scribimus, bona videntur, mala esse: id si non possumus; non esse bona, aut non magna bona esse contendamus: deinde majora, si possumus, aut similia proponamus, aliquodque his commodum adjungamus: ut si par bonum ex utraque re consequatur, hoc certe illi præferendum sit, quia facilius, quia commodius, quia propinquis, amicisque acceptius, & quæ sunt generis ejusdem. Mala contra ita tractanda sunt, primum ut bona, si possumus, esse dicamus, quæ ille mala existimet: deinde non mala, vel non tam magna, quam ille, vel vulgus opinetur: postremo majora illi, vel similia mala opponamus, quæ ille evadere non possit, factaque malorum comparatione, hæc aliqua

qua ex parte minuemus : ut si moriendum sit, Romæ, atque inter suos mori, satius esse dicamus. Eadem erit commodorum, & incommodorum ratio : quæ ut bona, vel mala ab hominibus expetuntur, & fugiuntur. Hæc inter se sæpe comparantur, & bona malis, & mala bonis confutantur : ut quum id, quod ille bonum appetit, fugiendum esse dicimus ratione majoris mali, quod inde consequatur : aut quum parvum malum non abhorrendum esse contendimus, quum inde bonum maximum profiscatur. Quam quidem universam confutandi rationem apertissime, ac latissime executus est Cicero tum sæpe alibi, tum vero, quum M. Marcello reditum pluribus epistolis suaderet ; ille enim omnia commoda, ac incommoda exilii cum commodis, & incommodis in patria viventis apertissime comparat, ostenditque omnibus rationibus patriam exilio præponendam. Qui locus quoniam latissime patet, & intellectu facillimus est, pluribus a me verbis non explicabitur, ne magis Ciceronis epistolas interpretari, quam tradere scribendi rationem videar. Accidunt autem epistolis nonnunquam etiam crimina, siue calumniæ vel ad nos, vel ad amicos pertinentes, quæ a nobis per epistolam vel defendendæ, vel refellendæ sunt. Crimen

defendere qui volet, si factum sit, cur id fecerit, ostendat necesse est. Si causam probabilem non habebit, crimen neget: si negare totum non poterit, partem neget; & aut non esse id factum, cujus arguatur: aut non eo modo factum esse contendat. Sin id quoque non poterit, culpam omnem in ætatem, in ignorantiam, in negligentiam, in occupationes, in socios, in alia denique omnia transferat, quæ aut levare factum, aut veniam impetrare aliquo modo possunt: quæ in epistola decent, in oratione non decent. Alia præterea crimina leviora, alia minora molliendo, excusando, minuendo facimus: quædam vero despicimus, ac pro nihilo habemus: quædam per jocum, & cavillationes irridemus: nonnulla in illum ipsum, qui objecit, retorquemus: quod lepidissime fecit Cicero, quum ad Curionem scribens ait: Equidem neminem prætermisi, quem ad te perventurum putarem, cui literas non dederim: abs te vero bis terve ad summum, & eas perbreves accepi. Quod si pergis iniquus esse in me iudex, eodem ego te crimine condemnabo. Ambigua vero omnia in meliorem partem accipiuntur, ita ut quæ ei, ad quem scribimus, vel gravia, vel luctuosa, vel dura videntur, ea nos graviorum comparatione, quæ ille aut tulerit, aut

aut nisi hoc ei accidisset, in posterum potuisset ferres leviora, tolerabilioraque reddamus: quod optime fecit Sulpitius, qui ut Ciceronem de morte filiae consolaretur, ei patriæ, dignitatis, honestatis, ceterarumque rerum, quæ multo ei debebant esse, quam liberi, cariores, jacturam commemorat. Sed hæc omnia facile consequemur, si quam supra commemoravi bonorum, malorumque comparisonem recte adhibuerimus.

*De Dissolutione argumentorum.*

CAPUT XXVII.

**Q**Uoniam autem, qua ratione fierent argumenta, supra docuimus, consentaneum videtur, qua ratione dissolvantur, etiam docere: ut quæ vitia in illis esse possunt, ea & ipsi in nostris argumentis magnopere fugiamus, & in alienis cognita reprehendere facilius, & confutare possimus. Qui quidem locus tametsi est ita late a Cicerone, dilucideque tractatus, ut a nobis neque copiosior, neque dilucidior effici possit: eum tamen, ne vel ignorasse, vel neglexisse videamur, quam brevissime attingemus. Omnis igitur argumentatio dissolvitur, quum aut aliqua pars ipsius, aut

tota vitiosa esse ostenditur : aut contra eam alia vel firmior , vel æque firma argumentatio collocatur . Partes ejus velut minime probabiles , vel ut minime necessariae reprehenduntur . Minime probabilis argumentatio fit , quum vel falsa proponimus : ut nemo est , qui non pecuniam , quam sapientiam malit ; constat enim multos contra fecisse : vel incredibilia , ut si avarus pecuniam se contempsisse dicat . Item minus probabilis fit , quum id , quod a plerisque fit , ab omnibus fieri dicimus , ut omnes opibus , quam virtutibus magis student ; vel contra , quum id , quod a paucis fit , a nemine fieri affirmamus , ut nemo est , qui virtutis adipiscendæ gratia opes , honoresque contemnat , quod etsi non omnes , quidam tamen faciunt . Minus etiam probabilis argumentatio redditur , quum id , quod proposuimus , vana , aut infirma ratione probamus . Vana ratio est , quæ vel falsa est , ut Poëtæ legendi non sunt , quia homines a religione dehortantur : vel inutilis , & contemnenda , ut Philosophia fugienda est , quia macilentos homines reddit . Infirma vero ratio est , quæ causam minus convenientem propositioni subjicit , ut utile jejunium est , nam ego hodie jejunare institui ; hic quare utile jejunium sit , non probo : sed quid ego sim factururus ,  
com-

commemoro . Item infirma est , quum idem per idem , sed aliis verbis probamus , ut magnum malum est avaritia : quia multis incommodis afficit homines pecuniæ cupiditas . Item infirma est , quum id , quod proposuimus , omni ex parte non probamus , ut expetenda est sapientia : quia sapientes castitatem amant ; non enim ob hoc solum expetenda sapientia est . Minus præterea probabilis atq̃uentatio redditur , quum similitudines , & comparationes ad rem , de qua agimus , minime accommodatas esse ostendimus . Id autem fit , quum ostendimus eas differre genere , specie , vi , magnitudine , tempore , loco , persona , opinione . Deinde utriusque rei genus , & differentiam demonstramus , quo modo confutantur maxime inductiones , & exempla , quæ similibus , & comparationibus maxime utuntur . Minus etiam necessaria , & propterea vitiosa argumentatio esse ostenditur , cujus complexio , vel simplex conclusio reprehendi potest . Complexio erat , quæ ex utraque parte concludebatur ea vel ex utraque parte convertitur , vel ex altera reprehenditur . Convertitur ex utraque , quale est pulcherrimum apud Gellium exemplum Eyathli , qui certa mercede causarum agendarum rationem a Protagora insigni ejus artis magistro hac con-

conditione didicerat, ut ei merces tum deberetur, quum primam in foro causam vicisset. Magister suo tempore mercedem petit, & negantem discipulum in jus vocat. Utitur autem adversus eum argumento: Debes mihi omnino mercedem, sive vincas causam, sive perdas; nam si vincis, debes, quia vicisti primam causam: si perdis, debes, quia a iudicibus condemnaris. Discipulus contra argumentum convertit hoc modo: nihil tibi debeo, sive vincam, sive perdam; nam si vinco, non debeo, quia a iudicibus non condemnor: si perdo, rursus non debeo, quia primam causam, ut inter nos convenerat, non vinco. Altera ex parte reprehenditur complexio sic: Etiam si causam perdam nihil debeo tibi, iudices enim me non pecuniæ, sed ignorantiae condemnabunt. Enumeratio autem reprehenditur, quum aliquod in ea membrum præteritum est hoc modo: quoniam habes hunc equum: eum aut emptione, aut hæreditate, aut dono habeas, aut certe furto abstuleris, necesse est: si dicamus donatum, aut ex hostibus captum, totum argumentum infirmabimus. Reprehenditur etiam, quum aliquid ex membris negatis probamus: ut in eodem exemplo poterit ostendi, equum hæreditate venisse, quod ille negaverat. Similis conclusio re-

prehen-

*complex*



prehenditur, quum aliud sequi potest ex nostra propositione, quam quod ipsi volumus, ut si lux est, dies est; potest enim ex luna, vel ex igne lux esse, neque lux necessario diem facit. Conclusiones vero argumentorum omnium reprehendi possunt, si vel non efficiant id, quod propositum est, vel cavillationem, ambiguitatemque efficiant: non efficiunt, quod propositum est hoc modo: Si venisses domum meam, vidissem te: non vidi, ergo non venisti; conclusio hæc non necessario sequitur, nam potes venisse clam me. Per ambiguitatem concludunt argumenta hoc modo, ut in eodem exemplo versemur: Si venisses domum, vidissem te: non vidi, ergo non venisti: non autem vidi, non quia non veneris, aut clam me veneris, sed quia cæcus sum, in qua significatione tu meum argumentum non intelligebas. Per cavillationem sic: Quod non perdidisti, habes: non perdidisti caudam, ergo caudam habes. Atque his fere modis argumentorum singulæ partes dissolvi possunt. Totum vero argumentum reprehenditur, quum aperte falsum est, ut quicumque pecuniam contemnit, stultus est: Diogenes pecuniam contempsit, stultus igitur fuit. Aut quum tam nobis, quam adversariis convenit, ut qua causâ confidebam, brevis tui. Aut quum

quum levem excusationem proferimus, ut si in mentem venisset, hoc nunquam commissem. Item quum remotas, & minus longinquas causas repetimus: ut si Jupiter rem cum Leda non habuisset, Ilium nunquam eversum fuisset. Item quum rem, quampiam vel male definimus, vel male dividimus. Definitio mala est, quæ per proprium genus, & proprias differentias non fit, ut si velim definire factiosum civem: Hic factiosus est, qui malus, & inutilis civis est, quæ definitio non magis ad factiosum, quam ad dissolutum pertinet. Item mala definitio est, quæ rem definendam non omni ex parte complectitur, ut fortitudo est constantia in adversis, quæ definitio partem fortitudinis, non totam complectitur. Mala vero divisio est, quum plura, vel pauciora, quam opus sit, membra facimus, plura sic: tria hominem beatum reddunt, virtus, scientia, & sapientia. In hac divisione sapientiam adungere necesse non erat, nam virtus, & scientia sapientiam complectuntur. Pauciora sic: duo potissimum homines ad scelera compellunt, libido, & avaritia; hic omissa sunt multa, ut ambitio, gula, gloriæ cupiditas, & alia. Reprehenditur etiam argumentum, quod vel dubia, vel inconvenientia dubiis, & inconvenientibus probat, dubia, ut

ut non occidi hunc, quia neminem unquam occidi, quum utrumque dubium sit. Inconvenientia, ut si quis suum scelus magnorum virorum exemplo tueatur. Item quum rem perspicuam pluribus verbis claram facimus, ut si Orestem accusans, occisam ab eo matrem, quod perspicuum est, coner ostendere. Item quum rem, de qua causa, & controversia est, tanquam concessam assumimus, ut si Ulyssē accusans iniquum esse dicam, Ajacem fortissimum hominem ab ignavissimo esse occisum: quod adhuc non constat. Item quum rem turpem, & iniquam, & indignam tempore, loco, personisque commemoramus. Item quum rem auditoribus invisam proferimus, ut si apud coelibes rem uxoriam laudem. Vel cum rem ab auditoribus, aut lectoribus factitatum detestamur, ut si apud Annibalem perfidiam, vel urbium expugnationem detestor. Item quum eadem de re diversi inconstanterque loquimur, ut si quis amico tantum benevolentiae causa favere se dicat, posteaque subjungat, sperare, tamen se aliquod ex ea re commodum consequuturum. Illa quoque argumenta vitiosa sunt, & facile confutantur, quae ad institutum omni ex parte accommodata, non sunt, ut si plura polliciti pauciora exequamur. Quod in vitium incidunt hi,  
qui

qui e tribus partibus, quas in divisione proponunt; tertiam plerunque linquunt. Item si quum totum debeamus probare, partem tantum probemus, ut si quum omnes senes avaros probare velim, unum, aut alterum avarum fuisse ostendam. Item si, omiſſa re, quæ in iudicium, aut consultationem veniet, alia proferamus, vel defendamus, ut si quis de bello gerendo dicturus pacem laudet, aut si quis ambitus accusatus se fortissimum manu semper fuisse defendat. Item si res ipsas ex vitiis vituperamus, ut si quis ex unius Poëtæ vitiis totam poëticen detestetur. Item si laudare quempiam instituerimus, & de felicitate ejus, non de virtute dicamus. Item si rem cum re ita comparaverimus, ut laudare alteram posse non putemus, nisi alteram vituperaverimus: quod plerique hac tempeſtate faciunt, qui laudare se hunc Pontificem posse non putant, nisi antecessores vituperent. Item, si quum de certa re dicendum sit, de communi, & toto genere dicamus, ut si iustitiam laudaturus, de ipso genere virtutis dicam. His fere de caussis argumenta reprehendi solent, quas quidem latius fortasse explicavi, non solum quia vitiosam epistolam, sed quia omnia quoque scripta, atque adeo sermonem ipsum vitiosum reddunt. Neque vero id tan-

tantum feci, ut in aliorum scriptis hæc vitia cognoscamus, sed multo magis, ut ipsi caveamus. Reliquum erat in confutatione, ut contra adversarii argumentationem, aliam vel firmiorem, vel æque firmam collocaremus: quod quidem tum ad deliberationes, tum ad consolationes est maxime necessarium. Id fit, si quum aliquid adversarii utile dicent esse, nos id, quod defendimus, esse honestum dicamus: aut quod illi quibusdam, nos omnibus, vel multis utile, aut honestum, aut acceptum esse ostendamus. Denique id optime fit illa, quam supra docuimus bonorum, malorumque comparatione. Sed de confutatione satis. Nunc ad conclusionem transeamus.

*De Conclusionē.*

## CAPUT XXVIII.

**C**onclusio est artificiosus terminus totius non orationis modo, sed cuiusvis etiam materiæ: quæ a nobis vel dicta, vel scripta est: in qua auditoris vel lectoris animum ad id, quod volumus, summa vi trahere nitimur. Ejus alia in oratione, alia in epistola ratio est. Oratio enim unum aliquid sibi dicendum proponit; epistola plerum-

runque multa præscribit : illa auditorem , hæc lectorem habet : illa iudicium plerunque expectat , hæc nunquam : illa certis tantum locis , id est quatuor , conclusione uti potest , in principio , secundum narrationem , secundum firmissimam argumentationem , in fine totius orationis : hæc multis , & incertis locis , hoc est ubicunque aliqua materia finitur conclusione uti potest . Quapropter neque ita longa , neque ita artificiosa conclusione utetur epistola , præsertim si pluribus de rebus scribatur , aut si negocia , vel res leviores contineat . Igitur si epistola unica de re neque valde longa , neque valde gravi scribatur , satis erit in conclusione , quod velimus , exponere brevi vel amplificatione , vel commiseratione adjecta : quibus de rebus paullo post dicemus . Si gravior erit , pro qualitate materiæ conclusionem adhibebimus . Aliam enim commendatio , aliam consolatio , aliam simplex narratio conclusionem habeat necesse est . Sin plura vel præcepta , vel negocia continebit epistola , & in singulis brevi conclusione , & in fine omnium enumeratione aliqua erit utendum . Quod Cicero facit ad Lentulum in ea epistola , cujus initium est . Perjucundæ mihi fuerunt literæ tuæ , ait enim : Accepisti quibus rebus adductus , quamque rem , causamque de-

defenderim : quique meus in republica sit pro mea parte capeſſenda ſtatuſ . Illud in omni epiſtola ſervandum erit , ut ad ea , quæ diximus , concluſionem applicemus , & lectoris animum cum in ceteris partibus , tum in hac vel maxime nobis conciliemus . Quoniam autem & enumeratione , & amplificatione , & commiſeratione utimur interdum in epiſtola , hiſ de rebus ſummatim quædam attingemus .

*De Enumeratione .*

C A P U T XXIX.

**E** Numeratio eſt brevis earum rerum , quæ dictæ ſunt , repetitio , quæ a Græcis ἀνακεφαλαιώσις dicitur , ea ita utemur in epiſtola , ut rerum tantum capita breviter repetamus , ne res ſingulas longius proſequamur , ut ad ea , quæ legit , animus auditoris reducatur , non redintegretur oratio . Neque vero non modo ſemper enumeratione utendum eſt , ſed varianda tum ratio , tum oratio , ne vel afferat lectori ſatietatem , vel artificii ſuſpicionem pariat , quo nihil magis fugiendum eſt . Varietas autem comparabitur tum ex verbis , tum ex ſententiis hoc modo : Scripſi ad te de hac , & illa re : habes quæ ſcire cupiebas :

F

hæc .

hæc habui, quæ de his, & illis rebus ad te scriberem: habes epistolam bene longam; quæ quidem plurima legenti, & cogitanti occurrent. Oratio per introductam vel rem, vel personam, interdum enumeratione utitur: ut, Si Respublica loqui posset, hæc, & hæc diceret: aut, Si pater ipse iudicaret, quid diceret, quum hæc probarentur? Sed his modis rarissime, vel nunquam epistola utitur.

*De Amplificatione.*

C A P U T . X X X .

**A**mplificatio est oratio ex communibus locis sumpta ad rem augendam, vel exaggerandam. Loci communes sunt, qui ad omnes causas accommodari possunt: hi plurimi sunt. Nos paucos, & ad institutionem nostram maxime necessarios profereamus. Ex his primus, ac præcipuus est ab autoritate Dei in primis, & eorum, quos Sanctos appellamus, deinde Pontificum, regum, & principum, civitatum, populorum, magistratum, præterea sapientum, jurisconsultorum, legum, ceterarumque tum personarum, tum rerum, quæ summam inter homines auctoritatem habent: quum ostendimus, quid de re, de qua agimus,



mus, fenserint, dixerint, fecerint, curaverint. Alius est locus, per quem ostendimus, ad quos ea res pertineat, utrum ad omnes, an ad superiores, de quibus modo diximus, an ad pares amore, fortunis, corpore; an ad inferiores ætate, fortuna, ceterisque rebus: rursus ad optimum quemque, an ad quemvis: ad vivos, an ad defunctos: ad parentes, an ad posteros. Alius est locus, per quem quid boni, aut mali ex ea re sit eventurum, ostendimus, si hoc nobis, vel aliis sive concedatur, sive negetur: nam in utramque partem loci communes accipi possunt: quod miror esse a Cicerone, quum de his scriberet, prætermisum. Alius locus est, per quem multos hoc exemplo vel ab ea re territum, vel ad eam rem incitatum iri, sive illa bona, sive mala sit, demonstramus. Alius est, per quem ostendimus cetera vel male facta corrigi; aut aboleri, vel bene facta in memoriam redire, posse, si hoc recte factum, aut judicatum fuerit; si contra evenerit, male facta superiora in memoriam reditura, antea facta bona omnia peritura. Quo loco, ut id, quod volumus, efficiamus, aliarum rerum comparisonem uti poterimus. Alius locus est, per quem ostendimus voluntariæ rei, si mala sit, nullam satis dignam poenam: si sit bona, nullam mercedem, vel laudem satis di-

quam reperire posse. Alius locus est, per quem ostendimus, ejus generis id factum esse, ut ejus causa, vel parvæ res sæpe crescant, vel maxime dilabantur: ex quo item maxima bella vel oriantur; vel extinguantur. Alius locus est, quo factum in alterutram partem verbis exaggeramus, hominesque ob id, quam ocysissime vel puniendum, vel remunerandum adhortamur. Alius est, quum peccata inter se, vel benefacta, comparamus, ostendimusque illud, de quo agimus, cetera superare. Alius locus est, per quem negotium breviter ponimus ante oculos, ut geri videatur: & quæ vel bona, vel mala consequi eam rem soleant, enumeramus, ut earum rerum enumeratione negotium ipsum augeatur. Alius est, per quem petimus ab hominibus, ut res nostras ad sese referant, & de se, ac de suis geri putent, idque de nobis, ac de nostris parentibus, liberis, uxoribus, ac de rebus omnibus statuant, quod de suis statui velint. Alius est, per quem ostendimus hoc facinus etiam hostibus admirandum, vel detestandum videri. Atque ab his potissimum locis communibus amplificatio sumi solet. Proprios causæ scriptor ipse judicabit. Neque vero omnibus his semper est utendum, sed ut quisque ad nostram causam maxime faciet. Illud in primis videndum est, ut  
hos

hos locos, five ad laudem, five ad vituperationem, five ad indignationem, five ad consolationem, five ad aliam rem quampiam apte convertamus, ne in conclusione tantum, sed in ceteris quoque partibus, præsertimque in argumentationibus amplificationem accommodate collocemus.

*De Miseratione.*

CAPUT XXXI.

**M**iseratio, five misericordia est affectus animi, per quem alienos casus dolemus, & ad præstandum illis, quod petunt, inclinamur. Eam in aliis commovebimus, si ostendemus variam fortunarum commutationem, & bona, & in quibus fuimus, cum malis, quæ patimur, & passuri sumus, comparabimus: si commoda, quæ sperabamus, & incommoda, quæ nos consequuntur, proferemus: ut in morte filii, propagatio sobolis, spes bonorum, solatium senectutis: contra, domus everfio, desperatio, orbitas. Item si turpia, atque indigna genere, ætate, dignitate nostra, ad quæ devenerimus, vel deventuri sumus, proferemus. Si calamitates nostras singulas ante oculos ponemus, ut non audire eas, aut legere homines, sed videre videantur.

tur. Si rogabimus, de se, ac de suis conjecturam faciant, cogitentque posse eadem omnibus accidere, quæ nobis acciderint: & quum nos vident, parentum, liberorumque suorum, sui denique ipsorum recordentur. Item, si orationem vel ad absentes, vel ad mortuos, vel ad res sensu carentes, nobisque charissimas, ut patriam, domum, & cetera ejus generis, convertemus. Item, si disjunctionem a rebus nobis charissimis, si patriæ, parentum, ceterorumque nobis conjunctissimorum amissionem, si orbitatem, solitudinem, si corporis, & fortunæ incommoda proferemus. Item, si conqueremur nos ab illis potissimum contumelia, & injuria affici, qui vel nos amare, & juvare maxime debeant, ut propinqui: vel sint de nobis optime meriti, ut amici, clientes; vel indigni sint, qui nos offendant, opprimant, subjiciant, ut servi, rustici, plebei, atque obscuri homines, in primisque vitiosi. Item, si supplicibus, & lacrymosis verbis orabimus, ut nos respiciant, nostræ necessitati ignoscant, subveniant, nostri misereantur: si dicemus nos non nostra, sed parentum, aut liberorum, aut aliorum, qui ex nobis pendeant, causa moveri. Postremo, si ostendemus animum cum in alios misericordem, tum vero constantem, & malorum omnium patientem, atque

atque ad omnia paratum habere, semperque habituros: & quicquid evenerit forti, atque excelso animo toleraturos, nam fortitudo, & constantia in viro, præsertim gravi, plus interdum ad misericordiam proficit, quam humilitas, & supplicatio. Atque his potissimum locis misericordia commovetur. Verum ut in amplificatione diximus, non sunt omnes in omnibus causis aut quærendi, aut collocandi: sed est ex his optimus quisque, & ad nostram causam, accommodatissimus quisque deligendus. Commiserationem enim brevem esse oportet: nam, ut ex rhetoris Apollonii sententia scribit Cicero: Lacryma nihil citius arefcit. Sed quoniam satis multa de his, quæ polliciti sumus, explicavimus, huic libro modum imponemus.



LIPPI BRANDOLINI

*Ad Rmum Patrem, & Dñum,*

D. FRANCISCUM

PICOLOMINEUM,

Cardinalem Senensem,

De Ratione scribendi,

LIBER SECUNDUS.

CAPUT I.



**I**N libro superiore, sapientissime Pater, quæ esset epistolarum inventio, quot, & quæ earum genera, primum exposuimus. Deinde, quoniam sunt tria causarum genera, demonstrativum, deliberativum, judiciale, quas causas recipere posset epistola, demonstravimus. Tum de sex partibus orationis, exordio, narratione, divisione, confirmatione, confutatione, conclusione, ut visum est, breviter disseruimus, easque partes ad scribendi rationem accommodavimus. Nunc, quoniam e tribus illis causarum generibus unumquodque epistolam reci-

recipere posse supra diximus, consentaneum esse videtur, ut de singulis aliquid breviter attingamus: & qua ratione unumquodque in epistola tractari conveniat, aperiamus: deinde ad ipsas epistolarum species descendemus, & quo singulæ pacto tractandæ sint, quantum poterimus, duobus his libris aperiemus. Postremo de dispositione, atque elocutione, quæ maxime necessaria videbuntur, in tertio libro paucis explicabimus, ut hæc, quam suscepimus de scribendi ratione institutio, quo ad fieri potest, perfectæ, absolutaque sit. Nunc igitur ad causarum genera revertamur. Ea quoniam tria esse supra diximus: judiciale, quod & difficillimum est, & minime nostris temporibus usitatum, primum absolvemus: neque vero id totum superstitiosius exequemur. Nam & longissimum est, & in usum scribendi non ita frequenter venit: sed eas tantum illius partes, quæ ad scribendum accommodari posse videbuntur, explicabimus, reliquas summatim pertransibimus.



*De constitutionum generibus.*

## CAPUT II.

**I**N omni causa primum omnium constitutio invenienda est, ut quo pacto causa ipsa tractanda sit, facilius cognoscamus. Ea, ne in omnibus decipiamur, ab aliis status causæ, ab aliis quæstio, ab aliis caput, Græce vero *σύνεσις* est appellata. Est autem constitutio, prima deprecatio defensoris, cum accusatoris insimulatione conjuncta: vel, ut Quintiliano placet, prima causarum conflictio. Est enim constitutio, sive status, ubi primum propter accusatoris, & rei discordiam causa constitit: ut, Fecisti; non feci; hic causa consistit, an fecerit: vel, Fecisti; feci, sed recte feci, hic causa stat, an recte fecerit. Quanquam, autem propria est judicialis generis constitutio, potest tamen in alia etiam genera cadere: in demonstrativum, ut quum quærimus, an is quem laudamus, eo tempore, vel eo loco, vel apud illos laudandus sit: item, an ejus magnitudo nostris laudibus possit augeri: item quum quærimus, quanta ejus virtutibus præmia: vel in vituperatione, quantæ ejus vitiis poenæ debeantur, atque in his rebus omnis nostra versatur  
ora-



oratio. In quo genere Cicero scribit Cæsarem in Catonem omnibus constitutionibus esse usum. In deliberativum genus cadit constitutio, quum disceptamus, an honestum, an utile futurum sit id, quod in consultationem venit; item quum disputamus, an fieri possit, de quo quæritur: ut, an everti possit Carthago, etiamsi ejus everasio a republica futura sit. Judicialis generis exempla sunt passim: ut, quum Ulysses accusatus, quod Ajacem interfecerit: aut, quum Orestes accusatus, quod matrem occiderit, jure id se fecisse defendit. Constitutio est in priore exemplo, utrum fecerit. Hoc inferius genus quanquam rarius, nonnunquam tamen etiam in epistolam venit: ut cum apud amicum, vel apud principem negligentia, vel ea, quæ obijciuntur crimina, per epistolam excusamus. Item quum aliquod nostrum factum, vel innocentiam nostram defendimus, quo in genere pulcherrimæ Ciceronis, & ad Appium Pulchrum, & ad Q. Metellum, & ad alios quamplurimos epistolæ reperiuntur. In omni autem causâ constitutio invenitur, quum consideramus id, de quo quæritur, an sit, quid sit, quale sit: hic ex tribus temporibus considerari potest, præsentem, præteritum, futurum: ut an sit factum, an fiat, an futurum sit: & eodem modo in ceteris, quum

quum quærimus an sit, conjectura est: quum quærimus, quid sit, definitio: quum quærimus, quale sit, qualitas appellatur. Quoniam autem, quum factum defendimus, aut legibus, aut rationibus defendimus, qualitas legalem, sive legitimum, & juridicalem statum efficit. Possunt igitur esse quatuor omnino status, sive constitutiones: Conjecturalis, qua quæritur an sit: definitiva, qua dubitatur quid sit: legalis, sive legitima, qua factum legibus, scriptisve defenditur: juridicialis, qua factum rationibus comprobatur, atque hæc sunt constitutionum genera. Nunc quo singulæ modo ad judicalem causam, quam primam explicandam proposuimus, accommodari debeant, summatim dicemus, a conjecturali potissimum incipientes.

*De conjecturali constitutione.*

### C A P U T III.

**C**onjecturalis constitutio est, in qua utrum aliquid factum sit, quia non constat, signis, & conjecturis investigatur. Ea quum in causam inciderit, is qui locum accusatoris obtinebit, narrationem ita suspicionibus sparget, ut omnia rei facta, dicta, consilia, in ejus, de quo agitur, criminis

minis suspicionem trahat. Qui defensoris loco uetur, plane, simpliciterque narrabit, suspensionesque omnes quantum poterit, removebit; habet hæc constitutio partes sex: probabile, collationem, signa, argumenta, consecutionem, approbationem. Probabile est, per quod ostendimus expedisse reo peccare. Id consideratur in re, & persona, sive in causa, & vita. In causa accusator considerabit, quæ commoda inde reus consequi, quæque incommoda evitare potuerit: eaque omnia reum secutum esse ostendet. Reus contra, se nihil commodi adipisci, nihil incommodi ex ea re vitare potuisse demonstrabit: imo aut incommodum, aut dolorem se ex eo facto coepisse ostendet. In vita, accusator anteaquam rei vitam in erimen, aut suspicionem advocabit, ut id, de quo quaeritur, ceterorum criminum exemplo probetur. Id si non poterit, dicet reum cetera vitia dissimulasse, atque occultasse, hoc celare præ turpitudine non potuisse. Reus vel anteaquam vitæ probitatem, atque innocentiam asferet: vel si id non poterit, quæ olim non fecerit, ætati, imprudentiæ, ignorantiaque ascribet: id vero genus flagitii se magnopere semper evitasse ostendet. Collatio est, in qua accusator per comparisonem ostendet, alium neminem id facere potuisse:

se: huic & commodum, & facile, & necesse pene fuisse. Reus & has ab se suspiciones omnes, quantum poterit, removebit: & alios iisdem de causis id facere potuisse, ostendet. Signum est, quod facultatem rei perficiendæ quæsitam ostendit. In eo considerabitur locus, celebris, an desertus: publicus, an privatus: commodus, an incommodus: item tempus, ut quæ pars anni, diei, noctis spacium, utrum satis magnum ad rem perficiendam fuerit; occasio, sive opportunitas, quæ fuerit expectata, exquisita, aut omiſſa: item quæ spes perficiendi, quæ celandi criminis fuerit, quæ quidem omnia accusator augebit, reus minuet, atque attenuabit. Argumentum est, quod certiora signa rei faciendæ, vel factæ ostendit: faciendæ, ut quum ante tempus apparatus, instrumenta, & res ad id necessariae proferuntur: quum reus fecisse, dixisse aliquid ad rem perficiendam per se, vel per alios demiratur. Factæ rei argumenta sunt, quum ipso facinoris tempore, vel paullo post, ubi reus, aut cum quibus fuerit, aut quo habitu, vultu, gestu fuerit, explicatur. Quæ quidem pro causæ qualitate, tum ab accusatore, tum a reo vel obijciuntur, vel refelluntur. Consecutio est, quum quæritur, quæ signa nocentis, & innocentis rem ipsam consequi soleant. In ea accu-

accusator rei fugam, latitationem, timorem, & his similia proferet. Reus innocentiam suam ex præsentia, conscientia, rebusque contrariis comprobatur. Approbatio est, qua suspicionem injectam locis tum propriis, tum communibus, vel confirmamus, vel infirmamus. Loci proprii sunt, quos secum causa quæque adducit, de quibus privatim præcipi nihil potest. Communes sunt a testibus: ut quum rem nostram juratis testibus comprobamus, de eorumque fide, autoritate, constantia, vita, plura dicimus. Contra testes, quum eos ab his omnibus partibus confutamus: eosque vel scire id non posse, vel cupide id dicere, vel corruptos, vel parum idoneos esse demonstramus, suspensionesque ad eam idoneas ex supra dicta divisione afferimus. Contra quæstiones locus est, quum labefactari, atque infringi tormentis ingenuorum corpora, ex levi suspensione, iniquum atque impium esse dicimus: dolori alium alio magis minusve resistere demonstramus, multos dolore victos fateri, quæ nunquam commiserint, suspensionem parum idoneam ad tormenta. Ab argumentis, signis, & conjecturis locus communis est, quum dicimus rem tot signis, atque argumentis patefactam, perspicuam, non suspiciosam videri debere: hæc plus quam ullos testes vale-

re;

re; testes enim mentiri, corrumpi, ac falli posse, hæc non posse. Contra hæc omnia communis locus est, quum suspiciones attenuamus, easque non minus in alios, quam in nos convenire ostendimus: quum iniquum esse dicimus, ex tenui suspicione quemque judicari; si sic facere liceat, unumquemque in jus rapi, atque in suspicionem multorum criminum trahi. A rumoribus locus communis, quum esse id de reo vulgatum, & in omnium jam ore versari, neque temere vulgari turpem de aliquo rumorem solere: neque causam hominibus cur id fingant, esse dicimus. Contra rumores locus est, quum vulgo, & famæ dicimus credi non oportere: rumores ut plurimum falsos esse, idque exemplo aliqujus falsi rumoris ostendimus: item quum fictum, aut verum de adversariis rumorem proferimus, quem in ore omnium esse dicamus, eique tamen nos fidem ostendimus non habere. Atque hæc in conjecturali causa considerantur: quæ quoniam in epistolam cadere frequenter solent, quum rem vel factam, vel faciendam conjectura investigamus, quod Cicero ad Lentulum in causa regia plane ostendit: propterea sunt a me pluribus verbis explicata. Nunc ad legitimam constitutionem transeamus.

*De legitima constitutione.*

## CAPUT IV.

**L**egitima constitutio est, quum ex lege, aut scripto, aut nomine facti controversia nascitur: ut quum leges, testamenta, voces ipsæ alio modo ab accusatore, alio ab reo accipiuntur. Ea quoniam tota juris consultorum est, neque cadere non modo in epistolam, sed ne in orationem quidem nostra ætate unquam potest, ad susceptam institutionem non pertinet: sed ne videamur eam aut neglexisse, aut ignorasse, quoniam in ordine divisionis venit, eam paucis explicabimus. Habet igitur partes sex: Scriptum, sententiam, contrarias leges, ambiguum, definitionem, translationem, ratiocinationem. Ex scripto, & sententia controversia nascitur, quum voluntas scriptoris cum scripto dissentire videtur hoc modo: Sit lex, quæ jubeat eos, qui navem ob tempestatem deseruerint, perdere navem, si servetur eorum esse, qui in navi remanserint. Igitur quum tempestate periclitaretur navis, omnes eam metu deseruere præter unum ægrotum, qui fugere non potuit; navis casu servatur, eam ægrotus lege possidet: repetit is, cujus fuerat,

rat, quod agrotum dicat necessitate, non voluntate in ea remansisse, neque hoc sensisse scriptorem. Nascitur controversia ex scripto, & sententia. Ex contrariis legibus controversia constat, quum alia lex quippiam jubet, aut permittit, alia vetat hoc modo: Lex vetat hominem repetundarum damnatum in concione orationem habere. Alia lex jubet augurem cum, qui defuncti locum petat, in concione nominare. Augur repetundarum damnatus, cum qui defuncti locum petit, in concione nominat, petitur ex eo multa ex priorē lege: is se posteriore defendit; nascitur quæstio ex contrariis legibus. Ex ambiguo controversia nascitur, quum scriptum duas, aut plures inter se sententias videtur habere hoc modo: Cicero in testamento sic scribit: Tullius hæres meus dato Terentiæ uxori meæ triginta pondo argenti, quæ volet. Illa post viri mortem optimum, & preciosissimum, petit: hic deterrimum vult dare: uterque testamenti verba pro se interpretatur; quæstio nascitur ex ambiguo. Ex definitione controversia oritur, quum de nomine facti dissensio est hoc modo; Quidam sacra vasa in loco profano relictā casu reperit, domum detulit: quæruntur a sacerdotibus, apud hunc inveniuntur: accusatur sacrilegii, defendit se vocabuli definitione: neque



facrilegum, neque furem esse: & quid facrilegium sit, quid furtum definit; nascitur ex definitione controversia. Ex translatione causa constat, quum aut tempus differendum, aut accusatores, aut iudices mutandos reus dicit; hæc apud veteres quoque perraro in iudicium veniebat. Ex ratiocinatione causa constat, quum res sine propria lege venit in iudicium, sed similitudinem aucupatur ex legibus hoc modo: Lex est, si quis furiosus erit, in eo, & bonis ejus cognatorum potestas esto. Et lex, qui patrem necaverit, in fluvium demergatur. Et lex, paterfamilias uti super familia, pecuniaque sua legaverit, ita jus esto. Et lex, si paterfamilias intestatus moritur, pecunia ejus agnatorum esto. Malleolus per furem matrem necat: in carcerem truditur, ibi testamentum scribit: mox in fluvium mergitur: hæredes adeunt hæreditatem: frater minor Malleoli, qui eum parricidii accusaverat, suam hæreditatem vocat, quod is ob furem testari non potuerit; hic certa lex in hanc causam nulla, multæ tamen per similitudinem afferuntur; nascitur ex ratiocinatione controversia. Ac de legitima constitutione hætenus, nunc ad juridicalem transeamus.

*De Juridiciali constitutione absoluta.*

## CAPUT V.

**J**uridicialis constitutio est, in qua de facto convenit, jure, an injuria factum sit, quæritur: ut quum Orestes se matrem fatetur occidisse, sed jure id a se factum esse defendit. Ejus partes sunt duæ, absoluta, & assumptiva. Absoluta est, in qua factum ita defenditur, ut nulla ad id extranea defensio petatur: ut, Mimus, qui Accium poëtam in scena nominavit, in jus ab eo vocatus, id solum defendit, licere nominari poëtam, cujus scripta dentur agenda. Ea constitutio tractabitur, quum idipsum, quod factum esse constat, licere ostendemus. Probatum autem aliquid licere jure naturæ, lege, consuetudine, judicato, æquo, & bono pacto. Naturæ jus est, quod nulla institutione ab ipsa natura nobis insitum est: quale est, ut liberi a parentibus amentur, eosque ipsi mutuo ament, ac colant. Lex est constitutio, quam populus, vel senatus, vel princeps sanxit: quale est jus civile, jus pontificium, quod jus canonicum appellamus. Consuetudo, est usus diu inter homines nulla lege servatus: quale est, ut mortui in monumentis majorum sepeliantur.

tur . Judicatum est , quod sententia unius , aut multorum judicum aliqua de re publice decretum est : quales sunt sententiæ , quæ quotidie a iudicibus in omni civitate de causis feruntur . Eæ quoniam eadem de re sæpe diversæ sunt , videndum est , si quando eas in nostra causâ proferemus , ut & plurimas , & approbatissimas afferamus , quo loco tum iudices , tum res ipsas iudicatas inter se comparare poterimus . Quod autem de iudicatis in causâ judiciali accidit , id in epistola de rebus ab alio dictis , ac factis accidere poterit ; in epistola enim omnis generis causæ sæpe incidunt . Sed hoc ab oratione differt epistola , quod oratio iudices habet , epistola non habet , nisi illum ipsum , ad quem scribimus , nostrarum rerum iudicem velimus . Æquum , & bonum est , quod boni viri omisso juris rigore , ad communem utilitatem iudicare : ut si pater filium exhæreditaverit , & qui hæredes constituti sunt , ei dare aliquam partem bonorum paternorum iudicentur . Factum est id , quod duo , pluresve servandum pepigere ; seque ad id vel solo verbo , vel iurejurando , vel scripto astrinxerunt ; his partibus juridicalem absolutam tractari conveniet .

*De judiciali Assumptiva.*

## CAPUT VI.

**A**ssumptiva juridicialis est, quæ factum accersita extrinsecus ratione defendit: ut quum Orestes dicit: Occidi matrem, quia illa patrem meum occiderat. Hæc partes habet quatuor: concessionem, remotionem criminis, translationem criminis, comparationem. Concessio est, per quam nobis ignosci postulamus. Ea dividitur in purgationem, & deprecationem. Purgatio est, quum consulto a nobis factum negamus. Ea dividitur in necessitatem, fortunam, & imprudentiam. Necessitas est vis, cui a nobis occurri non potest. ut ille, qui ad diem statutum in iudicium non venit, quod eum morbus, vel vis aquarum impedisset. In ea videndum est primum, utrum ea necessitas sit satis idonea ad impediendum causâ: deinde, num nostra causâ acciderit, num vitari potuerit, num consulto in eam incidisse existimari possimus. Postremo, num ob eam necessitatem excusari, aut absolvi debeamus. Fortuna est casus inopinatus, atque improvisus, ut qui quum feram sagittis peteret, hominem casu prætereuntem interemit.

Im-

Imprudencia est inconsiderata dictorum, factorumque emissio, ut qui criminis culpam in amorem, ætatem, ignorantiam, confert. Ac fortunæ quidem, & imprudentiæ iidem pene loci, qui necessitatis sunt. Considerare enim oportet, num id prævidere, aut scire, aut cavere potuerimus: num causam ei rei aut ipsi præbuerimus, aut præbuisse existimari possimus: num satis ea res, quam asserimus, præsidii, aut momenti habeat: num ob id nobis ignosci conveniat. Sed hæc omnia erunt pro ejus, apud quem agemus, qualitate tractanda: aliter enim nos apud amicum, aliter apud superiorem, aut principem excusamus. Deprecatio est declinandæ pœnæ gratia facta supplicatio. Ea est, quum reus fatetur se non casu, aut imprudentia, aut necessitate, sed consulto peccasse, & tamen postulat ignosci sibi. Ignoscendi ratio ex personis, & rebus maxime sumitur. Ex persona ejus qui peccavit, quum ejus nobilitatem, virtutem, meritaque in patriam, in alios, vel in eos ipsos, qui sunt ignoturi, ostendimus: quum ejus merita cum peccatis comparamus, & multo plura ac majora hæc, quam illa esse probamus: quum optimam de eo spem in posterum demonstramus, quum eum non dolo, aut odio, aut malo animo peccasse dicimus. A persona judicum ve-

niam captabimus, si de eorum humanitate, clementia, consuetudine ignoscendi quamplurima proferemus: si eos, quibus ipsi ignoverint, in exemplum adducemus, & homines homini, causam causæ comparabimus: si ex ea re non modo nullam infamiam, sed maximam etiam clementiæ, & mansuetudinis laudem eos, si ignoverint, consecuturos esse ostendemus. A re ipsa captabimus veniam, si rem ipsam, quantum licebit, omni ex parte attenuabimus: si in re simili aliis ignosci solere, aut ignotum esse ostendemus. Hæc quidem causâ in judicium nunquam venit: in privatum vitæ usum, atque in epistolam sæpe venit: proptereaque est a nobis pluribus verbis explicata. Remotio criminis est, per quam a nobis non crimen, sed culpam removebimus, eamque aut in hominem quempiam, aut in rem transferimus. In hominem, ut qui hominem occidit, id se magistratus, aut principis jussu fecisse defendit. In rem, ut qui noctu armatus contra edictum inventus, id se vel inimicitarum, vel grassatorum causâ fecisse affirmat. Si culpam in hominem conferemus, primum ostendere oportebit, quam ille jubendi potestatem habeat. Deinde utrum nos honeste recusare, quod jubebatur, poteramus. Postremo, num ea de causâ nobis ignosci con-

ve-

veniat. Quum in rem culpam conferemus, & hæc eadem, & ea, quæ de necessitate præcepta sunt, erunt servanda. Translatio criminis est, per quam nos aliorum peccatis coactos peccasse confitemur: ut Orestes, qui crimen suum in matrem confert, quæ patrem ante interemerit. Hac in parte, considerandum erit, primum, num vere crimen in alium transferatur: deinde, num æquale sit huic, de quo agitur; deinde, an iudicium de illo factum sit: tum, an debuerit reus alio crimine crimen illud vel iudicare, vel ulcisci: postremo quid futurum sit, si ceteri idem faciant, & sibi jus armis dicant; quid si idem accusator nunc fecisset? Atque hi sunt accusatoris loci. Reus atrocitatem alieni criminis ponet ante oculos, seque id coactum fecisse ostendet, neque utile, aut tutum fuisse iudicium expectare. Comparatio est, quum de duobus malis minus nos elegisse ostendimus, ut qui obsessus ab hostibus, quum de salute desperaret, exercitum incolumem eduxit, impedimenta hostibus tradidit. In ea primum accusator quæret, utrum utilius, honestius, laudabilius fuerit id, quod reus fecerit, an aliud quippiam. Deinde habuerit ne is statuendi potestatem, an ab alio petere debuerit. Deinde fuerit ne aliud remedium, ne id fieri necesse esset. Tum in-

inferetur ab accusatore per conjecturam suspicio avaritiæ, doli, metus, aliarumque rerum, quæ augere crimen possunt. Defensor, & suspicionem cupiditatis, ac doli omnem tollet, & magnitudinem periculi ponet ante oculos: tum ab iudicibus, ab accusatoribus quæret, quid ipsi fecissent, si eo in discrimine constituti fuissent. Postremo, per comparisonem malorum ostendet nihil aliud utilius fieri potuisse. Ac de judicialis quidem causæ generibus, satis pro suscepta institutione dictum puto. Nec dubito fore, qui supervacuam hanc partem existiment, quum epistola ad amicum, non ad iudicem scribatur. Sed primum ita causæ tractandæ sunt, ut amicos quoque de illis iudicaturos existimemus. Deinde ad superiores nonnunquam, item ad invidos, & inimicos scribimus, apud quos non aliter, quam apud iudices objectiones refellere, nostrum factum excusare, accusare alios sæpe compellimur. Postremo, nulla de re scribere possumus, in quam non aliquis ex iis, quos diximus, locis incidat. Sed hæc hæc hactenus. Nunc ad deliberativum genus transeamus.

\* \*

*De*



*De Caussis deliberativis.*

## CAPUT VII.

**I**N omni autem deliberatione tria potissimum notare debemus, personas, res, causas. Personæ duæ sunt, nostra, & eorum, apud quos agimus: aliter enim civis agere debet, aliter peregrinus: item aliter magistratus, vel princeps, vel dominus: aliter privatus, vel subditus, vel servus. Sunt præterea dignitatis, loci, ætatis, temporis differentiæ: ut aliter sacerdos, aliter popularis: aliter juvenis, aliter senex: aliter in templo, aliter in senatu, vel in foro, aliter in bello, atque apud exercitum, aliter domi, cum pax est, verba faciat. Permagni quoque refert, apud quos dicamus, vel ad quos scribamus, aliter apud senatum, aliter apud populum, aliter apud principem, aliter apud amicum loquimur. Quarum quidem personarum habere rationem, prudentia, atque usus vitæ potius, quam ars ulla docere nos potest. Veruntamen nos quoque ea, quæ præcipi hac de re posse videbuntur, suo loco dicemus. Res omnis, quæ in consultationem venit, aut possibilis, quod Græci *δυνατὸν* vocant, aut utilis, aut honesti rationem habet. Neque

que vero utile ab honesto separo, quod aliud utile, aliud honestum esse censeam: sed quia cum imperitis, ut plurimum agimus, qui utriusque rei rationem in vita communi separavere, nobis etiam in dicendo, ac scribendo separanda est: ut nunc solam honestatem, nunc solam utilitatem, propositam habeamus. Quum deliberamus, utrum aliquid fieri possit, id ex tempore aut præsentis, aut futuro consideramus. Ex præsentis, ut quum Pontifex deliberat, utrum fieri Ostiæ portus possit. Ex futuro, ut idem consultat, si Ferdinando Regi bellum inferat, utrum eum possit ex Italia expellere. Quæ quidem deliberatio quoniam in conjectura tota posita est, inde loci omnes nobis petendi sunt. Illud tamen videndum, ut quæ superius de re facta præcepta sunt, ea nunc ad rem faciendam accommodemus. Illa præterea consideranda sunt, locus, tempus, modus, occasio, facultas, & cetera, quæ aut gerendum negotium præcedere, aut gestum subsequi solent, Quæ quidem omnia, quoniam in priori volumine, quum de confirmatione ageremus, satis abundeque tractavimus, inde repetemus. Utilis autem consultatio distribuitur in bonorum, malorumque rationem. Bona in vita communi aut corporis, aut fortunæ, aut animi appellamus.

Bo-

Bona corporis sunt vires, valetudo, forma, celeritas, agilitas, & cetera ejus generis. Fortunæ bona sunt, nobilitas, opes, honores, dignitates, potentia. soboles, familia, & quæ his similia sunt. Animi bona sunt, ingenium, memoria, virtutes, disciplinæ, mores, & quæ sunt ejus generis. Mala horum omnium contraria sunt, ut imbecillitas, ægritudo, tarditas, fortunæ obscuritas, paupertas, abjectio. Animi vitia, ignorantia, morum perversitas. Atque in bonis quidem adeptionem, conservationem, incrementumque considerabimus. In malis imminutionem, fugam, evasionem, immunitatem. Honesti consultatio in recti, & laudabilis rationem dividitur, non quod laudabile aliquid esse possit, quod rectum non sit: aut rectum, quod non sit laudabile: sed quia rectum nonnunquam sine laude est, laus sine recto nunquam est. Nonnulli vero sine ulla spe, aut cupiditate gloriæ rectum expetunt: alii solam rerum gestarum, tanquam premium expetunt gloriam. Ideo mihi utriusque locos tractandos seorsum existimavi. Rectum igitur quatuor ex partibus maxime sumitur, præsentia, justitia, fortitudine, modestia. Prudentia, est rerum omnium ad usum vitæ pertinentium cum delectu scientia. Ejus partes sunt, memoria, intel-

telligentia , providentia . Memoria est , per quam ad usum nostrum præterita recordamur . Intelligentia est , per quam præsentia recte perspicimus . Providentia est , per quam futuris occurrimus . Prudentiæ partibus utemur , si præteritis rebus præsentibus , futurasque comparabimus : si comoda cum incommodis conferemus : si rationibus , atque exemplis , quæ sequenda sint , & fugienda , demonstrabimus : si alicujus scientiæ , aut artis rationes ad rem , de qua agimus , afferemus : si quo pacto eorum apud quos agimus , dignitati , ac salutis consuli in posterum possit , ostendimus . Justitia est æquitas , jus suum unicuique pro dignitate tribuens . Ejus partes sunt pietas , fides , beneficentia , & quæ proprie appellatur justitia . Pietatis partibus utemur , si in Deum , patriam , parentes , propinquos servanda esse officia suadebimus . Fidei partibus utemur , si pacta , conventiones , promissa omnibus inviolabiliter servanda esse , ostendimus . Beneficentiæ partibus utemur , si opes , & copias non ad luxum , sed liberalitatem conferendas : si sociis , amicis , propinquis , bonis viris , indigentibus subveniendum esse dicemus . Justitiæ partibus utemur , si naturæ , gentium , civium jura , leges , consuetudinem , instituta servari oportere demonstrabimus : si nemini injuriam

riam inferendam : illatam , quantum liceat , propulsandam : Item , si societates , & amicitias colendas : si jus suum amota omni cupiditate , & perturbatione animi , tribuendum : si omnia denique ad communem utilitatem referenda esse censebimus . Fortitudo est animi in rebus gerendis , tolerandisque cum periculorum contemptione constantia . Ejus partes sunt , audacia , patientia , perseverantia . His partibus utemur , si magno animo pericula omnia subeunda esse suadebimus : si mortem , exilium , vincula , cruciatus , tormenta , viro forti nequaquam timenda esse demonstrabimus , ut patriæ , parentum , & eorum ipsorum salus , incolumitas , dignitasque servetur : si nihil turpe , nihil humile , aut indignum , mortis aut doloris , aut periculi metu faciendum , atque dicendum esse ostendemus : si res adversas fortiter , patienterque tolerandas : si summam in dictis , ac factis constantiam servandam esse , hortabimur . Modestia est continens in omni re , ordine adhibito , moderatio . Ejus partes sunt continentia , modus , ordo , decorum . His utimur , si cupiditates opum , bonorum , libidinis , gulæ , similibusque rerum vituperabimus : si omnibus in rebus terminum , modumque statuemus : si quid in singulis rebus deceat , videndum , ac servandum esse

se suadebimus. Atque his potissimum locis recti ratio tractabitur. Laudabile id dicitur, quod famam, & gloriam apud omnes honestam, atque optabilem ex sese parit: id sumitur, vel a majoribus nostris, quum ostendimus, quantam illi ex ea re gloriam consecuti sint: vel a presentibus, quum ostendimus, quanto in precio ea res apud omnes sit: vel a posteris, quum gloriam, vel immortalitatem, vel beatitudinem tum a Deo, tum ab hominibus, ex ea re consecuturos illos esse promittimus. Causæ autem considerantur in deliberatione, tum ex ipsa re, quæ venit in consultationem, tum ex fine, quem sequi oporteat. Res autem, omnis, aut per se deliberationem facit: ut si quis deliberet, det, ne operam Philosophiæ, an non; aut propter extraneam causam: ut si Pontifex deliberet, an inferat Ferdinando Regi bellum, ut ille id, quod Pontifici debet, persolvat. Quibus in causis locus, tempus, modusque ponitur: ut si quis deliberet, utrum hoc tempore bellum inferendum, aut hoc loco incipiendum, aut hoc modo gerendum sit. Quum res ipsa faciet deliberationem, omnibus eam modis aut augere, aut extenuare oportebit. Quum autem propter extraneam causam veniet in consilium, primum causam ipsam vel augebimus, vel minuemus. Deinde  
quan-

quantum momenti ad rem illam, de qua deliberamus, habere debeat, ostendemus, & rem cum causâ conferemus, ut satis ne longeâ causâ sit pro magnitudine rei appareat; tum rei finem spectabimus, ad eumque nostras argumentationes omnes dirigemus: finis erit aut utilitas, aut honestas. Sed quoniam, ut Quintilianus ait, nihil aliud est deliberatio, quam quædam comparatio rationum, si quando res utraque in dubium, & comparisonem veniet, qui utilitatem præponet, his locis utetur. Incolumitatem, & salutem omnibus rebus præferendam esse: virtutibus neminem recte uti posse, qui a periculis tutus non sit; non virtutem, sed temeritatem esse ejus, qui, quum sine periculo possit vivere, pericula sponte suscipiat: neque illi Deum adjutorem esse, qui se ultro periculis offerat; honestum nihil existimari convenire, quod salutem non pariat. Qui rationem honestatis præferet, his locis utetur. Virtutem nunquam deferendam, dolorem, mortemque turpitudine, atque infamia leviores esse: mortem honestatis causâ ultro esse subeundam. Quo loco eorum exemplis utetur, qui pro patria, & honestate ultro mortem oppetiere: neminem exploratum habere, illo vitato periculo, incolumem se perpetuo, & immortalem fore: qui

H

ho-

honeste vivat, eum satis, abundeque tutum esse: qui turpiter, diu incolumem esse non posse: fortunam quoque virtuti adiumento esse solere: postremo quæ laus apud posteros, & immortalitas ex recte factis consecutura sit, quæ contra ex turpibus ignominia. Potest autem deliberatio duplex, aut triplex esse: ut si quis deliberet, det ne operam juri civili, an medicinæ, an philosophiæ: quæ quum inciderint, finis omnium spectandus erit, videndumque quid sequatur is, qui deliberet. Quoniam autem deliberatio duplex officium habet, suadendi, & dissuadendi, ex quibus locis suasionem comparabimus, ex contrariis dissuasionem constituemus; contrariorum enim eadem est disciplina. Sed de hoc hactenus. Nunc ad demonstrativum genus transeamus.

*De causis demonstrativis, Diisque laudandis.*

## C A P U T VIII.

**D**emonstrativum genus consumitur in laudem, & vituperationem. Sed quoniam & potior laudandi pars est, & ex laudis contrariis locis vituperatio constat, de ea potissimum dicemus. Laus igitur aut a personis, aut a rebus sumitur. Personæ  
in



in Deos, & homines distribuuntur. Deum ipsum laudare ob ejus magnitudinem vox humana non potest: sed singulos ejus actus laudamus, ut potentiam, sapientiam, providentiam, mansuetudinem, ordinem, & cetera ejus generis, quæ ex ejus operibus consideramus. Ea præterea, quæ ab homine satis intelligi non possunt, admiratione, & veneratione prosequimur, ut creationem mundi, conjunctionem humanæ, divinæque Naturæ, trium Personarum in eadem Essentia (sic enim loqui necesse) distinctionem, & quæ sunt ejus generis, quibus de rebus dicere qui volet, eas, quas dixi, partes amplificabit, hominesque in earum admirationem, contemplationemque adducet. Hoc loco mihi error eorum indicandus est, qui quum divinum aliquid in concione laudaturi sunt, ea de re partim disputant, partim præcipiunt, ac docent, quasi in schola apud discipulos, non in templo apud populum verba faciant: quæ ratio tum a loco, tum a tempore, tum a personis maxime aliena est. In quod quidem vitium plerique eorum incidunt, qui alibi festis diebus concionantur. Quod quidem mihi dicendum putavi, non ut eos reprehenderem, qui in ceteris disciplinis docti sunt, hanc facultatem omnino non attigerunt: sed ut hi, qui oratores ha-

beri volunt, id vitium & plane cognoscerent, & quantum possent evitarent. Sed ut ad institutum redeamus, ita divinæ res tractandæ sunt, si publice dicamus, ut oratio, non lectio, aut disputatio videatur. Epistola, quia jus docendi habet, liberior est. Hi vero quos Divos, vel recepto jam vocabulo Sanctos appellamus tum ab humanis, tum a divinis partibus laudandi sunt. Humanæ partes, natura, fortuna, & animo continentur. Naturæ, five corporis partes sunt forma, robur, valetudo, velocitas, agilitas, proceritas, dignitas, & quæ his similia sunt. Has illi partes si habuerint, aut extenuasse jejuniis, aut in solitudine abscondisse, aut squalore, situque obduxisse, aut ad divinarum rerum usum contulisse dicendi sunt: si non habuerint, non quæsisse, imo etiam contempsisse. Fortunæ partes sunt, genus, educatio, patria, honores, dignitates, inopia, clientelæ, amicitia, affinitates, liberi, nepotes, & cetera ejus generis: quæ si fuerint, ab aliis partim relicta, partim egentibus erogata, partim ad divinum cultum collata esse dicendum erit: si non adfuerint, non esse quæsita, imo etiam omni studio evitata. Animi partes sunt prudentia, justitia, fortitudo, modestia: quarum officia, quia satis, abundeque in deliberativo genere demonstravimus,

mus, in præsentia attingere non convenit. Hæ partes ita in his vel universæ, vel singulæ laudandæ sunt, ut rectum illud, perfectumque officium, quod *κατὰ θεῶν* Græci vocant, semper secutos eos fuisse, omnesque actiones suas ad Dei cultum, atque amorem retulisse demonstremus. Illæ præterea virtutes, quas nostri theologicas vocant, fides, spes, charitas, in summa eorum laude reponendæ: Divinæ partes sunt, quæ supra hominem positæ, humana ope comparari non possunt: ut doctrina sine studio, genera linguarum sine earum commercio nationum, curationes ægritudinum sine arte medicinæ, & alia permulta, quæ tum Apostolis, tum aliis sanctis viris a Deo data esse non dubitamus. Neque vero hæc in omnibus omnia laudanda sunt, sed alia in aliis, ut quisque visus est in aliquo genere præstitisse: ut in charitate Stephanus, Laurentius in patientia; in eloquentia, & linguarum interpretatione Hieronymus, Augustinus in multarum rerum scientia, Antonius in sanctitate vitæ, & ceteri eodem modo. Multorum mors ipsa insignis, atque admiranda est, quos recepto græco vocabulo martyres appellamus. Aliorum vel inventio, vel translatio maxime gloriosa, proptereaque consecuti sunt homines eo tempore beneficia. Et de sanctorum qui-

dem virorum laudatione hætenus : quam, quidem partem sum paullo latius executus, quoniam & res ipsa, quippe quæ nova sit, usque ad hoc tempus intacta fuerat, & hoc tempore magno Romæ in usu est. Nunc ad reliqua pergamus.

*De laudandis hominibus.*

## C A P U T IX.

**C**eteri vero homines aut viventes, aut defuncti laudantur : viventes item aut coram, aut absentes. Qui coram laudantur, summa gravitate, summaque modestia laudentur necesse est, ne scurræ magis, & adulescentes, quam oratores videamur, dandaque opera est, ut indicandæ potius, & testificandæ aliis virtutis ejus, quam hominis laudandi gratia suscepta esse nostra oratio videatur : justaque in primis, atque honesta, imo etiam si poterimus, necessaria ejus suscepti officii causa ostendenda est. Oratio vero non nisi ex admiratione quadam ad ipsum, qui laudatur, dirigenda est : curandumque ne id nos munus vel referendæ, vel aucupandæ hominis gratiæ studio suscepisse videamur. Absentes laudare libere oratio potest : epistola quanquam non erubescat, tamen ne adulationis suspi-

spicionem moveat, non potest. Defuncti ita mihi laudandi esse videntur, ut consolari magis eos, apud quos dicimus, quam illos laudare velle videamur. Quod contra faciunt plerique eorum, qui nostro tempore oratores haberi volunt; ita enim ad laudandum accedunt, ut aperte se laudatores, atque assentatores esse fateantur. Ita vero laudant, non ut orationem habere, sed ut ejus viri recitare ab se scriptam historiam existimentur. Mihi vero funebrium orationum ea servanda ratio videtur, primum, ut justissimum esse eorum, apud quos dicimus, dolorem, nostrumque cum illis communem esse ostendamus: Deinde, ut eos illorum, qui defuncti sunt, virtutibus, rebus gestis, gloria, felicitate, & memoria consolemur. Laudantur autem omnes homines ab his potissimum partibus, quas supra commemoravimus, naturæ, fortunæ, animi. Ac duo quidem illa superiora ita commemorantur, ut non propterea quod ea quis habuerit, sed quod his optime fuerit usus laude dignus existimetur; usus enim illorum non possessio, laudem affert: nam & a malis plerunque, & sine ratione possidentur. Laudantur tamen non immerito ii, qui quum ignoti, obscurique sint, summas tum opes, tum dignitates sunt virtutibus, & rebus gestis consecuti. Non

## 126 DE RATIONE SCRIB.

nullis contra vel paupertas, vel cæcitas, vel alia corporis, fortunæque calamitas laudem, & gloriam non mediocrem attulit, illustrioresque eos incommoda reddiderunt, quam ulla reddere commoda potuissent. Animi vero partes ita laudandæ sunt, ut & habuisse eas quis, & summa cum dignitate semper exercuisse commemoretur. Illa vero, de qua veteres scribunt, virtutum quatuor in partes distributio, in excogitando quidem apud animum semper est, meo iudicio, proponenda; in scribendo, aut dicendo non semper explicanda. Omnes enim virtutes in omnibus commemorare si velimus, irridere eos potius, quam laudare videamur; in milite enim religionem, in sacerdote bellicam disciplinam laudare non convenit. Videndum autem est, ut singularum virtutum partes notas habeamus, ne quid quod in illis laudabile sit, præterire possimus: & quàm unius virtutis propria sunt, aliis tribuamus, ut si quis opum distributionem, aut incommodorum tolerantiam prudentiæ ascribat, aut consilium in rebus gerendis modestiæ, ac temperantiæ. Neque verò existimemus eum, qui doctus non sit, prudentem aut sapientem, aut bonum virum appellari non posse: sed qui ita sit affectus, ut multarum rerum usum habeat, multa ab eo extent  
vel

vel provisâ prudenter, vel actâ constanter, vel responsa acute, ut de Catone scribit Cicero, eum appellare sapientem non dubitemus. In justitiæ partibus quædam nostra ætate laudantur, quæ veteres non commemorabant. Et observantia in Deum, ac Religionem nostram, & obedientia, in sacerdotibus præsertim, ac religiosis viris, magnam, si adsit, laudem affert; si absit summam vituperationem. Quid pars illa liberalitatis, quæ egenis succurrit, nobis ex divina institutione tradita, quam nos recepto Græco vocabulo eleemosynam appellamus, quantam nunc hominibus laudem affert, quæ veteribus pene incognita fuerat? Clementia erga inimicos, quæ nobis item ex divino instituto servanda est, si adsit, magna laude digna erit: quam præcipue in Stephano laudamus martyre; si absit sacerdotibus præsertim vitio dari poterit. Patientiam quoque Religio nostra laudabiliorem, atque illustriorem facit. Castitas apud antiquos tantum in mulieribus laudabatur: nunc vero etiam in viris ita, ut intactum se ab omni coitu, mundumque servasse, & ut quidem nunc loquimur. virginem esse, quod de Joanne Apostolo scribitur, summæ laudi, ac sanctimonix tribuatur. Quid nobis illæ divinitus traditæ virtutes, fides, spes, charitas, quantam cum

cum omnibus, tum vel maxime sacerdotibus, vel laudem, si adsint; vel absint, vituperationem afferunt? quantum habent in utraque parte momentum? Sunt igitur hæ quoque diligenter, accurateque tractandæ. Atquæ hæc potissimum in laudandis hominibus consideranda sunt. Illud in primis videndum erit, ut proprias unicuique laudes accommodemus: neque omnes eadem ratione laudemus; aliter enim magistratus, aliter privati homines laudandi sunt. Aliæ Regem, aut Imperatorem, aut belli Ducem: aliæ Pontificem, aut Sacerdotem laudes decent. Quæ quidem omnia nisi admodum imprudens, atque imperitus fuerit, discernere unusquisque facillime poterit. Sed de laudibus personarum hætenus, nunc de rerum laudibus pauca dicam.

*De rebus laudandis.*

C A P U T X.

**R**Es autem omnis corporea est, aut incorporea. Corporeæ res sunt aut a natura institutæ, ut elementa: quæque in illis sunt nata, ut plantæ, metalla, gemmæ; aut hominum industria sunt comparatæ, ut urbes, templa, domus, earumque ornamenta. Incorporeæ sunt, ut artes, ut  
pi-



pictura, sculptura; aut scientia, ut rhetorice, philosophia: aut virtutes, ut iustitia, fortitudo. Corporeæ res omnes, quæ a natura sunt, partim a natura sua, partim ab usu nostro laudantur. A natura quidem sua laudantur, quum earum species, ordo, proprietatesque commemorantur. Ab usu nostro, quum fructus, commoda, emolumenta, delectationes, quæ ex his percipiuntur, commemoramus. Quod quidem pulcherrime facit Cicero in secundo de natura Deorum, quum mundi universi pulchritudinem, ornatum, usumque describit. Facit multis in locis Plinius, quum vel provincias, vel plantas, vel gemmas, vel alia opera naturæ collaudat. Facit omnium optime, elegantissimeque Virgilius, quum in Georgicis Italiæ laudes describit. Atque in locis quidem consideratur in primis cælum, clemens, an asperum sit: salubre, an pestilens: calidum, an frigidum: pluvium, an serenum; deinde solum, fœcundum, an sterile: omnium rerum ferax, an aliquarum; vulgarium præterea, an earum, quæ paucis in locis nascuntur; utilium quoque, an noxiarum: situs præterea loci consideretur, montanus, an planus: maritimus, an mediterraneus: portuosus, an importuosus: cui præterea cœli regioni expositus, tum vero qui montes, quæ

quæ sylvæ, quæ flumina, qui lacus, qui fontes in eo sint, considerantur. Postremo quæ urbes, emporia, oppida in ea regione sint condita, & a quibus habitata. Usus spectatur tum ex his, quæ dictæ sunt, partibus, tum ex commerciis, tum ex commodis vitæ traducendæ, imperii propagandi, rerumque gerendarum occasionibus. Voluptas postremo, & delectatio commemoratur aucupandi, venandi, piscandi, tumque non uno modo animum relaxandi. Plantæ, metalla, gemmæ, & cetera ejus generis, tum a specie ipsa, forma, colore, & nitore laudantur, tum ab usu, qui inde percipitur: ut emendi, vendendique ex auro: ex ferro, belli gerendi: ex plantis, vescendi: ex gemmis, cetera exornandi, tum vero ex vi quadam, & proprietate naturæ, quæ his in rebus multiplex, admirandaque insit: quæ noscitur qui cupiet, legat eos, qui de earum rerum natura perscribere, ut ex græcis Aristotelem, Theophrastum: ex nostris Plinium, Albertum Magnum, aliosque permultos. Earum vero rerum, quæ hominum industria comparantur, urbes præcipue sunt; hæ laudantur tum ab his partibus, quæ locis attributæ sunt: tum a specie, tum figura, ab artificiosis munitionibus, ut fossis, muris, turribus; ab ædificiis tum publicis, tum privatis: ut  
viis,

viis, templis, aquæductibus, domibus, eorumque ædificiorum dispositione, atque ordine: tum vero ab antiquitate, conditionibus, alumniis, rebus gestis, imperio, legibus, institutis, exemplis, inventis, artibus, quæ ibi aut inventæ primum sunt, aut floruerunt. Cetera porro ædificia vel ab his omnibus, vel ab aliqua earum parte, laudantur: in quibusdam autem utilitas, ut in aquæductu: in quibusdam dignitas, & quasi majestas maxime consideratur, ut in templis. Ceteræ res omnes, quæ artificio constant, partim a materia, partim ab artificio, atque artifice, partim a forma, partim ab usu, partim a raritate, & precio, partim a possessoribus, & dominis commendantur. Ac coporeæ quidem res ita meo judicio tractandæ sunt. Incorporeæ autem res, quæ in laudationem veniunt, aut artes, aut scientiæ, aut virtutes sunt, ut supra diximus. Hæ laudantur, aut ab antiquitate, & inventoribus: aut a subjecto & materia, in qua versantur: aut a dignitate, & spectatoribus: aut ab utilitate, quam humano generi conferunt: cui est nonnunquam adjuncta necessitas: aut a fine, propter quem inventæ ab hominibus, cultæque sunt; has autem singulas partes explicare, quoniam & immensi operis esset, & ad nostram institutionem non pertinet, in præsen-

sentia non est visum : earum , qui notitiam nullam habebit , neque dicere de his , neque scribere quicquam poterit . Laudantur autem non solum ii habitus , verum etiam actus , sive actiones ipsæ , & quædam quasi professiones , institutionesque vivendi ab his ductæ , profectæque partibus : ut vita rustica , religiosa , solitaria , civilis , & quæ sunt generis ejusdem . Atque hujus quidem universi generis laudandi hæc potissimum ratio est . Primum , ut vitam ipsam universam quanta maxima possumus diligentia describamus . Deinde , ut ejus singula , commoda enumeremus , tum explicemus ea quibus caret , incommoda ; deinde contrarium vitæ genus describamus , & utriusque commoda , & incommoda comparemus ; quo loco per omnes partes vagari , easque singulas cum illa , quam nos laudamus , conferre poterimus , tum exemplo uti licebit eorum , qui id vitæ genus secuti sunt , in eoque præ ceteris floruerunt , tum finem ipsius vitæ collaudabimus , ad eumque omnes ejus partes referemus . Omnis autem non modo deliberatio , ut Quintilianus affirmat , verum etiam laus comparatione mihi maxime contineri videtur . Illa enim sive res , sive persona maxime commendatur , quæ ceteris sui generis præstare maxime demonstratur . Vituperatio vero quo-

quoniam ex contrariis laudationis locis, ut superius diximus, conficitur, non est mihi latius explicanda, nam qui recte laudandi rationem noverit, vituperandi quoque rationem tenebit; humana præterea ingenia ad vituperationem, quam ad laudem promptiora sunt. Huc accedit, quod singulis virtutibus bina, aut plura vitia opposita sunt, quo facilius vituperandi, quam laudandi ratio est. Ac de universo quidem demonstrativo genere diximus satis. Quod quidem copiosius, quam ceteri scriptores, executi sumus, tum quod ætate nostra vel solum, vel maximum est, in quo latina versetur oratio: tum quod nos scribendi, non dicendi rationem tradimus, quæ quidem latissime patet, atque in materia versatur. Postremo illa etiam me ratio movit, quod hoc genus, quasi facillimum, & notissimum veteres magis attigerant, quam tractaverant. Nunc quo pacto hæc causarum genera ad scribendi rationem accommodentur, aperiemus.

*De Personis.*

## CAPUT XI.

**I**gitur qui ad scribendum accedit, duo illa in primis consideret necesse est, personam, & causam. Personæ omnino duæ sunt,

sunt, ejus qui scribit, & ejus ad quem scribit. Quoniam autem neque omnes, neque ad omnes scribere eodem modo debent (aliter enim ad pares, aliter ad superiores, aliter ad inferiores scribimus) personarum in primis habenda ratio est. Sunt igitur in omni persona quinque potissimum consideranda: natura, fortuna, studium, dignitas, affectio. In natura considerandus est sexus, ut vir, an mulier: ætas, ut puer, an adolescens, natu grandior, an senex: natio, ut Italus, an Gallus: patria, ut Romanus, an Venetus. In fortuna consideratur, ut nobilis, an ignobilis: conditio, ut servus, an liber: ordo, ut eques, an senator: opes, ut dives, an pauper: æstimatio, ut clarus, an obscurus: amplitudo, ut potens, an impotens, alicujus auctoritatis, an nullius: status vitæ, ut pater, an filius, maritus, an cælebs, privatus, an cum potestate. In studio consideratur ars liberalis, ut medicina, pictura, sculptura, mercatura: an illiberalis, ut sutoria, institoria, fullonica, lignaria, ferraria, ceteræque ejus generis, quæ recepto græco vocabulo Mechanicæ appellantur. Consideratur præterea disciplina: ut philosophus, an astrologus, orator, an caussidicus: habitus etiam, & professio quædam, ut religiosus, an popularis, sive ut græce dicam, laicus, religionis

nis præterea professio, & Ordo non unus: ut Petri, Benedicti, Francisci, Dominici. Dignitas consideratur, sacra, an profana, ut Pontifex, an Rex: perpetua, an ad tempus, ut princeps, an prætor. In affectione consideratur notitia, ut notus, an ignotus: benevolentia, ut amicus, an inimicus: consuetudo, ut hospes, an familiaris: propinquitas, ut civis, an peregrinus: conjunctio, ut cognatus, an affinis: officia, ut bene, an male de nobis meritis. Atque hæc in personis considerata esse puto. Mutat autem in his scribendi rationem, earum, quas modo nominavimus, partium potissimum comparatio; aliter enim (ut paullo ante dicebam) ad similes, aliter ad dissimiles scribendum est. Igitur si ad eos scribere nos continget, qui omni ex parte similes nobis, paresque sunt, quanquam difficile admodum id quidem videtur, tamen si quando continget, honorifice de illis loquemur, eorumque dignitatem, virtutem, ingenium, judicium nos magni facere ostendemus; ita tamen loquemur, ut nostræ quoque vel ætatis, vel dignitatis rationem habeamus. Si ad eos scribemus, qui nobis aliqua ex parte superiores sint, qua ex parte videbuntur præstare, ei nos plurimum in scribendo tribuemus: etiamsi nos eos ceteris in rebus aut æquare, aut

superare videamur. Nam si ad natu majores scribemus, eorum ætati plurimum deferemus præsertim, si & aliqua pars adjuncta sit ex earum genere, quæ honestæ ab hominibus, & laudabiles existimantur. Si ad eos scribemus, qui nos fortuna, & dignitate multo antecellant, exordio plerumque utemur: & cum in eo, tum in tota epistola benevolentiam summam captabimus, nisi forte illis valde familiares simus. Dabimus autem operam, ut tota epistola tum verbis, tum sententiis gravis, ornataque sit, eosque omnibus in rebus nos magnificare ostendemus. Ita tamen cum illis loquemur, ne nos ipsos contemptos, abjectosque reddamus, præsertim si nos vel ætas, vel nobilitas, vel virtus aliqua commendabit. Ab omni vero non solum epistola, verum etiam cogitatione nostra, adulatio, atque assentatio in primis abesse debet, libero, ut ego quidem sentio, homine indigna: neque ulla vel temporis, vel personæ, vel necessitatis ratio apud nos valere tantum debet, ut cuiquam de ipso mentiamur. Nam tametsi credulos, & stultos homines, nec non gloriæ cupidos falsis laudibus decipimus, nos tamen mentiri non debemus. Si vero aliquod de se illi iudicium, aut ingenium habeant, nos stultitiæ, & vanitatis accusant, qui quod nobis per-



persuasum non sit, aliis persuadere studeamus. Nominare autem quemquam unum in numero multitudinis, qui recta, atque ex antiquo usu scribere volet, etiam si ad Pontificem, aut Regem scribat, non debet; vox enim illa si ad alterum referatur, numerum, non dignitatem significat. Nos ita de nobis, ut de pluribus loqui vel dignitatis, vel modestiæ, ac verecundiæ gratia plane licet, ut si laus, aut dignitas ulla est, eam cum aliis communicare: si magistratus est, eum cum aliis gerere videamur. Illa vero epitheta, quibus apud Pontifices, aut alios Principes uti solemus, ut aliquid usui, & temporibus concedamus, tollenda de nostris scriptis esse non arbitror, ne vel omnem penitus loquendi usum tollere, vel eos, ad quos scribimus, qui magna ex parte indocti sunt, contemnere existimemur: quorum alterum imprudentis, alterum superbi posset judicari. Quod si autem eorum res curemus, aut illis aliquo servitutis, vel officii genere astricti sumus, familiarius cum illis per literas loqui licebit præsertim, quum res illis suas domesticas perscribemus; servabimus tamen earum in omni scribendi genere dignitatem. Jocari cum illis per epistolas licere non puto, nisi compertum habeamus, eorum naturam joci, & salibus maxime delectari, existimemus.

que per eos nos, aut illorum gratiam inituros, aut facilius ab illis, quod volumus, impetraturos. Quod si quando utilitatis ratio exiget, ut faciamus, verecunde admodum, & graviter faciendum erit, ut & illis gratificemur, & nostram dignitatem retineamus. Si vero nobis ad incognitos homines aliqua de causâ scribendum erit, tamen si quo pacto scripturi sumus, ipsa nos causâ nostra facile admonebit: (neque enim ad eundem eodem semper modo scribendum est) dabimus tamen operam, ut quam maximam possumus a persona nostra benevolentiam contrahamus, eisque nostrarum literarum causam aut necessariam, aut honestam, aut utilem esse, quantum possumus, ostendamus, ad eosque aliquid ejus vel necessitatis, vel emolumenti, vel gloriæ pertinere, demonstramus. Docilem, vero in primis, attentumque reddemus, nostræ tum causæ, tum personæ significatione; tota vero epistola gravis, & accurata fit, ut & ille se etiam in scribendo magni fieri putet, & nos apud eum opinionem nostri quam maximam comparemus. Quum autem ad inferiores scribemus, magna tum sexus, tum ætatis habenda ratio erit, ut non quid nos possimus scribere, sed quid eorum vel sexus, vel ætas possit intelligere, putemus. Quid præterea vel sexui mulie-

liebri, vel juvenili ætati conveniat, magnopere considerandum: eritque id prudentiæ nostræ, ad unumquemque pro ætate, pro dignitate, pro doctrina, pro materia scribere. Si ipsi in magistratu, vel dignitate aliqua constituti erimus, ita scribemus, ut neque dignitatis, neque humanitatis obliti videamur: quorum alterum humilis, alterum superbi animi existimari posset. Si autem nos aut reipublicæ, aut principis, aut alieno denique nomine scribere oportebit; qua in re totus scribarum ordo, qui maximus, & honestissimus est, assidue versatur: dabimus operam, ut ejus, pro quo scribimus, tum naturam, tum dignitatem, quam notissimam habeamus: ejusque personam, quantum possumus, induamus: ad ejusque naturam, gravitatem, ætatem, dignitatem, officium, orationem nostram, omnem accomodemus: reipublicæ in primis gravitatem, & personam induamus, ejusque instituta, mores, consuetudines omnes, in scribendo servemus. Illud, ad quemcunque scribamus, in primis meminerimus, propterea nos scribere, ut legamur, atque intelligamur. Quod si vel longiores, vel obscuriores erimus, quam ejus, ad quem scribimus, sive natura, sive occupatio, sive doctrina postulabit, neutrum assequemur: ex quo fiet, & ut operam

omnem in scribendo amittamus, & ab illis tum odio, tum contemptui habeamur. Quapropter orationem nostram, quantum licebit, ad eorum, qui lecturi sunt, voluntatem, doctrinamque accommodabimus. Atque hæc circa personas conservanda esse censeo; nunc ad res ipsas transeamus.

*De Generibus Epistolarum.*

CAPUT XII.

**O**Mnis autem scribendæ epistolæ materia a fine deducitur, qui actionum nostrarum omnium dux, & moderator est. Is, ut in superiori volumine diximus, duplex esse potest, docendi, & movendi; absentes enim aut doceamus, aut moveamus necesse est. Alia enim scribendi causa, quod ego quidem sciam, esse potest nulla: ideoque epistolarum omnino genera duo fecimus: unum, quod ad docendos, alterum, quod ad movendos absentes, sit inventum. Quoniam autem quum doceamus, aut res divinas, mores, virtutes, disciplinasque, aut negotia vitæ civilis, actionesque tractamus: illud potissimum in duo genera partiti sumus, studiosum, seu contemplativum, & activum, sive negotiosum: ac studiosum quidem in duo genera rur-

rursus divisimus: divinum, & morale, quod dilucidandæ rei gratia appellare aliter non possumus. Activum quoniam multiplex erat, certa in genera non divisimus, ne lectorum animos multiplici partitione confunderemus. Movendi vero genus in duo item genera distribuimus, concitativum, & remissivum; affectus enim omnes aut concitamus in absentium animis, aut lenimus, remittimusque. Horum generum species innumerabiles, atque infinitæ sunt: quas quidem persequi velle & infinitum, & supervacuum esset. Nos eas, quæ maxime insignes, & necessariæ videbuntur, tantum persequemur: ceteras, quarum neque inventio difficilis erit, neque tractatio ab his multum abhorrebit, scribentium ingeniis excogitandas, tractandasque relinquemus.

*De divino, & morali genere Epistolarum.*

## CAPUT XIII.

**A**C duo quidem illa superiora epistolarum genera, in quæ studiosum illud genus partiti sumus, quorum alterum inter divinarum descriptione, alterum in morum, ac disciplinarum præceptis positum esse diximus, quanquam minus ne-

cessaria nostræ institutioni fortasse videantur, (nam & eorum tractatio aliarum disciplinarum propria est: & scribere de his, qui volet, majorem eruditionem habeat necesse est, quam ut ei in dicanda epistola elaborandum sit) tamen omittenda penitus esse non censui, vel ob id maxime, ut qui illis disciplinis instituti non essent, quum rei difficultatem intelligerent, scribere de his quicquam non auderent. Igitur scribere per epistolam aliquid sive de divinis rebus, sive de liberalibus disciplinis qui volet, ante omnia ejus, de qua scribere volet, disciplinæ, summam habeat cognitionem necesse est: neque ab aliis petat, quod ipse alios docere vult, nam si positionem aliquam vel male intellexerit, vel non suis verbis expresserit, vel oblitus aliqua ex parte fuerit, e vestigio & res tota labefactabitur, ac corruet, & ipse suam tum imprudentiam, tum ignorantiam indicabit. Neque vero eam tantum, quam tractabit, quæstionem tenere satis erit, sed universæ quoque disciplinæ fundamenta, & vocabula teneat necesse est; nam & probetur unumquodque per suæ disciplinæ principia, suasque in causas, atque elementa resolvatur, & propriis ejus disciplinæ, peculiaribusque vocabulis explicetur, necesse est: quæ qui ignorat, neque efficit quod vult, & discipli-

pli-

plinas ipsas confundit . Res itaque primum, deinde verba ejus disciplinæ recte teneat, qui tractare volet, quod suæ professionis non sit: deinde ita tractet, ut ad quos scribat, meminerit; aliter enim quum ad doctos, aliter quum ad indoctos scribimus, res universa tractanda est. Videndum est etiam, ut ea, quæ traduntur, certo ordine, ac ratione tradantur; nam & legentibus jucunda sunt, & discantibus facilia. Præcepta vero quanta maxima tradi possunt facilitate, tradenda, ne laboret intelligendo, qui ea servaturus est. Ne vero fastidium frequentia ipsa moveat præceptorum, in angustum contrahenda, & quasi inculcanda non sunt. Exemplis autem crebris utendum; ea enim, quam præcepta, magis movent. Neque veteribus tantum, quæ, incredibilia videntur, sed novis quoque, recentibusque utendum; ea enim facilia nobis existimamus, quæ ab aliis nostra ætate facta cognoscimus. Habet autem utrumque hoc genus cum in principio ea, quæ lectores attentos reddere solent, tum in tota epistola digressiones quasdam, quibus animi recreari, & quasi renovari ad legendum possint præsertim, si longior epistola futura sit; nam quum ipsa perdifficilis, severaque sit, habeat extrinsecus aliquid necesse est, quod ad legendum animos alluciat,

ciat, & pene attrahat. In hoc autem universo genere levissima, ac facillima sint, quæ de moribus disputant; nam & latissime patent, atque ad omnes pertinent, & liberius tractari possunt, quippe quæ verbis constent usitatoribus, campumque habeant ampliorem: in his tamen superior etiam servanda ratio est. Ac de duobus quidem illis generibus satis in præsentia dictum sit: quæ quoniam, & ad alias magis disciplinas pertinebant, & præceptionem communem habebant, conjuncte mihi tractanda esse censui. Nunc ad alia singillatim genera descendemus.

*De negotioso, sive activo Epistolarum genere.*

#### C A P U T XIV.

**S** Equitur id genus, quod in negociis positum esse diximus, quod vel activum, vel negotiosum appellari licet. Id in duo potissimum tempora distribuitur: præteritum, & futurum; nam præsentia ita tractantur, ut partim præteritis, partim futuris conjuncta sint. In præterito quidem tempore negocia omnia ita quidem tractamus, ut aut quemadmodum gesta sunt, narremus, aut laudemus, aut vituperemus; aut de his gratias agamus, aut gratulemur;  
aut



aut in his aliquid accusemus, aut defendamus, five excusemus. In futuro res aut certas, aut incertas scribimus. Certas quidem aut imperamus, aut suademus, aut dissuademus, aut commendamus, aut petimus, aut quæ his contraria sunt, facimus. Incertas vero aut deliberamus, aut optamus, aut prædicamus, aut conjectura opinamur: aut id, quod utrisque commune est, in his consilium damus: quod tamen ad suasionem, & dissuasionem referri potest, separatim tamen tractandum nobis visum est. Atque hæ sunt (ut mihi quidem videtur) hujus generis præcipuæ species. Si quæ præterea sunt, aut his adjungi possunt, aut ab his non sane multum discrepant. Nos has potissimum repetentes singillatim tractemus, & quæ unicuique præcepta conveniunt paucis explicemus.

*De Epistola narrativa.*

C A P U T X V.

**I**gitur quum negocium aliquod per epistolam narrandum est, ante omnia cur id narretur, considerare debemus: ut sine perspecto, ad eum omnis nostra narratio dirigatur. Nam si ex ea cognitio tantum rei, & notitia quæritur, ita res primum proponen-

nenda est, lectorisque animus in expectationem adducendus, ut si id petierit ad se perscribi, sciat nos sibi diligenter, accurateque satis facere: si non petierit, nos cupidum rei cognoscendæ faciamus, ut intelligat nos etiam absentes ea, quæ scire is velle debeat, ultro cogitare, atque afferre; deinde ita narranda res est, ut nihil omitamus de iis, quæ legenti aut cognitionem, aut delectationem possint afferre. Neque cum ipsa narratione finienda epistola est, ne inanis, & frustra suscepta narratio videatur: sed aut ejus causâ breviter exponenda est, aut ad aliquam vitæ partem accommodanda, aut invicem aliquid ab eo, ad quem scripsimus, exigendum. Si delectationis causâ narratio suscepta sit, & omnia, quæ id facere possunt, exequenda sunt, & lectoris animus nunc rerum varietate, nunc jucundis digressionibus detinendus est. Omnia vero lepidius, urbaniusque narranda. Claudenda vero epistola vel aliqua jucunda, acutaque sententia; vel similium nunc rerum pollicitatione, nunc expectatione. Si nostræ, vel amicorum res domesticæ, familiaresque narrentur, simplicem, nudamque narrationem, sermonique simillimam esse oportet. Nusquam liberior, ac solutior epistola est. Licet exordium vel adhibere, vel omittere: li-

licet plura negocia nullo servato ordine narrare : licet ab uno in aliud , quod longe volumus , digredi , atque ad idem sæpius reverti : licet seria jocis , jocos seriis immiscere . Sermo familiaris , & quotidianus esse debet . Finem epistolæ finis negotiorum affert : neque epilosis , aut transitionibus , aut occupationibus , aut ullo genere artificii opus est . Denique summum artificium in hoc genere est , ut nullo artificio utamur : ut extemporalis epistola non excogitata videatur . Quod tametsi tabellarius ultro exigentibus fieri necesse est , tamen etiam si nulla nos aut temporis , aut hominis necessitas cogeret esset illa in stylo extemporalitas effingenda . Qua de re non defuerunt , qui dicerent epistolam redolere incuriam quamdam , & negligentiam oportere . Si vero partim gesta , partim gerenda negocia exponemus , ita narrabimus , quæ gesta erunt , ut ex iis facile , quæ gerenda erunt , intelligantur ita , ut non solum præterita , & præsentia exponamus , sed futura etiam conjecturis quodammodo significemus : tum quid vel ipsi ab amico petamus , vel illi faciendum arbitremur , paucis aperiamus ; quid in quaque re aut boni , aut mali sit breviter declaremus . Postremo , quæ in nostra libertate sunt , liberaliter polliceamur .

mur. Atque his potissimum rationibus, quum exponenda erunt negocia, exponemus.

*De laudandi, & vituperandi genere.*

## C A P U T X V I.

**P**roxima est laudandi, & vituperandi ratio. Ea quoniam ex iisdem partibus sumitur, locis tantum in contrariam partem commutatis: ut supra fecimus, a nobis conjunctim tractabitur. Igitur quum hæc omnis ratio in res, atque personas conferatur, duo in primis considerata sunt, quum laudamus, utrum eum, ad quem scribimus, an alium quempiam, & qua de causa, utrum commendandi, an gratias agendi, an aliquid impetrandi, an homines conciliandi gratia; plurimum enim refert tum persona, tum causa. Eadem in vituperando sequenda est ratio; aliter enim eum ipsum, ad quem scribimus, vituperamus, aliter de alio ad eum scribimus. Multæ item sunt vituperandi causæ, ut maledictis respondeamus, ut injurias ulciscamur, ut vitia detestemur: aliæque permultæ, quarum in scribendo delectus habendus est. Igitur si eum ipsum, ad quem scribimus, laudare constituerimus, siue id hominis con-

conciliandi, five aliquid impetrandi, five ut hodie fit, volumen aliquod dedicandi gratia faciamus, principium aliunde sumemus: dabimusque operam, ne ille propter ea nos scribere credat, ut laudemus. Nihil enim (ut mihi quidem videtur) absurdius, atque oratoris officio alienius, quam quum nos tantum laudandi gratia vel dicere, vel scribere profitemur. Assentatores enim, e vestigio, non laudatores existimamur: nostraque scripta levissima ab omnibus, & vanissima judicantur, quippe quæ placendi studio confecta, nihil veri, relique continent. Hoc vitium effugere qui volet (omnes autem velle debemus) dabit operam, ut per insinuationem, ejus, ad quem scribit laudes ingrediatur; id autem commodissime faciet, si ab alterius egregie factis, aut dictis incipiat: item si ab aliqua sententia, quæ nos ad virtutis admirationem, investigationem, testificationemque excitet, principium sumat: item si dicat, se admiratione quadam, & splendore illius commotum contemplari ea, non laudare velle, magisque, ut alii cognoscant, atque imitentur, quam, ut ille res suas legat, ea scribere. Neque vero placet illud, quod est in tertio libro ad Herennium scriptum, ut dicamus id nos ex officio facere, quod causa necessitudinis intercedat. Officium enim di-

dictis in utramque partem omnibus fidem ,  
& auctoritatem detrahit . Nam si laudamus, vel amori, vel meritis id tribuere existimamur : si vituperamus, vel odii , vel injuriæ gratia facere id credimur . Immo in utramque partem omnis , meo judicio, tollenda suspicio est : dandaque opera , ut aliorum , non nostra causâ laudare quempiam , aut vituperare videamur . Aristoteles in demonstrativa causâ , libera maxime principia esse censet ita , ut etiam a rebus a causâ remotissimis exordiri liceat , quemadmodum Sallustius apud nos fecit in Catilinarîi , & Jugurthini belli principio . Id ego in dicendo non probo ; in scribendo probo præsertim , si recte , & per quosdam quasi gradus ad causam descendamus , ut sequi ea , quæ dicimus , non trahi , conjunctaque esse inter se , non consulta videantur . Laus enim omnis vel admirationis , vel testificationis vim habeat , neque aperta propositione proponatur , necesse est : ne scribere ea tantum de causâ videamur , nec venisse in eam mentionem , sed incidisse existimemur . Laudandi vero ratio ex superiori præceptione petetur , ita tamen , ut non omnia , sed clarissima quæque , & ad causam nostram accommodatissima , nobis sciamus esse deligenda . Digressionibus tam in laude , quam in vituperatione crebris  
ute-

utemur, ut & jucundior laus sit sæpe repetita, & aliud agere videatur oratio. Amplificationibus item utemur per eos, quos in superiore libro docui, locos communes. Hæ multum valent etiam ad eas, quas scribimus, siue laudes, siue vituperationes augendas, & ad legentium animos incitandos. Conclusionibus brevibus, & ad nostram causam accommodatis utemur: epilogis raris, ac brevibus, ut scribi epistola, non haberi oratio videatur. Et quoniam unicuique laudandi finis præpositus esse debet (neque enim ut laudemus, nos tantum ad scribendum adduci convenit) dabimus operam summo studio, ut omnes laudes, omnia dicta, epistolam denique universam ad eum quem proposuimus finem accommodemus: eo nostras argumentationes, tanquam ad signum aliquod dirigemus. Eadem omnia vituperatione spectanda sunt. Causa vero ejus rei, quoad fieri poterit, necessaria afferenda, atque in hominum animis fundamenta tum causæ, tum benevolentiae firmissima jacienda, ne qua de re nobis suspicio exoriri possit, quod ad ea perscribenda vel ira, vel odio, vel invidia, vel malevolentia adducti simus: eoque magis id vitandum est, quod omnis per se odiosa vituperatio est. Vituperandi autem ratio ex laudis præceptione sumetur, locis,

K

ut

ut diximus, commutatis, virtutibusque, in finitima vitia detortis: quæ quidem præceptio quoniam per se facillima est ( omnes enim ad vituperandum, quam ad laudandum ingeniosiores sumus: & non in virtutibus, quam in vitiis ostendendis exerceri malumus ) prosequenda latius visa non est. Illud in utraque ratione præcipiendum, ut nihil impossibile, nihil incredibile, nihil non verum, aut certe vero quam simillimum, proximumque dicamus: ne assentatores, si laudemus: si vituperemus, hostes, aut maledici videamur. Si laudare extraneam personam apud amicum velimus, tunc licebit ab officio nostro principium sumere, & causis necessitudinis, si quæ nobis cum illo intercesserint, commemorare. Sunt autem causæ necessitudinis, amor, beneficium, honor, cognatio, affinitas, vicinitas, patria, hospitalitas: item illa morum, studiorumque similitudo, præsertim bonorum. Quæ si aderunt, in principio commemorabimus: si non aderunt, dicemus nos studio virtutis, quo præcipue teneamur, vel nobilitatis, vel miserationis, vel pietatis, vel alia honesta, ac probabili ratione, ad eum laudandum, sive ornandum, sive juvandum esse adductos: petemusque ab amico, ut insignem virum tum cognoscere, tum comple-



plecti velit: ejusque rei fructum illi aliquem vel studii, vel benevolentiae, vel fidei, vel gloriae, vel utilitatis, vel saltem conscientiae pollicebimur. Quæ quidem omnia ad commendatitias epistolas plurimum valebunt. Si vero rem quampiam laudabimus, ut artem, disciplinam, professionem, virtutem: danda opera erit, ne modo id studio, quod ea nos maxime res delectet, facere videamur: sed si ea res amicum delectet, nos ejus delectationi inservire ostendamus: si non delectet, dignam nos putasse rem dicemus, qua ejus animus delectetur: paulatimque ejus fructus, atque utilitates commemorabimus. Ingressi vero materiam, ejus tractandæ rationem ex iis, quæ supra scripsimus, repetemus. Finem ejus convenit esse, ut eam rem vel amemus, vel capeamus, vel frequentemus, vel certe in precio, atque honore habeamus. Ad eum rationes nostras omnes, argumentationesque conferemus: idque exemplorum in primis tum copia, tum claritate confirmabimus. Eadem in artis, aut vitii alicujus vituperatione, atque execratione sequenda ratio erit, ut ejus rei tractationem non ejus, ad quem scribimus, gratia suscepisse videamur: quod omnium odio, ac detestatione dignam judicemus, eam deinde iis rationibus, quibus

bus supra laudandam esse docuimus, detestabimur: ejus damna, detrimenta, incommoda, ignominiam, labem, & perniciem proferemus: quantum deinde hominibus semper nocuerit, quanto in odio semper habita fuerit, plurimis exemplis ostendemus. Atque hæc potissimum in laudandi, & vituperandi genere servanda esse judicavimus.

*De gratiarum actione.*

## C A P U T XVII.

**L**Audi vero tum gratiarum actio, tum gratulatio finitima, & pene conjuncta est; utraque enim magna ex parte laudem continet. Et gratiarum quidem actio, tametsi non eodem semper modo tractatur, habet tamen semper, tum accepti beneficii testificationem, amplificationemque, tum aliquam seu verborum, seu animi, seu rerum remunerationem. Beneficium quidem aut a dantis, aut a recipientis persona, aut a re ipsa laudabimus. A dantis persona, laudabimus beneficium, si ostendamus illum non rogatum, non coactum, non debentem, sed ultro, libenter, liberaliterque contulisse. Hoc loco eum a magnificentia, & animi magnitudine laudare poterimus.

Si

Si rogatus fuerit, dicere poterimus eum citius spe, atque opinione fecisse, aut etiam plus, quam rogatus fuerit, dedisse: ejus præterea in re præstanda sedulitatem, fidem, studium, laborem, industriam, operam, diligentiam, benevolentiam, aut horum aliquid commendabimus. Plus etiam illum, quam pollicitus fuerit, præstitisse: aut plus, quam fuerit opus, oneris, & laboris nostra causa suscepisse dicemus. Si vero nostris beneficiis provocatus, gratiam retulerit, dicemus eum vel plus, quam acceperit, vel melius, vel majus, vel celerius, quam debuerit, reddidisse. A nostra persona beneficium laudabimus, si necessitatem nostram, aut calamitatem proferemus: si partes, quas ab animo, vel a natura, vel a fortuna habemus, modeste, ac verecunde commemorabimus: easque dicemus sine illo beneficio nos aut retinere, aut servare, aut exercere non potuisse. Item si nos ei vel affinitate, vel cognatione, vel patria, vel amicitia, vel ordine, vel studio, vel professione, vel moribus, vel alia hujusmodi re, quæ adducere hominem ad beneficium in nos collocandum potuerit, conjunctos esse dicemus. A re ipsa beneficium laudabimus, si magnum, si insigne, si insperatum, si incredibile, si perpetuum, si utile, si honestum, si laudabi-

le, si opportunum, si denique jucundum nobis, & gratum tum tempore, tum loco fuisse, ostendemus. Mercedem vero pollicebimur, siue in eadem, siue in maiore; nunquam in minore, nisi forte aut rerum numerus, aut indignitas, aut labor beneficium augeat. Si facultas referendæ gratiæ non erit, nos, nostraque illi perpétuo debere ostendemus, animum præterea, & voluntatem nostram erga illum optimam aperiemus. Eum nos animum si ostendere aliter non possumus, dicemus nos ejus beneficiis, & laudibus prædicandis omni loco, omni tempore, omnibus hominibus ostensuros, eoque pacto beneficia ejus cumulatiora, illustrioraque reddituros. Neque ab re interdum fuerit, hujus gratiæ relationem ad Deum bonorum omnium largitorem, remuneratoremque rejicere, ut ipse, qui solus & potest, & solet, meritis illius præmia digna restituat. Atque hoc pro personarum, quibus gratiæ agentur, qualitate faciendum erit.



*De Gratulatione.*

## CAPUT XVIII.

**G**ratulatio quoque non est a laudandi ratione disjuncta. Nam & rem, de qua gratulamur, & personam cui gratulamur, laudemus necesse est: neque hæc eadem semper ratione tractanda est. Nam & sola epistolam separatim facit, & cum aliis negociis sæpe conjungitur. Item aliter amico, aliter principi, aliter in re magna, aliter in parva gratulamur. Servare tamen hæc plerunque debemus, primum, ut lætitiæ nostram, & amplissimis verbis explicemus, & veram, solidamque esse optimis rationibus doceamus, deinde ut rem, de qua gratulamur, collaudemus: ostendamusque si res magna sit, dignam ea re fuisse/personam: neque aliam, cui tantopere res ea conveniret, facile inventum iri: neque minus rei, quam personæ fuisse prospectum. Si parva res sit, dicemus eum quidem multo majora, atque ampliora meruisse, sed hunc ad cetera quemdam quasi gradum, atque aditum esse. Si restitutio vel fortunæ, vel dignitatis sit, non tam amissio deploranda (quanquam possit ea culpa, vel in homines, vel in tempora, vel

in fortunam, vel in casum aliquem jure, conferri) quam restitutio laudibus, & lætitia prosequendi, quod ejus virtutis, dignitatis, nobilitatis, salutis habita tandem ratio sit; lætitiā vero nostram, aut a spe, confirmabimus, quod de illo sperasse tum nos, tum alios multos ante dicamus; aut ab insperato augebimus, quod rem tantam, tam cito, tam prospere succedere potuisse, tum ob rerum, temporumque difficultatem, tum ob perversitatem hominum, nunquam putaverimus. Quo loco ejus virtutem, diligentiam, industriam, laudabimus; optabimus deinde illi, vel ei rei, quam adeptus est, conservationem: tum ceterarum, aut similium, aut majorum accessionem. Si magistratus fuerit, tum ad illius rectam, integramque administrationem cohortabimur, si modo dignitas personæ patietur: sin major erit persona, quam ut eam amice cohortari, atque monere possimus, scire nos dicemus, eum se optime, atque integerrime, & ut in ceteris solet, in eo magistratu gesturum: magnamque ex eo vel fidei, vel industriæ, vel diligentia, vel integritatis laudem reportaturum; dabimusque operam, ut quæ facere debet, ea nos facturum esse eum dicamus. Si vero is sit, quemadmodum possumus, eum fideliter, amiceque, quo pacto se gerere oporteat, ad-

admonebimus, dicemusque ejus rei, vel gloriam, vel ignominiam non minus ad nos, quam ad illum, pro nostra amicitia pertinere. Hæc (ut dixi) sunt pro rerum, & personarum qualitate servanda. Apud amicum enim brevius, & familiarius, imo etiam levius tractanda sunt: dandaque opera, ut nihil fictum, nihil fucatum, excogitatumque nihil appareat, sed ut vere nos gratulari, amiceque intelligat. Apud principem omnia gravius, uberius, artificiosiusque agenda, ut se magnifici a nobis, colique cognoscat. Illud tamen in primis observandum, ut vel vera gratulatio nostra, vel ab omni certe assentationis suspicionem aliena videatur. Sed de his hæcenus.

*De accusandi genere.*

## CAPUT XIX.

**S** Equitur ex iis, quæ ad præteritum tempus pertinent, accusandi genus, quod multas in species distribuitur: quas quidem ut complecti facilius, atque explicare possimus, tria potissimum considerabimus, causam, personam, actionem. Causa in crimen, injuriam, vitiumque dividitur. Quicumque enim a nobis accusandus est, aut deliquerit, aut offenderit, aut erraverit,

rit, necesse est; aliud enim, quod ego quidem sciam, accusationi subiectum esse non potest. Persona vero duplex est, rei, & iudicis: quæ nunc eadem est, nunc diversa; aut enim eum ipsum, ad quem scribimus, accusamus, & suæ causæ quasi iudicem constituimus: aut alium apud alium accusamus. Actio quoque species complures habet; aut enim quasi apud iudicem accusamus, aut quasi apud amicum exposulamus, aut de injuria nobis illata conquerimur: quod etiam pro rerum, personarumque qualitate diversis modis facimus. Jam vero subditos per literas oburgamus, increpamus, monemus: quæ quidem omnia pro causæ, & personæ qualitate, non una ratione tractantur. Namque (ut de causâ primum dicamus) si leve, & tolerabile crimen erit, quale est intermisisse scribendi officium; amicitiae consuetudinem, aut leges non servasse, non respondisse  
 71<sup>v</sup> amor, aut literis nostris, & quæ similia sunt: primum cum admiratione quadam id crimen explicabimus, deinde per confutationem omnes ei excusationes auferemus: tum crimen ipsum augebimus, nosque id magnificare ostendemus: nihil deinde a nobis tale commissum esse demonstrabimus, nostrumque officium cum illius officio comparabimus. Quum autem illum,  
 quasi



quasi convictum nostris argumentis, rationibusque tenebimus, illum quasi condemnantes multabimus jucundissima multa officii in posterum duplicandi, consuetudinisque cumulatus refarciendæ. Si gravius crimen erit, ejus accusare amicum statuerimus, quale esset perfidiæ, doli, insidiarum, ejus rei ad nos injuria pertineat, primum a nostro in eum amore, nostrisque meritis initium capiemus: nostram in eum fidem, studium, benevolentiam, integritatemque commemorabimus: nullamque illi perpetrandi criminis causam fuisse ostendemus: deinde crimen ab eo commissum esse docebimus. Et quum diu illud au-xerimus, tum qua de causâ commissum, investigabimus: causisque omnibus confutatis, quæ illum quoquo modo compellere possent ad faciendum, aut nullam; aut turpissimam, minimeque ejus dignitati convenientem illi causam fuisse ostendemus, tum quali poena dignum sit crimen, inquiremus: atque illum, quasi causæ judicem statuentes, quæremus ab eo, quid ipse de alio judicaturus fuerit, quo supplicio dignum existimaturus, qua in eum clementia usus. Quod si servare amicum statuerimus, quam id sit ab amicitiae legibus, & sanctitate alienum, ostendemus: dicemus tamen nos illi libenter ignoscere, modo  
ve-

velit in posterum abstinere. Atque hoc loco illum liberius monere, & si personæ qualitas patietur, etiam objurgare poterimus. Postremo cum amicitiae quadam quasi instauratione epistolam concludemus. Si crimen ad nos non pertinebit, quum diu illud auxerimus, detestatique fuerimus, satis erit pro nostra amicitia amicum, ut in posterum abstineat, admonere: eique infamiam, pericula, poenas, ceteraque quæ ad deterrendum hominem valent, amice, severeque proponere. Si vero alterius crimen apud principem, vel apud aliquem, qui judicandi de illo jus habeat, deferemus, exordium ab ingenti benevolentiae captatione sumemus; eam tum a nostra, tum illius, ad quem scribimus, persona captabimus: id quomodo faciendum sit, ex superiore libro repetemus. Deinde ad causam pedetentim accedentes suspicionem odii, maledictiæ, invidiæ, calumniæque omnem a nobis removebimus: imo, si poterimus, amicitiam inter nos intercedere dicemus, officiaque ultro, citroque collata commemorabimus. His jactis fundamentis, crimen narrabimus: tum pro constitutionis genere, causam nostram argumentis, rationibusque confirmabimus, confutabimusque ea, quæ contra aut dicta essent, aut dici potuissent, deinde petemus ab eo, ad quem scribe-

bemus, ut hac de re iudicium faciat: neque inultum, aut impunitum tantum scelus, patiat<sup>ur</sup>: tum quid futurum sit, si hoc impune facere liceret, ostendemus, remque per omnes locos amplificabimus. Conclusionibus ad finem, quem nos proposuerimus, accommodatis utemur. Nam si ea de re iudicium futurum sit, epilogo utemur: causâque confirmata, exaggeratoque crimine, quid de ea iudicii fieri oporteat ostendemus: idque ut fiat, rogabimus. Si de ea iudicium futurum non sit, crimen ipsum atrocibus verbis detestabimur: & cum tempore querela, & hominum per-  
74 versitate, aut aliqua utili ad bene, beateque vivendum sententia concludemus epistolam. Atque hæc quidem causâ quo pacto tractari debeat, quoniam satis, abundeque superius a nobis dictum est, quæ hic conveniunt, inde repetantur.

*De injuriarum, vitiorumque accusatione.*

## CAPUT XX.

**S**I apud amicum de injuria expostulabimus, initium capiemus a nostræ amicitiae antiquitate, stabilitate, magnitudine, conjunctione: item a nostris in eum officiis, studiis, a nostra optima, constantique volun-

luntate ; aut si hic nos vel ætate , vel dignitate anteibit , a nostra in eum observantia , perpetuaque voluntate ordiemur : quamque sit vel indecorum , vel turpe , amicum immerito offendere , ostendemus ; deinde injuriam acceptam indigne , atrociterque explicabimus : atque ab eo ipso profectam esse docebimus . Duplex inde agendi ratio est . Nam si amicum gravius accusare statuerimus , ostendemus illum tantum gratia offendendi fecisse , quod fecerit , sive ut nobis aperte noceret : quod inimici , non amici animi est : sive ut ipse ex ea re commodum aliquod consequeretur . Quarum rerum utramque ab amicitia legibus , atque officiis alienissimam esse demonstrabimus : atque ad alterutram , sive utramque rem comprobendam vim argumentorum omnem conferemus . Quod si is in officio velit permanere , quo pacto nobis satisfacere possit , interrogabimus , idque nos maxime expectare dicemus . Sin aliqua ex parte amicum accusare statuerimus , causam illius injuriæ , causis multis allatis , confutatisque , ignorare nos omnino dicemus : neque tamen existimare nos , illum nostri offendendi gratia , ut id faceret , adductum esse , quod esset , & ab ejus natura , consuetudine , humanitate , & a nostra amicitia , observantia , meritis penitus alienum .

num. Expectare autem nos magnopere, dicemus, ut quoquo modo, & suæ dignitati, & nostræ amicitiae satisfaciat. Quod si is nos ætate, ac dignitate antecedit, quam indignum sit juniorem a seniori, a potente impotentem, ab opulento inopem, a majore denique minorem offendi, decipi, vexarique per locum communem ostendemus; tum nostram ætatem, impotentiam, inopiam, imbecillitatem cum illius ætate, potentia, opibus, & robore comparabimus: deinde nostram erga omnes innocentiam, mansuetudinem, clementiam, benignitatemque ostendemus: quamque indigne nobis, & præter spem, atque opinionem accadat, conqueremur. Hic quum locis communibus ad commovendam misericordiam usi fuerimus, rogabimus hominem, ut si prodesse aut non vult, aut non potest, nocere certe non velit. Si vitiosum aliquem reprehendere, aut accusare statuerimus, quoniam id fere a superiori in inferiorem proficisci solet, vel monendo, vel objurgando faciendum erit. Ab hoc tam<sup>non in d</sup> posteriori semper abstinendum, quum superiori uti licet: quum res gravior est, quam ut superius illud satis esse possit, ad posterius confugiendum est. Quum mone-  
re aliquem statuerimus, primum ostendere oportebit, nos eam rem, de qua agitur,  
pro-

probe scire, ne ille securius se excuset, quod a nobis ignorari putet: deinde ejus rei admonitionem ad nos potissimum pertinere vel ætatis, vel amicitia, vel sanguinis, vel aliqua justa ejus generis ratione, tum rem ipsam, uti gesta est, atrocius etiam, atque indignius, quam gesta est, exponemus. Deinde interrogabimus eum, num ita res se habeat: num ipse ejus rei auctor fuerit: num recte fecerit: num, quum id faceret, consilium, prudentiam, aut judicium adhibuerit: num suæ, vel ætatis, vel nobilitatis, vel dignitatis, vel salutis rationem ullam habuerit. Quum autem videbitur his verbis esse commotus, tunc admonitio sequi debet: ea severa, gravis, recta, fidelis, & paterni, aut fraterni affectus plena sit necesse est, quæ poenitentiam, aut pudorem facti afferat, desperationem nequaquam: neque minus incitet ad futurorum cupiditatem, ac spem, quam ad dolorem, & poenitentiam præteritorum. Admonebimus autem tum a persona, tum a causa: a persona, quum ostendemus eum fecisse rem indignam suis majoribus, sua cognatione, patria, aut si nihil horum habeat, sua ætate, nostra consuetudine, professione, amicitia eorum, quibus cum vivat. A causa admonebimus, quum ipsius rei per se indignitatem, foeditatem, abjectionem

tionem, vitiaque ostendemus: quantumque absit a virtute, & recte facti ratione, atque honestate, docebimus: tum quid eum fecisse oportuerit, & quanto id facilius, honestius, ac laudabilius futurum, ostendemus: eumque in posterum ab eo vitio deterrebimus, atque ad virtutem, & bene vivendi rationem cohortabimur. Si objurgabimus aliquem ab ipsodem fere locis personam commovebimus, remque exaggerabimus, sed atrocius, atque iratius agemus: anteaquam illi vitam cum exprobratione commemorabimus, qualis sit de eo spes in posterum, per irrisum ostendemus: poenas ei multiplices impendentes proponemus: eumque tum ignominia, tum suppliciiis deterrebimus: quantaque eum incommoda, quanta pericula, quanta a Deo, atque hominibus supplicia maneant, aperiemus. Postremo eum tum a rebus, tum ab hominibus, quibus maxime fretus vivat, tum etiam a nobis ipsis destitutum iri ostendemus, spemque illi omnem rerum, atque hominum, quantum fieri poterit, adimemus. Sed hæc materia rarius cadit in epistolam, nisi a patre in liberos proficiscatur, tamen quod erat cognitu non inutilis, relinquenda non est visa. Nunc ad defendendi genus transeamus.

*De excusandi, sive defendendi genere.*

## C A P U T XXI.

**D**efendendi, atque excusandi eadem, quæ accusandi, ratio est. Partes eadem habet, causam, personam, actionem: quæ quoniam inter se ita conjunctæ sunt, ut separari nequeant, conjunctim quoque a nobis tractabuntur. Omnis igitur causa, aut excusatur, ut non facta: aut tanquam facta defenditur. Si culpa omnino carebimus, remque excusare, ut non factam, apud amicum voluerimus, ab admiratione ejus, qui ita de nobis credat, aut scribat, incipiemus: nostram in eum benevolentiam, observantiam, fidem commemorabimus: anteaquam ei vitam in memoriam redigemus: nunquid simile, aut de majoribus nostris, aut de nobis ipsis unquam audierit interrogabimus: rem deinde a conjecturæ partibus, quas supra docuimus, ab illisque præsertim, quas ipse ad probandum attulit, infirmabimus: omnique ex parte incredibilem, inutilem, incommodam, indignam, difficilem nobis; & si poterimus, etiam impossibilem reddemus: quæque is firmissima contra nos argumenta colloca-  
verit, ea potissimum aut dissolvemus, aut in-



infirmabimus, aut eludemus: deinde, si poterimus, quis auctor ejus rei fuerit, vel aperte ostendemus, vel conjecturis significabimus. Id si non poterimus, alios in suspicionem adducemus. Rogabimus postremo, ut omnem de nobis suspicionem abiciat: nostramque amicitiam in posterum, optima spe, multisque pollicitationibus confirmabimus: rogabimusque eum, ut animi, atque amoris nostri quodvis periculum faciat. Si rem non factam apud superiorem excusabimus, in principio, quantum poterimus, nos in ejus benevolentiam insinuabimus, vererique nos dicemus ei quoquo modo adversari: sed fretos ejus humanitate, prudentia, benevolentia, æquitate, sperare plus apud illum, vel nostram innocentiam, vel ipsam per se veritatem, quam invidorum criminationem, aut perfidiam, tum fidei, tum auctoritatis habituram, cui nostra in primis vita, consuetudo, & in eum observantia nota sit, quarum rerum utilis commemoratio erit: culpam omnem in delatores, invidos, calumniatores, maledicos transferemus: ab eisque hanc in nos fabulam, vel ex sua natura, vel ex odio nostri, vel ex aliquo commodo, quod se consecuturos sperent, vel ejus ipsius fallendi gratia confictam esse dicemus: illis eum nullo modo credere oportere. Tum no-

77<sup>v</sup>

fram innocentiam probabimus, & ea, quæ in superiore excusatione præcepta sunt, omnia sed summissius, & circumspectius exequemur: quæque superius de amicitia diximus ea, in observantiam, fidem, & venerationem commutabimus: eademque clausula epistolam concludemus. Si facta res apud amicum defendenda erit, aut per se recte facta ostendetur, aut accersita extranea causa comprobabitur. Si pro recte facta defendemus, aut jura, aut leges, aut instituta, aut consuetudines, aut rationes, quibus id fieri liceat, afferemus: ostendemusque nihil a nobis contra officium, contra amicitiam, contra æquitatem, aut contra ejus vel salutem, vel dignitatem esse factum: quid autem factum sit, post breve exordium cum rei extenuatione narrabimus. Exordium autem tum admirationem ejus, qui recte factum vel ignoret, vel accuset, tum propositionem causæ justam, atque honestam continebit. Probata autem his, quas modo dixi rationibus, causa, nihil de nostra amicitia propter id minui debere ostendemus: quantique nos eum semper fecerimus, atque in posterum facturi simus, demonstrabimus; rogabimusque eum, ut amicitiam, benevolentiam, fidem, diligentiamque nostram omnibus suis in rebus experiatur. Si defensio per se infirma erit, at-

78 atque adjuncta extraneæ causæ videbitur indigere, primum non id factum, quod ille opinetur, dicemus, atque esse eum/vel ab aliis, vel ab ipsa rei specie deceptum ostendemus: deinde quid nos fecerimus, quid factum esse dicatur, alterum extenuando, alterum augendo, exaggerandoque narrabimus: factaque utriusque comparatione, quid hoc ab illo differat, ostendemus. Si facti species mutari non poterit, mutabitur magnitudo, modus, tempus, locus, aut aliquid ex his, quæ negotium possunt extenuare. Sin horum quoque nihil mutari poterit, finis saltem mutabitur: ostendemusque nos id non ejus offendendi gratia suscepisse, neque fuisse unquam suscepturos, si qua ex parte illum offendi posse suspicati essemus, tum de nostra innocentia, natura, consuetudine, professione, de nostra item amicitia pluribus tum rationibus, tum exemplis agemus: nullamque ejus offendendi causam fuisse dicemus. Hoc loco assumptivæ juridicialis partibus utemur: culpamque ut supra docuimus, vel in hominem, vel in rem quampiam transfereamus. Postremo rogabimus, ut nobis ignoscat: omniaque in posterum, quæ de amico sperare fas est, de nostra fide, diligentia, benevolentiaque pollicebimur. Si crimen, de quo aliquod judicium futurum sit,

apud superiores defendemus, utemur eadem, quam modo docuimus, tum distribuendi, tum defendendi ratione: sed omnia & circumspectius propter personæ dignitatem, & vehementius propter rei periculum tractanda sunt. Primum quidem ea dicenda, quæ benevolentiam omni ex parte contrahant: deinde, quæ causam nostram omnibus modis probent: postremo, quæ ad veniam, & misericordiam impetrandam sint accommodata: quæ quoniam modo facienda sint, quoniam superius satis, abundeque dictum est, hoc loco non commemoro. Si vero nostræ causæ maxime diffidimus, ad deprecationem fugiendum est: ejusque ad quem scribemus, æquitas, mansuetudo, clementiaque laudanda. Peccatum si extenuari non possit, plane confitendum, atque omnis nostra spes in ejus clementia, misericordiaque reponenda, quam sæpe, & quam multis vel alii, vel ipse, simili, aut majori de causâ ignoverit, exponendum: quantamque ei apud Deum, qui etiam hostibus ignosci voluit, vel apud homines ea clementia sit laudem allatura. Proderit etiam per locum communem de humanæ naturæ imbecillitate, & fragilitate disserere. Misericordia postremo, per eos, quos supra docui, communes locos, quoad fieri poterit, est commo-

79<sup>2</sup> movenda; omnisque fides, integritas, probitas, virtusque in posterum promittenda. Atque in excusandi quidem, & defendendi genere hæc scribenti servanda sunt.

*De certis, & incertis rebus.*

## CAPUT XXII.

**E**T præteriti quidem temporis in hunc modum ratio se habet. Futurum tum in rebus certis, tum incertis versari diximus. Certas res voco, quas aut faciendas, aut non faciendas esse, certa quadam animi sententia judicamus: ut ea, quæ vel principium aliquod habent, vel cursu aliquo naturæ, aut consuetudinis, certo quoque temporis spacio redeunt, & quasi referuntur, ut si apparatus belli viderimus, bellum futurum esse tanquam certam rem dicimus. Item quum hyemem, atque æstatem ex ipso naturæ cursu, recurrere singulis annis videamus, de his quasi de certis rebus loquimur. Item quum annuos Romæ creari magistratus longa jam consuetudine compertum habeamus, futura comitia, tanquam rem certam expectamus: magistratusque ante tempus, quasi certos, statosque petimus. Incertas vero res appello, quæ neque principium, neque tempus, quo ge-

78<sup>v</sup> rantur, certum habent, sed in spe, aut opinione, aut conjectura, aut rerum, voluntatumque mutatione universæ sunt positæ. Et quoniam in utramque partem sine ullo discrimine possunt evenire, judicia nobis libera non relinquunt, hujus generis exempla sunt; utrum ego anno proximo Romæ sim commoraturus: utrum Venetias, an aliam Italiæ civitatem petiturus: Utrum hoc anno Pontifex moriturus sit, & quæ sunt generis ejusdem, quæ possunt in utramque partem evenire, ut diximus: nos igitur a certis rebus incipientes, species singulas, quantum necesse videbitur, percurremus.

*De imperandi, & prohibendi genere.*

### C A P U T XXIII.

**I**N his prima est imperandi ratio, quæ superiorum, aut magistratum, aut potestatem aliquam gerentium est. Sed quum illi per alios, ut plurimum scribant, utrisque præcepta tradenda sunt. Omnibus igitur, qui per litteras aliquid imperaturi, aut mandaturi sunt, sive suo, sive alieno nomine id agant, tria potissimum consideranda sunt: quibus imperetur, quid imperent, quomodo imperent. Nam etsi omnibus be-  
ni-

nigne, mansueteque imperandum est, & omnes enim humanitati, quam superbiam libentius obtemperant, & ingenuis tamen, & generosis animis mansuetius, & consideratius imperandum est; sponte enim, quæ agenda sunt, agunt. Retinenda tamen est semper majestas imperantis, ne cui præest, subesse, aut quem cogere potest, rogare videatur. In hoc genere aut nullo, aut quam brevissimo exordio utendum est. Id si res postulabit, ad ea, quæ facienda sunt, lectorum animos præparabit, rationemque, qua ipse ad imperandum ductus sit, aut utilitatem exponet: nonnunquam rei magnitudinem, difficultatem, necessitatem, honestatem, laudem, præmiumque proponet. Id si opus non erit, a narratione incipiet ejus rei, de qua imperaturus est; rem autem, quam imperabit, primum possibilem ostendat necesse est: deinde etiam facilem, aut certe non difficilem: honestam præterea, & utilem, non ei, qui imperat solum, sed ei quoque, qui imperium sustinet, & si poterit, etiam necessariam. Modum quoque rei gerendæ, facultatemque præbeat. Postremo, quid ex ea re emolumenti, vel laudis sit uterque consecuturus, ostendat. Mandandi eadem pene, quæ imperandi ratio est, nisi quod qui mandat, rogare potest: qui imperat, si modo imperat, non potest.

80

ad Sen

test. Precum tamen loco adhortationes, atque incitationes succedunt: quæ imperanti nunquam inutiles, sæpe etiam necessariae sunt. Præterea qui mandat, familiaris, ac lenius: qui imperat gravius, ac severius agat. Prohibendi quoque ratio non sane ab imperando multum discrepat. Quibus enim rationibus imperamus, iisdem quoque prohibeamus necesse est. Sed prohibemus asperius, & præmii loco poenam, ignominiamque proponimus. Plus tamen in omni re humanitas, & æquitas, quam jus ullum, aut severitas valet. Sed de hoc toto genere hætenus.

*De suadendi, & dissuadendi genere.*

## C A P U T XXIV.

**S** Equitur suadendi, & dissuadendi, sive hortandi, & dehortandi genere, quod in scribendo latissime patet, atque ad res plurimas est accommodatum. Nulla enim fere epistola est, quæ non aliquam suasionem, & dissuasionem habeat. Ea cujuscumque esse debere, aut a quibus locis petenda esset, satis est a nobis in deliberativo genere demonstratum. Quum igitur aliquid nobis per epistolas suadendum, aut dissuadendum erit, exordium a nostra, in quem scribimus,



mus, perpetua voluntate, & benevolentia  
capiemus: ostendemusque, quam in ceteris  
rebus nostrum studium perspectum, proba-  
tumque fuerit, & quam nos cupidi simus,  
ut ei fiat aliqua vel virtutis, vel gloriæ,  
vel fortunæ, vel dignitatis accessio: nosque  
ad id summo studio dare operam, atque in-  
vigilare dicemus; deinde rem, de qua  
agendum erit, honorifice proponemus,  
eamque omni ex parte, ut intelligemus  
opus esse, laudabimus: aut si dissuadendum  
erit, vituperabimus. Tum ejus, si suade-  
bimus, utilitatem, honestatem, gloriam-  
que: si dissuadebimus, detrimenta, turpi-  
tudinem, atque ignominiam, & quæ sunt  
superioribus rebus contraria, proferemus;  
deinde exemplis in utramque partem ute-  
mur multis: tum superiora omnia ad eum,  
ad quem scribimus, accommodabimus,  
ostendemusque illum præ ceteris ea, quæ  
diximus, consecuturum: hominemque  
multis verbis ad eam rem cohortando, in-  
citandoque inflammabimus, vel ab ea de-  
terrendo, ac dehortando avertemus. Po-  
stremo, si opus esse videbimus, preces  
etiam nostras in utramque partem interpo-  
nemus: & quam grata nobis ea res futura  
sit, omni ex parte declarabimus. Hæc erit  
meo judicio, suadendi, & dissuadendi ra-  
tio in scribendo plerunque servanda. Mu-  
ta-

812

vel (sen)

tabit ex hac fortasse aliquid ratio, aut personarum, apud quas non semper eodem modo loqui licet: aut rerum, quæ non semper eo ordine, modove tractandæ sunt. Sed hæc omnia, quia certis legibus includi non possunt, scriptoris prudentiam moderabitur: nos ad cetera genera transeamus.

*De commendandi genere.*

## C A P U T XXV.

**P**roxima est huic commendandi ratio, quæ quidem, & epistolarum propria est (ea enim in alio scribendi genere non utimur) & ab omnibus, qui quoquo modo scribunt frequentissime usurpatur; nemo enim fere est, qui vel se, vel alium aliquando non commendet. Itaque tam varia, quam frequens est; pro personarum enim, rerumque qualitate aliter, atque aliter ab omnibus tractatur. Personæ in hoc genere duæ potissimum considerantur: ejus, qui commendatur: & ejus, cui commendatur. Aliter enim nos ipsos, aut liberos nostros, aliter familiares, atque amicos, aliter hospites, & incognitos commendamus. Magna præterea doctrinæ, virtutis, dignitatis, professionis, nobilitatis, fortunæ, ceterarumque rerum in commendatione habenda

ra-

ratio est: ut non eodem modo doctum, & indoctum, sacrum, & prophanum, magistratum, aut dignitatem aliquam gerentem, ac privatum: item divitem, atque inopem, liberum, ac servum, nobilem, atque ignobilem commendemus. Danda enim opera est, ut de unoquoque convenienter, atque accommodate loquamur. Eorum quoque, quibus commendamus, delectus habendus est, ut non eodem modo principi, atque amico: item magistratui, ac privato rem quampiam, aut hominem commendemus; cum amico enim, & privato homine agere utcunque possumus: Principi vero, & magistratui, neque omnes, aut omnia commendare, neque sine summa æquitate, aut necessitate fas est. Cum amico præterea liberius loqui licet: cum principe, & magistratu, etiamsi nobis ille amicissimus sit, non licet. Habenda est enim ratio ejus, quam obtinet, dignitatis, omniaque apud eum graviter, severeque agenda. Rerum quoque non mediocris habenda ratio est. Et primum quidem, nonnisi iusta, aut honesta, aut necessaria commendatio suscipienda est; deinde videndum, ut res sit ejus, cui commendatur, dignitati, facultati, naturæque accommodata; quæ quidem, ut cognoscere plane possimus, ante omnia ejus, quem commendare volumus, tum rei,

82<sup>v</sup> rei, tum personæ habenda cognitio est, ne aut injustam causam pro justa, aut pro bono viro pessimum commendemus. Commendatio autem omnis in duas potissimum partes consumitur, in laudem, & suasionem. Nam & dignam nostra commendatione, eam, de qua scribimus vel causam, vel personam ostendamus: & ei, ad quem scribimus, quod volumus suadeamus necesse est. Et quanquam tam varia est, ut diximus, commendandi ratio, ut præcipi in ea proprii, aut certi nihil posse videatur: hæc tamen in omni fere commendatione servanda esse video: primum, ut causas, quæ nos ad commendandum duxerint, ostendamus: deinde rem ipsam breviter explicemus: tum ei possibilem, facilem, commodam, utilem, honestam, laudabilemque reddamus; deinde rationes afferamus, quibus ille ad id faciendum adduci debeat; tum cohortationes, & preces adjungamus, & si necesse videbitur, misericordiam commoveamus. Postremo aliquod ei præmium proponamus: denique aliis precibus epistolam concludamus. Quæ omnia, quo pacto facienda sint, quanquam ex superioribus præceptis magna ex parte colligi potest: tamen quoniam hæc adolescentibus scribimus, ut cognitu faciliora sint, paulo altius explicabo. Causam commendatio-

83<sup>r</sup>

tionis vel a nostra, vel ab ejus, quem commendamus, vel ab ejus, ad quem scribimus, persona sumamus necesse est. A nostra, quum nos ejus, quem commendamus, necessitudine, familiaritate, cognatione, officiis adductos esse dicemus. Ab ejus, quem commendamus, persona causas sumimus, quum ejus probitatem, virtutem, doctrinam, nobilitatem, inopiam, calamitatem, aut necessitatem aliquam, vel a natura, vel a fortuna profectam commemoramus: a natura, ut corporis totius, vel membri alicujus imbecillitatem, item ætatis, aut sexus infirmitatem, aut rerum omnium ignorantiam: a fortuna, ut membrorum, aut liberorum, aut rei familiaris, aut libertatis, aut ceterarum rerum nobis charissimarum amissionem. Ab ejus, ad quem scribimus, persona causam sumimus, quum ejus naturam, humanitatem, virtutem, benevolentiam, & studium in omnes bonos: item quum bene merendi de omnibus consuetudinem, cupiditatemque: quum vel nostram amicitiam, vel ejus dignitatem, opes, copias, auctoritatem, magistratumque commemorabimus. Atque in has fere causas exordium consumitur; danda tamen opera est, ut pluris eum, ad quem scribimus, quam eum, quem commendamus, facere videamur, ne ille aut ob-

obtundi a nobis, aut defatigari, aut parvipendi, aut impediri putet, quo minus officium, & magistratus recte, atque ex sententia administret: plusque nos illi tribuere, quam aut ei, quem commendamus, aut nobis ipsis, majorique nobis curæ dignitatem suam esse, quam amici necessitatem ostendamus. Atque hæc potissimum in exordio facienda sunt copiosius, aut brevius, item accuratius, aut remissius, pro rerum, personarumque qualitate. Narrandi, suadendique rationem ex superioribus repetemus. Rationes, quibus ille ad rem, quam volumus faciendam, adduci debeat, ab iisdem locis sumamus, a quibus causas commendationis sumendas esse demonstravimus. Sed videndum erit, ne easdem sæpius, aut eodem modo repetamus; in exordio enim ad nos, hic ad illum omnia referenda sunt, ut ostendamus eum vel nostra, vel ejus, quem commendamus, vel suæ ipsius causâ moveri oportere. Preces, atque adhortationes ex communibus amplificationis locis, <sup>84<sup>2</sup></sup> item misericordiæ commovendæ rationem ex superioris voluminis præceptione repetemus. Præmii proponendi ratio ab iisdem omnibus, quas modo dixi, personis petenda est: a nostra quidem, si nos ejus beneficii gratos, memoresque futuros esse promiserimus: si benevolentia,

ob-

observantiæ, & obligationis, aut etiam servitutis incrementum pollicebimur: si in suis, atque amicorum rebus omnem operam, studium, industriam, diligentiamque adhibituros nos esse dixerimus: denique si certum aliquod præmii genus offeremus, quod nostra, ejusque persona dignum videatur. Ab ejus, quem commendabimus, persona præmium offeremus, si eadem fere de eo, quæ de nobis promitemus. Item si ostendemus eum ob suas virtutes dignum ejus, cui commendabitur, notitia, benevolentia, familiaritate, beneficiis, gratia, consuetudine, domo, conjunctione, & ceteris rebus, quæ hominem homini conciliare possunt. Ab ejus, ad quem scribimus, persona præmium offeremus, si ei gloriam, famam, existimationem, auctoritatem, immortalitatem, beatitudinem, aut si cetera omnia desint, conscientiam recte factorum, qui bono viro fructus est maximus, proponemus; hæc vero non omnibus omnia, sed ut cuique maxime conveniunt, ita maxime proponenda sunt, ac de commendandi quidem genere hæc in præsentia dicta sufficiant. Cetera ingeniorum varietas, & prudentia excogitabit.

*De petendi, concedendi, & negandi genere.*

## C A P U T X X V I.


**C**ommendationi finitima, & pene conjuncta petitio est. Altera enim alterius auxilio maxime eget. Nam & commendatione petimus, & in petitione sæpe commendamus: sed quoniam utraque locos habet peculiares, ac suos, tractanda mihi separatim est visa. Igitur ad quemcumque scripta sit petitio, exordium aliquod habeat necesse est: Id causæ maxime conjunctum, rei que, quam petimus, accommodatum esse debet. In eo personam, ad quam scribimus, nobis conciliare omnibus modis studebimus. Id a nostra persona faciemus, si nostram benevolentiam, observantiam, servitutem, officia pro personarum qualitate commemorabimus. Ab ejus, ad quem scribimus persona, si ejus in nos, & in omnes bonos benevolentiam, voluntatem, merita, atque officia proferemus: si hominem ab illis maxime virtutibus, rebusque laudabimus, quarum nos maxime indigebimus: ut si dignitates impetrare cupiamus, / potentiam ejus laudabimus: si opes, liberalitatem: si patrocinium, pietatem, auctoritatem commemorabimus: eodem-



demque tempore duo assequemur ; nam & benevolum nobis ipsum reddemus , & rei , quam petimus , præstandæ facultatem illi esse ostendemus . A re ipsa benevolentiam captabimus , si honestam , si laudabilem , si dignam , in qua ipse laboret , ostendamus : præterea , si ejus studio illum teneri dicemus . Exordium narratio statim subsequetur ejus rei , in qua fundenda petitio est . Narrabimus autem ita , ut rem honestam , possibilem , facilem , opportunam , & quantum possumus necessariam reddamus . Huic petitionem subjungemus : quo ad fieri poterit , brevis , atque attenuata sit necesse est , ne multa , & difficilia petere videamur . Danda itaque opera est , ut in uno potius verbo plura , quam in pluribus unum petamus , tum quibus id rationibus facere commodissime possit ; quibus etiam de causis debeat , aperiemus . Causæ autem vel a necessitate , vel ab honestate , vel ab utilitate , vel a laude , & gloria , tum a nostra , tum a lectoris persona , tum etiam a rebus ipsis ducendæ sunt : quæ quoniam sunt a nobis superius pluribus verbis explicatæ , non sunt hic latius repetendæ . Pollicebimur ei postremo aliquid loco præmii , 85 cujus offerendi ratio satis a nobis in commendatione est posita . Quoniam vero petita per epistolam aut negamus , aut conce-

*inferamus* dimus, de utroque genere mihi paucis est dicendum. Concedendi ratio duplex est; aut enim facilia, aut difficilia concedimus; Si difficilia concedemus, primum amici petitionem exponemus: deinde rei difficultatem vel ab ipsius rei natura, vel a nostra facultate demonstrabimus: deinde difficultates omnes superatas a nobis ejus causa, ostendemus. Dicemus nos id vel amicitiae nostrae, vel ejus virtuti, vel nobilitati, vel necessitati tribuisse. Si praeium benevolentiae fuerit, id non cupide accipere dicemus: si debitor gratiae non recipiemus: sed nos magis his, quas modo dixi, partibus omnia debere ostendemus, nostramque operam omnibus in rebus offeremus; suisque contra, quum aliqua in re nobis opus fuerit, ufuros nos esse dicemus. Si rem facilem, aut tanquam facilem concedemus, gaudere nos dicemus, oblatam nobis esse facultatem ei gratificandi; sed nostram in eum voluntatem aliqua magna in re nos ostendere vehementer cupere. Tum de nostro in eum animo, de sua contra in nos benevolentia, de virtutibus, in primisque de modestia, qua in petendo sit usus, aliquid dicemus. Deinde rem ipsam, ut minimam, facillimamque concedemus: rogabimusque hominem, ut nostra opera frequentius, & majoribus in rebus uti velit: nos-

nosque idem facturos, quum opus fuerit, ostendemus: eaque omnia dicemus, quæ animi nostri bonitatem, liberalitatemque ostendant, ut libentissime, quicquid fecimus, fecisse videamur. Si quid amico negabimus, primum ejus petitionem exponemus: deinde rei difficultatem, tum ab ipsius rei natura, tum a nostra impotentia, siue imbecillitate, tum etiam a loci, temporis, facultatum, instrumentorum, & ceterarum rerum culpa proferemus. Rem quoque, si poterimus, ei vel inutilem, vel incommodam, vel indignam ejus persona ostendemus. Rogabimus deinde, ut a quo animo ferre velit: atque ita rem negabimus, ut ille per nos non stetisse, quo minus efficeretur, existimet, nostramque in eum voluntatem, benevolentiam, fidem, diligentiamque, & præteritorum officiorum exemplo testabimur, & in posterum omnibus in rebus cupidissime pollicebimur: dabimusque operam, ne quid ex hac negatione nostræ amicitiae detrahatur. Atque his fere modis in scribendo res certæ tractentur.



*De consultandi genere .*

## C A P U T   X X V I I .

**I**ncertæ vero res aut nostræ , aut alienæ sunt : nostræ fere omnes in consilio capiendo , petendoque versantur . Alienæ magis variæ , multiplicesque sunt . In illis enim , ut superius diximus , aut optamus , aut opinamur , aut interpretamur , aut id , quod tam certis , quam incertis rebus commune est , consilium damus . Omnis igitur consultatio (ut a nostris incipiamus) partim talis est , ut sciamus , quid nobis agendum sit : partim talis , ut dubitemus , atque ab alio quæramus . Quum incertæ rei certum nobis consilium propositum erit , videndum erit , qua de causâ id ad amicum scribamus ; permagni enim refert , quâ de causâ quicque scribatur . Nam nostri consilii rationem ad amicum communicandi tantum gratia perscribemus , si is hoc a nobis petierit , dicemus nos ei satis facere , aut gratificari velle : nihilque esse , quod cum eo de nostris rebus per nostram amicitiam communicare non debeamus . Si is a nobis nihil petierit , dicemus nihil esse , quod illum pro mutua nostra benevolentia latere debeat , victosque nos illius fide ,  
pru-

prudencia, taciturnitate: si secreta res erit, ad eum nostri consilii rationem perscribere statuisse: deinde si res ei penitus ignota fuerit, eam altius repetemus: si nota fuerit, brevi narratione in memoriam redigemus. Tunc causa posita, quid faciendum constet, quid in deliberatione relinquatur, aperiemus. Deinde si late omnia perscribere statuerimus, singulas rationes, quibus ea res non facienda esse videbitur, confutabimus, donec ad eas veniamus, quibus ipsi, ut hoc consilium caperemus, adducti sumus. Deinde consilium explicabimus, idque rationibus confirmabimus, ut recte nos deliberasse appareat. Deinde brevi epilogo epistolam concludemus, & quid ex ea communicatione velimus, aperiemus. Si summatim nostrum consilium describemus, nulla confutatione utemur: sed consilium tantum ipsum aperiemus, breviterque confirmabimus, & sine epilogo concludemus: & quid ex ea communicatione petamus, aperiemus. Si nostrum consilium exponemus, ut amici iudicium audiamus, ejus fidem, prudentiam, ingenium, iudicium in principio commendabimus, resque ab illo prudenter judicatas profereimus: & rem, de qua capiendum consilium est, graviter proponemus: rogabimusque hominem, ut diligenter rem consideret: attentumque

his locis, quos in superiore libro exposuimus faciemus, ostendemusque nos nequaquam prudentiæ nostræ, judicioque confidere: ideoque rem ad eum integram detulisse, deinde causam, ut paulo ante dixi, narrabimus, confutabimus, confirmabimus, nostrumque consilium exponemus: tum brevi epilogo amici memoria recreata, judicium ejus requiremus: ostendemusque quantum ei tribuamus, quantumque in eo spei reponamus, dicemusque nos consilium nostrum ex eo judicio vel executuros, vel omisiuros. Si vero consilium nostrum incitandi ad idem amici gratia perscribimus, ostendemus nos eum monere non audere, prudentiamque hominis, judicium, doctrinam, experientiamque laudabimus, sed tamen benevolentia motos nos dicemus, ut quid ipsi vel fecerimus, vel facere constituerimus, conscribamus: ut nostrum consilium cum suo comparet, nostrumque si improbet, reprehendere: si probet, sequi possit. Si autem a nobis is alio consilio, quod ipsi non probemus, utatur, nosque eum in nostram sententiam traducere studeamus, laudabimus in principio prudentiam & sapientiam hominis, dicemusque non audere nos aut ejus consilia reprehendere, aut suis nostra præponere: sed tamen vim nostri amoris efficere, ut ei nostrum con-

consilium velimus perscribere , ut quum ipse suum nostrumque habeat , utrum placeat , sequi possit . Deinde rem , si opus erit , narrabimus : si non erit , omni ex parte confutabimus ita , ut nulla ex parte consilium ejus procedere posse videatur . Tum nostrum consilium exponemus , multisque id rationibus confirmabimus : & quid inde boni sequatur , & mali declinetur , aperiemus . Tum ad id paulatim hominem alliciemus , cohortabimurque , & quid inde consecuturus sit , multis verbis colligemus . Quamquam autem hæc præceptio existimari possit magis ad alienas , quam ad nostras res , potiusque ad dandi , quam ad capiendi consilii rationem pertinere : tamen quoniam nostri consilii continet expositionem , in eaque magna ex parte versatur epistola , hoc potissimum loco tractanda mihi est visa . Sed redeo ad inceptum . Quum consultatio talis erit , ut quid facturi simus , omnino dubitemus , consiliumque ab amico requiramus ; ejus in principio prudentiam , fidem , probitatem , ceteraque partes commendabimus , quæ ad consilii dandi rationem pertinere videbuntur : dicemusque & quo pacto ipse aliis consulere soleat , & quantum nos in ejus consilio , spei , fideique repositum habeamus , quantumque in omni re homini semper tribue-

buerimus : deinde , quanti momenti ea res sit , de qua consilium petimus , exponemus : attentumque ad eam cognoscendam , considerandamque reddemus . Deinde rem dilucide , breviterque narrabimus , omnesque causæ partes , & quasi latebras , ut inde consilium elici possit , referabimus . Tum ea consilia , quæ capi posse videbuntur , per confutationem excludemus , remque ipsam omni ex parte ambiguum , difficilemque reddemus ita , ut quemadmodum in superiori consultatione , tanquam in comœdia , certa omnia & parata relinquebamus , nunc incerta , atque implicita omnia , tanquam in fine tragœdiæ relinquamus . Rogabimus deinde amicum , & per res ei carissimas ; ut per Deum , per suam fidem , per nostram amicitiam obtestabimur , ut recte nobis , & fideliter consulat , nostræque huic vel sollicitudini , vel curæ , vel dignitati , vel saluti subveniat . Quantum momenti sit in consilio capiendo ad res vel bene , vel male gerendas , ostendemus . Postremo , quantum illi debituri simus , quantique hoc consilium facturi , declarabimus , nosque illi vicissim , & nostra omnia singillatim pollicebimur . Atque hæc fere in nostris rebus servanda sunt .



*De optandi ratione.*

## CAPUT XXVIII.

**I**N alienis porro, quæ futuræ, incertæque sint, varie afficimur; sed (quod ad hunc locum spectat) in primis optamus. Optandi autem ratio duplex est. Aut enim rem quampiam optamus, ut opes, dignitates, valetudinem, vitam: aut in re, quæ parta jam sit, aliquid evenire cupimus, ut in opibus conservationem, incrementum, usum: in dignitatibus gloriam, honorem, auctoritatem: in vita tranquillitatem, lætitiā, felicitatem, & quæ in ceteris rebus optari solent. Atque in priori quidem genere ante omnia videndum est, ut boni aliquid optemus, ne ei, cui optamus, aut noceat, aut certe non profit: quale esset, si avaro pecuniæ magnitudinem, aut furioso insanix materiam optaremus. Deinde, ut id, quod optamus, possibile & verisimile sit, ne aut non sacerdoti pontificatum, aut privato homini summum imperium optemus: quæ quidem tametsi fieri quoquo modo possunt, tamen quoniam iis ordo rerum humanarum, cursuique repugnat, ut a vero longissime absunt, ita debent a boni viri tum animo, tum scriptis abesse quam plurimum.

mum. Danda præterea opera est, ut non  
 verisimilia modo, sed convenientia etiam  
 personis optemus: ut civi in sua patria ma-  
 gistratus, principi regnum, Pontificatum  
 maximum episcopo: quæ non solum esse  
 possunt; sed frequenter quoque eveniunt.  
 In primis vero in optando modesti esse de-  
 bemus, ne blandiri magis, quam optare  
 videamur. Gratissimum autem fecerimus,  
 si ut cuique aliquid maxime cordi est, ita  
 id illi optabimus. Nobis tamen in optan-  
 do gravitas est, & prudentia retinenda: ut  
 si quis falsa de se persuaserit, non illi conti-  
 nuo vana optemus, hominemque in falsa  
 de se persuasionem confirmemus, & spe vana  
 impleamus. In posteriori genere, & eadem  
 honesti, possibilis, verisimilis, & congrui  
 ratio servanda est: & preces illæ par-  
 tim ex ipsarum rerum natura, partim ex  
 virtutum officiis, & bene, beateque vivendi  
 ratione ducendæ sunt. Ex ipsarum rerum  
 natura, ut quum opes ad usum, non ad pos-  
 sessionem optantur: quum magistratus ad  
 publicam utilitatem, non ad eorum, qui il-  
 los gerunt, cupiditates explendas bonis ci-  
 vibus optantur. Ex virtutum officiis, & be-  
 ne vivendi ratione ducimus preces, quum  
 opes ad liberalitatem, magistratus  
 ad iustitiam, dignitates ad virtutem quam-  
 piam exercendam, sive ad gloriam, aut bea-

bea-

beatitudinem comparandam optamus . Atque hæ potissimum nostris precationibus subjici rationes debent ; frustra enim optamus , nisi rationes quoque nostrorum votorum subjungamus . Precationibus autem cohortationes adjungi debent , ne optare tantum ejus rei , quam volumus , eventum , sed juvare quoque amicum ad eam rem consequendam , & manuducere quodammodo videamur . Hoc autem genus raro epistolam per se facit : sed aut gratiarum actioni , aut gratulationi , aut laudi , aut aliis generibus adjungi , atque admisceri solet , tamen si quando accadat , ut hac solum de causa scribere velimus , siqua de re certa spes , aut opinio erit , dicemus nos ea de re audisse aliquid : ut , proximis comitiis eum Prætozem , Pontificemve creandum . Quo loco , quam gratum id nobis , si evenerit , futurum sit , tum ab ejus , tum a nostra persona , tum a re ipsa ostendemus : ab ejus persona , si ejus virtuti , dignitati , nobilitati , meritis consultum iri dicemus : si quæ cum dignitas , auctoritas , gloria , item quæ opes , copię , facultates , quæ denique rerum omnium actiones consequentur , indicabimus : a nostra persona , siqua utilitas , dignitas , lætitia , fortunæ , dignitatisve accessio sit inde consecutura , demonstrabimus : a re ipsa , si tum demum recte administrandam ,  
cu-

curandamque ostendemus : si dicemus rem illam tali viro indigere , neque tam viro , quam rei consultum iri . Quæ quum fecerimus , optabimus , ut ita veniat : rationesque quas superius docui , subjungemus , tum hominem hortabimur , rogabimusque , ut spem atque expectationem tum nostram , tum eorum , per quos dignitatem , aut rem illam consecuturus est , tum ceterorum omnium non modo non frustretur , verum etiam augeat , atque accumulet . Quod si nulla certa res votis nostris erat præposita , eum initio laudabimus ab his potissimum partibus , quæ consentaneæ videbuntur ei rei , quam illi optare volumus : ut si magistratum optaverimus , ab iustitia , & integritate laudemus : si sacerdotium , a vitæ , morumque probitate , a religione , & ceteris ejusdem generis rebus : deinde ostendemus , quid meruerit , atque illi virtutum , & vitæ præmia digna optabimus : neque optabimus solum , sed spem quoque eadem de re ostendemus tum ob cognitam omnibus ejus virtutem , & probitatem : tum ob temporum , principumque naturam : tum ob alias causas , quæ in unaquaque persona excogitari possunt . Hortabimur postremo eum , & rogabimus , ut ab eo vitæ instituto non discedat ; nam & satis magnum præmium recte factorum in præsentia conscientiam

tiam esse, & in posterum a Deo, omni spe, aut cogitatione majus, atque augustius expectari. Ac si quando separatim est per epistolam optandum, hac ratione, meo iudicio, optandum est: sin vota nostra cum laude, aut gratulatione jungemus, hæc eadem fere, sed brevius, contractiusque servabimus. Sed de optandi ratione hætenus.

*De prædicendi, interpretandi, opinandique ratione.*

## CAPUT XXIX.

**I**lla quoque prædicere, conijcere, interpretari, & siqua sunt alia ejus generis, quæ in opinione posita sunt, quanquam raro per se epistolam, aut aliud scribendi genus faciunt, possuntque epistolarum magis loci, quam genera vocari: tamen & quoniam possunt aliquando per se epistolam facere, & habent sub se (ut docebimus) alios atque alios locos, separatim mihi breviter tractanda visa sunt. Igitur prædicere qui volet, sive ille arte aliqua, & scientia, sive ex prudentiæ ratiocinatione prædicat, ante omnia meminerit se nihil certi, nihil particularis prædicere vel debere, vel posse. Atque maximum imprudentiæ argumentum

tum est, quum ea, quæ vel in hominum voluntate, vel in varietate fortunæ tota sita sunt, putat se quispiam aut prudentiæ, aut scientiæ ratione prædicere posse. Itaque videndum in primis est, quid possimus, quid debeamus prædicere. Quum autem ad scribendum accedimus, tria in exordio facienda sunt: proponenda res, de qua dicturi sumus cum allectione lectorum: quo pacto eam aut prædicere possimus, aut velimus, ostendemus: removenda omnis tum temeritatis, tum divinationis suspicio, ne aut ea, quæ sciri a nobis non possunt, temere nobis arrogare: aut divinandi peritiam, quæ ab homine docto, & sapiente dissidet plurimum, simulare velle videamur. Sed ostendendum, quicquid nos dicimus, amici gratia, & benevolentiae magnitudine adductos dicere, ut ille vel tutior in periculis, vel in rebus gerendis consideratior, & prudentior possit esse. Deinde ad causam paulatim accedendum, & partim ex anteaclis, partim ex præsentibus futura per similitudinem, & comparisonem rationum, quodam quasi digito demonstrando, addendæ singulis rebus probabiles rationes: addenda signa, argumenta, & cetera omnia, quæ possunt id, quod volumus, aliqua ex parte comprobare. Quod si discrimen, aut periculum amico prædicamus, omnia metu augenda

genda sunt: exemplis præterea eorum, quibus idem accidit, multis, illustribusque utendum: his, prout opus esse videbitur, suasio, vel dissuasio, vel admonitio subjungenda. Proxima, & pene conjuncta prædictioni conjectura est, in qua primum nos rerum incertitudinem, & ignorance[m] excusabimus: deinde in eam, quam superius dixi, amici gratiam, & benevolentiam ea, quæ scribimus, referemus. Nonnunquam illa Ciceronis sententia in exordiis uti poterimus; ut dicamus: illum præsentium, quidem rerum vel publicarum, vel domesticarum habere alios & scriptores, & nuncios; a nobis vero, quæ in conjectura posita sunt, quæque nobis videntur fore, tanquam ab homine ejus amantissimo, & non imprudenter monente, expectare oportere. Deinde res, si qua incidit, narranda, conjecturæ quæ explicandæ, & signis, argumentis, ceterisque locis, quos in causæ genere docuimus, confirmandæ. Quo loco magnatū prudentia, tum moderatione utendum, ne quid temere, aut arroganter, aut inconsiderate, aut imprudenter de rebus, personisve dicamus: ne non tam amici rem agere, quam damnare aliquem, & in odium adducere velle videamur. Tum res similibus, atque exemplis, si opus fuerit, confirmabitur: si periculosa erit, suspicionibus

N

tota

tota respergetur. Deinde omnia ad eum, qui propositus erit, adhortandi, dehortandi, rogandi, aut rem aliquam obtinendi finem accommodabuntur. Eiusdem quoque generis est interpretatio, non quaestio- num, quæ ad studiosum illud, & contem- plativum scribendi genus pertinent, sed ne- gociorum, quum aliqua signa rerum futu- rarum videmus, quæ dubios, atque anci- pites rerum eventus faciunt: ut quum vel hominum voluntates, vel actiones aliquæ, vel sententiæ ita dubiæ, atque obscuræ sunt, ut in utramque partem accipi possint. Quæ quum inciderint, ut amici gratia in- terpretaturi simus, primum quidem de ea re, siue persona in universum disseremus, & quid in ea boni, quid mali cognoscamus, ex ipsius natura, & consuetudine ostende- mus ut, si quis taciturnus sit natura, & no- bis de amici causâ breviter, obscureque, responderit; id nos non superbiæ, aut ira- cundiæ, aut malæ in nos voluntati, sed na- turæ tribuemus: item si quæ res ob difficul- tatem, aut ob naturam sui generis, tardius quam volumus expediatur, id nos, quum ad amicum scribemus, non odio persona- rum, aut rei tædio, sed ipsius naturæ, dif- ficultatique tribuemus, omnia vero in me- liorem partem semper interpretabimur, ne amicum in discrimen, aut desperationem ad-



adducamus. Quod si quid in pejus interpretari necesse sit, quoad fieri poterit, bono animo amicum esse jubebimus, nostramque illi fidem, operam, & diligentiam pollicebimur. Si autem incerta sint omnia, ut neque conjectura, neque interpretatione aliquid consequi facile sit, de toto rerum, aut personarum genere in universum disputabimus: & quid in similibus rebus evenerit, aut quid aliæ personæ in iisdem rebus, aut quid in aliis eadem personæ fecerint, ostendemus: & quantum licebit, per similitudines, aut comparationes idem fore argumentabimur. Tum quid inde evenire possit, omni ex parte considerabimus: & quid nobis faciendum, aut quo pacto, cuique parti occurrendum videatur, quantum opinione assequi poterimus, ostendemus: ad eamque rem nos, nostraque omnia, ut supra docuimus, offeremus. De iis quidem quæ in conjectura, & opinione posita sunt, hæc mihi præcipi videntur posse. Cetera tum ætas, tum doctrina, tum prudentia (optima rerum omnium, actionumque, magistra) facile ad scribendi rationem accommodabit.

\* \* \*

*De consilii dandi ratione.*

## CAPUT XXX.

**R**eliqua est ex hoc universo genere dandi consilii ratio tam certis, quam incertis rebus communis: quæ quidem tametsi cum suadendi, & dissuadendi ratione conjuncta est; tamen quoniam aliam quamdam in scribendo rationem habet, diversaque præceptione continetur, consulto a nobis in hunc locum, ut separatim tractaretur, dilata est. Constat igitur hæc quidem tota ratio suasionem, & dissuasionem; sed habet differentias plurimas. Plurimum enim refert, sponte, an requisiti, in re certa an incerta, item integra, an inchoata, consilium demus. Multa etiam sunt personarum discrimina; neque enim eodem modo superiori, atque æquali, aut inferiori consilium damus. Atque hæ differentiæ, quum inter se miscentur, commutanturque, innumerabiles pene varietates ex sese pariunt. Possumus enim ad superiorem tum sponte, tum requisiti, de rebus nunc certis, nunc incertis, vel integris, vel inchoatis scribere: iisdem apud æqualem; atque inferiorem differentiis uti possumus: quas quidem omnes persequi, & infinitum, & su-

supervacuum esset; nos, quæ omnibus maxime communia præcepta judicabimus, ea potissimum persequemur: cetera scribentium ingeniis invenienda relinquemus. In omni igitur dando consilio, sive id sponte, sive requisiti faciamus, primum videndum est, ne aut nos temere alienis rebusingere, aut nostræ prudentiæ plus arrogare, quam æquum sit; aut aliorum consilia contemnere, & nobis tantum credi velle videamur. Quod quidem facile assequemur, si aliorum prudentiam, judicium, consilium in principio collaudabimus, nostra omnia extenuabimus. Item si nos vel ejus precibus, vel nostra in eum incredibili benevolentia, vel magnitudine suorum erga nos meritorum, vel aliquo nostro officio adductos, non quidem ad consilium dandum, (quod id fieri a nobis posse non putemus) sed ad nostram sententiam, ac voluntatem declarandam nos esse dicemus. Quo loco pulcherrimæ illæ insinuationes fieri solent, quum benevolentiam nostram cum illius sapientia, atque auctoritate committimus, & in aliquod quasi certamen, pulcherrima, atque honestissima sententiarum colluctatione producimus: & id, nunc ab ejus prudentia retrahi, nunc a nostra benevolentia concitari, hinc non audere, hinc cogi nos dicimus: & plurimis verbis vim nostri amoris,

ris, quæ continere se non possit, excusabimus. Quem locum totum pulcherrime exequitur Cicero, cum sæpe alias, tum in illis ad M. Marcellum epistolis. Illud deinde observandum est, ut quantum nobis prudentiæ, auctoritatisque detrahimus, tantum fidei, atque amoris addamus: ut si prudenter, aut mature, aut efficaciter non possimus, fidelissime certe illi, & amantissime consulamus. Atquæ hæc in exordio, in quo summa vis est, plerunque servanda sunt, nisi vel ad inferiores, vel ad amicissimos scribamus: quibuscum omnia familiarius agemus, ut amicitia, & personæ ratio postulabit. Exordio si qua inerit, narratio subjungenda erit, si nulla res erit, quæ narretur, in causam latenter ingrediendum: atque ita cum exordio causam conjungenda, ut continuari res eadem, non alia incipi videatur. Si in re certa consilium dandum erit, causam primum tota explicanda, partesque universæ, quasi latebræ, aperiendæ sunt. Tum quid in ea honestum, quid turpe sit, quid utile, quid inutile, quid denique boni, quid mali, oratione pervestigandum, ac discutiendum est. Si unicum in ea consilium sit, ad id oratio tota, & suasio dirigenda: & quo pacto id optime, atque honestissime succedere possit, ostendendum. Si plura sint consilia,

filia,

filia, optimum, atque honestissimum quodque deligendum: cetera omnia confutanda, ne dubius, atque incertus amici animus relinquatur. Si quando pugnare inter se utilitas, atque honestas videbuntur, utili semper honesta ratio præponenda: dandaque opera, ut amicus intelligat, quam ipse rem utilem putet, eam nisi honesta sit, non esse utilem, neque posse utilitatem ab honestate separari, sed specie, atque ignorantia boni homines decipi, atque adduci, ut alterum ab altero separent, quod revera non possit. Si autem res integra non fuerit, & aliquid sit contra nostram sententiam inchoatum, maxima vis in confutatione ponenda erit: dandaque opera, ut id, quod inchoatum est, plurima, & maxima tum mala, tum inconvenientia consequi, si perficiatur, ostendamus: atque id tum aliorum, tum nostro, si poterimus, exemplo comprobandum erit: & quid vel alii, vel nos ipsi in re simili fecerimus, proponendum. Magnam enim vim habebunt ea consilia, quæ vel nobis ipsis, vel aliis profuisse demonstrabimus. Si vero res incerta fuerit, universum amici statum optime antea cognitum ante oculos proponemus: atque hinc quid illi conveniat, hinc quid fieri possit ostendemus: & tunc quidem non unum tantum illi consilium dabimus, ne si

id forte non successerit, omni ex parte destitutus sit : sed multa in omnem eventum consilia quasi quædam præsidia , locis ipsis singulis disponemus : ut quocumque res reciderit , aliquid habeat amicus , quod sequi possit : omnibusque indagatis , ac peruestigatis partibus , quid in unaquaque re boni vel mali vel declinetur , vel insurgat , ostendemus : nosque semper ad id , quod ante dixi , honestatis fundamentum quantum poterimus , referemus . Sed si omni ex parte incommoda ostendantur , minima quæque toleranda esse suadebimus . Conclusiones autem ex ipso causæ fine assumemus , ut ostendamus , quid ex eo consilio secuturum sit : aut ab officio nostro , benevolentiaque ducemus , ut nos testificandi amoris nostri , aut servandi officii , non dandi consilii gratia , nos ea commemorasse dicamus : nosque consiliorum omnium ministros , effectoresque , quantum licebit , præbeamus . Ac de hoc quidem toto genere satis in præsentia dictum puto . Quoniam autem hujus voluminis magnitudo satis crevit , reliqua in proximum reservabimus .

*- gen man*  
*11*  
*sonde*

\* \*

LIPPI BRANDOLINI

*Ad Rmum Patrem, & Dñum,*

D. FRANCISCUM

PICOLOMINEUM,

Cardinalem Senensem,

De Ratione scribendi,

*LIBER TERTIUS.*

*De Affectibus.*

C A P U T I.



BSOLUTO in libro superiore maximo illo, ac difficillimo docendi genere, sapientissime Pater, superest alterum illud, quod in movendis affectibus positum esse diximus: quod

quidem & quia late patet, atque ad omnes pertinet, & quia magnam scriptis omnibus vim, atque auctoritatem affert, non modo cognitione dignissimum, sed maxime etiam necessarium nobis est visum. Id nos in duobus genera partiti sumus: alterum, quod ad con-

concitandos, alterum quod ad leniendos, sedandosque affectus pertineret. De quo quidem toto genere, antequam dicere incipio, pauca mihi de affectibus in univ-  
ersum dicenda sunt. Movere enim affectus non possumus, nisi quid affectus sit, & unde originem habeat, cognoscamus. Id ego nunc, quantum ad nostram hanc institutionem necesse videbitur, paucis explicabo. Est igitur affectus vehemens quædam in rem quampiam animi commotio; id Græci πάθος vocant. Ex nostris, qui verbum de verbo exprimere conati sunt, passionem appellavere. Cicero nunc eos morbos, nunc ægritudines, nunc affectiones vocat. Nos de verbo magnopere solliciti non sumus, modo constet, id esse vehementem quamdam, ut diximus, animi passionem, & commotionem. Ea ex opinione quadam in animos nostros proficiscitur. Quoniam autem omnis opinio, aut boni, aut mali est, ut species affectuum duæ sint: una, quæ bonum, altera, quæ malum quadam opinione concipiat: his nos bonum, aut malum, aut præsens, aut futurum opinari possumus. Hæ duæ species alias rursus totidem ex sese pariunt, quatuorque omnes efficiunt: quarum duæ bonum, aut præsens, aut futurum: duæ malum, sub eadem temporis ratione, respiciunt. Ac futuri quidem boni,  
cu-



cupido, five spes: præsentis, voluptas, five lætitia nominatur: mali vero futuri, metus, five timor: præsentis, dolor, five tristitia esse dicitur. Ex his vero quatuor, quasi fontibus, species pene innumerabiles oriuntur: quæ quoniam non hujus institutionis sunt, non sunt a nobis omnes hoc loco explicandæ. Insignes enim attigisse, satis erit: ex illis certe cognoscentur. Sunt igitur insignes ex eo genere, quæ ad futurum bonum pertinent, amor, cupido, spes, audacia, ira: his contrariæ, quæ ad futurum malum spectant, sunt: odium, abominatio, desperatio, metus. Iræ vero nullus affectus est contrarius, propterea quod illa omnium injuriarum patiens, five, ut rectius loquar, non sentiens natura inveniri nequeat. Præsentis boni sola lætitia, mali sola tristitia, seu dolor invenitur. Quoniam autem hi affectus omnes tum dicendo, tum scribendo, vel concitari, vel sedari possunt, sed alii frequentius concitandi, alii frequentius sedandi sunt: de singulis nunc, ut necesse videbitur, differemus: eodemque tempore, ut breviores, dilucidioresque simus, concitandi, sedandique rationem persequemur, a prioribus potissimum incipientes.

*De amore concitando, & sedando.*

## C A P U T II.

**Q**Uum autem affectus omnes ejusmodi sint, ut ad virtutes, & ad vitia detorqueri possint, ut amor, qui tum ad studium virtutis, & amicitiae, tum ad libidinem, & impudicitiam applicari potest: & cupiditas, quæ tam honorum, aut pecuniæ, quam scientiæ, aut religionis, aut optimarum rerum est: ante omnia de iis concitandis, qui ad vitia pertinent, aut de iis, qui ad virtutem spectant, reprimendis, nihil mihi dicendum est omnino. Nam & homines per se satis, abundeque ad vitia proclives sunt; & nos virtutes docemus, non vitia: sed omnis nostra præceptio tum ad utiles concitandos, tum ad noxios restringendos est accommodanda. Id autem per communes locos faciendum; nam proprios cujusque vel affectus, vel materiæ referre infinitum esset. Igitur, ut de amore primum dicamus, si quem ad amorem cujusquam, vel hominis, vel rei statuerimus allicere, dabimus in principio operam, ut quam maximam possumus benevolentiam, fidem, atque auctoritatem nobis apud lectorem comparemus. Quæ quidem tametsi in  
omni

omni persuasione , atque adeo in omni materia faciendæ sunt, in affectibus tamen movendis præcipua esse debent ; amicus enim nisi assentiatur iis , quæ dicuntur , eumque qui dicat , quodammodo vereatur , non facile movetur . Ac de benevolentia quidem comparanda superius satis , abundeque diximus . Fidem comparabimus , si nos ejus rei , de qua scribimus , scientiam , aut experientiam habere ostendemus : si nos ab omni adulandi , aut fallendi suspicione liberabimus , nostramque naturam ab his rebus semper alienissimam , idque illi exploratum esse , aliquo , si opus erit , exemplo , aut testimonio demonstrabimus . Item si nostram in eum voluntatem , benevolentiam , fidem , si nostra officia , nostram amicitiam commemorabimus : si quantum ei nostra consilia , nostræ admonitiones hactenus profuerint , commemorabimus . Item si nobis eum semper credidisse , & de nostra fide periculum sæpe fecisse , proptereaque debere nunc etiam nobis credere ostendamus . Item si rem ipsam a loco , a tempore , magnitudine , occasione , facultatibus , & ceteris locis credibilem faciemus . Auctoritatem comparabimus , si honestatem , virtutem , probitatem , doctrinam , gravitatem , modestiam in scribendo proferemus . Hæc autem omnia tum fidem , tum auctori-

ritatem summam nobis apud omnes comparabunt, si nos vel ætas, vel dignitas, vel potentia, vel hominum existimatio, vel nostra doctrina, vel vita commendabit. Hæc quum fecerimus, paulatim ad causam ipsam vel apertius, vel occultius, pro causæ ipsius qualitate descendemus: ejusque, vel dignitatem, vel jucunditatem, vel utilitatem, vel commoda, vel laudem lectori proponemus: nosque de ejus dignitate, salute, commodis, gloria semper sollicitos fuisse, proptereaque nunc ad eum scribere dicemus. Atque hi in omni pene affectu movendo (ne eadem sæpius repetenda sint) communes exordiorum loci sunt. Nec tamen omnibus omnes, sed qui maxime necessarii videbuntur, singulis affectibus sunt accommodandi. Si qui erunt alicujus affectus proprii, suis locis dicentur: nunc ad amorem redeamus. Igitur quoniam amor aut in hominem, aut in rem conferri potest, si amicum attrahere ad hominem, quempiam amandum statuerimus, primum quidem hominem illum magnopere commendabimus cum ab aliis partibus, a quibus præ ceteris commendari posse videbitur; tum vero ab illis, quibus is, ad quem scribimus, maxime delectatur: deinde persequemur, quibus amor maxime conciliatur, morum, studiorumque similitudinem,

hu-

humanitatem, fidem, modestiam, urbanitatem, suavitatem consuetudinis, ceterasque virtutes, quæ hominem homini conciliare solent, in quibus materia latissime patet. Illa quoque nos ad amandum quempiam sæpenumero incitant, ætas, patria, nobilitas, dignitas, fortuna. Nam & æquales, & cives, & nobiles, & honore, dignitate, atque auctoritate insignes, & opibus, fortunisque affluentes libentius amamus, quam eos, qui commune nobiscum omnino nihil habeant, aut nulla in re nobis, vel præsidio, vel ornamento esse posse videantur. Itaque quum hæc, vel omnia, vel magna ex parte illi inesse ostenderimus, utilem, honestam, laudabilem, jucundam, stabilem, perpetuamque ejus amicitiam fore demonstrabimus: atque in ea re innumerabiles amicitiae fructus, commoda, ornamenta, suavitates, voluptatesque afferre poterimus: quas persequi, quum & latissime pateant, & ex Lælio Ciceronis facile disci possint, necesse non arbitror. Illud non omittemus, a quam multis & magnis viris sit is, de quo loquimur, eorum amicitia, & familiaritate dignissimus judicatus, ut eorum vel exemplo, vel æmulatione, vel opinione ad amandum hominem moveatur. Si ad rei cujuspiam amorem incitare statuerimus, ejus dignitatem, utilitatem,

tem, jucunditatem pro rei qualitate explicabimus. Locos cujusque materiae proprios ex demonstrativi generis præceptione sumemus: deinde partes eas, quas modo diximus, ad lectorem ipsum accommodabimus, easque modis omnibus expetendas esse ostendemus. Deinde quid alii de illa re senserint, quid ipsi sentiamus; quanto in precio cum ab aliis, tum a nobis ipsis, & olim habita, & nunc habeatur, multis, atque illustribus exemplis docere conabimur. Postremo quantum ea res ad illius, vel rationes, vel consilia conferat, quam sit ad bene, beateque vivendum, vel utilis, vel necessaria demonstrabimus. Si autem revocare amicum ab indigno aliquo, & turpi amore, aut consuetudine studebimus, dabimus in principio operam, ut intelligat, quam studiosi salutis, ac dignitatis ejus, quam solliciti semper fuerimus, atque hodie quoque simus: causasque hujus nostri studii, vel veterem amicitiam, vel clientelam, vel virtutem, vel nobilitatem ejus, vel aliam quamvis honestam causam explicabimus: idque ita fuisse, aliquo insigni exemplo, aut testimonio comprobabimus. Deinde ad causam pedetentim accedemus, ostendemusque nos, ut id scribamus, neque odio, neque invidia, neque radio, neque satietate, neque imprudentia,

tia, neque temeritate, neque ulla malignitate animi esse adductos: sed abundantia quadam benevolentiae, quod illam magnam infamiam, magnum detrimentum, ac periculum fugere cupiamus. Deinde in universum de toto ejus turpitudinis, aut amoris genere disputabimus; genusque ipsum summopere detestabimur. Tum ad rem, de qua agitur, veniemus, quantumque in ea vel obscœnitatis, vel turpitudinis, vel flagitii sit, quantum poterimus, aperiemus. Deinde quas partes superius ad amorem conciliandum adduximus, earum contrarias ad reprimendum adducemus. Ostendemus enim, quanta in re sit turpitudō, quantum detrimentum, quanta perniciēs, ignominia, molestia, inconstantia, quanta præterea sit rerum omnium dissimilitudo, quanta inæqualitas. Deinde quid ex ea re evenire soleat, exemplis ostendemus. Quid illi eventurum sit, ex aliorum comparatione demonstrabimus. Postremo quantopere cum ab aliis, tum a nobis ea res semper evitata sit, quantoque studio sit ei quoque, si modo suæ dignitati, salutique consulere velit, evitanda, multis atque acerbis verbis aperiemus: atque ita rem in summum odium adducemus. Quemadmodum autem amor odio, ita odium amore sedatur; contraria enim contrariis, ut frigus

gus calore, lux tenebris, expelluntur. Si  
cujus autem odium in nos, aut in alium  
sedare, & amicos inter se reconciliare sta-  
tuerimus, primum quidem odii causas  
persequemur, easque fictas, falsas, inanes,  
parvasque esse docebimus: & nostram, vel  
illius, de quo agetur, innocentiam osten-  
demus. Deinde turpe esse dicemus eum,  
quem amaveris, odisse: quem laudaveris,  
vituperare: & quale amici judicium de al-  
tero esse debeat; quale illud videri possit,  
ostendemus. Tum quid in odio mali, quid  
boni in amore sit, quid ex utroque sequi so-  
leat, aperiemus. Si vero susceptum odium  
jure videbitur, ad misericordiam, & cle-  
mentiam confugiemus: utcunque sit, ami-  
citiam in posterum firmam pollicebimur:  
ostendemusque nostrum, vel ejus, de quo  
scribimus, amorem in amicum, etiam ipso  
odii tempore non esse imminutum, nosque,  
aut illum in officio semper fuisse, atque in  
posterum fore. Ac de amore quidem,  
& odio satis.

*De cupiditate incitanda.*

### C A P U T III.

**A** Morem cupiditas sequitur ordine, non  
præceptionis modo, sed ipsius quo-  
que



que naturæ; ita enim a natura comparatum est, ut id quod bonum esse ducimus, primum quoquo modo cognoscamus, deinde amemus ( amare enim nisi nota non possumus ) tum cupiamus ( ea enim, quæ amamus, facile cupimus, postea speramus ) ( cupiditas enim assequendi, spem potiundi erigit ) deinde aggredi audeamus, quod nisi successurum speraremus, a nobis nunquam fieret. Spes enim potiundi, aggrediundi audaciam ex sese parit. Postremo voti compotes, eo, quod quæsiuimus, perfruimur: unde lætitia illa gestiens proficiscitur. Igitur, ut ad cupiditatem redeamus, ea partim laude, partim vituperatione digna est, ita ut & virtutum, & vitiorum quidam quasi fons existimari queat. Nos enim nunc ad scientiam, virtutem, gloriam, immortalitatem, beatitudinem, & cetera laudabilia studia & ducit, & trahit: nunc ad pecuniæ, honorum, & voluptatum studium, hoc est ad avaritiam, ambitionem, libidinem, & cetera vitia humano generi perniciosissima, stimulis quibusdam, & quasi flammis incendit. Siquem igitur ad priorum rerum studium inflammare voluerimus, superiori præceptione utemur, atque eas, quas supra dixi, partes, dignitatem, utilitatem, jucunditatem in ea, de qua agetur, re considerabimus. Nam si quempiam ad scientiæ stu-

dium incitabimus, ipsius dignitatem tum ab antiquitate, tum ab inventoribus, tum a subiecto, tum a fine, tum ab his, qui eam studio, vel honore, vel præmiis prosecuti sunt, poterimus demonstrare. Utilitatem ab omnis vitæ, ætatisque institutione, ab omnium artium inventione, ab omnium rerum tum notitia, tum administratione sumemus. Quæ partes singulæ si dividantur, atque amplificentur, maximam vim argumentorum, materiamque ad scribendum amplissimam præbebunt. Jucunditas eodem modo ab omni vitæ, ac fortunæ genere, & rerum omnium cognitione petetur. Ostendemus præterea cognitionis, & scientiæ cupiditatem homini non ab homine, aut casu aliquo, sed ab ipsa rerum omnium parente natura, hoc est a Deo datam. Exemplis postremo clarorum omnis generis virorum agemus, lectoremque ad eorum, quos audierit, viderit, legerit, æmulationem, quantum poterimus, incitabimus. Eadem de omni virtute ratio erit. Gloriam virtutum, & rerum gestarum in hac vita præmium esse, oportebit ostendere: eam non ab hominibus tantum, sed a ceteris quoque animantibus expeti, equorum maxime exemplis comprobabimus. Tum quid gloriæ causa homines in omni vita, & fortuna gesserint, quæ pericula adierint, quam

quam multi etiam ultro mortem oppetierint, ostendemus: lectoremque eorum exemplis, & imitatione ad aliquod præclarum facinus inflammabimus. Ad eam rem ingenium, materiam, tempus, opportunitatesque omnes illi adesse ostendemus. Immortalitatem non ab animalibus tantum, ut gloriam: sed ab inanimatis quoque rebus, ut plantis, ac lapidibus expeti, optarique docebimus. Omnia enim, quantum natura liceat, diuturnitatem, & sui conservationem affectant. Ad eam nos genitos esse, ex intellectus, & rationis magnitudine, & ceteris animæ partibus demonstrabimus. Possē autem virtutibus, rebus gestis, & literarum monumentis facillime comparari, clarorum omnis generis virorum, quorum memoria sempiterna sit, exemplis ex antiquitate repetitis, ostendemus: ad eamque consequendam lectorem propositis facultatibus incitabimus. Ad beatitudinis cupiditatem tum præsentium miseriarum enumeratio, tum futurarum explicatio lectorem satis, abundeque eriget. Utramque rem; quoniam latissime patet, neque hujus institutionis est, pro sua quisque prudentia, & cognitione tractabit. Ac hæc ad incitandam cupiditatem pertinent.

*De contemptione pecuniae, honorum, gloriae,  
& voluptatis.*

## CAPUT IV.

**S**edatur autem hic affectus, restinguiturque contrario, ut de amore, odioque docuimus. Contrarius porro cupiditati affectus ab aliis contemptio, ab aliis abominatio, ab Aquinate Thoma fuga nuncupatur: quæ quidem ad vitiorum destitutionem maxime pertinet. Habent autem vitia locos tum communes omnibus, tum singulos, & proprios. Communes sunt: nos ad virtutem, non ad vitia esse natos: animam nostram optimo quoque habitu imbuendam, & tanquam pulcherrimum agrum optimis frugibus, ac plantis excolendam esse: fruges animæ, virtutes: vitia, dumos, carduos, herbas esse, quæ non animam solum, sed corpus etiam excrucient, vexent, atque enecent: virtutibus præterea honores, dignitates, opes, imperia, nobilitatem, & præmia ingentia comparari: vitiis ignominiam, inopiam, obscuritatem, servitutem, & sordes sempiternas acquiri: poenas denique, & nunc multis modis graves persolvi, & post mortem æternas expectari. Alia item multa hujus  
gc.

generis excogitari possunt, quæ si amplificentur, latissimum ad scribendum campum patefacient. Proprii singulorum vitiorum loci, & innumerabiles sunt, & ad philosophum magis pertinent: nos tamen susceptæ institutionis gratia paucos, atque insignes persequemur. Igitur si pecuniæ cupiditatem detestabimur, de usu pecuniæ disputabimus, finemque ejus rei usum, non accumulationem esse docebimus: eum neque majorem ex ingenti, neque ex parvo minorem capi posse ostendemus. Deinde quanta sit in mediocritate, & liberalitate animi alacritas, tranquillitas, securitas: quanta inde commoda tum corporis, tum animi consequamur. Quanta contra in pecuniæ appetentia sollicitudo, quanti labores, pericula, incommoda, jurgia, tormenta subeantur: quam multi ob eam rem servitutem, cruciatus, mortemque subierint: quam multorum malorum causa, & fomes pecunia sit: quantopere corpus, animumque effeminet, quam infinita, insatiabilis, & importuna sit: eam a sapientibus nunquam expetitam, propterea quod & virorum, & cupiditatum, & curarum omnium quasi parens sit existimata. Postremo quis ejus finis esse possit, indagabimus; quam multis modis partæ divitiæ dilabantur, quo pacto ab invitis relinquantur, ostendemus: ita ut

avaro tam defuisse quod habuerit, quam quod non habuerit, doceamus. Si ad honorem, aut gloriæ contemptionem impellere quemquam studebimus, primum ostendamus quanta in ea re comparanda sit difficultas, quantis laboribus, periculis, incommodis, curis, ac molestiis obnoxios nos esse oporteat, quam gravem, quam diuturnam, quam indignam servitutem subire, quam turpiter atque ignominiose agere; quibuscum versari, quibus adulari, quibus subjici honoris, & gloriæ causa compellamur. Deinde quam sæpe hæc omnia frustra suscipiamus, quum ea, quæ volumus, non consequamur. Atque hæc exemplis eorum docebimus, qui suæ ambitionis poenas dedere. Deinde quam ea res inanis, fluxaque sit tum ab ipsius rei natura, tum ab his, a quibus proficiscitur, ostendemus; honor enim per se vana quædam, & inanis hominum existimatio, aut confessio est, quæ laudem, aut dignitatem alicui tribuit. Ea nunc ficta, nunc falsa, nunc vana, nunc etiam invita est, pro eorum, qui deferunt, mentes; alii enim honorem hominibus suæ utilitatis gratia tribuunt, quod inde se aliquid consecuturos sperent: alii sui honoris gratia, quod quum illos ornent, ornari se putent: alii falso quodam, vulgarique judicio, quod illos honorari ab aliis, & apud principes

gra

gratiosos esse videant : nonnulli etiam metu, quod illorum potentiam reformident. Quas causas quum omni ex parte indagaverimus, qualis honor sit, qui ab illis profiscitur, ostendemus. Tum a quibus honor expectetur inquiremus : & quam stultum sit ex imperitæ multitudinis judicio pendere, demonstrabimus. Deinde etiam quam falsum, quam inane, quam instabile vulgi judicium esse soleat, aperiemus. Hic exempla eorum afferemus, qui ex summis honoribus in summam ignominiam devenere. Postremo, quis honorum, aut gloriæ sit finis, indagabimus : quem quum aut laudem, aut famam, aut vulgi consensum, benevolentiamque, aut vanum aliquid esse constiterit, ostendemus neque in nostra potestate, ut eum vel mereamur, vel retineamus, situm esse. Nam & datur sæpe non merenti, & habenti sine causâ aufertur. Neque cum ad nos post mortem pertinere : nam si anima cum corpore extingatur, nihil sentiet : si immortalis sit, vel non curabit hæc, quia bonis majoribus perfruetur : vel hac de causâ magis dolebit, quia pœnas suæ stultitiæ, & cupiditatis dabit. Denique fama paucorum annorum, si cum æternitate comparatur, non modo non appetenda, verum etiam contemnenda, ut res levissima, ac brevissima judicabitur. Si vero corporis

poris voluptatum cupiditatem sedare scribendo studebimus, primum eas, quæ ab hominibus existimantur, non esse voluptatis, sed naturæ necessitatem contendemus: naturam enim vel exinanitam repleri, vel repletam exinaniri cupere. Deinde etiam si voluptates sint, tam breves esse, ut prius abeant, quam venisse sentiantur; tantis vero laboribus, incommodis, periculisque parari, ut vel ob id solum optabiles esse desinant; deinde etiam noxias, ac perniciosas non animis modo esse, sed corporibus quoque, multis rationibus, atque exemplis ostendemus. Postremo, turpe atque indignum esse dicemus, quas voluptates communes cum belluis habeamus, in quibusque ne ipsæ quidem belluæ volutentur, his potissimum nos obrui, atque immergi. His atque aliis hujus generis rationibus non modo non optandas, sed fugiendas etiam voluptates esse demonstrabimus. Sed de cupiditate quidem, & contemptione hætenus, cetera petantur a philosophis.

*De spe, ac desperatione.*

## C A P U T V.

**S** Equuntur spes ac desperatio, quæ conjunctam cum cupiditate tractationem ha-



habent : iisdem enim pene rationibus spes & cupiditas & augetur & diminuitur. Quemadmodum autem contemptione cupiditas , ita spes desperatione : item ut cupiditate contemptio , ita spe desperatio tollitur . Sed ne omnino præterisse hos affectus videamur , de his quoque pauca dicamus. Igitur siquem ex desperatione rerum suarum in spem adducere , atque erigere conabimur , primum quidem ejus infortunium extenuabimus , & accidisse aliis sæpenumero plura , & graviora ostendemus . Deinde magno animo quamcumque fortunam quamcumque ea sit , tolerandam esse docebimus , neque forti viro unquam aut desperandum , aut cedendum . Tum esse illi malo remedium ostendemus , & quo pacto id invenire possit , aperiemus : deinde hominem paulatim quasi ad certamen revocabimus , & in spem victoriæ paulatim erigemus . Ad eam rem commoda facultates , occasiones , instrumenta , adminicula omnia quasi faces quasdam , & aditus patefaciemus , eumque ad inceptum capeffendum certo rei eventu proposito , magis ostensis præmiis , cohortabimur . Siquid difficultatis , aut incommodi inesse videbitur , aut confutando diluemus , aut extenuando minuemus , aut dissimulando reticebimus , omnia levia , facilia , & certa reddemus . Si nihil ei acciderit

derit mali, quem erigere in spem summam statuerimus, omiſſis prioribus locis, nihilominus ſequentibus utemur. Si autem, minuere, ac labefactare ſpem cujuſquam ut falſam, inanemque velimus, ſuperiores locos in contrarium ducemus, atque omni ex parte rem duram, difficilem, incredibilem, dubiam, impoſſibilemque reddemus: oſtendemusque pro noſtra in eum benevolentia nolle eum in re incerta ſpem certam collocare, atque ita nobis eſſe viſum dicemus. Atque hic optimus quidem in principio locus erit. Exemplis præterea utemur eorum, qui ex ſpe magna, & pene certa deciderunt, neque credendum aut principibus, aut opibus, aut conjecturis, aut meritis, aut ullis denique adminiculis eſſe dicemus. Contentum ſua quemque fortuna eſſe oportere: impoſitum autem ſpei & cupiditati modum: atque hoc in primis eſſe ſapientis. Hoc loco tum de fortunæ levitate, tum de continentia, & moderatione diſſeremus, & quantum in mediocritate boni, quantum contra mali in luxuria, & cupiditatibus ſit, pluribus argumentis oſtendemus. Atque hæc ad ſpem minuendam pertinent. Siqua præterea ſunt, quæ ad levandam deſperationem pertineant, ea a nobis in conſolandi ratione dicentur.

*De audacia & metu.*

## CAPUT VI.

**P**roximi sunt his audacia, & metus, quorum alter magis excitandus, alter magis reprimendus est, uterque tamen pendet ex altero. Igitur si metum repellere, atque audaciam accendere constituerimus, primum quidem dabimus operam, ut metus causam diligenter indagatam quantum possumus, extenuemus: eamque vel falsam, vel inanem, vel ineptam, vel parvam esse ostendemus: neque debere ullum his rebus aliquo pacto commoveri dicemus; & quam turpis sit in homine tum formido, tum ignavia, utriusque effectibus, atque exemplis demonstrabimus. Deinde hominem ad id quod volumus, audendum, proposita rerum gerendarum, sive virtutum mercede, ea, quam ille dignissimam, & cumulatissimam putet, incitabimus. Tum de animi magnitudine, & audacia in rebus gerendis disputabimus, eamque rem pulcherrimam atque honestissimam rationibus & exemplis maxime illustribus faciemus. Labores & pericula omnia, tum extenuanda, tum contemnenda esse dicemus: neque deterreri fortem virum aut laborum, pe-

periculorumve magnitudine , aut vinculo-  
rum tormentorumque , atque ipsius deni-  
que mortis metu oportere. Hoc loco exem-  
plis æqualium , aut etiam si poterimus, mi-  
norum , qui vel eadem , vel similia gessē-  
rint , hominem inflammabimus : atque ad  
eos æmulandos , aut etiam superandos in-  
citabimus . Quod si is claris majoribus  
ortus sit , ut vel illos virtute superet , vel  
ab illis certe non degeneret , admonebi-  
mus . Postremo eum ad clarissimi cujus-  
cumque æmulationem provocabimus . Si  
vero temeritatem cujusquam atque auda-  
ciam reprimemus , his locis in contrarium  
versis , omnia aspera ac difficilia faciemus.  
Dicemus enim , neque pericula temere su-  
scipienda , aut labores frustra sumendos es-  
se : neque fortunam cœptis nostris semper  
arridere , aut audaciam nostram prosperum  
semper eventum fortiri : neque nostris viri-  
bus , aut nostro ingenio usque adeo confi-  
dendum esse , ut non plurimum etiam in  
aliorum consilio , & prudentia reponamus.  
Quo loco quanta vis sit consilii , & pruden-  
tiæ, differemus; hominemque ad consilium,  
& rationem revocare conabimur, neque for-  
titudinem eam esse, quæ consilio, & ratione  
careat, exponemus . Et in hanc sententiam  
plura dicemus , ostendemusque ita majores  
ejus , ita clarissimum quemque fecisse , ita  
illum

illum quoque facere oportere : quantaque eum vitæ laus , & vitæ tranquillitas , si ita fecerit , quanta contra ignominia , quanta incommoda , ac pericula consequantur , si contra fecerit , ostendemus : metumque illi tum infamiæ , tum periculorum , tum tormentorum , tum etiam mortis , quantum poterimus , injiciemus . Si vero aut ceterarum rerum , aut mortis metum sedare , & repellere decreverimus , nihil esse in illis mali , aut etiam aliquid inesse boni , contendemus , locisque communibus , atque exemplis constantiæ id comprobabimus : omnia virtuti & gloriæ tribuemus : pro ea neque exilium , neque vincula , neque tormenta , neque ullum genus mortis timendum esse : idque multis atque illustribus exemplis eorum , qui hæc pro patria , aut fide , aut pro virtute pertulerunt , abunde docebimus : quanta eos gloria atque immortalitas consecuta sit , quanta nos quoque apud posteros maneat , aperiemus : mortem vero naturæ finem esse , qui quum & certus , & communis omnibus , & necessarius sit , timeri non debeat . Ita enim aut nihil mali , si omnia dissolvantur : aut plurimum boni , si animæ maneat , existere necesse est : tum hominem ad conscientiam bene actæ vitæ , & ad nostræ Religionis veritatem , ac justitiæ revocabimus : eumque cer-

certissimam, atque amplissimam vitæ suæ mercedem sperare; atque expectare jubebimus. Atque de metu sedando in præsentia hæc satis sint. Si qua deesse videbuntur, in doloris, & mortis consolatione dicentur.

*De Ira.*

## C A P U T VII.

**A**Udaciæ finitima ira est, quam diximus affectu carere contrario, propterea, quod stupida illa, & omni injuriarum sensu carens natura non reperiatur: sed ejus loco virtutes habet, mansuetudinem & clementiam. Iræ autem duo genera plerique fecere, alterum, quod ad punienda errantium delicta: alterum, quod ad ulciscendas injurias dicunt pertinere. Superius illud genus humano generi utile admodum, & necessarium putant ita, ut Deo quoque concedere id nostri non dubitent: posterius noxium omnino ac perniciosum est. Illud itaque nobis excitandum, hoc reprimendum, atque extinguendum est. Siquem igitur ad punienda delicta, pœnasque de reis sumendis incitari decreverimus, duo potissimum considerabimus, causam, & personam. In causâ de criminis specie, & magnitudine disputabimus: idque a tempore, loco, modo, sociis,

fociis; facultatibus, instrumentis, & ceteris partibus, quæ augere aliquid possunt, majorem in modum augebimus. Quod si plura crimina fuerint, cum accumulatione, & atrocitate enumerabimus: si unum fuerit, id plures in partes amplificando dividemus, & ex uno plura faciemus. Persona duplex est, rei, & judicis: hoc est, ejus qui puniendus est, & ejus qui puniturus est, ad quem ipsi scribimus. In reo considerabimus sexum; alia enim maribus, alia feminis foediora sunt: ætatem; non enim omnia omni ætati concessa sunt, atque alia alii ætati turpiora: conditionem; nam servorum & subditorum in superiores crimina graviora sunt: statum, ut liberorum crimina in parentes atrociora esse dicemus: fortunam; quanto antecellit, tanto ejus crimina graviora, insignioraque sunt. Considerabimus præterea voluntatem, atque inde, si malo animo fecerit, causam augebimus: consuetudinem, ut si id crimen sæpe numero commiserit: audaciam; quo loco, & quantum facinus aggredi ausus sit, & quid in posterum ausurus esse videatur, crescente semper audacia, ostendemus. Ab ejus, ad quem scribimus, persona, iisdem rationibus crimen augebimus, indignumque esse dicemus eum, qui grandior natu, qui dominus, qui pater, qui magistratus sit,

P

qui

qui denique punire & possit, & soleat, sceleratis impunitatem permittere: quantumque ex eorum supplicio universis commodum, quanta civitati quies, quantus improbis in posterum terror, quanta illi ipsi iustitiæ, & severitatis fama accessura sit: quam contraria omnia sint futura ex eorum impunitate, singillatim explicabimus. Si autem posterius illud iræ genus, quod ad ulciscendas injurias spectare diximus, compescere, ac sedare statuerimus, eadem rerum, & personarum divisione utemur: atque in rebus quidem, a quibus partibus crimen augendum esse diximus, ab iisdem injuriam extenuabimus. Personarum quoque eadem facienda distinctio erit: atque ab iisdem locis minuenda injuria, omniaque ad animi mansuetudinem, clementiam, & animi magnitudinem referenda: ostendendumque esse majorem in condonanda injuria clementiæ, atque animi magnitudinis laudem; quam in persequenda ultionis voluptatem. Ad hanc illum etiam rationibus, & exemplis clementium virorum, quoad fieri poterit, incitabimus: ostendemusque cum superioribus quidem, quibus par esse non possis, certare stultum esse: cum paribus, ambiguum: cum inferioribus vile, & indecorum. Illud præterea est ultionis genus, cum is se contemni, & pro nihi-



lo haberi videt: quæ quidem & alia ejusdem generis, quum dixerimus, exemplisque confirmaverimus, ejus animi magnitudinem, & clementiam commendabimus, ad ejusque laudem appetendam hominem summo studio; atque omnibus orationis viribus inflammabimus, & cum deprecatione misericordiam a communibus locis commovebimus. Atque hæc de ira satis, nunc ad reliquos affectus pergamus.

*De lætitia, & joci excitandis.*

## CAPUT VIII.

**R**Estant ex omni affectuum ratione duo, qui a præsentis boni, & mali opinione proficiscuntur: lætitia illa gestiens, quæ ab aliis gaudium, ab aliis voluptas appellatur: & dolor, sive, ut Cicero appellat, ægritudo. Horum uterque reprimendus est: lætitia vero nonnunquam etiam excitanda. Igitur de ea primum dicamus. Excitatur scribendo lætitia aut universa re, aut partibus universæ, quum aliquid amico per literas nunciamus, quod illi jucundum, atque optatum esse scimus: ut opum, honorum, dignitatumque accessio, patriæ fortunarum, ornamentorumque restitutio: liberorum, propinquorum, atque amicorum

salus, valetudo, dignitas, & quæ sunt generis ejusdem: quæ gratissima esse audienti solent, præsertim quum præter spem, atque opinionem acciderunt. Excitant etiam illa voluptatem audienti, quæ voluptatem attulere spectanti: ut quum triumphus, convivium, nuptiæ, ludi, spectaculaque omnis generis visa narrantur, in quibus tum res ipsæ, tum narrandi modus delectationem affert; nam si nudam & simplicem narrationem habeant, lectorem non sane multum movent: si in illis crebræ digressiones fiant, quædam incredibilia, subita, inopinata, ridicula referantur: si tota narratio lepore quodam, & salibus respergatur: si singulorum mores, sermones, actiones, cum eorum imitatione narrentur: si denique singula quasi oculis spectanda proponantur, ea demum narratio voluptatem affert. A partibus voluptas excitatur, quum vel in verbis, vel in rebus jocamur; jocandi in rebus Cicero duo genera libero homine digna esse dicit, narrationem, atque imitationem. Narratio est alicujus factæ, vel fictæ rei cum lepore expositio ad id, de quo loquimur, accommodata: ut apologus, simile exemplum, comparatio, res gesta, quæ aliqua de causâ ridicula, jocosaque sit. Jocus autem & risus excitatur multis modis; ex ambiguo, quum aliud dicimus, & aliud

& aliud dicere videmur, vel aliud intelligi volumus: ut si quis de servo furace dicat, hic est, cui nihil domi occlusum, obsignatumque sit: quod etiam fidei servo convenit. Ex imagine, quum ejus rei, de qua loquimur, imaginem a re quadam inopinata, & dissimili ducimus: ut siquem pessime cauentem asino rudenti, aut si præpinguem hominem dolio comparemus. Ex errore, quum vel ipsi nos errasse fingimus: ut si avarum, qui se venisse dicat, interrogeamus, Quanti? quasi venalem existimaverimus: vel alios in errorem ducimus; quale est illud Martialis in Codrum, quem plurimum credere, non quia pecuniosus esset, sed quia cæcus amaret, affirmabat. Sed ex his rebus locus potissimum existit, quæ præter spem atque opinionem vel dicuntur, vel accidunt: cujus generis infinitæ pene species reperiuntur. Imitatio est, quum alterius sermonem, mores, naturamque effingimus: ea dicendo, atque agendo magis, quam scribendo utimur; licet tamen scribendo quoque apud familiarissimos quorundam sermones, qui nobis ridiculi videantur, effingere. Mores vero, & naturam aliquorum quadam cum venustate describere, ridiculum in primis, & jocosum est. Verba vero tam multis modis jocum, & risum excitant, ut difficile atque incredi-

## 230 DE RATIONE SCRIB.

bile dictu sit; nunc enim transferuntur, nunc invertuntur, nunc mutantur, nunc transmutantur, nunc aliam in partem, nunc in aliam significationem accipiuntur: nunc, vocalibus tantum mutatis, eadem consonantes servatæ in aliam, quæ a proposito non discedat, sententiam transferuntur: atque omnia aut fallunt, aut alludunt, aut derident, aut mordent, aut contemnunt, aut in alium sensum detorquentur. Sed quoniam hæc, natura, non arte perficiuntur, supervacuum de his præcipere quicquam videtur; nam si quis ineptus natura sit, atque ex arte joculari velit, non magis id prospere, ac decenter faciet, quam asellus is, qui est apud Æsopum, qui quidem blandiri domino quum vellet, cum prioribus pedibus, & ruditu immenso, atque intempestive invasit. Joculari itaque unumquemque natura, & consuetudo doceat, necesse est. Materiam inter amicos pro cuiusque natura, res, quæ quotidie accidunt, satis, abundeque præbebunt. Modus ex amici natura, & nostra consuetudine, ac familiaritate statuetur. Illud non in scribendo modo, sed in omni quoque oratione, & sermone cavendum, ne aut scurrilia, aut obscœna proferamus: ne, dum urbani esse cupimus, scurriles, impudicique habeamur. Ac de jocos quidem hactenus.

De

*De latitia reprimenda.*

## CAPUT IX.

**S**I autem reprimere gestientem illam, atque immodicam lætitiā moderari tentabimus; quum rationem nostrī consilii atque admonitionis nostræ in principio aperuerimus, omnesque invidiæ suspiciones a nobis, iis, quas supra ostendimus, rationibus amoverimus, de immodica lætitiā in universum disputabimus: ostendemusque primum, quam multorum malorum ea causā, radixque sit, quippe quæ insolentiam, superbiam, jactationem falsæ gloriæ, cupiditatem, impatientiam, levitatem, luxuriam, segnitiam, ignaviam, inertiam, atque innumerabilia vitia ex sese pariat. Deinde quam ea res inanis, brevis, caducaque sit, aperiemus: & quam sæpe in contrarium verti soleat, ex quacunque re profecta sit, multis ac variis exemplis comprobabimus: idemque in omni lætitiæ, ac prosperitatis genere accidere, singillatim per omnes vitæ status, ac species discurrentes, ostendemus. Inde ad causā pedetentim accedentes, eam rem, de qua ille gestiat, maxime fluxam atque inavem esse ratione aliqua demonstrabimus: & quid eum

339 - DE RATIONE SCRIB.

ad insolentiam superbiamque efferat ; quæ contra in ea re pericula , atque aduersa metuenda sint , ex aliorum , quibus idem acciderit , exemplo perscrutabimur , timendaque omnia , quæ accidere possint , illi esse dicemus: quæ si accidant, quid factururus sit, & quam turpiter de summo gradu in infimum sit casurus , interrogando investigabimus . Quum autem quid in ea re mali sit , atque esse possit ostenderitimus , quid in moderatione boni sit , quæ inde quies , quæ salus , quæ auctoritas , quæ gloria , qui denique fructus proveniant , explicabimus , ad eosque percipiendos , atque amplectendos , illum , & ejus , & nostra , & ipsius rei causa , cohortabimur .

*De mærore , siue ægritudine sedanda .*

C A P U T X.

**M**æror autem, siue ægritudo , quæ una ex omnium affectuum ratione reliqua est , quum animum præsentis mali opinione conficiat , non excitanda stimulis , sed consolatione aut tollenda omnino , aut quantum fieri potest , sedanda , comprimendaque est . Quoniam autem ægritudo multiplex est , multiplex quoque consolatō adhiberi solet ; quæ quidem res quum & ad  
phi-

philosophos tota pertineat, & ita late pateat, ut de singulis ejus generibus singula tum a Græcis, tum a nostris volumina, & olim scripta sint, & (ut ego compertum habeo) nunc quoque scribantur, tractari a nobis pluribus verbis nec debet, nec potest. Sed ne reliquisse pulcherrimam operis partem intactam videamur, capita tantum, quædam in singulis generibus summatim attingemus, ut ex iis unicuique aditus ad cetera præbeatur. In omni autem consolatione tria illa potissimum, quæ Cicero docet, quasi fundamenta quædam nobis sequenda etiam censeo: primum, ut in re boni plurimum, aut nullum malum, aut quam minimum malum esse doceamus: Deinde, ut de communi vitæ conditione, aut de ejus ipsius, ad quem scribimus, propria disputemus. Tertio, ut summam stultitiam esse doceamus, frustra confici mœrore, quum intelligamus ea ratione profici nihil posse: quæ quidem quum omni ægritudini communia sint, qua ratione possint singulis generibus accommodari, nunc breviter subjiciemus.



*De consolatione paupertatis.*

## CAPUT XI.

**O**Mnis igitur ægritudo , ut breviter complectamur , aut ex opum , aut ex honorum , aut ex patriæ , aut ex suorum , aut ex valetudinis amissione suscipitur . Si quem aut ex opum amissione , aut etiam inopia mœrentem consolabimur , primum quidem ostendemus , quam multa , ac magna ex divitiis mala nascantur , ut ignavia , luxuria , libido , avaritia , odia , contentiones , cædes , bella , urbium everSIONES , & quæ sunt generis ejusdem : quantas etiam hominibus curas , sollicitudines , molestias , quantos labores , opum tum comparatio , tum conservatio afferat . Perpauca vero ad usus vitæ necessaria sunt , ut nihilo plus dives , quam pauper vel vivens consumat , vel moriens secum auferat : quanto vero cum dolore opes a morientibus relinquuntur , & quibus sæpe relinquuntur . Deinde paupertatem omnibus his malis carere , singillatim ostendemus , ejusque innumerabilia bona superioribus malis contraria explicabimus . Quæ vero in ea , vel mala , vel incommoda esse existimantur , ea nos partim negando , partim confutando , partim exte-  
duan-



nuando, partim bonorum magnitudine, compensando, aut omnino dissolvemus, aut quam maxime levia, & tolerabilia faciemus. Deinde ad communem vitæ conditionem conversi, jubebimus considerare, quam pauci divites, quam multi pauperes sint: quo loco plurimos in eadem, qua illi, quos consolamur, sunt fortuna, plurimos etiam in deteriore constitutos, omnis generis viros ostendemus: neque vero divitias, ut præmium virtutis, optandas esse, quibus pessimus quisque maxime affluat: neque paupertatem, ut crimen aliquod, aut turpitudinem refugiendam, quam optimus quisque semper adamaverit, esse dicemus. Atque hoc exemplis tum sanctissimorum virorum, tum doctissimorum hominum demonstrabimus: qui opes non modo, quum abessent, non quæsivere: sed, quum adessent, etiam aliis, atque aliis rationibus abjecere. Ex quo fiet, ut opes, si non contigerint, non sint appetendæ: si amissæ sint, non sint requirendæ. Deinde cum, ad quem scribimus, suorum bonorum enumeratione consolabimur, atque ad eorum contemplationem, fruitionemque cohortabimur. Postremo dicemus, facultates illi ad vivendum necessarias neque pro sua virtute deesse posse, neque si desint, magno esse labore conquirendas.

*De*

*De consolatione amissorum honorum ,  
& patriæ .*

## CAPUT XII.

**E**Adem in honorum , dignitatum , ac potentia , quæ in opum amissione , consolandi ratio erit . Primum enim ostendemus , quantis illa laboribus , curis , molestiis , & periculis comparentur , quantisque servantur : quam vero fluxa , inania , atque instabilia sint , & in quorum potestate constituta . Quæ contra sit privati hominis vita , quæ quies , quæ securitas , quæ tranquillitas , quæ denique beatitudo ; deinde nihil esse mali in earum rerum amissione contendemus , quæ neque virtutibus comparentur , neque vitiis amittantur . Culpam omnem tum in fortunæ varietatem , levitatemque , tum in ipsarum rerum naturam conferemus . Ei rei constantiam , patientiam , prudentiam , & ceteras virtutes opponemus , quarum exercendarum gratia hæc accidere divinitus permittuntur . Hic exemplis illustrium virorum , quibus idem in omni genere acciderit , multis utemur . Hominem deinde tum ad inferioris fortunæ contemplationem , tum ad privatæ vitæ commoda , tum ad eorum , quæ eripi non possunt .

possint, bonorum; si non habeat, adeptionem; si habeat, fructum, & conservationem, omni alia sublata cogitatione, revocabimus. Siquem autem patriæ amissione morientem consolabimur, primum de populorum levitate, stultitia, & iniquitate in universum disputabimus: ostendemusque quam multi sint a suis civibus immerito ejecti, qui paulo post aut frustra desiderati sunt, quum in patriam reverti nollent; aut cum magna sua gloria revocati. Hic optimum etiam exilium esse, cum a malis & factiosis civibus disceditur, ita ut ultro etiam sit ex tam iniqua, aut ingrata patria migrandum, demonstrabimus: exemplisque eorum utemur, qui civium suorum aut vitiis, aut factionibus, aut ingratitude offensi, patriam ultro reliquere. Deinde siquid proprium de ejus ipsius patria, civibusque habebimus, in medium afferemus. Nominis autem ignominiam, præsertim si injuste damnatus sit, non esse timendam; illic enim exilium esse, ubi virtuti locus non sit: exemplis eorum utemur, qui multo clariores exilio, illustrioresque fuere, quam si in patria perpetuo mansissent. Quo loco virtutem ejus collaudabimus, eumque multo clariorem, acceptioremque apud omnes nationes hoc exilio fore ostendemus. Exilii quoque nomen in peregrinationem commu-

mutabimus : atque eo modo levius , atque tolerabilius faciemus . Quod si is propterea doleat , & se miserum arbitretur , quod sibi extra patriam vivendum sit , primum quidem ostendemus , si ita esset , plenas omnes provincias miserorum futuras esse , in quibus tam multi , ac tandiu peregrinentur ; hic ostendemus , quam multi mercaturæ , quam multi doctrinæ , quam multi etiam voluptatis gratia & olim peregrinati sunt , & hodie peregrinentur ; nostri enim temporis exempla ad omnem consolationem valebunt plurimum ; nam veterum facta tanquam incredibilia , & a scriptoribus ficta leguntur . Eos itaque potissimum commemorabimus , qui noti , illustresque sint : & aliqua de causa semel egressi , in eam postea nunquam reverterint : illum vero nullo modo patriam amisisse dicemus , sed in ea rerum gestarum gloria , & multarum virtutum memoria & nunc permanere , & perpetuo mansurum : de habitatione modici temporis , aut de sepultura corporis sollicitum illum esse non debere . Si bonorum amissionem doleat , exiguarum opum gratia illum commoveri non oportere dicemus , qui majoribus rebus non commoveatur : & opes illi nullo loco defuturas . Si suorum vel civium , vel propinquorum desiderio teneatur , eos extra patriam videre fa-

facile posse. Si patriæ commoda, aut voluptates desideret, ubique illi eadem, aut majora commoda fore demonstrabimus. Quod si extra patriam & melius, & quietius, & commodius possit vivere, omne solum viro forti patrium existimandum, exemplo Teucris, qui patriam illic esse aiebat, ubicunque esset bene: denique stultum esse dicemus, se, suamque virtutem moenibus unius civitatis claudere, eique se addictum, ac devinctum esse existimare, quum possit universum terrarum orbem sibi patriam facere, ut Socrates, qui quum interrogaretur, Cujatem se esse diceret, mundanum se esse aiebat.

*De consolatione mortis.*

C A P U T XIII.

**S**Equuntur ea, quæ adversus dolorem ex alicujus morte susceptum dici solent: quæ quidem, quoniam res ipsa quotidie accidit, atque in omnium ore versatur, partim tam multa sunt, ut brevi comprehendere non possint: partim tam late patentia, ut facile ab omnibus excogitari queant: nos tamen, ut aditum ad cetera invenienda faciliorem omnibus, & latiore præbeamus, quædam breviter perstringemus. Idcirco si  
con-

consolari quemquam morte lugentem statuerimus, oportebit nos initio scribendi orationem nostram ad illius dolorem parumper accommodare ita, ut & jure dolere, & nos ad ejus dolorem quam proxime accedere ostendamus. Ex quo fiet, ut ille facilius nostram consolationem admittat, & nos fidem apud eum, & benevolentiam ad ea, quæ dicturi sumus, majorem comparemus; nam & genus quoddam consolationis est, habere aliquem nostris calamitatibus nobiscum pariter dolentem. Videtur enim ille, quum ex eadem re dolorem capit, nos aliqua ex parte nostro levare: & adhibere statim acrem recenti, atque acerbo vulnere medicinam, minime accommodatum est; recrudescunt enim vehementiori contactu recentia vulnera; & non modo ferrum, sed manum quoque medici in principio reformidant: necesse itaque est, ut dolori paululum concedamus, & tum oratione, tum etiam significatione nostri doloris obsequamur, quod quum aliquandiu fecerimus, & animum hominis benevolum nobis, atque obsequentem reddiderimus ita, ut nos putet jam æque ac seipsum dolere; nihilque posse nos, quod ille refugiat, dicere, consolationem ipsam paulatim ingrediemur: & primum quidem doloris causam, aut interrogando, aut indagando, aut confutando

do investigabimus: ea aut in morte ipsa, aut in eo, qui mortuus est, aut in eo, qui luget, inveniatur necesse est. In morte quidem aut boni plurimum inesse ostendemus, tum earum, a quibus discedimus, injuriarum explicatione; tum ejus, quæ divinitus promittitur immortalitatis, ac beatitudinis commemoratione: aut certe nihil etiam mali, etiamsi id, quod credere prohibemur, animæ cum corporibus extinguerentur. Mortem præterea naturæ finem esse, non pœnam tum ex singularum ætatum ordine, tum ex ipsa compositione, ac resolutione demonstrabimus. Exempla eorum, adjiciemus, qui cum senio confecti essent, paulatim sine morbo, sine dolore, quasi sponte decesserunt: aut eorum, qui mortem suam aliquo tempore prædixere, quod se deficere, dissolvique sentirent; mortem itaque doloris causam cuique esse nec debere, nec posse. Defuncti etiam gratia lugendum non esse, cui aut ingens bonum, aut nullum malum acciderit, ostendemus; deinde ex ejus virtutibus rebus gestis, moribus, & antea vita non posse eum immortalem beatumque non esse: tum quibus in vita bonis perfunctus sit; a quibus contra malis tum præsentibus, tum imminentibus sit ereptus, demonstrabimus, atque utraque, & bona, & mala commemorabimus ita, ut neque

Q

ma-

majoribus bonis eum perfrui potuisse, si diutius vixisset, & mala ingentia, quæ imminebant, evitasse dicamus ita, ut vel sponte eum decessisse, vel divinitus sublatum esse monstremus. Mortem autem illi utilem fuisse non modo ex instantibus, & pene presentibus malis, sed ex his etiam, quæ accidere diutius viventibus solent, ostendemus. Afferemus huc exempla eorum, qui quum multos annos felicissime vixissent, infelicissimum exitum vel suorum morte, vel patriæ calamitatibus, vel alia fortunæ mutatione habuere. Eum vero, qui lugeat, si hominem ad tanta bona ab his malis profectum lugeat, non recte facere; id enim invidentis potius, quam amantis esse ostendemus. Sin sua commoda lugeat, quæ ex illo vivente capiebat, non illum, sed seipsum amasse dicemus. Quod si filius ejus fuerit, qui defunctus est, ostendemus commodatum a Deo, non datum fuisse, quandiu illi collibitum fuerit, eum patri concessisse; quum visum sit, quod suum erat recepisse: omnia in meliorem partem accipienda; Deum, cum optimus, atque æquissimus sit, nihil nisi summa ratione, aut agere, aut permittere, nihil non optimum nobis, atque utilissimum, pati evenire, quippe qui multo magis nos amet, quam ipsi: sed nostri commodi gratia permittere,  
ut



ut non omnium rerum scire rationem possumus ; & alia multa , quæ in hanc sententiam a Theologis dici solent . Deinde lugentem exemplis eorum , qui & plures , & clariores filios amisere , consolabimur : eumque tum malorum , quæ plura , & majora pertulerit , comparatione , hanc calamitatem contemnere debere , quum animus jam in malis obduraverit , ostendemus : tum bonorum , quæ ei plurima , & maxima reliqua sunt , explicatione hominem ad eorum contemplationem , perfruitionemque revocabimus . Illa præterea quanquam communia , & vulgata sint , nonnunquam tamen , si suo tempore afferantur , animum lugentis non mediocriter recreant : hominem , eum natum fuisse : hanc esse humanæ vitæ conditionem , ut omnia orta occidant , & aucta senescant : neminem debere peculiariter lugere , quod commune sit , atque omnibus accidat : sapientem vero , qui causas rerum intelligat , multo minus angi , commemorare tot regum , civitatum , nationum , ædificiorumque interitus , hominemque ab unius morte ad tantarum rerum interitum contemplandum exemplo Servii Sulpitii revocare . Accedent his , si qua de conditione defuncti dici possint , quæ illi propria sint : quæ quidem vitam ejus aut acerbam ,

## 244 DE RATIONE SCRIB.

aut minus jucundam reddere potuissent : ut cæcitas , surditas , sive alterius membri , aut etiam totius corporis debilitas , aut ægrotudo , item orbitas , humilitas , paupertas , infortuniaque alia , quæ hominibus præter opinionem solent accidere : quarum rerum si afferre aliquam poterimus , mortem illi fuisse utilem concludemus ; postremo stultum esse dicemus , luctu ac mœrore confici , quum intelligat proficere se nihil posse ; quo loco hominem ad patientiam , constantiam , virtutem , quam in ceteris rebus semper habuerit , ostendendam cohortabimur ; eamque medicinam se sua sibi prudentia afferre oportere dicemus , quam ipsa sit omnino temporis longinquitas allatura . Denique barbaras quasdam nationes luctu nascentes , morientes cantibus , & lætitia prosequi consuevisse cogitantes , alteros in magnas misérias ; alteros a maximis malis liberari . Turpe itaque esse nobis , qui literas , & sapientiam profiteamur , a barbaris hac in re una superari , qui eos in ceteris superemus . Quod si levare morte nostrorum non possumus , luctum certe omnem cohibendum esse . Sed de morte quidem satis , cetera ex libris philosophorum petentur .

*De consolatione cæcitatis, & totius corporis  
imbecillitate.*

## CAPUT XIV.

**S**upereſt, ut eos conſolemur, qui aut aliqua corporis parte, aut toto etiam corpore debilitati ſunt. In his primum locum obtinet cæcitas, quæ propter illius ſenſus excellentiam maxime videtur deteſtanda. Igitur ſi cæcum hominem conſolabimur, primum oſtendemus, quare ſint ſinguli ſenſus a natura dati: docebimusque eos non ad ſcelera, aut voluptates perfruendas, ſed ad inſtitutionem animi, ac perfectionem corporis, tanquam duces, & comites eſſe datos: deinde quam multa ex his mala tum in corpus, tum in animum ipſum proficiſcantur, explicabimus. Et quoniam hæc ratio ad omnium ſenſuum amiſſionem conſolanda valebit, quæ ex ſingulis mala oriri, quæ a ſingulis ſcelera committi ſoleant, oſtendemus. Deinde his malis omnibus liberum, atque immunem eſſe, qui illorum incitatore, atque auctore ſenſu careat, demonſtrabimus; tum eorum, qui ſenſibus his privati ſunt, quietem, ſimplicitatem, ſecuritatem, & commoda proferemus: incommoda, ſi qua ineſſe videbuntur, docebimus

ea vel per alios sensus suppleri, vel per minus, ac servos evitari posse: ac cæcis quidem colorum, surdis vero sonorum notitiam, quæ utrisque deesse videatur, neque ad capiendas voluptates, neque ad res gerendas obesse, quo loco eos neque corporis, neque animi voluptatibus carere, excepta dumtaxat colorum in cæcis, in surdis sonorum voluptate, multis rationibus, atque exemplis demonstrabimus; eas vero voluptates neque tanti esse faciendas, ut earum gratia tot vitiis, atque sceleribus subjacere, involvique velimus: & tam multis contra bonis, ac virtutibus compensatas esse, ut etiam si magnæ essent, contemnendæ tamen, ac pro nihilo habendæ videantur. A rebus vero gerendis neque cæcos, neque surdos, neque alio sensu debilitatos abduci, singulorum exemplis, qui in omni genere claruerunt, comprobabimus; tum quæ disciplinæ, quæ virtutes, quæ artes in cæcis, surdis, mutisque & esse possint, & semper fuerint, ostendemus: nonnullosque altioris contemplationis gratia, ne a sensibus distraherentur, aut se in altissimos recessus abdidiisse, aut etiam sponte sibi oculos effodisse; atque hæ communes consolationes sunt. Proprias unicuique proprius ingenio, natura, disciplina, virtutibus, moribus, rebus gestis, & ceteris partibus, quæ

quæ personis attribuuntur, accommodabimus: quæ præterea de communi humanæ vitæ conditione, de potentia, de constantia, de omni virtute dici possunt, in hanc poterimus consolationem conferre. Quæ de his sensibus diximus, tum in alias corporis partes, tum ad universum corpus, atque ad omnes ejus morbos accommodari poterunt; ostendemus enim pernicitatem pedum, corporis totius formam, agilitatem, robur sæpe homini obfuisse, profuisse fere nunquam, malaque omnia colligemus, quæ ab his, quas dixi partibus profiscuntur. Commoda vero, quæ ex corporis integritate capiuntur, partim extenuabimus, partim nobis per alios præstari posse ostendemus, ita ut ex infirma corporis valetudine aut nulla, aut quam minima incommoda suscipiantur, eaque omnia fervorum, ac jumentorum ministerio resarciantur. Dolorem vero corporis, ad patientiæ, constantiæ, virtutumque omnium exercitationem, item ad animi præstantiam, ad immortalitatis, ac beatitudinis spem, atque expectationem revocabimus: exempla quoque afferemus eorum, qui minima quaque de causa, ne proderent, quod celeri volebant, gravissimis cruciatibus resistere: item eorum, qui nostræ Religionis tuendæ, Christianique nominis profitendi

gratia, ultro se maximis atque exquisitissimis tormentis objecere. Auget hanc consolationem & communium, & particularium, universarumque miseriarum commemoratio, ut intelligat is, qui morbo aliquo laborat, calamitatibus, atque ærumnis immunem esse neminem, quod si palam singulæ ostendi, & cum alienis conferri possent, neminem suas cum alienis commutaturum. Maxime autem proderit illa corporis, animique comparatio, & utriusque officiorum, virium, partium, utriusque denique finis explicatio: quam quum accommodatè fecerimus, & animi præstantiam ostenderimus, ad ejus vires exercendas gloriam, atque immortalitatem doctrina, ingenio, & virtutibus comparandam, summo studio cohortabimur: & hujus vitæ brevitæ, atque imbecillitate contempta, ad beatam illam æternamque appetendam, & origine, & mercede proposita, incitabimus. Sed hæc hæc haec.

*De inventione in universum.*

## C A P U T X V.

**I**N omni scribendi genere, quo pacto materia inveniendæ esset, satis abundeque videor exposuisse: quæ quidem pars, quo-

quoniam & difficillima erat, & a nostris scriptoribus, in hoc præsertim genere minime tractata, pluribus verbis a nobis explicata est. Nemo enim fere est, qui conceptus mentis exprimere, atque eloqui non quoquo modo possit: sed difficillimum ab omnibus existimatur, quid dicas, apte accommodateque invenire; nam etiam si minus ornate dicas, quod velis, si animo aliquid non vulgare dicas, poteris tamen non mediocriter lectorem delectare. Quemadmodum enim pulcritudinis in corpore potissima pars non vestes sunt, sed ipsa corporis habitudo, & forma; ita in oratione non verba, sed sententiæ, & materia ipsa pulcritudinis, & roboris causæ potissima sunt: atque ut vestes induendi, atque exornandi corporis gratia inventæ sunt; ita verba enunciandi, atque eloquendi mentis conceptus gratia sunt excogitata. Denique res ipsæ sine ornatu verborum quasi nudum corpus esse possunt: verba sine rebus, ut sine corpore vestes, subsistere, atque esse non possunt. Huc accedit, quod de elocutione multi & veterum, & recentium perscribere: de inventione ea, quæ extra iudicium in demonstrativo, & deliberativo causarum genere versaretur, exacte, atque accurate adhuc nemo. Hanc enim partem veteres, ut existimo, partim ut notam, partim ut ad  
aliam

aliam institutionem attinentem, pene intactam reliquere; recentiores adhuc non attingere. Postremo omnes, qui ad dicendi facultatem accedunt, quo pacto dicant, quærunt: quid dicant, non quærunt. His igitur de causis ego mihi in hac potissimum parte insistendum, atque elaborandum putavi: reliquas duas, dispositionem, atque elocutionem breviter, summatimque perstringam. Altera enim & per se facillima est, & a nobis in ipsa rerum inventionem magna ex parte tractata: altera partim est jam a nobis nonnullis libris conscripta, partim in aliud tempus, opusque conservatur.

*De dispositione.*

C A P U T X V I.

**D**ispositio igitur est ordo rerum dicendarum, ad nostram causam certa ratione accommodatus; ea nos in scribendo plurimum juvabit. Is enim, qui scribit, si recte materiam disponat, & facilius scribet, quum res inter se non implicet, atque ad idem sæpe non redeat: & utilius, atque aptius ad persuadendum scribet, quum rationes singulas locis suis quasi milites in acie collocaverit. Is vero, qui leget & omnia  
me-



melius intelliget, & facilius memoria retinebit. Igitur qui ad scribendum accedit, quasi corpus aliquod compositurus, materiam omnem animo quasi oculis subjiciat, ac proponat: & primum quidem eam in caput, & maximâ membra, hoc est, in exordium, & ceteras majores partes distinguat: neque solum quantum satis est, unicuique parti tribuat, ut omnia pro corporis magnitudine sibi æqualiter membra respondeant; ne si caput, aut aliud membrum a ceteris magnitudine discrepet, monstrosus corpus esse videatur: verum etiam ejus generis materiam parti cuique tribuat, quam ille maxime intelligit convenire; ne vel ea, quæ confirmationis sunt, in exordium conferat: vel quæ in narratione dicenda sunt, in conclusionem differat. Deinde in exordio semina quædam, & principia causæ totius, tanquam nervos in capite collocet: a quibus universa oratio manare, ac diffundi videatur. Ea vero prima in exordio locet, quæ ad conciliandos animos tunc maxime liberos, & in nullam adhuc partem incli- nantes valere plurimum existimabit. Ea enim, quæ nudis adhuc & liberis animis imprimuntur, maxime inhærent. Sunt itaque lectorum, atque auditorum animis potissimum, & primo quoque tempore imprimenda, quæ neque deleri facile possint, & re-

& reliquis rebus dicendis fidem maximam, atque attentionem parent. Exordio, si res postulabit, statim narratio subjiçietur, nisi aut lectoris animus majori præparatione, aut nostra causâ majoribus fundamentis indigeat: quod accidere poterit, si defendere turpem causâ existimabimur. Narrationis vero dispositio qualis esse deberet, diximus, quum de narrationis virtutibus tractarem; post eam divisio earum rerum, quas tractaturi sumus, si longior causâ fuerit, collocabitur. Sæpenumero tamen in epistolis præsertim, quæ artificium omne dissimulant, divisione superse-  
demus, aut id quam occultissime facimus. In confutatione ea prima diluere, ac refellere oportebit, quæ vel lector, vel adversarius tanquam firmissima suæ causæ adjumenta ex adverso vel collocaverit, vel collocare poterit. Cetera partim illudere, partim contemnere, partim transferre, partim subterfugere facile poterimus. In confirmatione firmissimam quamque argumentationem cum in principio, tum in fine collocabimus, ut & nostræ causæ fundamenta constituamus, & lectoris, sive auditoris animum in fine quasi obsessum, ac devictum nostris rationibus relinquamus. In medio leviora collocabuntur: quæ quum per se satis firma non sint, validioribus  
utrin-

utrinque vallata, robur ab antecedentibus, consequentibusque accipient. Conclusio tamen si multis in locis disponenda est, in fine tamen maxime, artificiosissimeque adhibenda: cujus ratio satis, abundeque a nobis in primo libro est tradita. Dispositio in epistolis, si perpetua materia fuerit, hæc potissimum servanda est. Si plures erunt res, quæ tractentur, a maximis, & gravissimis incipiemus. Licebit tamen pro qualitate eorum, ad quos scribimus, a levioribus tanquam ab exordio incipere, ut illis adiutum quodammodo nobis ad graviora præparemus. Si pluribus epistolis unica epistola respondendum erit, licebit vel acceptarum epistolarum ordinem, vel negotiorum gravitatem sequi, atque in hac quidem re nos ratio temporis admonebit. Ac de dispositione quidem satis in præsentia dictum sit. Nunc ad elocutionem, quæ una reliqua est ex suscepta institutione, transeamus.

*De elocutione in universum, & de scribendi materia.*

## CAPUT XVII.

**E** Locutio, est elegans & ornata verborum, sententiarumque compositio: quam quidem adipisci qui volet, ante omnia

nia considerabit, num poëmata, an solutam orationem velit scribere. Plurimum enim tam apud nos, quam apud græcos differt poëtarum, ac oratorum inter se lingua, non numeris modo, sed toto etiam dicendi genere. Poëtæ enim omnia magna, atque admirabilia dicendo faciunt: quippe qui res heroicas, divinasque narrent. Oratores, quum veras causas agant, causæ, non admirationi inserviunt; proptereaque circumspectius loquuntur. Præterea poëtæ omnia adjectivis exornant, illustrent, vestiunt, circumfundunt. Oratores omnia simplicius, atque absolutius agant necesse est, & res ipsas apertas, expeditasque proponant. Postremo illi tum in singulis verbis, tum in sententiis ordinandis, componendisque, audacia ac licentia majore utuntur: figurasque tam verborum, quam sententiarum sibi proprias, atque accommodatas habent, quæ orationi minime conveniunt. Hi vero, cum numeris illis non arctant, neque sibi figuras arrogant, neque illam transferendo, & componendo licentiam assument. Suos utrique fines habent, quos egredi nefas est. Quisquis igitur ad scribendum accedet, hos in primis fines, atque hanc differentiam teneat necesse est, memineritque se in oratione poëtam, in poëmate oratorem figuris, & genere ipso dicendi

ceudi esse non posse. Quo quidem in genere duo maxime vitia fugienda sunt : unum, ne omnia promiscue, vel quum discimus ab aliis, audiamus : vel quum docemus, aliis enarremus. Nam (ut ait Flaccus) Quo semel est imbuta recens servabit odorem Testa diu. Quod si futuri oratores poemata a principio imbibant, illisque animum adhuc tenerum, & mollem imprimant, semper postea strepitum illum verborum, & tumorem orationis affectabunt : quod in oratore non mediocre vitium est. Atque hoc quidem vitio video plerosque laborare, non eorum modo, qui rhetoricen, sed eorum etiam, qui grammaticen docent. Pueris enim statim post prima grammatices rudimenta Virgilium, Ovidium, Lucanum, Juvenalem, Martialemque apponunt, secuti, ut arbitror, Quintilianum, qui a sermone græco incipiendum, & Homerum pueris enarrandum esse præcipit : neque reputantes hanc temporum mutationem, & linguæ amissionem, quæ tunc patria erat, nunc peregrina dici potest. Imo etiam magis tunc Romæ vigeat græca lingua, propter hominum, librorumque copiam, quam nunc latina : cujus quidem non usum modo naturalem, quem veteres habuisse non est dubium, sed scripta quoque, quibus retineri poterat, magna ex parte amisimus.

Dif-

Difficilius itaque, & laboriosius nunc latina discuntur, quam olim græca discebantur. Mutata igitur linguæ consuetudine, ratio quoque docendi, atque discendi mutatur necesse est, neque pueris, ut olim, poëtae a principio tradi possunt. Moribus vero illa lectio quantum noceat in tenera illa, & molli ætate, nequeo dicere; perniciosius enim nihil esse, meo iudicio, potest, quam nudum adhuc animum, qui optima quaque re primum imbuendus esset, amoribus, lasciviis, fabellisque imbuere. Alterum est vitium, quod magnopere fugiendum esse diximus, ne in soluta oratione, poëticam grandiloquentiam, & circuitus illos verborum imitemur: aut nostram orationem adjectivis, translationibus, & figuris immodicis repleamus, quæ tumidam, atque obscuram orationem reddunt. Quo in genere Apulejus, Petronius Arbiter, Martianus Capella, & alii nonnulli magnopere peccaverunt: qui in oratione poëtae quodammodo esse voluerunt. Quod quidem vitium optime vitabimus, si in principio ejus lectioni assuescemus, cujus in dicendo similes esse cupimus. Quum autem sint plures etiam in soluta oratione scribendi differentiae, considerandum deinceps est, in quo potissimum genere versari velimus. Habent enim res singulae non solum

lum distincta genera dicendi, verum etiam propria, peculiariaque vocabula. Nam si historias, & res gestas scribere instituamus, grandiores, tumidioreſque, & poetis quodammodo ſimiliores eſſe poſſumus. Si orationes aut ſcribere, aut etiam pronunciare velimus, graves quidem cum in verbis, tum in ſententiis eſſe nos neceſſe eſt: ſed tamen ita faciles, & perſpicuos, ut totam orationem noſtram ad eorum, qui audiunt, peritiā, ſive intelligentiā, accommodandam eſſe ſciamus. Quo loco reprehendendus nobis error eſt eorum, qui quum apud imperitos verba faciant, ita in dicendo affectati, obſcurique ſunt, ut vix a doctiſſimis per otium intelligi poſſint. Nonnulli quum græce aliquid ſciant, in latina, popularique oratione græcis ſæpenumero verbis utuntur ob id vel maxime, ut a nemine, vel a quam pauciſſimis intelligantur, ſcilicet ut errare impune poſſint: & quum maxime errant, quam optime dicere exiſtimentur; quod quidem nequaquam facerent, ſi aut ſuæ, aut audientium perſonæ rationem haberent, aut ſi Cicero- nem optimum fuiſſe oratorem exiſtimarent: qui, quum & ipſe in utraque lingua doctiſſimus eſſet, & ad doctiſſimos plerunque loqueretur, non ſolum tamen græcis verbis abſtinuit, ſed latinis quoque nonniſi com-

R

muni-

munibus, atque usitatissimis uti voluit. Nihil dico de illis, qui apud populum altissimas philosophiæ, ac Theologiæ quæstiones tractant: quas neque si ab aliis audirent, ipsi aut intelligerent, aut probarent: neque quum eas dicunt, satis intelligunt. Igitur, qui orationes volet scribere, ante omnia eam materiam sumet, quam non ipse modo plane intelligat, sed ab auditoribus quoque intelligi facile posse confidat. Deinde eo orationis genere utetur, quod & verbis, sententiisque gravissimum erit, & ad usum, atque ingenia auditorum quam maxime accommodatum: si quis autem in aliqua disciplina præcipere, aut scribere quicquam velit, æquabile illud, & temperatum dicendi genus, de quo Cicero loquitur in Officiis, sequatur necesse est ita, ut neque figuris multis orationem distinguat, neque longo ambitu verborum utatur: & quod in primis, necessarium est, maxime dilucidus, apertusque sit. Nam si ad materiæ difficultatem accedat etiam obscuritas verborum, & affectatum dicendi genus, neque libenter legetur quicumque is sit, neque facile intelligetur: quo in genere Quintilianus in vitio est; quanquam id temporum, quam hominis vitium dici magis potest. Siquis autem epistolas tantum, & leviora quædam velit conscribere, is pro subjecta materia  
tum



tum gravius, tum levius, tum affectatius, tum remissius, tum copiosius, tum brevius, denique quod ipse maxime amaverit genus dicendi sequi poterit, modo materiæ, lectorique satisfaciat. Postremo, qui ad scribendum accedit, non solum quid potissimum velit scribere, sed cujus in scribendo similis esse, consideret necesse est. Nam quum aliter Catonis, aliter Ciceronis, aliter Quintiliani, aliter Macrobij, & Boethii seculum locutum sit, omnesque in suo genere, quanquam bene dicant, tamen inter se maxime discrepent, videndum est, cujus maxime similes esse cupiamus. Nam si Ciceronem nobis imitandum proponimus, ceterorum tum modos, tum vocabula vitemus necesse est: non enim secula modo inter se discrepant, sed ejusdem quoque seculi homines dissimiles in dicendo sunt; nam si diligenter advertimus, aliter Cicero, aliter Sallustius, aliter Cæsar loquitur, qui tamen æquales prope fuere. Permixtio vero illa, & confusio generum dicendi, quæ ex omnibus seculis, atque hominibus fit, tantam orationi inæqualitatem, ac dissimilitudinem affert, ut monstrosa pene videatur, quod in Aulo Gellio maxime intueri licet, qui quum priscam illam eloquentiam imitari conaretur, neque id pateretur consuetudo seculi sui: item quum græcos,

## 260 DE RATIONE SCRIB.

apud quos illa conscripfit, effingere, atque exprimere, natura linguæ latinæ repugnante studeret; pessimum, meo judicio, & minime imitabile dicendi genus assecutus est. Is igitur, qui ad scribendum accedet, uni seculo, atque adeo uni viro se addicat necesse esse: eumque, quum optimum elegerit, (stultum est enim, ut ait Plinius, ad æmulandum non optima quæque proponere) tum sibi summo studio imitandum, atque effingendum curet, neque diffidat se dicendo quemcumque voluerit æmulari, & consequi posse, modo se diutissime inscribendo exerceat. Nemo autem est, sive veterum, sive nostrorum, qui Ciceronem in omni genere non optimum, atque præstantissimum esse putet. Quod quidem qui existimabit, ad ejus imitationem se solum conferre, ejus orationem effingere, ejus virtutes in eloquendo, quoad fieri poterit, sibi comparare velle debet.

*De figuris orationis.*

## CAPUT XVIII.

**Q**Uum autem sint figuræ tres orationis: Una gravis, quæ verbis & sententiis gravissimis constat, & luminibus ac coloribus tota distinguitur: quales in orationibus

bus Ciceronis loci quam plurimi, præsertimque in accusationibus, & investivis. Altera mediocris, quæ de altitudine illa, & sublimitate multum detrahit, non tamen ad ima descendit: quales sunt magna ex parte Ciceronis orationes, & philosophiæ volumina. Tertia infima, quæ sermonem purum, popularem, ac nudum, sed tamen proprium, & latinum habet: quales sunt multæ ejusdem Ciceronis epistolæ tum ad uxorem, tum ad Atticum, tum ad alios, ad quos ille quotidiano sermone scribebat: ante omnia videndum est, ut illas inter se discernere quam optime sciamus: neque existimemus orationes omnes in gravi, philosophiam in mediocri, epistolas in attenuata figura scriptas esse. Nulla enim fere oratio est, in qua non omnia hæc genera reperiantur. Narrationes enim plerunque in attenuata sunt: exordia in mediocri: confirmationes, & confutationes, & conclusiones præsertim in quibus miseratio capitur, plerunque in gravi sunt, nunquam in attenuata: quod ex pondere sententiarum, figurisque verborum deprehendi facile potest. Habet enim hæc figura tanquam fluvium quemdam dicendi, effunditque omnes habenas eloquentiæ: vehementiam vero tantam, ut animos non movere, sed cogere videatur. Attenuata huic con-

traria, nullas translationes, aut figuras habet : nervos tamen sermonis non amittit. In hoc genere comœdiæ scriptæ sunt, tametsi insurgunt illæ nonnunquam, iratusque Chremes, ( ut ait Flaccus ) tumido de litigatore. In hac figura epistolæ a nobis, nisi gravior res urgeat, magna ex parte scribendæ sunt. Est enim difficilior jam nobis attenuata, quam gravis veteribus unquam fuit, propter linguæ latinæ desuetudinem, atque amissionem, & propter discendi difficultatem. Licet tamen, & ex humili in mediocrem, gravemque ascendere, & e gravi in mediocrem, atque humilem, non tamen repente, sed per quosdam quasi gradus sensim descendere, ut venisse in eam : non cecidisse videamur. Mediocris inter utramque posita, neque hanc humilitatem, neque illam sublimitatem omnino retinet. Distinguitur tamen & illa figuris, & luminibus orationis : & quia utrique finitima est, faciliorem tum ascensum, tum descensum habet. In hoc genere historiæ sunt magna ex parte conscriptæ : orationes tamen Livianæ præsertim, ad gravem plerunque conscendunt. In hoc genere magna ex parte orationes a nobis hodie scribi debent, qui forense illud dicendi genus exercere non possumus, & in laudationibus plerunque versamur. Licet etiam in  
hoc

hoc genere epistolas scribere, præsertim, eas, quæ materiam habent graviolem. Videndum autem est, ne in finitima his figuris vitia dilabamur. Nam dum graves esse cupimus, solemus nonnunquam tumidi fieri, si vel crebris, atque extraneis translationibus, vel frequentibus, ac poëticis adjectivis orationem repleamus: qualia sunt in Petronio, Martiano, & Apulejo multa, quædam etiam in Hieronymo nostro, præsertim ubi de beata Virgine, aut inferis loquitur. In quod vitium multos quoque de nostris incidere hodierna die video, qui se tum demum latine, atque ornate loqui putant, quum poëticis adjectivis, atque translationibus orationem duram, ac difficilem reddunt. Attenuatæ contra figuræ vitium est, quum conjunctiones, ac nervos orationi detrahimus, quod in sermone quotidiano fieri videmus: quale est, Tu nunquam ad me scripsisti; ego scripsi ad te sæpe: Tu non scribis ad me, ego non scribam ad te: Amicitia mea tibi jucunda non est, mihi tua jucunda non erit. Hæc oratio nervos non habet. Adduntur autem nervi sic: Quum ego ad te sæpe scripserim, tu ad me nunquam scripsisti: Quod si post hac statueris non scribere, ego quoque ad te non scribam: Nam si tibi amicitia nostra non est jucunda, tua quoque mihi jucunda non

erit. Atque huic figuræ quoniam usitatio-  
 & intellectu facilior est, exemplum appo-  
 sui, habet enim grande, & perspicuum vi-  
 tium. In ceteris, in quibus vitia vel mino-  
 ra, vel occultiora sunt, non apposui. Me-  
 diocris autem figuræ vitium est, quum qua-  
 si sine sanguine, nervisque sententias coac-  
 cervamus potius, quam componimus: &  
 orationi tenorem illum, vigoremque sub-  
 trahimus: qui intelligi magis, quam dici  
 potest. Sed quoniam hæc sunt a Cicerone,  
 & ab aliis veteribus nostrisque copiose, or-  
 nateque perscripta, a nobis verbosius tra-  
 ctanda non sunt.

*De virtutibus elocutionis.*

## C A P U T X I X.

**R**eliquum est, ut de virtutibus elocutio-  
 nis pauca dicamus. Habet autem tres  
 maximas, præcipuasque virtutes elocutio,  
 perspicuitatem, ornatum, compositionem:  
 quæ ceteras omnes complectuntur. Perspi-  
 cuitas tum in singulis verbis, tum in ipsa  
 compositione, & ordine consideratur. Ver-  
 ba singula & propria, usitata & latina sint,  
 necesse est. Propria sunt, quæ uniuscujus-  
 que rei conceptum proprie accomodate-  
 que significant. Quo in genere sordida,  
 ob-

obscœna, & humilia vitanda sunt: quanvis sint ejus, quam exprimere volumus, rei propria. Sordida existimantur dicta, quæ ab oculorum aspectu removeri solent: ut officia corporis necessaria, eorumque membrorum, & officiorum vocabula. Obscœna sunt ea, quæ tametsi cum honestate fieri nonnunquam possint, dici tamen sine verborum foeditate non possunt, ut dare operam liberis, & quæ ejusdem generis omnibus nota sunt: quæ quidem tam honeste dici, quam fieri debent. Humilia sunt, quæ infra lectorum, aut auditorum, aut etiam ejus ipsius, qui loquitur, dignitatem sunt: ut si apud Pontificem, & sacrum Collegium, asinos, mulos, instrumenta rustica singillatim, aut vilia domus officia nominemus, quæ quidem aut silentio prætereunda, aut honestioribus vocabulis nominanda sunt. Propria item sunt, quæ quum vocabulo careant, ad similitudinem referuntur: ut jaculari, quod tam de pilis, & sudibus, quam de jaculis dicimus; quia pilari, & sudari non dicimus. Item lapidare, non solum de lapidibus, sed de glebis quoque, & testis, & similibus dicimus, quæ vocabula propria non habent. Vertex item est aquæ revolutio, & quicquid in se vertitur: per similitudinem tamen & capitis, & montis cacumen dicimus. Propria etiam sunt, quæ usus ali-

cui

cui certæ significationi accommodavit: ut veteres, qui urbis nomine Romam tantum intelligebant, quanvis aliæ multæ urbes essent: & nos, qui Philosophi nomine Aristotelem, Apostoli Paulum intelligimus, quanvis & philosophi alii, & Apostoli fuerint. Denique ut breviter dicam, propria sunt, quæ id, quod volumus, auditori maxime, apertissimeque declarant, & (ut Fabius ait) non auditu, sed intellectu perpendenda sunt. Latina autem verba sunt, quæ veterum scriptorum auctoritas, & romanæ linguæ consuetudo comprobavit. Quo in genere græca multa ita jam in usum recepta sunt, ut si quis eadem latine velit exprimere, non intelligatur: ut Apostolos, Prophetas, Episcopos, Evangelia, Theologiam, Angelos, & alia multa, quæ appellare latine audent nemo. Quædam etiam hebræa vocabula ita recepimus, ut mutare ea nefas ducamus, ut Cherubim, Seraphim, Sabaoth, Osanna, Alleluja, & similia. Quod si quando de sacris rebus scribamus, aut dicamus, illis abstinere neque debemus, ne Religionem odisse videamur: neque possumus, quia si Latine hæc dicere velimus, a nemine prorsus intelligeremur. Eadem, quorum res inventæ nuper sunt, vocabula reformidare non debemus, qualia sunt, Cardinales, bombardæ, campanæ, sta-



staphæ , & cetera , quorum quum res nuper inventæ sint , verba quoque , quibus res illa exprimantur , in consuetudinem admitenda sunt , ne vel aliud dicere velle , quum loquimur , vel alio nati seculo , vel nolle omnino intelligi videamur . Usitata vero non omnia sunt , quæ latina . Ea enim , quæ vel in duodecim Tabulis , vel in libris pontificum , vel in comœdiis , tragœdiis , scriptisque eorum , qui ante Ciceronem fuerunt , latina quidem esse nemo dubitat : sed etiam ipso Ciceronis tempore ex usu remota , atque antiquata erant , propterea minus bene , ac perspicue loqui existimandus est Gellius , qui non modo a verbis illis non abstinet , sed ea etiam affectat , & quærit . Contra , ea , quæ posteriores philosophi , theologi , & jurisperiti in consuetudinem adduxerunt , verba , magna ex parte fugienda sunt , atque ad Ciceronianum illum candorem , & perspicuitatem omnis linguæ consuetudo revocanda , modo vel apud Ciceronem , vel apud alios magnæ auctoritatis scriptores ea verba reperiantur . Si vero conceptus aliquos vel in philosophia , vel in theologia exprimere velimus , qui veteribus vel intacti , vel incogniti fuerint ; non propterea debemus vereri , quo minus quoquo modo exprimamus , aut voces de integro effingamus , aut inventas molliamus ,  
au-

## 268 DE RATIONE SCRIB.

auresque illis nostras assuefaciamus : neque propterea eos, qui id fecerunt, Cyprianum, Lactantium, Hieronymum, Augustinum, innumerabilesque alios doctissimos viros, barbaros, aut imperitos, appellare debemus : sed omnia ad doctissimorum hominum auctoritatem, consuetudinemque referre. Atque hæc in singulis verbis breviter observanda esse censeo.

*De vitiis compositionis.*

## C A P U T XX.

**I**N compositione autem, & contextu ipso, multa & magna vitia committuntur, quæ non modo difficilem, atque obscuram, sed ineptam quoque, & inconcinnam orationem reddunt. Nos ex illis quædam maxime insignia annotabimus, ut ex illis cetera cognitu faciliora sint. Ante omnia igitur, si dilucidi esse cupimus, longissimas illas comprehensiones, quas ~~argides~~ Græci vocant, fugiemus, ne lectoris, aut auditoris intentio, prosequi ingenio nostram orationem non possit. Item tardam, & diu dilatam verborum tractationem, quod Græci ~~varisbaron~~ vocant, magnopere vitabimus, ne multis interjectis verbis, finis demum sententiæ, oblito jam le-

lectore, consequatur: qualia vitia sunt in procemio Prisciani. His finitimæ sunt longæ, crebræque sententiarum interpositiones, quas Græci *μακρολόγοι* vocant: quas neque frequentes longas esse convenit, ne lector aut principalis sententiæ obliviscatur, aut ita utramque secum implicet, ut neutram intelligat. Videndum præterea est, ne verba ita texamus, ut vel ancipitem, vel obscurum intellectum reddant. Quale est illud: Saxa vocant Itali mediis, quæ fluctibus aras: aut illud, Ajo te Aejacida Romanos vincere posse: quo loco & victos, & victores romanos possumus accipere. Videndum item est, ne dum copiosi, aut elegantes, aut ornati esse cupimus, inani quodam strepitu, circuituque verborum, & (ut ait Quintilianus) copiosa loquacitate longissimam, & incomprehensibilem verborum seriem, sine ullo rerum pondere, aut conclusionem faciantus: qua in re nonnulli maxime laborant, rati se tunc maxime doctos, atque elegantes existimatum iri, si a quam paucissimis intelligantur. Alii contra brevitati studentes, verba, nomina, conjunctiones, & ceteras partes ex oratione detrahunt: rati aut se ita breves fore, si necessaria omiserint; aut ceteros ea intelligere, quæ ipsi intelligant. Nonnulli verba quidem clara, & suo ordine collocant:

cant : sed ita , ut nullus ex his , aut quam occultissimus sensus emergat , ita ut oporteat lectorem sensus illos non quasi alienos intelligere , sed quasi suos magno labore excogitare , atque invenire : quæ quidem ~~admiranda~~ a Græcis vocantur . Danda igitur opera est , ut lector , atque auditor non modo possit nostram orationem intelligere , sed ut non possit eam , etiamsi velit , non intelligere . Quod quidem obtinebimus , si , ut ante diximus , verbis propriis , latinis , & usitatis utemur . Nam emendate loquendi ratio , quam Quintilianus adjungit , ad grammaticam institutionem pertinet . Item si comprehensionibus non longis , neque interjectione sententiarum , aut traiectione verborum , aut ancipiti contextu sententias obscurabimus . Postremo , si neque orationi quicquam detrahemus , neque supervacuum disfluere patiemur , neque sententias de communi usu remotas , atque abhorrentes excogitabimus . Est enim , ut ait Cicero , vitium in oratione maximum , a vulgari genere orationis , & consuetudine communis sensus abhorreere : quod quidem vitium quum semper magnum fuit , tum hoc præcipue tempore , vel maxime fugiendum est ; nam neque omnes literis delectantur . Præterea quam paucissimi ex his , quorum gratia vel dicimus , vel scribimus , ita docti  
sunt

sunt, ut possint nos, si obscurius loquamur, etiam diligentius attendentes intelligere. Dabimus itaque operam, si intelligi cupiemus, ut nostra oratio ita in animos lectorum, atque auditorum, ut sol in oculos, etiam invitos ingruat, atque incurrat. Illa præterea in compositione vitia fugienda sunt, quæ ineptam, insulsam, atque inconcinnam orationem reddunt: ut, frequens earumdem vocalium concursus; quale esset, Herculeæ arma ænea allata sunt, quod vitium vastam, atque hiantem orationem reddit. Item huic contrarius creber multarum consonantium quasi conflictus, qui difficilem pronuntiati reddidit orationem: quale esset, Xerxes strangulavit Ptolemæum. Item ejusdem literæ crebra repetitio, ut in hoc versu:

*Q Tite tute Tata tibi tanta tyranne tulisti.*

Item ejusdem dictionis frequens sine decore, atque ornatu repetitio: ut, Si homo cogitaret, quanti hominis vita, nullus homo hominis gratia homines occideret. Vitandus est etiam ille contextus verborum, qui vel sonum turpem, vel obscœnum reddit: ut, Cum nostro exercitu, & Dorica castra, & similia. Vel sensum efficit talem, qui etiam in obscœnam partem accipi potest: quale est, Incipiunt agitata tumescere. Utrumque autem a Græcis κακὲς λέγων dicitur.

tur. Item ille vitiosus contextus est, qui in numerum poëticum definit: ut, Da animas nobis, cetera tolle tibi, & illud in prior Lucilii libro; Has res ad te scriptas, Luci misimus Aeli. Item vitiosa sunt crebra similiter cadentia: ut, in conspectu tantorum doctorum virorum, sapientissimorum oratorum quis audeat verba facere? Quæ quidem vitia tametsi obscuram orationem non reddunt, æque tamen, atque obscuritas, lectorem, atque auditorem, avertunt: atque haud scio, an etiam magis. Nam obscuritas auditoris videtur arrogantiam arguere, & quoquo modo attentum eum reddit, ut siqua ex parte possit, quæ dicantur, intelligat. Inconcinnitas vero, & auditori quanvis imperito fastidium affert, & scriptoris ignorantiam, atque stultitiam ostendit aperte. Dabimus itaque operam, ut & perspicui scribendo, dicendoque simus: & hæc, atque alia his similia in compositione vitia declinemus.

*De ornatu.*

## C A P U T XXI.

**S**equitur, ut de ornatu, quem secundam esse virtutem elocutionis diximus, pauca differamus. Nam ubi oratio propriis, latius

latinisque , ac usitatis verbis afflecta fuerit , ut perspicue ab omnibus intelligatur , tum quibusdam quasi coloribus depingenda , atque illustranda luminibus erit , ut & aures delectet , & animum mira quadam lectionis suavitatem permulceat , quæ quidem quomodo aut invenienda , aut collocanda sint , magna ex parte natura ipsa docebit , atque ad locos illos filo quodam , & ordine orationis quasi manu ducet . Non enim hæc tam ab arte , quam ab ingenio , ac natura ipsa , meo iudicio , proficiunt ; nullis enim præceptis , nullo artificio tradi potest , quo loco unamquamque figuram disponere , & collocare conveniat . Huc accedit , quod in sermone etiam quotidiano , & in communi lingua illiterati homines non illis modo , quæ arte traditæ sunt , sed aliis quoque , & multo pluribus nullo docente utuntur , quod quum ita sit , fatendum est , aut hæc a natura , non ab arte proficisci , aut homines cum arte nasci : quod quidem quum stultissimum sit , illud profecto sequitur , hæc a natura primum profecta esse , deinde a doctissimis viris observata : & quia conferre ad dicendum videbantur , in artem præceptionemque redacta . Observaverunt autem hæc primum græci , eaque in artem , & præcepta redigentes , suis nominibus appellavere . Nobis , quibus illa

S

adhuc

adhuc incognita, atque inaudita erant, majora ac difficiliora ob nominum novitatem videbantur. Nostri deinde illa scribentes, atque omnia ad patrium, hoc est romanum sermonem revocantes, latinis vocabulis nominavere. Sed qui parum periti linguæ græcæ sunt, alia putant esse, quæ græce audiunt, alia quæ latine. neque esse eandem figuram ὑπερβολὴν, & superlationem, atque illo nominum inusitato, & incognito sono decipiuntur. Nos & latinæ linguæ, & discientium utilitati consulentes, eas & latinis nominibus appellabimus: & ubi se nobis græca obtulerint, etiam græcis signabimus: ut & qui hæc latine scire volunt, habeant, quibus ea vocibus possint appellare: & qui græce scripta apud alios legunt, alia esse non credant. Appellantur hæc autem a græcis, partim τρόποι, partim σχήματα, eo quod vertant, formentque sermonem: a nostris tum figuræ, tum exornationes, sive ornamenta, eo quod exornent, effingantque orationem: tum per similitudinem colores, aut lumina, quod orationem ipsam pingant, & illustrent. Sunt autem figuræ, quibus in sermone utimur, tam multæ, ut nihil sine figura loquamur. Nam quum figura sit formatio quædam, compositioque sermonis a vulgata illa, & se primum nobis



bis offerente loquendi ratione discedens, & ad variandam, atque illustrandam orationem excogitata, quis obsecro valeat modos omnes, quibus oratio variari, aut illustrari potest, præceptis, aut nominibus comprehendere, quum quotidie etiam in sermone communi innumerabiles reperiantur? Nos autem, ne partem hanc neglexisse videamur, paucissimos, atque usitatissimos attingemus: reliquos scire qui volet, apud Ciceronem, Quintilianumque, a quibus nos hæc accepimus, facile inveniet.

*De figuris verborum.*

C A P U T XXII.

**I**gitur quum ab eodem verbo membrum, vel comprehensiones sæpe inchoamus, repetitio a nobis, a græcis ἀναφορά dicitur, hoc modo: Scipio Numantiam sustulit: Scipio Carthaginem delevit: Scipio pacem peperit: Scipio civitatem servavit. Contra, quum in idem verbum sæpe definimus, conversio, sive ἀναστροφή appellatur, hoc modo: Pœnos populus Romanus iustitia vicit, armis vicit, libertate vicit. Quum autem & ab eodem inchoamus, & in idem definimus, ex ambabus his figuris una fit, quæ complexio, sive συμπλοκή nominatur,

hoc modo: Qui sunt, qui fœdera sæpe rupe-  
runt? Carthagenenses. Qui sunt, qui in  
Italia crudele bellum gesserunt? Carthagi-  
nenses. Qui sunt, qui Italiam deforma-  
verunt? Carthagenenses. Quum vero idem  
verbum in media oratione cum dignitate,  
& concinnitate in diversis casibus sæpe re-  
petitur, Translatio, sive *μεταφορά* nuncupa-  
tur, hoc modo: Qui nihil habet in vita ju-  
cundius vita, is cum virtute vitam non po-  
test colere. Quum autem commiserationis,  
vel alterius affectus movendi gratia, unum,  
vel plura verba mutato ordine iterantur.  
Conduplicatio, sive *ταυτολογία* dicitur, hoc  
modo: Pudet iudices, pudet hac de re to-  
ties verba facere: item, Nunc etiam audes  
in horum conspectum venire, proditor pa-  
triæ, proditor inquam patriæ venire audes  
in horum conspectum? Quum quasi per gra-  
dus quosdam a verbo in verbum cum anté-  
cedentis repetitione descendimus, Grada-  
tio fit, quæ *κλίμαξ* appellatur, hoc modo:  
Africano virtutem industria, virtus glo-  
riam, gloria æmulos comparavit. Atque  
his potissimum figuris cum dignitate verba  
repetuntur.

Contentio, sive contrarium, quod  
*ἀντιθέσις* dicitur, est, quum ex contrariis  
verbis, ac rebus sibi respondentibus senten-  
tia conficitur, atque id, quod volumus pro-  
ba-

batur hoc modo: Habet assentatio jucunda principia, eadem exitus amarissimos affert; item, Qui suis rationibus inimicus semper fuit, eum quomodo rebus alienis amicum fore speres? Atque has duas figuras, quum & ejusdem generis sint, & parum inter se discrepent, de industria conjunxi. Differunt autem hoc modo. Nam contrarium urget, & ex re contraria probat, quod vult: Contentio neque urget, neque quicquam probare vult, sed plerunque reprehendit: quod ex superioribus exemplis apparet.

Exclamatio est, quæ animi affectum ostendit per loci, aut rei, aut hominis absentis, sive defuncti compellationem hoc modo: Te nunc alloquor Africane, cujus mortui quoque nomen splendori, ac decori est civitati: item, O singularem audaciam, o perfidiam incredibilem.

Interrogatio dignitatem, atque ornamentum affert orationi, quum ex antedictis urget, faterique compellit hoc modo: Quum igitur hæc faceres, ac diceres, num Rempublicam conservabas? num socios in fide retinebas?

Membrum, quod *καλον* dicitur, est oratio brevis: quæ tametsi sententiam absolutam habet, aliam tamen expectat, quæ ei per conjunctionem plerunque annectitur:

jungunturque duo, aut plura membra simul hoc modo: Et inimico proderas, hoc unum membrum est: Et amicum lædebas, hoc est alterum; additur & tertium sic: Et tibi ipsi non consulebas. Item, Nec rei consuluisti, nec amicis profuisti, nec inimicis restitisti: quæ quidem græci *τρίπλοκα* vocant.

Articulus, qui *ἀνένδετον* dicitur, est, quoties verba singula sine conjunctione per se quadam cum vehementia collocantur, hoc modo: Acrimonia, voce, vultu, gestu, inimicos perterruisti.

Compar est, quum duo, aut plura membra paria, quantum fieri potest, sine conjunctione ponuntur: ut, In prælio mortem pater oppetebat, domi nuptias filius comparabat: hæc omnia graves casus administrabant; atque hæc *ἰσόβηλα* a græcis appellantur.

Similiter cadens, quod *ὁμοϊόπτωτον* dicitur, est, quum plures dictiones in eadem oratione per casus similes efferuntur: ut, Hominem laudas egentem virtutis, abundantem felicitatis.

Similiter desinens, quod *ὁμοιοτέλευτον* vocatur, est, quum in easdem syllabas desinunt ea, quæ casibus carent sic: Turpiter audes facere, nequiter studes dicere. Vivis invidiose, delinquis studiose, loqueris

ris odiose. Coniunguntur hæ duæ figuræ simul hoc modo: Perditissima ratio est, amorem petere. pudorem fugere, diligere formam, negligere famam.

Agnominatio, quam *μετανομασία* vocant, est, quum pene eandem dictionem, mutata significatione, per jocum, aut per dicacitatem repetimus. Ea fit commutatione, additione, imminutione literarum, ut, Hic mero, non Homero operam dat. Item, Hic quod se magnifice jactat, venit a te ante, quam Romam venit. Item, Hic sibi posset obtemperare, nisi amor mallet obtemperare. Atque hujus allusionis plures species sunt, quam ut a nobis breviter explicari possint. Sed ut a lepidio ingenio facile excogitantur, sic a stolido frustra conquiruntur.

Definitio est, quæ breviter, quid quæque res sit, & quæ sit natura ejus, ostendit: vel dialectico modo pergens ad differentias proprias: ut, Avaritia est cupiditas pecuniæ congregandæ, sine erogationis voluntate. Vel oratorio modo sic: Avaritia est, quæ pecuniam congregat, neque sibi, neque aliis quicquam impartit, neque unquam habendi cupiditate satiatur, quæ quidem potius descriptio potest appellari.

Transitio est, quæ breviter, & quid dictum sit, repetit: & quid sit dicendum, proponit,

+ ponit hoc modo: Audistis patres, qualis fuerit Thomæ vita: audite nunc, si placet, qualis fuerit ejus viri doctrina.

Correctio est, quæ tollit id, quod dictum est, & pro eo id, quod magis idoneum videtur, reponit hoc pacto: Quod si iste suos hospites rogasset, imo ipse innuisset, modo hoc facile perfici posset. Item, Hoc offendit existimationem nostram, imo vero dignitatem, atque adeo salutem ipsam evertit.

Occupatio est, quum dicimus nos præterire, aut non scire, aut nolle dicere id, quod maxime dicimus hoc modo: Non dico te ab fociis pecunias accepisse: non sum in eo occupatus, quod civitates, regna, domos omnium depopulatus es: furta, rapinas omnes tuas omitto.

Disjunctio est, quum singulis membris sua verba damus sic, Populus Romanus Numantiam sustulit, Carthaginem delevit, Corinthum evertit.

Conjunctio est, quum verbum unicum, & illud in medio collocatur, sic. Formæ dignitas, aut morbo deflorescit, aut vetustate.

Adjunctio est, quum verbum aut præponitur, aut postponitur. Præponitur sic: Deflorescit formæ dignitas aut morbo, aut vetustate. Postponitur sic: Aut morbo, aut

aut vetustate formæ dignitas deflorescit .

Interpretatio est , quum idem per diversa verba ad rem exaggerandam , & animos commovendos repetimus sic : Patrem nefarie verberasti : Parenti scelerate manus intulisti . Quod si longior sententia diversis verbis repetatur , Expolitio dicitur .

Commutatio , quæ ἀντιμαρτυρεῖται dicitur , est quum duæ contrariæ sententiæ , mutatis tantum vocibus verborum , apte simul concluduntur : ut oportet esse , ut vivas : non vivere , ut edas : item , Dicere , quæ non sentio , licet : quæ sentio non licet .

Permissio est , quum id , in quo vel salus nostra , vel res alia consistit , ex desperatione rerum nostrarum alienæ potestati permittimus sic : Amissis jam omnibus , vita sola superest : eam vobis totam permitto , ac dedo : vos , ut placet , utimini , atque utimini : de me , ut vultis , statuere .

Dubitatio est , quum quærimus , quod ei rei quam dicere volumus , verbum accommodatum sit , hoc modo : Quæ ista tua est sive imprudentia , sive stultitia , sive utrumque ? dubitamus enim quo eam nomine appellemus .

Expeditio est , quum pluribus rationibus enumeratis , ceterisque cunfutatâs unam quam volumus , nos sequi necessario ostendimus

dimus hoc modo : Quoniam habes hunc equum , aut dono , aut hæreditate , aut præda , aut furto ; habeas necesse est ; amicum , qui tibi dono eum dederit , non habes : hæredem te per hos annos nemo scripsit : in exercitu nunquam fuisti : relinquitur ergo , ut eum furto sustuleris ; sed hæc figura inter argumentationes est dicta .

Diffolutio , quam *Ἀσχυρολογία* appellant , est , quum plura membra sine conjunctionibus per intervalla proferimus sic : Gere morem parenti : pare cognatis : obsequere amicis : obtempera legibus .

Præcisio est , quum dictis quibusdam , id quod dici cœpit , imperfectum relinquitur ad suspicionem , vel atrocitatem augendam hoc modo : Tu hoc audes dicere , qui nuper ; sed præ turpitudine dicere id non audio . Plus hic est , quod suspicatur auditor , quam quod ille dicturus fuisset .

Conclusio est , quum brevi argumentatione id , quod volumus , ex antedictis necessario consequi ostendimus sic : si hæc urbs servari sine comœatu non poterat , Pompejus autem & pecuniam , & naves ad comœatum emendum , atque advehendum contulit , Pompejus nimirum hanc urbem servavit .

Nominatio , quæ *ἰννομενία* dicitur est , quum nomen aliquod novum rei , quæ  
sa-



fatis idoneum non habeat, accommodamus. Ea fit duabus de caussis, imitationis, & significationis gratia: imitationis, quum ex similitudine aliarum vocum aliquam fingimus sic: Nam ut maiores nostri philosophari dicebant eum, qui philosophiæ operam dabat, sic nos astrologari hunc hominem dicimus. Quum aliquid significare, & exprimere volumus sic: Conscendit equum, atque in staphis substitit. Nomina tamen hæc, & raro, & necessario, & dilucide, fingenda sunt.

Pronominatio, quæ *ἀντινομία* dicitur est, quum aliquem vel laudis, vel ignominiae causa quodam quasi cognomine appellamus: ut si quem novum Cæsarem appellamus: aut si invidum, Zoilum: pumilionem, Atlantem: aut ignavum, Herculem deridendi gratia nominemus.

Denominatio, quæ *παρανομία* dicitur, est, quum a propinquis, & finitimis rebus aliquid nominatur, ut inventum ab inventore: ut quum Liberum, & Cererem, pro vino, & frugibus ponimus, vel contra inventorem pro invento: ut quum vinum, & fruges pro Baccho, & Cerere ponimus; dominum pro instrumento: ut si quis de Gallis loquens dicat, expulsæ sunt ex Italia tandem pallæ, quæ vestes eorum sunt: aut si quis rusticos, vomeres, aut ligones  
ap-

apellet. Item id, quod fit ab eo, qui facit: ut si Martem, bellum appellemus, aut tardos, & frigidos, Saturnos vocemus. Item quum, qui facit ab eo, quod fit: ut si pigram hyemem, aut desidiosam artem dicamus, quæ pigros, & desidiosos homines reddit. Item id, quod continetur ab eo, qui continet: ut si Italiam, aut Galliam, pro Italis, aut Gallis dicam. Item id, quod continet ab eo, quod continetur: ut quum argentum, & aurum, pro vasis, & divitiis nominamus. Hæc figura species quam plurimas habet, quæ usu magis, quam præceptis discuntur. Sed videndum est, ne in denominando, aut ab usu recedamus, ut obscuriores simus, aut in poëticas denominationes dilabamur, quæ in oratione soluta vitiosæ sunt. Sed hoc nos oratorum lectio, & usus ipse doceat necesse est.

Circuitio, quæ ~~circuans~~ dicitur est, quum ornandæ rei gratia id, quod paucioribus verbis dici potest, pluribus dicimus sic: Scipionis prudentia Carthaginis opes fregit, poteram dicere, Scipio Carthaginem sustulit, nisi circuire ornandi gratia maluissem.

Transgressio, quæ ~~transgessio~~ dicitur est, quæ verborum perturbat ordinem, non solum sine obscuritate, sed etiam cum dignitate ad poëticum quemdam numerum, qui  
non

non dedecet oratorem. Ea fit verbis nunc præpostero ordine collocatis, ut Magna cum laude tua dixisti. Nunc in partem aliam trajectis, ut Non veni ad te ob eum, quem ex patris morte cepi dolorem.

Diminutio est, quum rem quampiam oratione attenuamus, vel evitandæ arrogantiae causa, ut Dedi operam, ut artem dicendi non in postremis tenerem. Vel invidiæ fugiendæ causa, ut Habeo patrimonium non tenuissimum. Superius vitavimus, ne diceremus, Optime tenerem, quod arrogans esset: hic, ne amplissimum patrimonium appellaremus, quod invidiosum fuisset.

Superlatio, sive υπερβολή, est oratio superans veritatem, augendi, minuendive, gratia, ut Si concordiam retinebimus, magnitudinem imperii solis ortu, & occasu metiemur: fit & per similitudinem, ut Igneum aspectu ardorem æquabat: & per comparisonem, ut Dulcior melle ab ore ejus fluebat oratio.

Intellectus, qui νόημα dicitur, est, quum vel a toto pars intelligitur, ut Si preciosas vestes ostendenti dicam, Ostendas mihi divitias tuas: vel a parte totum, Non te illa sanctissima lumina, illæ aræ sacratissimæ commovebant, quæ partes templum universum repræsentant. Item quum plura ab

uno

286 DE RATIONE SCRIB.

uno intelliguntur, ut Miles Romanorum victor extitit, id est, milites Romanorum: vel unum a pluribus, ut turbasti mea pectora, quum pectus unicum habeamus.

Abusio, sive *παράχρησις* est, quæ verbo simili, & propinquo, pro certo, & proprio abutitur, ut quum longum consilium, & breves vires dicimus, quæ impropria sunt. Nam metiri ea non possumus, sed tamen non inconcinne usurpamus.

Translatio, sive *μεταφορά* est, quum verbum ex propria re in aliam per similitudinem quamdam concinne, perspicueque transfertur. Ea fit multis modis: quippe qua plenus sit quotidianus sermo: nos exempli gratia, paucos subijciemus. Obscœnitatis vitandæ gratia sic, Ejus mater quotidianis nuptiis delectatur. Ornandi gratia sic: Eloquentia, quæ hætenus aruerat, tua industria revirescet. Rei ante oculos ponendæ gratia sic, Hic tumultus sopitas hominum mentes expergefecit. Augendi gratia sic, Nullæ opes famem istam tuam explere possent. Minuendi, sic, Mihi fortuna cœpit paullulum aspirare. Ceteri modi usu, & natura percipientur.

Permutatio est, quum tota oratio aliud dicit, & aliud intelligit: hanc *ἀντιθέσις* Græce possumus appellare, tametsi eam consummationem Quintilianus vocet, ea fit  
per

per similitudinem sic: Quum canes fungantur officio luporum, cui jam pecuaria commitemus? Per contrarium, ut si divitem Irum, pauperem Croesum, impium Æneam appellemus: quæ, ut dixi, natura magis, quam arte percipiuntur. Ac de exornationibus verborum satis sit dictum. Nunc de illis, quæ non pluribus verbis, sed tota sententia constant, paucas attingemus.

*De figuris sententiarum.*

C A P U T XXIII.

**I**N illis autem obtinet primum, meo iudicio, locum ea, quæ dicitur sententia, quæ *ῥήμα* appellatur a græcis. Ea est oratio de vita, & moribus sumpta, quæ breviter quid sit, aut quid esse oporteat, ostendit hoc modo: Liber is est existimandus, qui nulli turpitudini servit. Item Avaritia pecuniæ studium habet, quam nemo sapiens concupivit. Item, Possessio divitiarum, & formæ gloria fluxa, atque fragilis est: Virtus clara, eternaque habetur. Quibus quidem sententiis, & Sallustius in procemiis, & Seneca in omnibus suis libris pleni sunt.

Ratiocinatio est, per quam ipsi a nobis quærimus, quare unumquodque dicamus, & nostris interrogationibus ipsi responde-

mus

mus hoc modo: Majores nostri, si quam unius peccati mulierem damnabant, simplici in judicio multorum maleficiorum convictam putabant. Quo pacto? quoniam quam impudicam judicabant, eam veneficii quoque damnatam existimabant: quid ita? quia necesse est eam, quæ suum corpus addiderit turpissimæ cupiditati, timere permultos: quos istos? virum, parentes, ceterosque ad quos videt sui dedecoris infamiam pertinere.

Divisio inter figuras nominatur, quum rem in duo membra dividimus, atque, utrumque brevi ratione concludimus sic: Cur ego nunc tibi objiciam quicquam? si probus es, non meruisti: si improbus, non commovere.

Frequentatio, quam *εὐανθεσίμην* Græci vocant, est quum res in tota causâ dispersæ unum in locum accumulatur, quo gravior, atque acrior fiat oratio: ut si quempiam laudaverimus, ejusque virtutes multas enumeravimus, denique sic eas in unum congregemus: Qualis igitur vobis videri debet, qui tam pius in patriam exitit, tam liberalis in suos, tam officiosus in omnes, tam mansuetus, æquus, modestus, omnibus denique ob suas virtutes charus.

Similitudo est oratio, quæ ex re dissimili, aliquid simile ad rem, de qua loquimur,

mur, accommodat. Ea fit ornandi gratia per similitudinem sic: Non sicut in vestibus ea pessima, quæ diutissime duravit: sic in amicitia is deterrimus, qui vetustissimus; vestis enim usu teritur, amicitia diuturnitate perficitur. Hæc similitudo per contrarium dicitur, quia vestis amico contraria est: fit autem ornandi causa, quia illa poterat carere oratio. Fit etiam probandi gratia per negationem sic: Neque equus indomitus, quanvis natura bene compositus sit, idoneus potest esse ad eas utilitates, & aptus, quæ desiderantur ab equo; neque homo indoctus, quamvis ingeniosus sit, ad virtutem potest pervenire. Hoc probabilius factum est exemplo equi, cujus ratio similis videtur esse. Dictum autem per negationem, quia res utraque negatur. Fit item similitudo apertius dicendi causa, per brevitatem sic: amicitia ut vestis dissuenda magis, quam laceranda est. Hic eadem oratione utraque res breviter est conclusa, & apertissime dictum, quod volebamus. Fit postremo per collationem, rei ante oculos ponendæ gratia, quod ad poetas maxime pertinet hoc modo: Sicut citharædus preciosissimis vestibus indutus, corona aurea, cithara pulcherrima, atque ornatissima, ceterisque rebus, quæ expectationem concitare possunt, insignitus; Si repente

T

filen-

silentio factò, pessime, atque imperitissime canat, ab omnibus ejicietur, explodetur, ita si quis in summis opibus, maximis naturæ, ac fortunæ commodis constitutus, nulla virtute, ac doctrina præditus sit, ex omni conventu bonorum ejicietur. Hæc similitudo per comparisonem ponit rem ante oculos: sed ut dixi, ad poëtas maxime pertinet. Videndum tamen est, ut quum similitudinem rei nostræ applicamus, verba ex ipsa similitudine in rem nostram commode, & apposite transferamus sic: Ut hirundines æstivo tempore præsto sunt, frigore epulsæ recedunt: ita falsi amici sereno vitæ tempore præsto sunt, simulatque fortunæ hyemem vident, devolant omnes.

Exemplum, quod *ὑποκρίνεται* appellatur, est alicujus facti, aut dicti præteriti cum certi auctoris nomine propositio, ad rem nostram accommodata. Id fit iisdem de causis, atque iisdem rationibus, quibus similitudo: propterea exemplis non eget.

Confirmatio, quæ *ἐπιμύθεια*, dicitur, est, quum absenti, aut mortuo, aut mutæ rei vocem, atque orationem tribuimus: ut si civitatem introducamus loquentem, aut aliquem ab inferis suscitemus, & loquentem faciamus: ut Cicero fecit pro Cælio, qui Appium Claudium Cæcum cum Clodia illa loquentem induxit.

Ser-



Sermocinatio, quæ *εὐνομιὰ* ab aliis, ab aliis *διάλογος* dicitur, est, quum iis, de quibus loquimur, sermonem ætati accommodatum damus, ut si de puero loquentes, pueri sermonem effingamus: item si senem, mulierem, servum, regem loquentem faciamus, quod in narratione rerum gestarum, dum singula exprimere volumus, atque historia, & poemate fieri maxime solet. Dialogi item omnes in sermocinatione sunt positi: quæ res exemplis non eget.

Significatio, quæ *ἑρμηνεία* est dicta, appellatur, quum suspicionis augendæ gratia plus, minusve dicimus, quam ipsa res sit. Ea fit multis modis. Per exuperationem, quum veram orationem transgredimur hoc modo: Hic ex tanto patrimonio ne testam quidem sibi reliquit, qua ignem petat. Per ambiguum, quum verbum plura significat, sed capitur in eam partem, quam vult is qui dicit, ut si de eo loquamur, qui pecuniam suam omnem aliis crediderit, & dicamus: Religiosus hic admodum vir est, multum enim, & libenter credit. Per consequentias, quum rem consequentem exprimimus, & antecedentem intelligi volumus, ut si aratoris filium velimus significare dicamus: Tace tu, cujus pater festis tantum diebus humi spuebat, significamus per hoc, cum aliis diebus manus ad ligonem reti-

nendum conspuisse. Sed hæc genera non nisi a facetissimis ingeniis excogitari possunt; nulla enim arte tradi queunt. Fit etiam significatio per abscissionem, quum coeptam rem non perficimus, sed in suspicionem relinquimus, ut scis te ista forma, atque ætate in aliena domo, nolo plura dicere. Hanc figuram, pulcherrime locus ille Juvenalis ostendit: Aut Pastor fuit, aut illud quod dicere nolo. Fit etiam significatio per similitudinem, quum re simili alata, satis significatum existimamus, quid velimus dicere, ut si patriæ proditorem, pœnas daturum significare velimus, hoc modo per similitudinem significemus: Noli consiliis istis, aut opibus nimium credere: erat etiam ingeniosus, & locuples Catilina. Hæc exornatio ad jocandum, & mordendum accommodata est.

Brevitas, quæ *βραχυλογία* nuncupatur est, quum rem verbis tantum necessariis perstringimus hoc modo: Robertus Malatesta Romam venit, exercitum cogit, hostem prælio superat, paucis post diebus moritur. Brevius hoc nihil dici potest. Et de figuris hætenus.

\* \* \*

*De compositione.*

## CAPUT XXIV.

**Q**Uoniam de tribus elocutionis partibus, quas supra proposuimus, duæ jam absolutæ sunt, perspicuitas, & ornatus: reliquum est, ut de compositione, quæ tertia pars erat, breviter differamus. Non enim satis est, verba propria, & accommodata rebus invenire, nostramque orationem figuris, & quasi luminibus quibusdam illuminare, nisi hæc omnia structura quadam, & ordine componamus, & quasi contexamus. Quanquam autem hæc de re superius a nobis, quum de perspicuitate loqueremur multa, quæ ad vitiosam compositionem pertinent, sunt dicta, multa etiam aliis locis, ubicumque se opportunitas obtulit, resperfa; tamen, quoniam hic proprius ejus locus est, quædam de ea separatim dicenda sunt. Danda igitur in primis opera est, quod sæpius repetere non verebor, ut ita scribamus, ut ab omnibus etiam mediocriter eruditis facillime intelligamur, quod quidem assequemur, si a communi quodam, & usitato genere orationis non abhorrebimus, nosque totos ad illius Ciceroniani candoris, & facilitatis imita-

tionem conferemus: dabimusque operam, ut fluere sponte oratio, non trudi, atque impelli, & tunc maxime natura ipsa effundente provenire, non artificio præscribente excogitari videatur. Illa enim optima, atque artificiosissima sunt, quæ nos facere nullo negotio posse confidimus. Nam si Ciceronem, aut Sallustium, aut alium, quempiam ejus temporis diligentius consideremus, nihil facilius existimabimus, quam eorum in dicendo candorem, & simplicitatem assequi. Quod si tentare id, atque experiri velimus, nihil difficilius inveniemus. Texenda igitur ita nostra oratio est, ut naturalem illum candorem, & romanæ linguæ simplicitatem, quantum fieri potest, præferat, quod consequemur, si ea, quæ in perspicuitate sunt a nobis præcepta servabimus, ut neque longiores ambitus faciamus, neque inter se verba obscurare, atque ambigue implicemus, neque sententias inusitato quodam modo, aut impropriis, peregrinisque vocabulis inculcemus. Postremo si ordinem quemdam non in verbis modo, sed in sententiis quoque singulis, & materia universa servabimus. Ordo autem in verbis sic servandus, ut neque verba suos casus, neque substantiva suas adjectiones longe positas, disjectasque considerent, & quasi expectent, neque inter se

or-

ornandi studio dictiones singulæ implicentur: quale esset, si Ciceronianum illud: Orationem autem latinam efficies legendis nostris plenior, ita implicarem: Orationem autem nostris latinam legendis plenior efficies. Videndum etiam est, ne verba ita collocemus, ut alium, quam nos volumus, sensum efficiant. Nam ne ab eodem exemplo discedamus, si verba commutes, Orationem autem plenior legendis nostris latinam efficies, sensum omnino alium, ac diversum effeceris. Item si negationes alio, atque alio loco posueris, non eundem sensum feceris. Aliud est, Non omnis, qui literas discit, doctus est: & aliud, Omnis qui literas discit, non doctus est, & aliud, Omnis qui literas non discit, doctus est. Item non idem est, Ego te non vidi, & Non ego te vidi; posterius enim plerumque interrogat. Videndum item est, ne sensum in aliarum quoque dictionum ordine pervertamus. Nam si velimus dicere, Ego non solum te, sed tuam quoque familiam diligo: non recte sic dicemus, ego te non solum diligo, sed tuam quoque familiam: nec sic, ego te non diligo solum &c. Verbum enim diligo, aut utrique præponendum est sic: ego diligo non te solum, sed universam quoque familiam tuam, aut utrique postponendum, ut in principio fe-

cius. Sed hæc, quoniam & plurà sunt, quam ut breviter comprehendi possint, & a nobis magna ex parte in libris de lingua latina pertractata, non sunt hic latius repetenda. Illud autem in ordine observandum est, ut semper crescat in verbis, sententiisque oratio, ut Homo prudentia, mansuetudine, modestia, atque omni virtute præditus; virtus enim & ea, quæ dicta sunt, & alia multa complectitur: proptereaque primo in loco ponenda non erat. Contra nonnunquam particularia, quam universalia, vehementiæ plus habent, proptereaque posteriore loco ponenda sunt hoc modo: Amote cum propter alias virtutes tuas, tum vero ob egregiam, singularemque modestiam; plus enim apud me modestiæ, quam ceterarum virtutum ratio valet. Videndum itaque in hoc genere diligenter est, ut nunquam decrescat, & minuatur vis illa, & vigor orationis: omnibus autem, quas diximus, rebus ita ratio subjicienda est, ut in illis nihil dubitari possit. Rationes, & rationum confirmationes ita texendæ inter se, & conjungendæ sunt, ut non solum sententiæ sententiis, propositionibus conclusiones, explicationes divisionibus, partes partibus, sed verba etiam singula verbis ipsis respondeant, referanturque ita, ut omnia inter se quibusdam quasi hamis lori-

cæ modo inserta, & concatenata sint, ut destrui, & quodammodo retexi non possint. Danda autem opera est, ut neque verba, neque partes alias omittamus, quæ aut obscuram, aut ambiguum orationem reddant: nisi quum verba tam propinqua sunt, ut intelligi alias superlativi non possint. Nihil contra ornatus tantum gratia sine magna ratione apponendum est; frustra ea enim ornamenta sunt, quæ ratione, ac specie omnino carent. Quod quidem necessario mihi dicendum est, propter imperitos quosdam, qui tum denique se ornatissime loqui putant, quum orationi, vel supervacuas particulas multas apponunt, vel detrahunt necessarias. Illa igitur optima compositio erit, in qua nihil deerit, quod desiderari; nihil supererit, quod auferri possit.

*De numerosa oratione.*

## CAPUT XXV.

**Q**Uoniam autem oratio per aures in animum transfunditur, aures autem numeris ita capiuntur, ut Aristoxenus non ignobilis philosophus animam harmoniam quandam dicere non dubitaverit, numeris quibusdam quasi pedibus feratur, & aures perfecto quodam, & ut ita dicam, rotundo  
ver-

verborum ambitu impleat necesse est: quidem quum pro qualitate materiæ nunc tardius incedit, nunc celerius currit, tum graviolem, tum acutiorlem harmoniam, five concentum ex sese parit. Quum ita instabilis est, ut tenorem servare nullum queat, & incompósito verborum strepitu inanem quemdam, & immodulatum sonum efficit, ab auribus confestim, animoque respuitur. Quanquam id aures iudicare, nisi doctæ, atque assuetæ sint, plane non possunt: sentiunt tamen optimum illum, atque absolutissimum sonum, quoquo modo etiam indoctæ. Sed ut in musica minima quæque deprehendere nisi peritissimus artis non potest: sic in hac re ultimam illam, atque absolutissimam perfectionem intelligere aures nisi assuetæ omnino non possunt. Atque hæc quæ dicimus, eo spectant, ut intelligamus nos artificio, ac præceptis ullis numerosam orationem, aut nostram facere, aut cognoscere alienam non posse, nisi aures numerosis orationibus audiendis longa consuetudine sonum illum, optimum a minus bono discernere doceamus. Qua quidem in re assidua nos Ciceronis lectio in primis juvabit. Quanquam autem, neque qui audiunt hoc tempore, numeros satis intelligunt, neque qui dicunt, aut scribunt, eos magnopere curam



rant ( vix enim hac ætate unum , atque alterum vidi , qui numeros in dicendo , aut scribendo sectaretur ) tamen vel ut intelligamus , quid nobis servandum sit , si veteres imitari velimus , vel ut eorum in scribendo artificium , atque observationem cognoscamus , pauca de numeris ex Ciceronis præceptis , atque observatione perstringam. Orationem igitur apud græcos primi omnium Thrasymachus Chalcedonius , & Leontinus Gorgias numeris astrinxere , ut quum poëtas cum voluptate , se cum severitate audiri viderent , & voluptati audientium , varietatiquæ consulerent . Gorgias autem paribus paria reddere , & contrariis contraria referre primus instituit , eaque re ad vitium usque delectatus est . Isocrates deinde moderatione quadam adhibita , rem maxime excoluit . Nostri eam rem tantopere admirati sunt , ut cum aliquid numerosè cecidisset , tota concio pariter exclamaret . C. quidem Gracchus dum oraret , servum cum organo quodam post se habebat , qui ei numeros , modosque succineret . Cicero in eo genere , quantum intueri licet , palmam mihi videtur esse assecutus : ita nihil etiam in familiaribus epistolis , quotidianoque sermone non numerosum efferebat . Neque vero tota oratio numeris tanquam versus astringenda est : sed ita a principio  
flue-

fluere, ac ferri debet comprehensio, ut deponi, & quiescere in fine, non cadere, aut projici videatur. Et quanquam clausula ipsa, id est, finis comprehensionis maxime debet esse numerosa, cetera tamen omnia, quæ ad finem illum ducunt, numeris, & modulis quibusdam carere non debent, ita ut auditor, aut lector a principio videre finem illum, atque expectare videatur. Neque hoc sane difficile factus est illis, qui se in scribendo aliquandiu exercuerent. Nam ubi primum sententia mente concepta est, confestim verba ultro se se offerunt, & in ordinem, ac numerum quemdam digerunt. Requiritur autem non eosdem omnia numeros, sed alios alia, pro diversitate materiæ, & orationis genere. Contentiones enim celerius currere, narrationes tardius ferri debent. Tarditatem orationi, & gravitatem spondeus in primis asseret, quæ duabus syllabis longis constat. Celeritatem Pæan maxime conficiet, qui tribus brevibus, & longam, vel in principio, vel in fine posita continetur. Dactylus, quæ longa, & duabus brevibus conficitur, utrique generi est accommodatus. Iambus, qui ex brevi, & longa est, demisso, & humili sermoni aptissimus est, proptereaque eo maxime comici utuntur. Principia a longis, ut plurimum, syllabis facienda sunt, fiunt

fiunt etiam a brevibus nonnunquam: ut Cicero, Animadverti iudices & novum crimen. Pæan is, qui primam longam, & tres breves habet, & in principio, & in medio passim optime collocatur: in fine decet. Is vero, qui tres breves, & longam postremam habet, Temeritas, Aristoteli, & Græcis maxime placet: in fine Cicero eum non valde probat; nam ultimam syllabam ne in versu quidem, quanta sit, referre arbitratur. Quintilianus longam esse censet oportere. Ego Ciceroni, qui plurimum dixit, & scripsit, magis accedo. Cavendum autem est, ne hexametri versus principium initio dicendi, aut scribendi faciamus: quale dicitur reliquisse Livius, Facturus ne operæ precium sim: quod qui emendare voluerunt, facturus ne sim, postea scripserunt. Sicut etiam finis hexametri, & pentametri vitiosus est, in quem Asinius, & Brutus incidere sæpenumero solebant, ut video placuisse Catoni, & Hieronymus noster, quamquam non his rebus erat intentus, in translatione Geneseos ait, Da mihi animas, cetera tolle tibi: quod ego non accusandi Hieronymum, sed vitii ostendendi gratia posui. Clausula autem optime desinit in dichoreum, id est, in duos trocheos, ut Patris sapientiam, filii temeritas comprobavit. Trocheus enim ex longa, & brevi con-

conficitur: Queadmodum Asia maxime secuta est. Sed videndum est, ne frequentius idem finis, quamvis optimus sit, satietatem afferat; afferunt enim etiam optima satietatem. Optimus est etiam in fine creticus, qui ex longa, brevi, & longa conficitur: si ante se habeat vel dactylum, vel pyrrichium, qui duas breves, vel tribrachum, qui tres item breves habet, quale est, Quamdiu tantas injurias patiemur? &, Facite, ut bonos servare videamur. Geminatus etiam idem optime claudit, ut Virtus est servare quam plurimos. Patitur etiam ante se anapæstum, qui duabus brevibus, & longa conficitur, ut De viro loquar non solum bono, verum etiam nobili. Dactylis quoque non claudit male, si eum jambus, vel creticus antecedit, ut Hoc nostra ratione concluditur; male autem si spondeus, vel trocheus antecederet: quale esset, Hoc ratione nostra concluditur, vel hoc nostra ratione clauditur. Illud tamen advertendum est, pedes omnes, si dictionibus singulis contineantur, pessime orationem inchoare, & claudere, ut in Jugurthini belli principio apud Sallustium notat Quintilianus: Falso quæritur de natura sua genus humanum: in fine quale esset, quod modo dicebam, Ratione nostra clauditur. Quod quidem, & in pedibus bene coeuntibus vitiosum est.

Spon-

Spondeus bene claudit, præsertim quæ incisa nominantur, si eum antecedit creticus, ut similis causâ, qua plurimum uti solebat Demosthenes. Item si anapæstus, ut, Loquar de muliere, non solum nobili, verum etiam nota. Item si iambus, ut, Tu optimum munus exerces: qui molossus efficitur, qui est ex tribus longis. Contra Spondeus optime jambum præcedit, ut iisdem in armis fuit, & quid futurum sit, nescio. Claudit autem male spondeus, si eum vel spondeus, vel pyrrichius, vel dactylus, vel pæan, vel tribrachus antecesserit. Amphibrachus etiam, qui longam inter duas breves habet, auctore Quintiliano, etiam claudit non male, ut in Africa fuisse. Sed ego id ratione dichorei, qui eodem in loco est, fieri censeo. Idem trochæum, & pyrrichium, qui pæana conficiunt, optime cadere existimat, ut Quanta eos a plebe romana maneret invidia; quem pedem Cicero dicit vigere in principio, in fine jacere. Bacchius, qui est ex brevi, & duabus longis, etiam geminatus recte concludit, ut Quæ ratio fuit, ut ab homine tibi amicissimo venenum timeres? Trochæus quoque non solum geminatus, ut diximus, sed etiam spondeo præcedente recte cadit, ut Quod hic potest, nos possemus. Item pyrrichius inter duos trochæos, ut Scipio  
suos

suos omnes virtute superavit. Drochimum, qui est ex quinque syllabis, prima brevi, duabus longis, brevi, longa, existimat Cicero, si semel ponatur, esse non malum, ut Amicos tenes: quanquam magis numerus, quam pes propter multitudinem syllabarum videri potest. His vero clausulis si oratio variabitur, fiet, ut & capiat lectorem, & satietati occurrat. Quanquam autem omnis oratio fluere ita debet, ut numeris quibusdam incedere videatur: diligentia tamen illa, & ratio numerorum tribus in locis potissimum adhibenda est: quum aliquid laudare ornatius volumus, ut fecit Cicero in secunda accusationum in C. Verrem, de Siciliae laudibus; aut quum narrandum est aliquid, quod plus dignitatis habeat, quam doloris, ut idem in quarta de Aetnensi Cerere, de Segestana Diana, de Syracusarum situ fecit: aut in amplificationibus, & commiserationibus, ut idem pro Milone, pro Ligario, & aliis judiciis quam plurimis dixit. Tametsi se conatum esse, & voluisse id assequi fatetur, nescire tamen se, an sit consecutus; neque diu retinendam eam formam numero se dicendi, idem Cicero arbitratur; sed transeundum ad ea, quæ Græci *μέμματα*, & *κῶλα* vocant, nos incisa, & membra possumus appellare: his oratio pulcherrime distinguitur. Sunt  
au-

autem incisa, breves quædam orationes, quæ vel interrogant, vel respondent, vel confutant, vel indignantur, vel pronuntiationem suspendunt. Quale est illud apud Ciceronem: Domus tibi deerat? at habebas; pecunia superabat? at egebas: hæc incisa dicuntur: quæ quidem, danda opera est, ut quam aptissime cadant. Membra vero sententiæ longiusculæ sunt, quæ quibusdam quasi nodis inter se connectuntur, Incurristi amens in columnas, in alienos insanus insanisti; sequitur deinde quædam quasi columna, quæ superiora continet, & comprehensionem concludit: Depressam, cæcam, jacentem domum pluris, quam te, & quam fortunas tuas extimasti. Quæ quidem comprehensio dichoreo finitur: superiora membra spondeis optime terminantur. Historia, ut Quintilianus scribit, non tam finitos numeros, quam orbem quemdam, contextumque desiderat, nam omnia ejus membra connexa sunt, & ipse rerum gestarum ordo per se lectorem capit, ac detinet, proptereaque cum in omni scribendi genere, tum in historia vel maxime, quæ rerum notitiam pollicetur, servanda, perspicuitas est, atque omnis compositionis affectatio fugienda: quo quidem in vitio maxime versari mihi videtur Tranquillus, qui dum brevis, & non vulgaris esse voluit

obscurum se, & nimis affectatum reddidit. Omnis igitur oratio candorem quemdam, & sponte fluentem cursum habeat necesse est, qui non numerosus sit, & similis numerofo; nihil est enim pejus, ac turpius, quam si artificiose numeros consecrari more poëtico videamur, nihil contra pulchrius atque artificiosius, quam quum ars in omni genere scribendi minime apparet, totaque compositio naturæ quam maxime se accommodat: quam quidem rem duabus nos rebus maxime consequemur, lectione, & scriptione. Lectio non varia quotidie, & diversa, sed simplex, & unius generis esse debet, ejusque præsertim scriptoris, cujus in scribendo esse similes volumus; multum enim, Plinius ait, legendum esse, non multa, eum autem esse Ciceronem, nemo dubitat: ille enim se profecisse sciat (ut Quintilianus ait) cui Cicero valde placebit. Quod si historias scribere velimus, Cæsar, & Sallustius mihi in primis legendi, imitandique videntur. Livius quoque, tametsi diversum ab his scribendi genus habeat, obtinet tamen in suo genere principatum, miram enim in scribendo majestatem præsert. Neque Curtius, meo judicio, repudiandus est, proxime enim ad superiores illos accedit. Alium præter hos, quem imitari debeamus, video neminem. Exerci-



citatio autem multiplex est, unusquisque enim suo genere delectatur. Sed illa prima, atque utilissima mihi videtur esse, ut epistolas in omni materia frequentissimas conscribamus, atque illis quodammodo vires quasi in campo aliquo comparemus; possumus enim illis omne scribendi genus experiri, & nos quasi ad veram pugnam præparare. Illa deinde optima exercitatio est, ut historias, siue communi lingua scriptas, siue barbare, atque inornate compositas, latine conscribamus. Nonnulli etiam latine scriptas in *ιστορίαν* redigunt, vel aliis verbis componunt. Quod genus *αναλόγως* grecis vocatur: quæ quidem si ex soluta oratione, in solutam item orationem transferatur, probanda est: sin ex poemate accipiat, ut a quibusdam fieri nostra ætate intelligo, meo iudicio, pessima, ac vitiosissima est; alia enim poematis, alia orationis solutæ ratio est. Adolescentes vero, qui fines utriusque rei nondum intelligunt, poetici translationibus candorem illum orationis involvunt. Danda itaque opera est primum, ut optimum quemque imitandum nobis deligamus, deinde ut diutissime his, quibus dixi, rationibus exerceamur. Hæc autem, quæ his libris tradita sunt præcepta ita teneamus, ita servemus, ut intelligamus, neque sine his magnopere valere

Iere exercitationem ; neque hæc sine exercitatione multum ad scribendum conferre . Quod si hæc cum exercitatione assidua conjunxerimus , vetustam illam , & perfectam scribendi rationem , qua illi , quos maxime admiramur , veteres utebantur , optime ( ut spero ) atque absolutissime consequemur .

**F I N I S .**

FR. LIPPI AURELII  
B R A N D O L I N I

AUGUSTINIANI

O R A T I O

De Virtutibus D. N. JESU CHRISTI  
Nobis in ejus Passione ostensis.

R O M Æ C O R A M

ALEXANDRO VI.  
P O N T. M A X.

I N P A R A S C E V E H A B I T A

*Ac tantum probata, ut iterum, ac iterum  
eam repetere Auctor cogeretur.*



ALFONSO DE ALBUQUERQUE

DE ALFONSO DE ALBUQUERQUE

DE ALFONSO DE ALBUQUERQUE

DE ALFONSO DE ALBUQUERQUE

DE ALFONSO DE ALBUQUERQUE

DE ALFONSO DE ALBUQUERQUE

DE ALFONSO DE ALBUQUERQUE

DE ALFONSO DE ALBUQUERQUE

DE ALFONSO DE ALBUQUERQUE

DE ALFONSO DE ALBUQUERQUE

DE ALFONSO DE ALBUQUERQUE

DE ALFONSO DE ALBUQUERQUE



LIPPUS AURELIUS  
BRANDOLINUS

AUGUSTINIANUS EREMITA.

B. P. AC DOMINO NOSTRO

ALEXANDRO VI.  
PONTIF. MAX.

Salutem in Domino, & felicitatem dicit.



*Uum apud Beatitudinem  
Tuam proxime in Para-  
sceve Orationem de Sal-  
vatoris nostri virtutibus  
habuiffem, Tu eam, pro  
tua fingulari benignita-  
te, & tunc absente me, & postea præ-  
sente, tibi ita placere ostendisti, ut mi-  
hi & per nuntios, & coram, gratias*

*non semel ageres . Quod quidem quantæ humanitatis sit , ut tantus Pontifex Christianæ Religionis Princeps , Christi in terris Vicarius humillimum , atque indignissimum hominem audiat , collaudet , accersat , gratiis prosequatur , dici oratione non potest . Quibus quidem rebus tametsi ego indignus sum , gaudeo tamen , mihi potissimum contigisse , ut in me tanta tua mansuetudo eluceret . Cupiens itaque tuæ Beatitudini meum animum aliquo vel levi officio significare ; & tenuitatis meæ conscius , quum neque haberem quod offerrem , neque vellem vacuus ad sanctissimum tuum conspectum accedere , eam ipsam , quam habueram , Orationem tuæ mansuetudini legendam obtuli : ratus , me tibi rem non ingratam facturum , si quod tibi semel auditum quasi eminus placuisset , cominus legendum , atque habendum traderem . Neque dubitavi , ne , exacto jam suo tempore , gratiam novitatis amississe oratio videretur ; quum soleant , quæ semel placuerunt , etiam repetita non displicere , & tuæ Beatitudini oblata res sacræ , ut Hostiæ , quæ Deo offeruntur , semper tempestivæ sint . Neque etiam*

maximi tui aut acumen ingenii, aut severitatem iudicii veritus sum, quod plerique scriptores vereri solent; quum quasi vadem habeam testimonium, ac præjudicium tuum; nec putem, quod semel placuit, displicere jam posse. Accipe igitur exiguum quidem, & tua magnitudine indignum munus, sed nostri erga te optimi animi certissimum pignus, nostræque servitutis quasi validissimum auctoramentum: eoque animo nostram hanc orationunculam accipe, quo Deus duos vetulæ obolos dicitur suscepisse. Quum enim Principes dare magis deceat, quam accipere, quippe qui dando beatiores, ac Deo similiores fiant, siquid ipsi ab aliis accipiunt, ipsius Dei exemplo, & dantis animum, debent librare, non munus, & pro exiguis maxima, amplissimaque referre. Quarum rerum, si ego a tua Beatitudine alteram impetravero, ut studium, atque animum nostrum non spernas, utramque me impetrasse existimabo. Quum vero aliquid otii nactus fuero, ut me ad scribendum referre queam, dabo operam, ut intelligas, quantum tibi debeam, quantique semper tuam Beatitudinem fecerim.

*rim . Tu interea Christianam Rempubli-  
cam , ut facis , & defende , & serva ;  
nostræque exiguitatis , quum licet , te me-  
morem esse non pigeat . Vale .*





# ORATIO. 315



Tu Tuus, tuique sacratissimi Senatus jucundissimus conspectus, celeberrimusque hic totius orbis terrarum Conventus, me majorem in modum recreat, atque exhilarat,

BEATISSIME PATER: quippe quem ego semper optaverim, sperare vix unquam sum ausus; vincit tamen moeror publicus privatam lætitiā, communisque Ecclesiæ Christianæ luctus, unum me hilaritatem præmeferre non sinit. Video enim squallere, depositis ornamentis, pulvinaria omnia; nudata mœrere altaria, parietes ipsos situ quodam suum dolorem significare. Te quoque, ac senatum tuum, mutata veste, communem Ecclesiæ mœrorem, luctumque testari. Neque sane immerito; commemoratur enim nobis hodie, Salvatoris nostri mors acerbissima: proponitur ante oculos crudelissimum divinæ Crucis spectaculum: indignissima Dei Filii Passio celebratur. Cujus quidem tum magnitudo, tum acerbitas tum indignitas, quum ad nostram memoriam revocatur: quis hominum, obsecro, est tam immanis, tam sce-

sceleratus, tam ab omni religione, atque humanitate alienus, qui dolorem dissimulare, atque a lacrimis temperare unquam possit? Non enim nobis hodie amicus aliquis, non propinquus, aut consanguineus, non frater, aut pater, non denique princeps aliquis civitatis, defunctus refertur: sed totius naturæ Auctor, & Conditor, humani generis universi Redemptor, & Parens, dignitatis, ac salutis nostræ Instaurator, & Effector: verus denique, ac naturalis Dei Filius, a quo omnis vitæ nostræ ratio, incolumitatisque dependet: in quo spes nostra omnis est sita: per quem & quæcumque habemus, accepimus omnia & quæcumque speramus, accepturi sumus. Hic inquam, nobis hodierno die defunctus refertur: hic mortuus celebratur: hic deploratur extinctus. Neque vero naturali, ut plerique homines, morte decessit; sed violenta ereptus est: neque etiam quacumque, sed turpissima, abjectissima, indignissima Crucis morte multatus est. At meritas fortasse suorum scelerum poenas dedit? Immo vero, pro nostris flagitiis, pro nostris criminibus, pro nostra turpitudine: quum ipse innocentissimus esset, neque quicquam aut admisisset unquam, aut admittere potuisset, ultro se cruciandum, occidendumque exhibuit. Quæ quidem quum a nobis

bis audiuntur, quum leguntur, quum celebranda proponuntur: quo tandem animo esse debemus, BEATISSIME PATER? quo pacto dolorem diffimulare? quomodo lacrymas continere possumus? quo vero ingenii flumine? qua copia dicendi? quanta vi eloquentiæ, ad explicandum divinæ Crucis mysterium, opus esse censemus? Non enim nunc aut Gavianam crucem, ut Tullius; aut Cæsaris necem, ut Maro; aut principis alicujus mortem, ut veteres sæpe fecere, deploramus, aut describimus: sed eam Crucem, in qua Christus Rex regum, Princeps principum, verus Deus, Deique Filius, ab iis ipsis, quos creaverat, quos legibus erudierat, quos innumeris beneficiis affecerat, quorum denique causâ factus Homo, ad homines venerat, contra jus, fasque omne crucifixus est. Quam quidem mortem & cœlum, & sol, & sydera, & elementa, & creata universa luxerunt. Hanc vero quum nulla vis eloquentiæ attingere, nullum ingenii acumen penetrare, nullius mentis amplitudo comprehendere, aut complecti queat: & tamen ipsa dei celebritas, demandatique nobis officii necessitas nos cogat non tacere: ab Auctore, omnis ingenii, omnis eloquentiæ, initio dicendi opem suppliciter implorabimus, ut, quod de ipso, ad ejus gloriam dicere

ast-

statuimus ; de ipsius potissimum , quantum ipse expedire novit , in nos munere , ac liberalitate proveniat . Et qui suam ex infantium , & lactentium ore laudem perficit , nobis in suo nomine congregatis , de se aliquid non indignum dicere cupientibus , adesse dignetur . Quoniam autem & altissimum Crucis mysterium , & Christum in Cruce pendentem hodie celebramus , ipsam potissimum hoc carmine Crucem venerabimur .

*Supplicium servorum olim , nunc gloria regum ,*

*Mors olim miseris , nunc data vita reis*

*Crux , solium , curvusque Dei , spes unica Mundi ,*

*Sis via , sis nostra porta salutis , Ave .*

Cum universa Salvatoris nostri vita , tum ejus in primis Passio , BEATISSIME PATER , nobis non modo exactissime cognoscenda , verum etiam , quoad fieri potest , perfectissime imitanda est ; ut quemadmodum Christus non solum præceptis nos saluberrimis erudivit , sed sanctissimis quoque exemplis instituit ; ita nos & quæ docuit , fideliter retineamus , & quæ gessit diligenter imitemur ; propterea enim docuit , ut sciremus ; propterea gessit , ut ageremus . Quæ duo nobis per Mosem mystice significat dicens : Inspice , & fac secundum exemplar , quod tibi

tibi in monte monstratum est . Quanquam autem universa ejus , ut dixi , vita ( quippe quæ omni virtutum . ac perfectionum genere consummatissima fuerit ) nobis perdiscenda , atque imitanda est : ejus tamen in primis Passio , quæ cumulum quemdam virtutum , perfectionumque omnium , utpote postrema ejus vitæ pars , complexa est ; nobis cum in reliqua vita , tum hoc potissimum tempore ad memoriam revocanda , & ad imitationem proponenda est , dicente Petro Apostolo : Christus passus est pro nobis , nobis relinquens exemplum , ut sequamur vestigia ejus . Nam , si paupertatis exemplum quærimus : nudatum hodie Salvatorem , & omni terræ habitatione destitutum , in Cruce sublimem , ipsum etiam caput ubi reclinet non habentem , conspiciamus . Si pudicitiae testimonium poscimus : eum Matrem virginem virgini discipulo commendantem audimus . Si obedientiae formulam desideramus : eum non modo Deo Patri , sed pessimis quoque , ac vilissimis hominibus usque ad mortem obsequentissimum intuemur . Si liberalitatem in eo , beneficentiamque requirimus : eum non lacrymas modo , sed sanguinem quoque ipsum , salutis nostræ gratia passim effundentem , immo etiam corpus , atque animam , rerum omnium charissimam , saluti

luti nostræ donantem cernimus. Si clementiam in eo, & animi magnitudinem postulamus: eum pro inimicis orantem; latronique ignoscentem videmus. Quæcumque denique virtus, quæcumque animi perfectio aut reperiri in homine, aut desiderari potest, ejus in Christi Passione clarissimum nobis exemplum ostenditur. Quæ quidem omnia si ego oratione prosequi vellem, nullus esset dicendi finis omnino. Sed quoniam ego apud sapientissimum Pontificem, Senatumque doctissimæ verba facio: quem docere ex hoc loco nec possum, nec debeo; ut demandatum mihi munus quoquomodo expleam, ex infinita illa virtutum multitudine, quas hodie nobis in Passione Salvator discendas, imitandasque proposuit, quatuor tantum, quæ ad cognoscendum dignissimæ, & ad imitandum aptissimæ mihi visæ sunt, commemorabo: summam ejus justitiam, charitatem singularem, inauditam humilitatem, patientiam incredibilem, vereque divinam. Neque etiam has ipsas universas explicabo; non enim omnia aut ego dicere, aut tu BEATISSIME PATER audire unquam posses: sed ex singulis paucissima tantum, & quæ optima, & commodissima videbuntur, perstringam. Tu, tua sapientia, ex his, quæ dicam, cetera facileprehendes.

Ac

DE PASSIONE DOMINI. 321

Ac de iustitia quidem dicere cogitanti, illud præfari libet, me de Christi virtutibus, non quidem absolutissime, ut par esset, quasi de Divinis (nam id quidem, nemini mortalium arbitror posse contingere) sed quasi de humanis, leviter, atque humano more locuturum. Atque in hac quidem virtute cum multa præclara, atque admirabilia sint; quæ in divinam laudem referri queant: illud in primis, & maximum, & maxima admiratione dignum occurrit: quod Deus hominem a se creatum, in sua potestate constitutum, sibi a suo nequissimo servo versutiis, dolisque subtractum, violenterque detentum, quum ex ejus manibus eripere jure suo & deberet, & posset; redimere tamen ingenti precio maluit. Quid enim, ut verum fateamur, juris in conditum paulo ante hominem, diabolus habebat? Immo quum ipse & ab eodem Deo paulo ante conditus, & ejusdem Domini, vellet, nollet, servus esset, quid in illum habere juris poterat? At peccaverat, inquit, homo, & seipsum diabolicæ ditioni subdiderat. Primum ego hoc a te requiro, diabole (tecum enim mihi modo res est) quis tibi hoc juris in hominem dederat, ut eum dolis præriperes? circumvenires? falleres? an alienum eum, servum esse nesciebas? quæ tibi in alienum

X

ser-

servum potestas? an te quoque servum, & ejusdem Domini servum esse non memineras? Debebat certe te id satis, abundeque docere, casus tuus. Quod si es ejusdem Domini servus, eique etiam tuo scelere in-viſus, atque odioſus eras, quæ tibi in alieno regno potestas? quod tibi in alienum, ſervum, immo in tuæ ſervitutis ſocium, adhuc innocentem, ſuoque Domino parere cupientem, juſ erat? ſed permittamus tibi, ut cum invidia, & malignitate tentares: neque unde tu cecidiſſes, ibi conſiſtere, hominem patereris. Fateamur peccaſſe hominem, & ſupplicium meruiſſe: quis, obſecro, eum tibi puniendum, cruciandumque tradiderat? quis te ejus delicti vindicem, & carnificem fecerat? Nonne igitur Deus ſervum ſuum, in ſuo regno, a ſuo ſervo, per invidiam circumventum, diuque detentum, jure optimo ex ejus manibus eripere poterat? immo vero, etiam debebat? Quod quidem ſi feciſſet, quis poſſet aut de eo jure conqueri, aut eum injuſtum appellare? Noluit tamen juſ ſuum in ſuos, ut poterat, exercere juſtiſſimus Deus: ſed officii plurimum apud ſe remanere placuit: & quem ſibi ſuo jure vindicare poterat, cum redimere precio perſoluto maluit.

Quam vero mirabiliter, quam decen-ter, quam cumulate redemit? Ita ut, ne-que



que hominum , neque Angelorum quifquam , non dico explicare , aut fcire , fed ne cogitare quidem tantam divini confilii altitudinem unquam potuerit . Debebat homo pro feipfo fatisfacere ; fed non poterat : poterat Deus ; fed non debebat . Hic attende fummum confilium , inſcrutabile facramentum , incomprehenſibilem divinæ Providentiæ rationem : conjunxit utramque naturam Deus ineffabili illo , ac divino nexu atque ita conjunxit , ut quod eſt omnium mirabilium maxime mirabile , una in ambabus perſona conſiſteret ; & quod impoſſibile videbatur , unus , atque idem pro univerſo humano genere fatisfacere & deberet , & poſſet . Quid , quod eiſdem rationibus , quibus delictum admiſſum fuerat , ne qua juſtitia pars deeſſet , ſatisfecit ? Primus enim parens inobedientia , atque elatione deliquerat , Chriſtus obedientia , atque humilitate expiavit : ibi mulier perditioni initium ; hic mulier initium redemptioni dedit : illa peccato divinas execrationes ; hæc innocentia divinas pollicitationes , ſive ( ut vulgo dicere ſolemus ) benedictiones meruit : illa ſerpentis voce decepta eſt ; hæc Angeli voce concepit : illa denique virum nocentem fecit ; hæc Filium peperit innocentem . Adam porro comedendo peccavit ; Chriſtus jejunando peccata delevit :

ille per lethiferum interdictæ arboris lignum a serpente superatus est ; hic per salutare sibi oblatae Crucis lignum , serpentem acerrimum humani generis hostem superavit . Quid plura ? ille sibi , & posteris sua morte mortem attulit ; hic & mortuos , & morituros omnes , unica sua morte liberavit ; atque ita liberavit , ut æternam omnibus vitam , beatitudinemque conferret . Quid obsecro , in hac redemptione justius ab ipso etiam Diabolo aut peti , aut desiderari posset ? Quid si ipse pro tribunali sederet , aliud vel ab homine , vel a Deo ipso postulare auderet ? Verum hæc nobis , BEATISSIME PATER , profecit , nobis , inquam , hæc est collata justitia : nos , quum hæc ageret , Salvator adspiciebat : nos erudiebat : nos ad suam imitandam justitiam , provocabat . Quum enim ipse talem se in redimendo humano genere , etiam adversus hostem , ac servum suum diabolum , exhiberet ; qualis tu , ceterique Pastores , in hoc grege servando , atque alendo , esse debeatis , præscribebat . Sed de justitia satis est dictum .

Venio nunc ad Charitatem , qua ipse non modo mortales ; ut in virtutibus aliis , sed quod incredibile dictu est , & ipsam charitatem superavit . Quanvis enim eam hominibus , ipso suo adventu , ita ostendisset ,

ut

ut nulla major ei veniendi causâ videretur extitisse ; quanvis eam in universo vitæ cursu ita omnibus declarasset , ut nemo ejus expers , atque immunis esset ; eam tamen hodierno die , tantis , tamque illustribus argumentis patefecit , ut quæ antea fecerat , omnia nulla fuisse posses existimare . Quale enim obsecro , aut quantæ charitatis fuit , quod in suprema illa mysticâ coena Corpus , & Sanguinem suum , novo quodam . & infallibili instituto , discipulis omnibus impertivit ? atque ita impertivit , ut ad posteros quoque omnes , incredibilis illa suæ divinitatis diffusio , & communicatio propagaretur ? Magnum quidem fuerat , magnæque bonitatis , & charitatis argumentum , hominem sibi similem creare , creato universa subicere : majus ; captum , venundatumque redimere : maximum ; ejus gratia mortem subire . Se vero singulis totum quotidie tractandum , vescendum , immolandumque tradere , quo tandem charitatis gradu statuas ? quantæ magnitudinis esse dicam ? Desunt , BEATISSIME PATER , tantæ rei explicandæ accomodata vocabula : desunt ad ea excogitanda humani vires ingenii : vincitur sermo rei magnitudine : quicquid de ea vel dici lingua , vel mente comprehendi potest , multo re ipsa minus , atque inferius est . Quanquam autem in.

hac virtute , multa præclara , atque admirabilia sunt : quæ ego tum quia tibi nota esse arbitror , tum quia ad cetera propero , ne te diutius detineam , consulto relinquo : illud tamen silentio præterire non possum , quod Salvator proditorem suum , quem & antea noverat , & aliis indicaverat , ut a scelere revocaret , eodem , quo ceteros suæ divinitatis munere impertivit : moxque ad se cum militibus , ut osculo proderet , venientem , non modo non est averfatus , sed blandis quoque vocibus appellavit , & benigna fronte suscepit . O novam , inauditamque charitatem : o ingentem humanæ salutis ardorem : quis hoc factum unquam post hominum memoriam aut audivit , aut legit ? quis fieri ab homine posse existimavit ? Proditurum sciebat , & convivam esse patiebatur : invisum se illi noverat ; & ei se ultro ingerebat : videbat prodentem ; & amicum appellabat . Tu vero , iniquissime , ac perfidissime Juda , tam multis , tam claris ejus in te amoris signis , argumentisque perspectis , quo tandem animo rem tantam aggredi , tantum scelus concipere , tam impium facinus audere , tam dirum nefas perpetrare potuisti ? Num tui officii , cum hæc faceres , memor eras ? num tuæ vitæ , salutique prospiciebas ? num ejus in te benevolentia , meritorumque memineras ? Sed ,  
ut

ut tunc illo Collegio , ita nunc hoc Pontifice, hoc Senatu indignus es . Redeo igitur ad Salvatorem: cujus quidem dum singulas ab eo res hodierno die gestas contemplor , nihil invenio , in quo non ejus charitas singularis eluceat . Quæritur a militibus , & seipsum indicat: inventus iterum quæritur , & iterum quærentes se docet : prostratos erigit : incitat trepidantes : capientes hortatur : curat vulneratos : discipulos a sui defensione prohibet . Ductus vero ad Pontificem , & labentem Petrum confirmat , & verberantem Ministrum coarguit ; & quis ipse sit , intrepide confitetur . Quæ quidem omnia ab uno , eodemque charitatis fonte procurrunt ; ab incredibilem nostri liberandi ardore proficiscuntur . Sed singula prosequi oratione non possum : extrema tamen illa , quæ in Cruce positus gessit , tacere non valeo . Pendebat in Cruce , manibus , pedibusque confixis , omnium naturarum conditor , omnium seculorum Princeps , omnium mortalium salus : utrinque latronibus stipatus erat . Hinc eum Scribæ , & Pharisei maledictis , & conviciis insectabantur : hinc vulgus ei dira imprecabatur : inde milites ei certatim illudebant . Inter hæc ludibria, inter hos cruciatus , quæ vox ejus audiebatur ? sitio . Quæ , inquam , vox ejus audiebatur ? Pater , ignosce illis , quia

nesciunt, quid faciunt . Quid tibi , obsecro, istæ voces volunt ? quid hi clamores , BEATISSIME PATER , significant ? In Cruce pendet ; & de siti cogitat : vix animam tenet ; & potum affectat ; de morte certissimus est , & vitam sustentare desiderat . Profecto non hoc sitit , non hoc affectat , non hoc desiderat . Quid igitur sitis , fons inexhauste , qui Te universam omnium sitim , tua illa perenni , & in vitam æternam scaturiente lympa , in perpetuum extincturum es pollicitus ? Nostram profecto salutem sitis : nostram redemptionem affectas : nostram reconciliationem incredibili ardore desideras . Altera vero vox illa , quæ veniam hostibus implorat , quantæ , obsecro , charitatis est ? Magnum est profecto , inimicum non odisse : multo majus , amare : quid , beneficiis prosequi ? Hoc qui faciat , non ego hunc summis viris comparo , sed simillimum Deo judico . Postremo vero , dulcissima illa Matris , & Discipuli commendatio , quam vehementem , quam castum in utrumque amorem indicat ? exhalabat animam , & Matris , ac Discipuli curam non remittebat : seipsum non curabat , & de suis sollicitus erat . O inauditam pietatem : o charitatem incredibilem , vereque divinam : o rem omnibus filiis , omnibus amicis imitandam . Nullum officii genus Salvator no-

ster

ter in quemquam prætermisit : nullum in omnes perfectæ charitatis indicium non exhibuit : adeo ut alteri e latronibus veniam postulanti, in extremo spiritu positus, beatitudinem largiretur . Quid hoc majus ? quid admirabilius cogitari potest ? ut eum , qui vitam in sceleribus consumpsisset , ibique ad ejus ignominiam esset collocatus , orantem exaudiret ? se commendantem susciperet ? veniam postulantem, non modo venia , sed gloria quoque , & immortalitate dignum judicaret ? Hæc Salvatoris nostri charitas est, BEATISSIME PATER, hæc ejus institutio, nobis , non modo plurimis , & clarissimis , ut vides , exemplis , sed præceptis quoque frequentissimis , atque arctissimis , commendata . Hanc nos, si Christi memores , si imitatores, si denique Christiani esse volumus , & inter nos fidelissime retinere , & usque ad inimicos extendere , ac propagare debemus .

Sequitur Humilitas , virtutum omnium præstantissima , Christianis hominibus maxime propria , veteribus pene ignota . Eam enim Christus non modo vivens , ac moriens & servavit , & docuit , verum etiam nascens ex Materno utero secum attulit . Ante omnia enim divinæ naturæ sublimitatem , usque ad humanæ facis abjectionem depresso ; quantæ , obsecro , humilitatis fuit

fuit? quis potest hoc verbis prosequi? quis mente, aut cogitatione concipere? Venturus porro ad homines homo, virginem quidem, sed humilem, seni pauperi desponsam Matrem deligit. Nascitur Rex omnium seculorum non in Regia aliqua, vel civitate, vel domo, sed in humili, obscuroque oppidulo; in sordido, atque immundo jumentorum stabulo. Excipitur non ab ingenti servorum multitudine, in auro & purpura, sed a sola Matre, in fœno, vilique palliolo. Omitto infantiam ejus, & pueritiam in fuga, exilio, & trepidatione transactam. Taceo adolescentiam parentum inopiæ, imperioque subjectam. Non explico reliquam vitam, in summa paupertate, sine servis, sine domo, sine pecunia, nunc in navi, nunc in solitudine, tum inter pisces, tum inter publicanos, & infames homines, magna ex parte traductam. Prætereo de industria labores, contumelias, jurgia, ludibria, & innumerabilia pene vitæ pericula: quæ mortalibus erudendis perpeßus est. Passionem enim nunc ejus, non vitam narro: neque volo te, Beatissime Pater, nostra diutius Oratione detinere: venio ad ea, quæ nostræ institutionis propria sunt. Moriturus Dei Filius pro mortalium omnium salute, non humillimum, obscurissimumque oppidulum, ut

na-



nascens, sed illustrissimam totius Judææ civitatem, in medio pene terrarum constitutam; toto orbe notissimam, clarissimamque delegit: ut quos ejus ortus latuerat, obitus saltem non lateret. Num suam, suorumque, quum id faceret, infamiam timuit? immo vero appetiit. Num de eorum quos ad se converterat, fide, aut constantia, dubitavit? immo, ita demum confirmari arbitratus est. Quo vero pacto Hierosolymam moriturus intravit? quasi ad triumphum, non ad mortem accederet. Intuere, quæso, BEATISSIME PATER, atque oculis subijce triumphantis Salvatoris ingressum. Insidet non albis quadrigis, auro, purpureave constratis, sed vilissimæ asinæ brevi discipulorum pallio velatæ. Præcedunt eum non senatorius, atque equester ordo, imperatorem collaudans, sed innocens puerorum turba Hosanna clamantium. Subsequitur non armatus exercitus, sed imbellis mulierum, discipulorumque multitudo. Hic est nostri Imperatoris ingressus: hæc pompa triumphantis. Quid Cœna illa Paschalis? quam parca? quam moderata? quam humilis? quid illa post Cœnam pedum lotio? quantam nunc etiam audientibus admirationem affert? surgit a cœna Deus occultus, homo manifestus: humilitate, & majestate pari: deponit pallium:

lium: linteo præcingitur: aquam poscit: ad singulorum se discipulorum pedes submittit: lavat singulos diligenter, inter quos etiam a proditore non abstinet. O inauditam omnibus seculis humilitatem: o virtutem mortalibus antea prorsus ignotam: o rem admirandam omnibus, paucis imitabilem. Quis hoc regum? quis principum? immo, quis mortalium omnium, ante id tempus aut facere, aut cogitare unquam potuit? Expressere animus verbis admirationem tantam non potest: non potest tantam humilitatem lingua mortalis explicare. Sed dum in his hæreo, quasi hæc maxima sint, majora non video. Quid enim lotos discipulorum pedes commemoro? Vide, quæso, BEATISSIME PATER, eum se ad osculum usque proditoris inclinantem: vide, eum se hostibus capiendum, ligandum, irridendumque ultro permittentem: vis videre quam ultro? Prostratos ab eo unica voce tot armatos milites, atque ab eodem erectos, confirmatosque considera. Vide, inquam, quam submisso pontifici maximo, sacerdotibusque respondeat? quam humiliter cum prætore colloquatur? quam serviliter inter milites commoretur? Quæ quidem omnia, ne temerer, consulto prætereo. Illud, quod humilitatis caput est, præterire nullo modo

DE PASSIONE DOMINI. 333

do possum : quam abjectum , quam ignominiosum , quam vile pro mortalibus mortis genus elegerit ? Crux olim fugitivis tantum , & servis , aut furibus , & latronibus parabatur : at hanc potissimum humani generis Redemptor , omnis humilitatis auctor , ne quisquam eam in posterum horreret , assumpsit ; atque ita assumpsit , ut nullum in ea probrum , nullam ignominiam , nullum dedecoris , aut ludibrii genus declinaret . Pendebat sublimis in altissima Cruce , Dei Filius , cœli , terræque Parens , ac Dominus omnium seculorum , ac gentium Rex , & Princeps sempiternus : Pendebat , inquam , in celeberrimo terrarum emporio , in clarissima Judææ civitate , in editissimo Calvariæ vertice , ubi de damnatis supplicium sumi mos erat . Pendebat vero , inter duos latrones constitutus , spectante Matre , suisque omnibus , spectante ingenti judæorum , ceterarumque gentium , quæ eo convenerant , multitudine . Ne quid vero ad ignominiae cumulum , humilitatisque deesset , maxime solemnî totius anni die imminente , Cruci affigi voluit . Quid , obsecro , humilior ? quid ignominiosius excogitari potuit ? Ut nos & ab æterna servitute liberaret ; & Deo subiectos , nostræ salutis gratia , redderet ; servilem , atque abjectam mortem

libertatis auctor subire non dubitavit? O mira, o incredibilis Salvatoris mansuetudo: O Divina, ineffabilisque benignitas, ut ex servis liberos, ac beatos faceret; Deus, & servus, & miser effici non dubitavit. Hæc est illa humilitas, quam ipse nobis in Evangelio tam sæpe commendat, quam suo exemplo tantopere discendam nobis, imitandamque proponit. Hæc est, quæ & Deum e Cœlo advexit in terram, & hominem e terra in cœlum evectura est. Sed de humilitate satis.

Huic conjuncta Patientia est, quæ una ex iis, quas proposuimus, virtutibus reliqua est. De qua quidem, quoniam multa jam, quum de humilitate ageremus, sunt dicta, & ego ad finem propero (video enim me jampridem abuti benignitate tua, BEATISSIME PATER), quædam, quæ ejus virtutis propria sunt, paucis absolvam. Nam, ut omittam, quam multa in tota vita omnis generis incommoda, probra, pericula, & quam patienter Salvator pertulerit; qualem se, quum a militibus caperetur, quum ad sacerdotum Principem duceretur, quum ab illo interrogaretur, exhibuit? quam multis eum contumeliis, jurgiis, ludibriis, ab inimica, atque invida, & odium explere cupiente multitudine affectum fuisse existimas? Videre videor crudelissimos homi-

DE PASSIONE DOMINI. 335

mines , omnem feritatis , atque insanix vim , in unum certatim effundentes . Alii enim eum rapere : alii post tergum ligare manus : alii vultum colaphis cedere : alii pectus , ac renes verberare : hi hominem sputis foedare : illi jurgiis , ac maledictis insectari : ipse tamen omnia patientissime perferre , ac pati . Pro nefas , ubi mansuetudo ? ubi ratio ? ubi lex , ubi ordo naturæ ? capitur invisibilis , tenetur impalpabilis , ligatur incomprehensibilis , trahitur immutabilis : & qui nullam vim sentire potest , ab omnibus passim verberatur , conspuitur , ceditur : & tamen nullam in quemquam vocem emittit : immo omnia non modo patientissime nostra causa , verumetiam libentissime tolerat . Verum hæc parva admodum , & exigua sunt . Quid , quum prætorianis militibus traditus , atque in prætorium ductus est ? quam multa , bone Deus , quam indigna , quam nefaria perpeffus est ? Propone tibi ante oculos , obsecro , BEATISSIME PATER , Deum ipsum , mundi Auctorem , totius naturæ Parentem , hominum Creatorem , Salvatorem , Redemptorem , ab iis ipsis , quos creaverat , quos redempturus venerat , captum , vinctum , accusatum , damnatum , irrisum , consputum , verberatum : propone tibi , inquam , Regem seculorum , cœli , terræque Principem ,  
fu-

futurorum bonorum Pontificem , tabernaculum non manu factum , inter sceleratissimos milites constitutum , spinis coronatum , coccino indutum , ab aliis per ludibrium regem salutatum , ab aliis pulsatum arundine , ab aliis omni maledictorum genere laceffitum , omnibus denique injuriis , contumeliisque expositum , omnia tamen æquissime , ac mansuetissime tolerantem . Sed parum dico , quum Deum ab hominibus hæc omnia perpeßum esse dico . Non est tantis injuriis expleta crudelitas : non est impietas satiata : immo nonnisi hausto demum divino Sanguine satiari potest . Nudatur ergo decorum Christi Corpus ; & membra etiam Angelis verenda coram , sceleratissimis hominibus deteguntur . Ligatur ad columnam mansuetissimus Agnus ; atque a validissimis , crudelissimisque militibus diu , omni ex parte , virgis durissimis cæditur . Pro dolor , cædebatur virgis in medio Hierosolymæ foro a sceleratissimis hominibus , innumerabili spectante multitudine , Salvator Mundi : & tamen nulla , inter crepitus , doloremque plagarum , ejus omnino vox audiebatur . O invictam patientiam : o mansuetudinem incredibilem : Ego quidem eam quibus verbis exprimam non reperio . An nondum tua , judæe impie , satiata crudelitas est ? Ego quidem ,  
hæc

hæc sine multis lacrymis referre non possum: tu ea siccis oculis spectare potuisti? ego hæc ore pronuntians ingenti pudore afficior: tu, quum ea tuis manibus perpetrares, non erubuisti? Sed quid eos non erubuisse, aut non commotos esse conqueror? utinam, utinam iis cruciatibus eorum contenta fuisset impietas: utinam se his crudelitatis finibus eorum sævitia continuisset. Verum, nonnisi visa demum nece, novit feritas insana consistere: nonnisi ad inter necionem sæviam, potest odium crudele fieri. Quid igitur tibi ultra petendum? quid faciendum restat impietas? Crucifigatur, crucifigatur, inquit. O vox impia: o perversa voluntas: o feritas inexplebilis. Facinus est vincere Deum: scelus, ludibriis afficere: parricidium, virgis cedere: quid dicam, in Crucem tollere? Verbum satis dignum, quo tam nefariam rem appellem, BEATISSIME PATER, non reperio. Tollitur igitur in Crucem, plagis innumeris affectus, & cruorem toto corpore manans patientissimus Jesus: manus, pedesque vix reliquo corpori præ multitudine plagarum hærentes, clavis durissimis confodiuntur: hiat undique vulneribus: totus doloribus, & cruciatibus deficit: & tamen iis omnibus judæorum impietas adhuc contenta non est: insultat etiam confixo: ma-

ledictis, & amarissimis verbis illudit: Alios, inquit, salvos fecit, seipsum non potest saluum facere. Lacrymas quum cæderetur, paulo ante non tenebamus: quid nunc quum Cruci affixum cernimus, facere tandem debemus? Si hæc non ad Pontificem clementissimum, non ad religiosissimum Senatuum, non ad Christianos fidelissimos; denique si non ad homines, sed ad bestias; & ut longius progrediar, si hæc non Romæ, sed in aliqua deserta solitudine, ad saxa, & scopulos loqui, & deplorare vellem, nonne & muta, & inanimata omnia, tanta, ac tam indigna rerum atrocitate commoverentur?

Quali igitur nos in Salvatorem nostrum animo esse debemus? Propone tibi nunc, BEATISSIME PATER, immensum, clavorum manus, ac pedes trajicientium, dolorem: propone pendentis cruciatum: imaginem confixi parumper intueri. Erat inter latrones medius, in altissima Cruce confixus Dei Filius: hinc a Matre, & a discipulis deflebatur: inde a sacerdotibus, & scribis lacerabatur: milites eum potus amaritudine cruciabant: latro vocibus insectabatur: inscriptio ludibrium, doloremque augebat: vulgus de eo varie loquebatur: Inter hos dolores, inter hæc tormenta, quænam, obsecro, voces illius erant?

Num



Num quemquam accusavit? num coarguit? num ea se inique ferre, num illis iratum esse ostendit? minime. Quid ergo ait? Pater ignosce illis: quia nesciunt, quid faciunt. O vox summæ patientiæ, summæ clementiæ, summæ mansuetudinis: quum innocentissimus sis, Te a scelestissimis hominibus, contra jus, fasque omne comprehendi, vinciri, accusari, damnari, corripiri, cædi, atque in Crucem agi, permittis. Tu vero hæc omnia non modo patientissime toleras, verumetiam, ut ea illis condonentur, affectas. Illi te accusant; tu eos excusas: illi damnant; Tu conaris absolvere: illi execrantur; Tu bene precaris: illi tibi necem inferunt; Tu pro eorum vita Patri supplicas. Quid obsecro, ad hanc mansuetudinem, ad hanc Patientiam addi potest? immo quibus hæc verbis non dico extolli, sed æquari, aut pronuntiari satis queunt? Nullus eloquentiæ fluvius, nulla vis dicendi, nulla humana vox, nulla mortalis lingua hæc consequi unquam posset. Ubi mare illud eloquentiæ Tullianæ? ubi terrens fluvius Demosthenis? Nunc profecto muti essetis ambo, & vestra lingua torpesceret. Qua vero de causâ tot dolores, tot cruciatus, tam indignam necem, ille, qui tam innocens est Deus, ut pateretur, adductus est? Nostra profecto caus-

sa, nostra inquam causa, BEATISSIME PATER, ut hæc omnia pateretur, adductus est. Nostra scelera, nostra flagitia eum in Crucem egerunt: nos omnium dolorum, omnium cruciatuum illi auctores sumus: nobis comprehensus, nobis accusatus, nobis damnatus, nobis casus, nobis denique in Crucem actus est. Quid vero a nobis exigit, BEATISSIME PATER? nisi id, quod nobis maxime expedit; quod nos ultro illi offerre deberemus: ut sobrie, caste, & pie vivamus: ut fidem, justitiamque servemus: ut ejus & præcepta fideliter retineamus, & exempla constanter imitemur. Quæ quidem omnia, si volumus, neque nos ipsos valde amamus, & facillima nobis, & commodissima sunt.

Obediamus igitur, BEATISSIME PATER, Deo, nobis tam juste, tam benigne, tam utiliter imperanti, Tam multa pro nobis, & tam patienter tolerantem, quoad possumus, imitemur. Servemus in proximos, atque aequales, quam ipse non dubitavit in servum, atque hostem servare justitiam. Charitatem, quam ipse usque ad inimicos extendit, omnibus veram, sinceramque exhibeamus. Neque pudeat nos, quum homines simus, hominibus ministrare, quando etiam Deus ipse hominibus ministravit. Nec obsecro, pauperes, atque humilis fortunæ homines fastidiamus; quum Salvator ipse

DE PASSIONE DOMINI. 341

ipse & pauperrimus, & humillimus semper fuerit. Remittamus adversariis nostris injurias; quum sciamus, illum pro inimicis, atque interfectores supplicasse. Quæcumque denique acciderint adversa æquo animo toleremus, quum illum tam multa. tamque indigna, nostra causa, perpeßum esse meminerimus. Quæ quidem omnia, si nos, ut debemus, & possumus, præstiterimus; & Christus suæ Passionis amplissimam gloriam, & nos nostræ imitationis fructum uberrimum, & cumulatissimum reportabimus.

*F I N I S.*

2.5.8.58.



5.8.55

















